

中華文史叢書之九十  
清·光緒刊本影印  
王有立主編

# 八旗文經

(三)

楊鍾義撰

華文書局股份有限公司印行

八旗文經卷第三十八

記丙

鮑鈺俊逸亭記

鮑鈺前度軒記

顧琮靜廉堂記

趙宏恩朱文公關里廟記

常安游臥龍山記

常安來牛石城記

常安 盛京風俗記

常安游西山記

常安堂子山藥師院記

常安下河水利記



常安游蜀山湖記

常安游東磊記

耿鱗奇陡河海陽隄記

俊逸亭記

鮑鈐

長興縣治聽事之東有軒三楹庭際花木交蔭余取韓退之  
守縣坐深樾句名以坐樾軒東側一庖屋縱廣方丈暗陋不  
可以居人余乃撤其瓦易其采鋪甃平之以爲臺曰博山臺  
臺側有小山藉其勢貼石以疊磴道曰兼山磴復穴臺山兩  
堵東達乎劉郎泊之南溪曰鑿坏洞闢地數弓縛條樹援闌  
入而亭之曰俊逸亭臺言形磴言勢洞言體亭言望各名其  
所當然而亭則惟吾得有故特記主之亭製六合位函一筵

上覆草茅以崇儉下聯埤垸以承坐櫺栢不雕以尙質闌楯不設以省工環楹植花周礮嵌石因陋就簡程度惟意攷工之成兩泐其辰庀材之費不盈一鎰不耗民力不廢曹事于以籌畫政理會計租課究習律令捫判文牘省身退思宴息全性茲焉是託其或春秋佳日齋居休暇風庚露蟀灼月繁香觸手一編神來得句憑襟挂頰資益實多昔唐陽翟令陳寬作穎亭記云匠氏退有後言以當敏樹政無敏樹亭爲勸誠今余不德再叨爲茲邑長雖主未聞惠人未蒙仁然教令之出民皆安之祿食七載而亭始營且方捐哀俸錢重建縣樓成因其餘材不煩特構非如所云遽以麻覽爲懷者吾知其可塞匠氏之意矣

前度軒記

鮑鈺

余以康熙乙未銓授長興令履任三載被劾解去例以原缺補用需次京國者十有四年雍正辛亥復除茲邑廨舍東北隅舊有池池南老屋三楹余取劉賓客元都觀詩語命屋曰前度軒因命池曰劉郎泊蓋不過一時感歎宦迹云爾實未遑經理也乾隆丁巳政粗有成稍尋游憩之所始于軒西築俊逸亭越明年戊午端月鎖印無事步至軒中見其垣泥剝不整梁塵黯以積荒涼蕭瑟之狀直與村舍相似乃命瓦師略加潤飾大書題榜揭于梁閒萃盆花盜草以充之具法酒眞茶以落之賓朋契集憑欄倚檻若不知人事之有夏屋幃幪也顧池心故亭基豐草披拂翦如浮嶼所嘗目爲宛宛邱者亟呼蘿氏蘇之列植緋桃數株於其上復命撩淺卒浚池

而深之遂造一小舟襄之日萍牀迴環汎與軒相望凡禽魚竹樹無一非軒之助無一不倚重于軒也而軒則發迹于余余允得爲軒之主憶自辛亥迄今閱歲又入境內歲與民俱無恙故得委蛇退食無負初心雖謝巧宦之謀抑亦拙宦之效矣用是懸敘其事爲之記

靜廉堂記

顧琮

雍正癸丑仲秋余奉命督理直隸河務方蒞任卽巡視河防未遑居處至冬十有一月望後四日歸天津使院越三日友人傅文孫至自京攜朱子所書靜廉二字石刻贈予余因以名堂夫靜與廉本乎性亦成於學者也靜者格物之源神凝而後幾可研所以能慮也廉者守身之要內澹而後外可

潔所以不撓也石刻在鎮邑學宮歲久流落民間士人張某得之移置其家而此刻復顯余生後朱子數百年得其書而額諸室如日侍先賢之側心常有警焉是以記之

朱文公闕里廟記

趙宏恩

婺源之有朱子猶鄒之有孟子曲阜之有孔子也自古至聖大賢其風教所被瞻嚮之誠卽窮海內外日月霜露之所及無有遐邇如奉函丈而尤必重其里居鄉邑故孟子敘道統而亦以近聖人之居爲幸豈非以天地靈異所鍾而神明所憑哉今天下於朱子仕宦流寓講學之地無不崇廟貌祀春秋則婺源之廟宜尤巍煥異於他所自雍正二年燬於火於是兩江督撫大臣胥用悚懼而余以十一年冬奉命蒞茲

任彙檄所司鳩工庀材毋怠毋率而布政使司李蘭鹽運司尹會一殫力經畫斥羨帑倡捐輸委吏董役虔肅將事自雍正十一年工興迄今歲三月告竣請予爲文以紀之世嘗謂三代而上道統與治統合自孔孟後道統寄於師儒遂與治統分余謂不然道統之寄不遇聖帝明王亦無以別正宗而昭一是是豈不繫乎其治哉有宋周程張朱五夫子續千聖之道統於既墜一洗漢唐以來淺儒俗學其爲聖門功臣當無所軒輊其以公爲集諸儒之大成雖昔賢有言之者而歷朝典禮班於諸儒於公未有所隆異我

聖祖仁皇帝以天縱之資契執中之傳編纂全書冠以

御製序文特命從祀進公位次於十哲之後以示褒崇於是天下士大夫求聖賢之道者知必由公之教始無歧誤如

入室之戶涉川之舟楫也蓋自公之生迄今五百餘年而其道始大著是豈不繫乎其治哉余博觀諸儒之書求聖人之道二十餘年略有窺測歎宋儒皆學孔子之學而能具體孔子者斷推公一人蓋公之窮理致知一孔子之博文也主敬存誠一孔子之約禮也反躬實踐一孔子之下學也一生所注釋考訂之書幾萬卷而未嘗自爲一書一孔子之述而不作也微公則周張二程之學不著卽孔子之道亦從而晦噫嘻盛矣宋熙寧元豐間聖學久蕪學者溺於文詞錮於功利重以王氏之學誣經叛道簧惑其閒聞周張程子之說信者十一而誦毀詆謫者蠡起迨南渡後風流彌遠非公爲之揚其風而暢其義後之人誰復知周張二程之書而又何由知孔子之道哉夫孔子之道不外六經四書此生人之命脈國

之治亂人心之存亡係焉不得其言不明其道自公研窮闡發而後由孔子而上溯於堯舜禹湯文武周公由孔子而下及於顏曾思孟靡不揭其心源以詔示萬世炳炳乎如日月之經天江河之緯地蓋其精神氣力實足以肩荷古今宇宙之大業而視若欲然故河汾薛氏謂朱子之功不在孟子下也堯舜之道得孔子而益彰周張二程之道詎非得公而益彰也邪余以譎薄遭逢

聖主累膺重任恆隕越是懼猶以讀公之書竊公一二緒言勉勉於立誠主敬爲當官治躬之則以冀倖寡過使公生於今日必得大用以上佐

聖天子唐虞之治顧不幸而際宋季與時齟齬不得一行其志以老每讀宋史爲之慨然然孔孟之生皆未得一遇於公



又何歎焉而從此億千萬年孔子之道悠久不息公之教亦  
歷久而彌芳公之教列於千秋孔子之道愈光昌于萬古余  
茲以公與孔孟並舉豈諛也哉因志重修歲月而敬述其私  
淑之誠俾勒之石

游臥龍山記

常安

按察聽政之堂北有臥龍山山隈建諸葛武侯祠祠之左右  
砌以石磴夾以危嶠高數百丈餘或起或伏有蜿蜒狀故以  
臥龍名登其巔地忽平坦約有二畝餘名諸葛臺四圍甃以  
磚石厚且堅高三尺許所以便游人之憑眺也臺畔有碑知  
爲隆慶中征蠻將軍俞大猷所樹讀其文以先生躬耕南陽  
時人以伏龍稱故名其居之岡曰臥龍邦人以其名之相合

構祠以祀之是先生之祠因山而名而峰頭之臺則又因祠而名也歟戊申冬余觀察西粵登堂北望危欄飛閣碧檻朱軒層見疊出於寒松古樾煙鬱杳藹閒宛然若古圖畫所布置余心竊慕焉然而案牘紛紜無暇登覽也久始卜日躡磴而上謁像再拜以伸仰止之思起而憑高寄眺萬象在目歷歷然可數不可盡也是日也陰雲凍合木石蕭疏朔風怒號野鳥鳴悲不覺淒然有鄉國之思故未果前而中止焉春來余有采薪之憂風雨浹旬無虛日至二月而天朗氣清方思一續前游商之周子又彌陳子文園朱子曼若倪子載菴皆欣然有同志遂各振衣而前攀蘿而上據石趺坐而望之見夫峯然聳於前者秀山也巋然擁於後者桂嶺也森森然列於右者寶髻也其下爲都會周遭或官署或民廛仙宮佛院

臺宇鱗列萬戶千門市井紛錯再望寶髻之上晴嵐霧靄變態無窮奇幻盈眸不可名狀左顧瀛江一帶浩浩乎迴繞天際於煙波渺茫中舟小如一葉相錯往來飛鳥千點落霞一片氣象萬千使人應接不暇余與諸同人願而樂之斯游也友不過五人時未及終日憇息坐頑石飲啜止苦茗豈若七賢鄴下三月蘭亭爲一時勝事作千秋之佳話哉雖然憶昔晉陽相聚時沈子蒼符俞子泗集周子文元陸子稼山風雨聯牀或登眺游覽或飲酒賦詩至今計之蓋已十有五年矣風流雲散邈若山河幸有周子日夕左右每一談及恍如復晤於花晨月夕之下再踐乎名山大川之中儼然見其灑墨濡毫歡欣歌詠之態至其磊磊落落不衫不履爾我相忘無不歷歷仍在目前則今昔離合之感未嘗不少爲之一慰然

則斯游也有賓主之歡有山水之適一轉瞬間且更有異鄉邂逅歡愁離合之不同儻十數年後諸君幸不我遐更訂同事乎一方則將來回憶今日之游不又重可念邪

來牛石城記

常安

都江古州之經流也由諸葛營而西爲上江其源出都勻獨山州由諸葛營而東爲下江其流通粵之柳州夾江盡苗藪也下江多崗苗上江多山苗而山苗尤悍上江山重箐密地極險阻雍正七年勦撫叛服不常亦上江爲甚底定後議置營汛於上江設一協鎮轄兵二千二百名駢水陸扼要之區日來牛辛亥撤師題建土城予聞其地土疏易圯土城恐不足資扞蔽癸丑春以改建石城入告蒙俞旨允行爰飭

新設通判鄧瀾董其事且諭之曰苗新嚮化慎勿以鼙鼓滋擾而附近居民苦苗蹂藉凋殘之餘不堪重役務厚其值以徠傭者庶工成速而苗與民皆無傷甲寅春二月工竣計高一丈女牆高四尺下廣八尺上六尺周圍六百三十九丈有奇城門四東曰陽和西曰慶和南曰薰和北曰化和於是都勻之父老子弟忻忻然來告曰來牛石城成矣官兵永駐於此以控制諸苗而今而後誰復敢入我村落掠我子女牛羊者乎誰復敢張毒機奮長矛伺我於林莽奪我財而戕我命乎人安枕席出履康莊吾儕小人何其幸哉且崇墉屹屹不特爲吾一方萬年之利卽遠近鄰邑皆可恃爲犄角以無恐茲城之功不其偉乎曷可忘其所自始也請記之余因思來牛爲上江扼要之區向無城垣故崇山湍水皆爲苗險今石

城既成天造之山爲我屏障激蕩之水爲我塹壕由是上江固而下江亦固下江固而丹江清江靡不固

聖天子南顧之憂不藉是少摠乎孟子曰地利不如人和傳曰眾志成城是城可恃而尤有可恃者在守其可恃者而更無忽其尤可恃者余能無望於後之君子哉時余有撫江右之命不敢以行速辭遂記之

盛京風俗記

常安

我朝自天聰五年因瀋陽之域創立盛京而興京東京咸統焉西至山海關東南並至海北迄興安土地沃衍川原拱衛靈秀蟠結之區元氣細縕之宅也其風俗純樸有不雕不琢之象焉

聖聖相因誠教之深而養之厚始乎垂髫及乎白首無非含哺鼓腹之朝葛天無懷之樂風氣蒸蒸乎上矣婚聘不責財各隨所有豐者不以市德儉而荆布不相誚也遭喪孝子哀痛特甚親賓弔者各有戚容不涉他語其家不及舉火或備粥食強孝子一沾唇諸喪事俱族人代執有移饌以自食者湯飯而已無簋盤之設焉宴會之節父兄對客子弟躬奉杯勺侍立惟謹村僻之地偶有過客必延之家給之饗殮爲之止宿償以直則不受以爲相視之薄也地宜黍菽兼蕃鳥獸農事之暇射獵爲娛所衣所食視其土宜止於充飢渴禦寒暑並不知有遠方珍異之物無厭故喜新之心亦其習然矣市肆之區有無相通交易而退無詐無欺其築室牆不過數尺室家之好可望而知也而一意誠慤不以機械待人故人

亦竟無巧爲窺伺者婦女尤尙貞信各守其職無靚粧麗飾之容翡翠珠璣之好雖親舊之家無故亦不相往來大抵氣質厚重則輕佻不生混沌不鑿則緣飾不起寔質毋華寔樸毋巧寔強勁果毅毋汨沒詭隨用其勇健之習可以厚蓄聚而作干城加以化導之功可以篤倫常而敦禮義殆所謂不識不知順帝之則者乎然則觀長白混同之閒而知比戶可封誠易易矣我國家興王於斯用卜萬年有道之長者於茲不益信哉

游西山記

常安

出阜城門七星至予家墳園其西有蒼翠空濛朝煙夕靄不可名狀者西山也自墳園而右指則一帶之內高者下者呀



言  
而空洞者石之蹲如虎豹樹之走若龍蛇赤若流丹碧如  
染黛俱羅列目前應接不暇自宦游四出以來萬里馳驅朝  
夕不遑而西山之一觴一詠要未嘗不夢寐以之也庚申夏  
承乏卿貳又以職守牽心不獲遽至及秋日乃以赴園林之  
便策馬西行初至龍泉菴有池泉出螭口注池中晝夜無間  
聽其潺湲激蕩之聲居然驚濤倒峽起於檐廡之間左右客  
室二楹因山以構山排列則豎而爲屏山罅隙則竅而爲牖  
天然位置視人工迴別矣盤桓移刻至聖感寺山至此差平  
故舊曰平坡

聖祖仁皇帝易名聖感過此一里許爲寶珠洞洞石黑白分  
明點糝如珠志載夜有珠光照崖者卽此嗣登覺山振衣而  
上四眺皆層巒密樹山盡樹窮得平田原隰鱗次町疇刻鏤

之中遠村如點爨煙欲上而茅茨出矣已而過小溪溪卽桑  
乾河故道也至盧師山寺其秘魔崖爲師晏坐之處聞當日  
二童侍師名曰大青小青歲早爲致雨蓋龍也遺像猶存崖  
下於是且眺且旋就山坡小憩家僮出餅餌食訖獨坐崖邊  
見天高氣清景明風澹塞鴻初到素鳥旅行巖際老松謾謾  
作聲山空人靜與疏鐘相酬荅倚檻而聽則清越者與耳謀  
適者與心會俯仰上下曠如也煙之霏雲之停孰非助吾  
人興趣也哉時隨行奚僮輩於石根競覓草蟲迴憶四十年  
前寺方重建與窗友趙子友倫等踏雪來游四面悉瓊田玉  
砌而嵐影一抹橫空縹緲顧而樂之趙子曰吾曹戴高檐帽  
披羊裘褕馳車鞭馬互相指盼得善繪者寫西山雪色豈不  
居然圖畫中人哉予笑曰山林圖畫大抵皆皓首龐眉或跌

坐看雲或獨立聽泉或過小橋尋梅訪友安所得吾曹後生  
小子嬉游佻達之狀耶同人俱爲絕倒今寺仍壯麗而吾則  
老矣一花一樹向所無者或增而置焉欲問舊所撫摩半摧  
爲薪閒有存者古榦虬枝意態迥別至於同游之人凋零已  
盡卽追隨僮僕亦無復舊人獨予成皓首龐眉轉堪入畫耳  
其能無怍怍於中耶嗟乎自有此山以來先吾而游者吾不  
得而見也後吾而游者吾不得而知也卽吾一人之身轉盼  
之頃頓成今昔隙駒易過蹤跡無常獨山靈之面貌不改自  
此而後或更有來游之期而時光意趣又有渺乎不可定者  
矣故備誌此游若爲數十年來償逋願焉是日也山僧期予  
以遲日至山觀紅葉後竟不果

堂子山藥師院記

常安

歲庚申九月奉

天子命決讞於溇山行數日天氣晴爽頗堪登陟凡境僻地幽之區無不搜討冀領略其靈竒有堂于山者在馬蘭營東南巖壑紺閭林木蔥蒨寒露濡英朝霞絢彩紛披掩映之間圖畫不盡乃循覽四麓其連延而迤邐者平原也其岌業而翁蔽者高坂也迴溪鬱盤琮瑋而淡澗者石澗也於峰巖曠衍處得所爲藥師院依山闢寺架石構宇不知創自何代院之東矗浮圖約高五丈名永旺前明萬曆時建碑碣周立摩視則鎮守薊州永平之總兵戚繼光與協守薊州山海關之副總兵張爵及分守薊州馬蘭營之中路參將王通各署名焉院迎三陵予欲仰瞻神宮遂祇宿斯院後聞律有禁

步不得入然於邊牆遠矚覺俯控滄海上接丹崖摩霄漢之  
蒼茫挹煙嵐之縹緲萬壑朝宗羣峰重疊洵虎踞龍盤之勝  
地也於時日將夕羣牧歸西風急而暮山紫北鴈盡而秋葉  
隕撫景流連心胸頓豁夜深不寐月照幃幙如畫因賦紅葉  
詩數章并記住宿一再過之由以當題名云

下河水利記

常安

淮揚皆水鄉也其自運河東岸逶迤以達於海者爲下河下  
河與運河通南至秦州之鹽河東至興化之平望湖大縱湖  
鹽城之東西塘河而江都甘泉高郵寶應諸山阜錯處其中  
九屬支河統數千百而總名曰下河淮揚之地至此卑下極  
矣

聖天子惠澤覃敷不吝帑金 特命重臣董其修治而廷尉汪公副憲德公以碩德宏才上銜 恩命下軫黔黎夙興夜寐風餐水宿諸險遠之地無不目矚而躬履諸艱鉅之任無不心籌而口授勞瘁數年告厥成功維時億萬人僉曰

皇上簡畀名公卿惠我無疆而其總理之方運量之實有非目擊不能知者至是以余督漕淮上聞見親切索余記其事並以河道圖及圖說來余閱之不覺恍然曰是其具成局於胸中集妙算於掌上宜功之成而可以垂不刊也蓋運河之隄高下河十餘丈運河水漲則開涵閘以歸下河且導下河以入海如漁濱涇市黃浦子嬰南關大壩通湖橋等河則由射陽湖入海車邏大壩火燒閘等河則由天妃口石碇口入海淶洋文陵恆子等湖則由丁溪草堰閘入海而歷年既久

運河之水積而日多下河之水去之不速則欲防其泛漲必先定其歸宿欲定其歸宿必先去其阻滯令由運丁至海口如身之使臂臂之使指上下相承血脈通貫而後底定之績可希今兩公之治之也因地制宜不拘一轍而大要有三一曰去淤以通潮汐一曰建閘以時啟閉一曰修隄以固防閑高郵寶應興化泰州其水皆洩之東塘河東塘淤塞則水之在四邑者無所容故浚東塘並浚上岡草堰內外河以疏東塘之下流阜寧有清溝鎮河蘇家黃河一洩黃河一通馬家蕩二河濬則上下通矣山陽之涇河市河寶應之子嬰閘河興化之北官白塗等河泰州之小紀宗村二河皆曲折與海通浚之而諸路悉達矣泰州屬十二場鹽河通州屬十場串場河逐一濬治而鹽艘亦無不可行矣此所謂去淤以通潮

汐者也高郵三壩雖閉而閘有未建則瀦洩無資今並建三閘則水力多分而疏通亦易又建天妃口新閘修白駒草堰丁溪等處舊閘既可導河入海亦可使海不得爲害於河矣移上港草堰二閘於串場河外遠而可禦鹹水矣沙壩閘高於運河底八尺則止去其石版之腐泐洋子橋閘比運河底高一丈四尺則移閘底下三尺量其高低以便吐納所謂建閘以時啟閉者此也秦州通州鹽河外爲范公隄自昔資以捍海而海水漸逼日刷日消坐見庫薄通州所屬拚茶斜角二塲去海近者隄有八千餘丈海潮衝齧勢屬可虞量其形勢傾者築之薄者培之下者高之卽將挑河之土加添修補隄根旣固縱有風潮不足爲患而河道亦永安矣所謂立隄以固防閑者此也至於眾論紛紜有謂河宜深浚者不知一



河過深而眾流將涸也有謂隄宜截斷者不知概爲堵截而  
會歸無自也有謂海口宜開者不知舊日海口原未嘗塞也  
無稽之論烏足動有識者之聽乎河工旣成人民咸安堵以  
居而田疇資以灌溉商賈由以往來魚鹽芟葦因以滋殖水  
之害旣去水之利斯收蓋大臣爲國任事千萬世咸賴之  
豈饒倖於一時以爲功者哉若夫九屬地形高郵寶應興化  
鹽城泰州同居釜底而興化又受四邑之水今一治則無不  
治其享安瀾之福猶之江都甘泉二邑之近山阜也故詳爲  
記之見我  
皇上之加意南邦如此其至而兩公亦能仰副聖眷以相  
與有成淮南之食德豈有旣哉

游蜀山湖記

常安

蜀山一卷石也孤絕湖中湖水環二十餘里因山得名濟御河挽運之涸捐居民灌溉之勞如值泛漲南通馬塲北連馬踏則百里之外皆巨浸矣子舟泊寺前闌乘閒駕小舟以往水清澈如鏡深三五尺荇藻菱芡點綴水面而雲開日晃其半焜燿如錦其半澄泓如練所謂春水綠波者非此溶溶之色耶移時至山山石雄峻作虎踞龍蹲狀無嵌空玲瓏之形色如黑玉建祠於其巔不知昉於何時祠東有魯宗堂堂前觀瀾亭今傾圮惟碑碣存祠外南望遠岫隱隱城堞斜抱其北沙積如山列於運河兩岸其東脊無際涯遠樹迷離沙鳥水鳧與漁舟交雜西則煙村一帶隔水參差而糧艘估航帆檣林立蓋山居湖之西偏也瞻眺未已北風大作波濤洶涌

有觸山啗地之勢既而浩浩茫茫與黃河一色不復見前此之綠波搖漾矣憶予昔過洞庭涉孟津泛彭蠡行黃天蕩變態萬狀驚心駭目今此湖一陂水耳風以鼓之則橫奔怒激苟拂其性則異其常亦安計大小哉譬如人心一爲物所撓拂則氣不能和其感之也遠其應之也疾豈其性哉君子鑒之

游東磊記

常安

宿青峰頂越日詣延福觀由三元宮取道曉雲出谷海霧迷空兩相襍糅鱗鱗然如波浪米襄陽畫墨淋漓尙未能狀此浮浮白也籃輿行雲霧中抵九龍橋探九龍洞出山口五六里雲漸斂復循山東麓行路頗險磳确硤昇卒上下如

貫猿步不及寸踵趾相躡遂舍輿扶掖而行峰層巒疊連屬擁翼秀拔萬狀可驚可愕心目豁然其峰曲如列屏削如立壁或矗如攢劍或銳如植圭琳宮瓊宇輝煌紺碧隱然杳靄閒黃冠迎導逶迤降陟數百磴始抵觀觀左右率大石如案卵每案則三或上一下二或相疊積厯落堆垛土花苔蘚封其隙陸離斑駁雖商周彝器未足比其古茂也嗚呼鴻荒之初孰爲經紀而營腴之眞令人疑造化之有爲也雲臺昔在海中東磊更其陡絕處游人罕有至者余幸至其地爲盡搜其奇而記之或曰山饒桃李春日尤勝花光山色相映發余曰值茲歲寒浮豔全凋眞藏畢露東磊之勝以此也何問桃李之有無哉遂記之

陡河海陽隄記

耿鱗奇

皇上御極之八年予承乏桂守奉有修治靈渠之旨下督撫等會估以聞於時總督鄂公爾泰巡撫金公鉉聚而謀曰陡河之爲利大矣自秦至今農工商旅永是賴焉有修築者代不乏人而迄無百年可久之工豈眞水勢使然哉母亦疏鑿節宣未盡其道也我

皇上念切民依銳志修舉開農田於畿輔濬水利於東南固已捐數萬之金錢爲萬世開樂利粵西炎徼去天萬里不於此時大興修治而惟是補苴罅漏爲目前之計無久遠之圖何以仰承德意乃親爲相度形勢其因前人之舊而加工者則濬其淺寬其狹疏其阻此致功爲易者也惟海陽寺沙州之衝由分水塘奔盪而來電掣雷轟如萬馬奔騰陡河不

能容也遂奔潰橫出決爲新河而舊河盈盈一綫曾不容舸  
矣新河不塞則陡河不治而農商皆病顧欲障新河以還舊  
河非隄岸不可而隄當水衝遏之則水愈激怒愈甚非大爲  
之防不可乃於沙州創立石隄高若干濶若干長若干若長  
虹之緜互而崇墉之屹峙也名之曰海陽隄雖然猶慮其單  
也又築月隄其高廣視內隄使如輔車相依而水得循涯而  
上建瓴而下矣顧春夏水漲立可數十丈無以受之勢將又  
溢則開支河以洩之築壩以攔之河深若干長若干壩之長  
視河夫陡河大非南北河比也而以治南北河者治陡河隄  
防完密蓄洩得宜其有不慶安瀾通舟楫而利桔槔者乎豈  
猶是補苴罅漏緣飾目前而無當於久遠之圖者乎是役也  
惟

聖主惠及遠民計存永利惟憲府心程口畫規制周詳而以  
鱗奇之無能幸得一親承指示黽勉以從不改怠墮茲固  
由經始而觀厥成矣謹拜手以記

八旗文經卷第三十八終

八旗文經卷第三十九

記丁

覺羅雅爾哈善吳縣陶氏義莊記

尹繼善畱松喬少宰樓居圖記

阿桂 聖駕東巡記

阿肅雙節堂記

宗室敦誠拙鵲亭記

宗室敦誠松亭再征記

全德重建儀徵鰲院記

伊湯安重建曝書亭記

鐵保徠寧果木記

鐵保記與止齋司空論藥



吳縣陶氏義莊記

覺羅雅爾哈善

爲政以人心風俗爲本人心之厚風俗之淳以敦宗睦族爲  
本周禮太宰繫邦國之民五曰宗以族得民大司徒安萬民  
三曰聯兄弟是道也盛世由之具見前載乾隆十五年予巡  
撫江蘇吳縣候選員外郎陶篠置常稔田千畝營守舍三十  
餘楹爲義莊以贍族之貧者予聞而義之冬十二月具疏入  
告明年四月奉 旨依部議照原銜卽用以示獎勵 命下  
之日震宇族類拭背鋤心謹曰古稱財輕簞籜誼重嵩衡今  
厯見陶氏而眾著孝弟之義矣匪直陶氏之 恩榮也而陶  
氏循省銜仁下逮童穉思永垂諸子孫無過佚前人光議勒  
貞石請文於予予旣移節兩浙思以宣揚 上德風曉封圻

不可以辭按陶氏之先系出潯陽前明洪武閒有名俊者以鳳陽勳衛千戶調蘇州右衛所永樂交趾之役力戰於鹹子關遂家于吳淞入本朝子孫以千計有名世魁者篤念宗族捐田百畝又協捐五十畝卽篠父也篠起承之奔走齊魯燕趙閒日有所儲迺於乾隆十一年捐田如前數統前一百五十畝共千一百五十畝又糜白金千八百兩建義莊奉俊爲始祖祀焉貯其田之所入凡子姓兄弟出自俊者養生送死之具疾病急難之需皆於是乎給董以莊正佐以司莊司倉綱舉而目列之秩無所緝噫固孝且勤矣今夫孝友睦婣任恤古以之設科選士沿及季世上治下治旁治之義曾不五世而斬非道亡也其事不立也上世井田法行大民細民豐瘠略等又有大宗以統小宗其制寓於封建自宗法廢而

族不收井田廢而同父之子貧富殊闊風氣所以日媮不可復振若篠者其又可少乎哉義田之設始范文正公其時韓魏公亦合宗族百口衣食之一本誼摯豈後於文正公者然後世知有文正公不知有魏公豈左韓而右范耶良以范氏義田歲入粳稻八百斛擇族之長而賢者主其計法甚善而魏公不聞有田此其所以或傳或不傳也世謂晉陵錢公輔爲范氏義田作記而范益顯吾不謂然文正豈藉一記而傳者吾今特爲記亦以人心之厚薄風俗之醞醞其攸關具是焉耳義莊在長洲縣之因果巷其田畝坵段字號例備書碑陰

畱松齋少宰樓居圖記

尹繼善

畱松裔少宰居京師之厚載門家有園數畝雜花幽草紛然  
滿徑西偏有小樓數楹可以眺西山望蓮池境地清絕游者  
不自知其在城市中也余初與松裔同官京師朝夕過從相  
與挹芳翠窮遠目相得甚歡及余持節外行奔走於江淮之  
閒及滇黔秦蜀者二十餘載每念平生舊游杳不可再而松  
裔萬里寄詩每道其樓中景況有微意焉今年七月余再奉  
兩江之命入京師過訪松裔時松裔已閒居三年聞余至  
竹杖出迎攜手登樓秋雨初旣西山氣爽荷香入戶樹影橫  
波感時序之屢更喜雲物之無恙撫今追昔有低徊不能自  
已者松裔欲招二三故人開尊其酌而僕夫命駕不能稍畱  
松裔執手依依賦詩贈別余亦未及和也到江南後百務叢  
集兩眼塵昏迴憶樓中之景與樓中之人覺巒光水色琴瑟

爐香猶時時入夢因命善繪者畫爲一圖寄贈松喬嗟乎人生聚散渺若浮雲松喬官至少宰領袖清華事業文章在人耳目今退老林下得山水之樂以養其性情閉門靜處耳不聞車馬喧闐之聲抱子弄孫而外時或攜杖而游欹枕而臥此小樓中之真趣爲何如者余則南北驅馳風塵鞅掌形神交瘁鬢髮已蒼茲復駐節金陵雖秦淮鍾阜風物依然而終日勞勞無暇眺覽回首燕雲故山在望可能暫息塵緣復踐登樓之約與松喬把酒聯吟同爲畫中人乎

聖駕東巡記

阿桂

皇帝膺

天使命四十有八年繹思

祖

宗興業造功以奄有九有之師啟無疆大寶祚景嗣前烈是  
祇是勤顧瞻 舊都神皋隩宅 山陵遼羣

陟降攸憑粵自乾隆癸亥甲戌以洎戊戌式循彝章三修  
謁祭之禮隆儀忒宣 孝德光被迺者 特詔有司選和闐  
貢玉新作 冊寶格于

太室而以舊所奉者尊藏 盛京

太廟洪昭

列聖之丕庥顯光闡示無極將 遣皇子諸王等翊奉以行  
皇帝曰朕巡省舊京肅拜 園寢於今五年維艱難締構之  
緒夙夜常在朕心益宜以時敬申報饗其以孟秋啟軫熱河  
有事于

三陵夙戒所司一如舊典迺五月甲寅 車駕發自 御園  
駐蹕避暑山莊越六月丙子復 詔以伏暑閔勞烝徒令  
太史改卜吉日 恩意滂沲歡聲雷動越八月壬申恭遇  
萬壽聖節

上御澹泊敬誠殿諸藩從官入賀如儀越三日乙亥自 惠  
迪吉門 啟蹕東巡蒙古科爾沁土默特諸部落皆除道成  
梁奔走恐後所在擲肆節次生殖蕃阜一比內郡縣塞田畝  
一鍾刈穫彌望咸感荷 聖朝涵濡休養之厚澤踞仰 羽  
蓋懼歌載塗爰循柳條邊以東入九關臺門將軍侍郎府尹  
以下緣道迎謁各修乃守越九月戊戌 車駕至 興京謁  
永陵越五日癸卯謁  
福陵若翼日甲辰謁

昭陵功臣陪塋以次 賜酌祀事嚴恪蕭薌肝升

神明居歆多福單厚乙巳 車駕入 盛京徧禮于

天壇

地壇

堂子

太廟還 莅舊宮瞻視棟宇 皇情愴穆越三日戊申肆觀

于 崇政殿朝鮮國王遣陪臣奉表起居鞠膾在列 賜詩

褒錫慶賚有加遂大宴羣臣頒幣以差中外愷樂若翼日己

酉 宮中行祀 神禮庚戌發自 盛京先是有 詔推恩

給復奉天所屬租稅一年行所過者半之除莊頭輪倉粟萬

餘石旗地歲納米豆草束十之五囚輕繫以上至徒流減免

如例民男婦七十以上優以粟帛廣博士弟子員額凡扈從



王公諸臣暨大吏郡吏之有執事於行在者差別敘錄具  
準乙未己亥乙巳丙午節次指揮行慶所逮羣倫靡不霑  
漑越五日乙卯次廣靈禮于北鎮廟它若遼河渾河太子  
河秩在祀典者咸先後遣官將事懷柔百神山川受職越十  
日甲子次山海關禮于北海神廟登澄望樓以望海馮夷  
奔趨恬波效瑞越八日壬申謁東陵如初禮乙亥車駕  
至自盛京若翼日丙子親享于

奉先殿告成事焉惟自發軔熱河六旬有二日而大禮  
備懿鏗顯融燮古無尙臣仰惟國家光宅大東以建我不  
丕基神威變伐震耀典冊

皇帝虔共昭事旣日發金匱周覽本末灼知於

受命之原而猶不憚屢駕之勤巡行川塹諮度聖蹟

于赫圖阿拉見 荆造之勞於遼瀋見 經營之績於寧遠  
錦州松山杏山大凌河薩爾滸尙閒崖諸地見

皇天助順集勳制勝之所由然流連勤恁久而彌摯細及一  
名一物亦必反覆覈證以毋忘先民淳厚之俗於是摛爲

天文甄謨鑄雅 御製薩爾滸書事臚功勒實照燭宇宙旣

宣付刻石其處以詔無窮而前後詩章規重矩疊無非懷  
翔業之不易而益憬惕於守成之難長言諄復盎溢楮墨

爰 命諸皇子敬繕一通櫝而藏諸祕閣所以 垂訓於億

萬禩子孫者 睿慮深長實爲至詳且切若夫植根樹本崇

飭典物則有如 盛京諸 壇廟舊領祠官隆壝周墻嚴翼

無改復命將作繕葺規模鼎新奉天所屬諸城歲久侈剝當

其治者十有八 特詔大臣相視大斥帑金撤而甃之埴良

土剛金湯永奠四庫全書排輯告蕨復於盛京建 文溯閣  
分部藏弄琅函玉笈奎壁增輝惟

聖天子眷顧邠岐於事神誠民緯武經文諸大政壹切修明  
百務具舉而 淵沖默運所以周暨於萬方臣庶者亦無不  
龔和紹德推本 孝熙 宵旰勤咨彌昭 行健臣阿桂侍  
直樞禁日聆 睿訓仰見我

皇上體

祖

宗之心爲心法

祖

宗之治爲治寅承對越日昃不遑故能精意孚通受釐集福  
至仁達孝一以貫之固非徒豐鎬歌詩枌榆樂土飭彌文

而侈掌故者所克比擬萬一臣學質樸昧無以率先館閣諸僚導揚盛美而職領起居注法當纂次事實以付史館不揣固陋謹件繫日月撰記一篇竊附於記言記動之義曷勝悚戢懼怖之至

雙節堂記

阿肅

蕭山汪生輝祖修門內之行博學工歌詩雜文曉練世故正直豈弟彊毅祖義本仁不奪於俗省府州縣賢吏倚任賓師之嚴事惟謹生生十一歲失怙鞠於繼母王孺人生母徐孺人比長求戚屬端士督傅之出入苛察細行必令就規矩故生出飲吏施政理明守堅譽流當世者實兩孺人劬躬秉節所熏而成之者也初生之考南有君尉淇縣廉正慈愿其人

懷之慕親引疾歸有弟弗馴私鬻產以博置不問旋丁父艱  
貧甚過嶺依故人生活捐魄旅中兩孺人奮義壹心上養老  
姑撫十一歲兒瘡瘁十指負腹憊神用資事育然而內外釁  
紛然起眈眈視弱肉欲甘心焉於是爲畫移家之策者兩  
孺人謝曰斯堂也是先夫子所以授未亡人命未亡人上奉  
姑下扶持此卯角童以承祭祀以守墳墓未亡人誓與斯堂  
俱存亡無可去之義卽去且將安之萬一族鄰終不靖冒非  
義求逞未亡人不敢愛身行當濺以頸血耳於乎三十年維  
音嘒嘒植顛覆定室家至輝祖學立名章得 俞旨旌門已  
而舉鄉舉成進士祭先於斯堂娶婦於斯堂嫁女於斯堂死  
者斂穢於斯堂生者賓燕於斯堂垣墉墜茨實堅以好揭  
王言垂母範於斯堂里黨婦孺俛仰太息咸惻愴以涕零觀

感而興起於乎在兩孺人當日惟知壹心服義秉節求不負南有君而已豈曾逆計及此乎哉生之葺斯堂也以乾隆三十五年九月而自題曰雙節之堂今年余奉命典禮部試生得舉以雙節堂贈言來謁乞余記之余惟周易節之彖傳曰說以行險當位以節中正以通通之爲言亨也兩孺人始險旣亨安志中正思不出位若兼山之艮繩祖翼子再造汪氏而實成於兩孺人麗澤之說勢疑睽蹇臭乃同人分懸顛趾之鼎情篤中孚之吉若兩孺人是固汪生所不敢殊者也是固善體王孺人之指者也是固南有君所不得而殊之者也徐孺人縱欲然自抑損亦有不得而自殊者也以雙節名不亦可乎生勉之

天子錫極庶民豳宰降德有眾汪氏一門婦節子孝式光

聖澤其日篤前修施及其子孫余與生幸叨一日之知與有榮耀焉是爲記

拙鵲亭記

宗室敦誠

鵲巢鳩居謂鵲巧而鳩拙也而小園之鵲異乎是十百其侶維林是栖窺其意非故厭乎巢居亦非畏鳩之奪之也蓋其性拙視鳩爲甚殆不善於爲巢者故雨霜雪霰毛翼離褪而朝陽一晞乃復羣噪於木杪其音怡然似不以栖苦爲意且飛不高翥去不遠颺惟飲啄於園之左右以自適或時入主人之室值主人食棄其餘便就而置其喙主人之客來亦不驚起若視客與主人皆無機心者然歲次辛丑初冬作一亭於堂之陽凍林四合鵲乃環而栖之因名之曰拙鵲亭雖然

鳩拙宜也鵲何拙然不拙亦不爲吾園之鵲也

松亭再征記

宗室敦誠

戊寅正月自都再赴松亭走潞河秣駟水南稅駕舊城貽謀  
送予至渡頭是夜旅舍蕭條一鐙相對此松亭第一程也曉  
起與貽謀至一壚強之飲曰古人謂醉中分袂殊不悲然終  
不免淒然予遂馬首向東春風故道滿眼離愁渡陰流晚至  
一莊宿焉回憶昨夕同貽謀一鐙一酒相對又不可得矣殘  
月已沈朝曦初上人煙山靄雨不分明過邦軍北有顏祠一  
老槐可數十圍土人謂唐樹也昔吾宗薌嬰老人暨月山叔  
曾賦詩其下丁丑春予同子明兄汪易堂載酒過此有詩紀  
事低回之下輒有今昔之感路走盤山下遙望翠嶂崇巒奇



峰峭巖而雲罩寺高插青冥間昔日之詩僧名士如拙菴法  
天阮亭竹垞者於今安在惟有無盡白雲出入古岫閒也傍  
午至薊州州卽古漁陽郡登舞鶴樓憩獨樂寺昔曾經此有  
落日令人弔摻搗之句復訪趙韓王之墓暨竇禹鈞故宅不  
可得晚宿石門驛遼蕭翰潰宋兵爲郭藥師所敗卽此兩山  
截辭石路崎嶇眞雄鎮也是夜脫驂旅店曉發石門午至遵  
化古無終國地漢爲右北平唐置鹽城後唐始置今名解鞍  
造食路傍地上有殘書數帙亂颭風中有昌黎文集暨公權  
文敏墨蹟予探客囊尙未至阮遙集之羞澀急向書傭購之  
勿使諸公久困泥塗中也是晚宿三屯營之西村曉過三屯  
營營距松亭二舍初建於明天順繕於戚南塘爲東北重鎮  
過元武山山高數十丈有松萬餘株上有朱樓飛閣望之如

畫拾級而上紆迴盤曲至絕頂可二里許倚欄遠眺眾山環繞煙樹蒼茫北視窟窿山峰尖一竇儼若明月但聞丁丁伐木之聲不復見有人跡山南一碑撥草尋之乃前明總鎮尤紹菴之德政石也狀元朱之蕃爲書撰文自古迄今去思碑盈於寰區朝而碑成暮爲馬勃牛溲地不知凡幾而此碑歷二百餘年不朽其亦峴山之遺義乎至沙河會子明兄自榆關馳四百里就予於松亭值予入都未同兄與汝猷登松亭山愀然不樂越日而返將之冷口至此忽遇於村店中把酒沾衣恍如夢寐各敘別後事不覺有感於中而繼之以泣也時夕陽在野倦雅歸樹予曰魯陽戈不可再揮盍爲弟駐一日之驂兄曰諾於是再渡沙河抵景忠山下小憩村舍肩輿而上同登者汝猷弟錢唐王植三子明兄暨予童子三輿者

十數山高數十丈亭亭孤峙盤石爲磴歷十級一轉輒有小  
祠可以坐憩其顛祀碧霞元君總兵馬永建祠其上以奉武  
侯及武穆信國爲三忠祠其碧霞祠至 國朝始建云數憩  
游亭始陟其椒時夕日已沈暮煙渺莽諸峰羅列起伏蜿蜒  
謁祠畢宿於東堂與子明兄挑鐙話愁回念故鄉風雨聯牀  
如隔世事而梵音倏起鈴聲相應愈增旅人之感翌日老僧  
指顧徧歷山景仰瞻 御筆靈山秀色折東而南下有古洞  
小樓松濤寂寂嘯鳥瞻瞻石壁鐫尤悔菴太史詩予與子明  
次韻焉此時屐齒已折遂緣石磴復數憩而下回仰山祠已  
懸天半只覺眾山取次而高殊不知人在地上也謁城南塘  
公祠堂至村舍晚餐訖兄欲東之予固畱不可遂舍汝猷植  
三送兄之白廟又其旅次一宵翌日馬上再送數里至一水

予曰此濯纓處也兄前矣吾亦從此返也各沾衣別予詠坡翁送子由詩登高回首坡隴隔惟見烏帽出復沒之句至灤陽春雲蔽岫暮雨迷濛歸雁數聲離人如夢林外一鞭殊不覺松亭之翠色已落馬首前矣

重建儀徵巖院記

全德

兩淮鹽筴甲天下明初以都轉使爲理巖專官正統閒始歲遣御史巡其事職任綦重我朝因之儀徵介長淮以南憑臨大江所有江廣口岸危檣巨艦稠載而往者悉由乎此凡開掘開所開江諸務御史歲按臨之此儀徵察院所由建也舊傳所謂大中邊三院故址已不可考今在縣南里許卽批驗鹽引所自以御史監察乃建前後堂及引庫書算房凡七

十八楹嘉靖以來御史張珩戴金朱珽立相繼修葺萬曆中商人江宗文吳一瀾等重新之國朝康熙二年御史張問政於堂後建大樓及廨宇改大使衙於儀門外增設司道廳規模悉如察院遂永爲駐節所康熙四十二年

聖祖仁皇帝雍正四年

世宗憲皇帝皆有御書賜御史羅瞻噶爾各敬懸其上

雲章昭爛臣工瞻對天威不違咫尺至今咸凜凜焉然使者居郡城日多儀邑歲不過三四至視行部如傳舍一日卽去往往久而弗葺任其頽傾不甚惜而斥鹵之地又易爲朽蝨無以重觀瞻而昭爽塏其失滋大予銜命再視淮巖仰

體

聖天子愛養商民屢加優恤之至意英蕩所指爰度爰諮務

悉其隱夙夜匪懈今見垣墉摧剝于雨風輪奐穿漏于鳥鼠赤白漫漶堂廡卑溼視事之際心每缺然夫官之有署非以爲逸樂及游觀計也政令于是乎出條教于是乎頒耳目于是乎寄上下于是乎接登其堂視聽必嚴行其庭簿書必究小雅云築室百堵西南其戶而卽繼之曰君子攸芋言其所居尊且大也又繼之曰攸躋攸寧言其堂室之美而君子所升以聽事與夫休息以安身者況使者奉簡書來茲土民食所關正編派定季掣分檄郡縣督率員弁有其舉之莫敢廢也繡衣是莅驄馬是駐顧傳舍視之而不加飭不幾等王章於弁髦乎因命商籌款興作鳩工庀材費期于節省事便於張弛撓者易仆者起其中主善樓及相傳爲五美君陽樓改名朝陽者悉圻而新之無侈前人無廢舊觀諏吉於某

年月日迄工于某年月日夫需者事之賊而勇者功之府也魯叔孫昭子雖一日必葺其牆屋後之人因而守之時而修之則不勞而可久旁有關忠義祠亦就傾落同時更造合併書之以俟志邑乘者采覽焉

重建曝書亭記

伊湯安

梅會里曝書亭者秀水朱竹垞先生所築而因以名其集者也先生舉康熙己未詞科入翰林預修明史歸田後擁書入萬卷勤著述尤篤于經所輯經義考三百卷

聖祖南巡賜額有研經博物之褒乾隆四十二年

太上皇帝賜題長律海內翕然宗之嘉慶元年學使閣學儀徵阮公按試禾郡以講經術敦行誼爲士子訓士風振起湯

安承乏郡守于士之賢者亦皆識之試事畢公特訪曝書亭遺址則廢已百年矣乃與大中丞玉公方伯謝公觀察秦公議修是亭而湯安實任其事遂清復遺址官給直以贖之芟荒鉏蕪繚以短垣亭柱易以貞石使可久且以爲鐫字之地仍懸嚴蓀友中允所書扁過者不啻先生在時也且蒔花貼石略還桐階蘭砌之舊牆陰有桑百十株則畀其後人資修葺費而曩之芟池芋陂以及繡鴨灘落帆步諸景供游觀之勝者姑俟諸郡人之續成焉可已是役也邑令司何兩君爲湯安分任其事而司論車君專董之落成之日乃進斯鄉之人而告之曰公之建是亭也非徒惜名迹之湮沒也非徒爲檢討子孫復祖業也將以使鄉之人知鄉之有賢士大夫雖沒世而猶當尊且敬如此也使檢討之子孫知先人之遺書



手澤存焉當守且讀如此也且使四方之士聞之知通經博古述作不朽德久而益光其興起當何如也知聖天子以政學教天下學使奉命稱職必以經術深厚文章爾雅之儒是崇是奉其奮發激厲又當何如也

徠賓果木記

鐵保

崑崙踞西域之勝世傳爲仙人出入之所嘉樹珍果萃於其地徠賓地近崑崙得其餘氣多暖而少寒以故果木之盛甲於天下桃杏葡萄梨棗蘋婆林檎櫻桃俱極香美無論矣桑椹大可徑寸色白如玉味甘如蜜冰蘋婆尤爲異品形如內地蘋婆而瑩然無滓表裏照澈如水晶味香烈而極甘別城無此種又有所謂歐椽者似出東木梨而大香如木瓜以蜜

漬之甘酸如山查而香過之真異種也嗚呼以此珍果如生於中土移入神京必能貢明堂饗清廟供上方之饌擅華林之春其次亦得爲卿士大夫所共嘗文人學士所爭賞乃生於窮荒之地食之者不知其味珍品與羊腓同烹名園與馬廄爲伍物之不得其地至此已極不大可痛惜乎哉或曰八埏之外人益而物靈山川清淑之氣多鍾於草木以補人之不足是說也余姑存而不論云

記與止齋司空論藥

鐵保

止齋司空成吉林長日無事無所好而獨好病每病輒數日或數十日不出門素解醫性多避忌凡藥性之有偏勝者輒屏棄不服以故服藥多不效梅翁見而嘲之曰先生視藥太

重責藥太周無怪乎金石草木之精難乎其爲先生藥也夫藥以偏勝爲貴或偏於補或偏於瀉或偏於解散有是病則有是藥所謂有病則病受之者不以偏爲害正以偏奏效也若棄偏勝之藥而欲求效於無關輕重之品如以任重投艱之舉而委之和事老人其因循慢緩養癰成患必至僨事而後已求一時之安滋他日之患病勢已成雖虛扁復生不能爲力可不深痛惜哉且藥既有偏勝以偏見功卽以偏受謗嘗見人服藥之後或外感風邪或內傷六慾或平昔本有之病不時舉發而適當服藥之後則歸其咎於藥不知外感內傷及素有之疾因時而發卽不服藥亦病與藥無涉而藥又不能自白嗚呼此大黃附子南星半夏之類人不計其回生起死之功而但咎其雄悍尅伐之氣列入毒草門而含冤千

古也故善用藥者探其病源以藥藥病卽以藥藥藥性烈者藉他藥以和之性急者用他藥以緩之或制其太寒或去其太熱集羣策羣力之長以濟我用則藥之瑕瑜不掩我之損益得宜天下無棄物乃無棄才較之尋常庸劣之品非之無非刺之無刺碌碌無所短長者其得失不可以道里計也先生深於醫者其以余言爲是否止齋曰嘻子論藥而廿一史萃其中吾當以不解解之

八旗文經卷第三十九終

八旗文經卷第四十

記戊

法式善 南薰殿古像記

法式善 歷代帝王名臣遺像記

法式善 誠求堂記

法式善 重裝錢南園副使畫馬記

法式善 戒臺圖 裕軒曹慕堂兩先生祠記

法式善 思過齋記

法式善 校永樂大典記

法式善 借綠山房畫集記

法式善 校全唐文記

松筠巡邊記

成書三聖祠記

那彥成重修易州安河記

闕

鄂山重修新鄉錢公祠記

滿保命名記

樊封新建粵秀山學海堂題名記

寶琳復閱古堂記

南薰殿古像記

法式善

嘉慶七年三月初八日法式善以纂修 宮史得敬觀 南薰殿暨 內庫所藏歷代帝王及諸名臣像凡爲冊者十七爲卷者二爲軸者百蓋我

高宗純皇帝命廷臣哀集 宮府庫司所儲而藏諸者也其

像之作于何代無款識可辨以縑素筆墨度之蓋唐時所存者至少宋南渡以後略備然其紙墨之剝落亦多矣惟宋明帝后暨唐宋功臣像稱完善意當時奉詔勅爲之者觀其冠裳制度可以見古今沿革損益某幸以承乏 宮史之役得悉觀 內府所藏此於儒生之際遇榮幸爲何如夫列聖之相傳以心而覩像而增敬者聖人之恭也我 朝

聖聖相承法唐虞而紹商周治法心法之同揆卽一繪事所存而有可以寄羹牆之思者乃猶約旨卑思卽漢唐而下之君臣不廢採取其善以寓博覽得失之意則斯像之藏 內府也豈獨以昭慎重而已蓋又有以備監觀焉所謂德無常師主善爲師者非

聖之大曷克如是某旣自幸其得邀儒生榮遇敬誌始末爲



之記如此

歷代帝王名臣遺像記

法式善

王新城尙書謂六朝人畫多寫古聖賢列女及習禮儀器等圖此如漢儒注疏多詳于制度名物也余嘗摹古聖賢像舊蹟又摹太學大成殿周彝器圖四方能詩之士爭爲題詠裝成鉅軸久矣歲乙卯四月時雨初晴訪吾友夢禪居士於桑陰老屋見所藏歷代帝王名臣遺像數冊不署畫工姓氏度爲國初人摹本墨顏紙壞精氣特存惟其間殘缺殊甚年代先後復多訛舛借歸展對取詩龕石墨卷軸印證頗能相合其不合者亦可以補予所未備嗚呼可寶也已爰倩荆溪畫師潘大琨摹諸縑素越歲始成署名幀端者一冊至五冊甯

化伊員外秉綬六冊至八冊靈石何員外道生書出兩人故  
詳簡不同其序次多依官史故與原本亦稍異近余課士太  
學閒試以古文因舉所繪像爲題分譔頌讚銘說考諸體具  
有可觀余旣別錄存之而諸生亦願各畱其蹟遂參差雜書  
於帙像凡二百九十有二其間品類不同要其術業皆可傳  
世原闕者無考未及續繪異日者儻遇于荒祠畫壁斷楮殘  
縑或摹搨或臨寫則所闕者或不至終闕乎

誠求堂記

法式善

夫人必有所欲得也則求之有所欲得而惟恐其不得也則  
誠求之誠求之術不一而誠求之理無二居則以求乎聖賢  
之道而出則以求乎經濟之宜其功非朝夕所可竟而其事

則隨在皆可用力也周子霽原以名孝廉出宰粵東于其行也乞余爲誠求堂記周子嘗讀書石鏡山中及鼓篋鬻舍六館人皆以奇才目之今抱手版謁上官平時磊落傑特之氣不能無稍緇不紆者顧其中懇懇款款不敢欺人與不敢自欺之素志則矢之于心如一日縣令一官以得民心爲急務我之安我婦子也何術乎卽以此術安民之婦子我之適我口體也何道乎卽以此道適民之口體未安而求其安未適而求其適雖其勢不能盡同然好佚樂而惡勞苦趨衽席而避桁楊未有不同者周子以是顏其堂解衣脫屣棲息其間非無花竹之觀圖書之樂而民之顛連煢獨無可告語者日往來于胸中則植花竹列圖書者堂之迹拯顛連哀煢獨者所以居是堂之心吾知周子異日官益尊任愈重仍無異于

讀書石鏡山時也故樂爲之記

重裝錢南園副使畫馬記

法式善

今世所傳趙吳興畫馬雖贗本然固多愛護之者吳興生平不無遺議特以藝工世重之如此況不僅以藝傳者乎錢南園副使立朝風節卓卓可紀工詩文書入顏平原之室好畫馬歲庚子訂交于同年徐鏡秋齋中時副使方授鏡秋舉子業適從頗密然未得其畫也已未八月鏡秋出宰粵東其宅余借居之壁上遺有副使所畫馬紙墨黴敗神采奕然因亟收取裝潢藏之并憶辛丑夏余晨訪鏡秋未起與副使坐新槐樹下偶誦近作七言詩副使援筆立和今槐陰蔽屋紙窗竹榻未改於前而副使之亡已久至於譔著皆不可問獨此

尺幅獲歸于吾重副使者將必重惜其翰墨所存況余與副使之相習乎哉

戒臺圖裕軒曹慕堂兩先生祠記

法式善

天之報施善人也不一致其顯有以屈之者必隱有以伸之也其事在若可知若不可知之閒余昔于翁覃溪先生坐閒晤圖裕軒學士時學士方養痾林下余素欽挹其人茗話移晷款洽甚至不兩年學士卽世又於西苑直次見曹慕堂宗丞意致謹樸遇後進語娓娓不倦隨以請建辟雍見褒于上未幾旋歿兩先生皆世所稱善人長者也庚戌之秋偕同人游西山路經戒臺登佛閣觀所謂活動松者見峰岫迴復處爐煙一縷從雲霧中颺出僧指謂曰此裕軒慕堂二先生

祠堂也同人攝衣歷百十級始至閣肅衣冠展拜相與感舊太息而去今年八月又偕宗丞子定軒給諫俱來給諫修祀事成屬余記之余觀壁間刻劉岸淮副憲所記建祠始末甚詳不復贅獨念學士無子得其門人副憲爲立祠又得給諫奉其先人宗丞公共祠妥侑曹氏子孫賢且多必能恢大宗承遺業以流傳于永久與茲山同不朽也天之報施善人固如此哉

### 思過齋記

#### 法式善

思過齋者頤園同年紀 恩而作也頤園官侍郎有直聲一日以言語失職廷議重譴上

天子鑒其素而宥其罪俾閉門思過以養其親侍郎感

聖恩之優渥奉其定省之身不敢有退閒自適之念爰以思過額其齋楣而屬余爲之記夫侍郎失職負咎引慝方自以爲罪矣言乎過則非罪明甚書曰宥過無大易曰无咎者善補過然則常人無過君子有過君子不患有過患有過而不自知其爲過職思其居職思其外思之固不可已哉且夫過之爲言失乎中之謂也侍郎與余交三十年其心術學業知之最深有特立孤行之誼焉然嫉惡太嚴求治太急嫉惡嚴可也太嚴則不辨其惡之大小而盡欲去之勢不能盡去將小者去而大者留焉有之矣求治急可也太急則不辨其治之輕重而盡欲行之勢不能盡行將輕者行而重者沮焉有之矣大惡期於必去重治期於必行其小者姑可以聽之士貞子曰林父之事君也進思盡忠退思補過社稷之衛也侍

郎者社稷之衛也他日 召用吾願侍郎於嫉惡求治二端  
務持其平譬如射焉期於中鵠斯已耳譬如音焉味焉取其  
配與調斯已耳酬

聖恩於萬一而慰蒼生之望所以盡其思於平日者豈不在  
此時哉豈不在此時哉

校永樂大典記

法式善

明永樂元年九月詔學士解縉以韻字類聚經史子集天文  
地志陰陽醫卜僧道技藝之言爲一書越年奏進賜名文獻  
大成上覽書嫌未備更命姚廣孝劉季篪及縉監之簡翰林  
學士王景以下二十五人爲正副總裁中外宿師老儒充纂  
修國學縣學能書生員繕寫開館于文淵閣光祿寺給朝暮



膳司事凡二千餘人累十年而就是爲永樂大典凡二萬二千餘卷一萬一千九十餘冊貯之文樓嘉靖三十六年三殿災書以救護免救閣臣徐階摹鈔副本一部書手一百八名每人日三葉起嘉靖四十一年訖隆慶元年凡六載竣事萬曆二十二年南京祭酒陸可教請分頒巡方御史校刊議允未行其說散見於張元怵之館閣漫錄邵瑛之七修類彙朱國楨之湧幢小品姜紹書之韻石齋筆談阮葵生之茶餘客話惟諸書皆載目錄六十卷而朱書稱九十本殆有誤歟今翰林院所貯僅一萬冊相傳爲李自成所摧殘檢每冊後署銜則曰重錄總校官侍郎高拱學士某分校編修某書寫儒士某其爲嘉靖本無疑不知原書今歸何所竟無人知之是可怪也此書發凡起例實未美善而宋元以後書固已搜羅

大備世閒未見之鴻文祕籍賴此而存惜唐隋以前書仍寥寥耳然余披校唐人之文如張燕公陳子昂陸宣公顏魯公權載之獨孤至之韓昌黎柳柳州白樂天歐陽行周劉賓客李義山杜牧之羅昭諫行世本外各有增益者數十少者亦五六其不習見於世之人蓋往往而有也當此之時苟欲考宋元兩朝制度文章蓋有取之不盡用之不竭者焉若徒便其按韻索覽是固當時編輯一隅之見也

借綠山房畫集記

法式善

臨川李郎中薌甫芸甫昆季奉職居京師居與長椿寺僧寮相向寺門外疏槐高榆掩映衢巷乃以借綠名軒余時時詣其所說詩弗倦今年暑雨稍踰兩三月未及登堂慰契闔休

沐之暇風日嘉淑折柬招余並約同人工繪事者各出其能以爲娛樂促余爲記余有慨焉夫京師五方雜處公卿大夫既各守其官奮志於功名橫經之士操技藝之流亦必有所趨向以自專其業欲求一日之暇有不可得者矣然吾聞諸荀卿云其爲人而多暇日其出人不遠淮南又謂學不暇者雖暇亦不能學矣由是言之不暇者人事之恆暇者人心之定耳是日也庭除灑掃肴核修潔賓客歡洽飲酒賦詩相期敦古人誠敬之誼以快足于心而復託諸絹素貞之文章二李君愷切悱惻之意豈有涯涘乎時無錫秦侍郎酒微酣大聲歌唐風曰今我不樂日月其除無已太康職思其居諸客肅然起聽余進而言曰良士休休不皆從瞿瞿蹶蹶來乎願諸君子休休於暫時將以瞿瞿蹶蹶者行之終身哉侍郎曰

善余遂書以爲記會者若干人某某期而未至者若干人某某作記者法式善也嘉慶十四年八月初二日

校全唐文記

法式善

內府全唐文鈔本十六函每函十冊約計其篇蓋萬又幾千焉前無序例亦無編纂姓氏首葉鈐梅谷二字私印相傳海甯陳氏遺書或云玲瓏山館所藏或云傳是樓中物大約鈔非一手藏非一家輯而未成僅就人所習見常行採掇爲卷唐人各集亦皆錄從近代坊本蘇尙書官兩淮鹽政時購於揚州而上貢 秘殿嘉慶十三年十月奉 詔補輯纂校善獲奔走爰從諸君子後閱四庫全書若干部天下府廳州縣志書若干部金石碑版文字若干紙而又閱永樂大典二萬

卷釋藏八千二百卷道藏四千六百卷然後補入若干嗚呼盛矣夫唐人之文不能昭著于有唐之時摧殘漸滅越千年而後顯焉唐文與唐詩並重而不能昭著于刻唐詩成之時輾轉流傳越百年而後興焉夫此千年百年者亦豈人之所能爲也哉老子云復眾人之所過以輔萬物之自然而不敢爲又云執古之道以御今之有能知古始是謂道紀斯役也吾蓋三復斯言云

巡邊記

松筠

乾隆六十年乙卯夏四月巡邊自前藏經曲水過巴則江孜計十日抵後藏由札什倫布走岡堅寺彭錯嶺拉孜羅羅協噶爾過定日通拉大山計十一日至聶拉木又由達爾結嶺

西轉經伯孜草地鞏塘拉大山瓊噶爾寺南轉出宗喀行六日  
至濟隴仍旋宗喀東北行十日還至拉孜入東山一日至  
薩迦溝廟自廟北行二日出山仍走岡堅還至札什倫布往  
復略地隨在繪圖知其槃焉札什倫布西南左有薩迦溝之  
曲多江鞏右有彭錯嶺峭壁連岡是爲後藏咽喉實天然要  
隘也乃辛亥年廓爾喀以步卒數千人入自聶拉木走薩迦  
溝直抵札什倫布彼時果有蕃漢官兵劃分兩路一赴曲多  
江鞏以扼其前一赴彭多嶺偵探以截其後則廓爾喀可以  
不戰自潰至協噶爾定日左首之絨轄喀達定結西路之宗  
喀瓊噶爾鞏塘拉大山皆爲天然門戶曲水巴則江孜又爲  
前藏之要隘而江孜迤南之帕克里甘壩界連藏曲大河尤  
爲前後藏第一險要凡前後藏蕃漢官兵及噶布等均宜熟

悉因於前後藏江攷校場勒石咸使對圖講求胸中有主方  
於防汛有益然安邊之策莫若自治非獨濟嚙聶拉木應用  
廉潔營官前後藏屬各營官第巴皆能教以廉潔自持善撫  
百姓又何他患耶是爲記

三聖祠記

成書

水旱禱祠古人所不廢牲牢酒醴備物告虔祈而應則歸功  
於神不應則委之於運數而神無與焉如是而已夫人至於  
憂危窘迫智窮力殫不得已而求之不可知之神此亦事之  
極難者矣而神乃如其願而償之又於其智慮所不到祈請  
所未及者曲爲之謀而適滿其意嗚呼神之靈亦赫矣哉嘉  
慶癸酉夏

秦陵松樹生蟲似蠶而黑眾多易長喬松萬株齧食殆徧官吏搜捕不遺餘力而生生不已餘孽猶存於是宗臣長吏祠官衛士勞心焦思若喪魂魄既已無可如何乃相與委命於神而致禱焉此三聖祠之所由建也祠凡三楹中祠蟲神而以樹神電神配郎中永慶尙膳正永康實董其事今年春余自樞部來鎮秦甯與今少司寇那公交謝語其事以爲深憂翌日恭謁 山陵周視林麓彌望童然時蟄戶未啟而蟲已蠢動乃往禱於祠集僚吏謀所以禦之者永君曰蟲秉旱氣生性不畏霜雪遇暖則驟長夏遺子秋復結繭其生不窮百足多力抱枝而棲尋常風雨不能撼也故經歷年所興役數百焚斫者計數萬斛而蕃衍如故余聞而懼適春夏復旱蟲果大作一如其言官吏之憂惶士卒之勞悴視昔有加焉竊



伏自念身膺重鎮守衛 山陵力不足以驅醜孽誠不足以格明神曠官尸位災譴固宜神而有靈豈亦晏然而不一拯乎因復請於祠迫切待命自四月至六月數雨數晴樹漸萌矣而蟲如故己未大風以雹蟲乃殲焉夫蟲固非畏風雨者也是日也風雨靡常時作時止雹復聞之若深知其冥頑詭譎難於驟除而出其不意奪其所恃勞苦之摧挫之使必無所逃死焉蓋至是而向之蜂屯蟻聚以百千萬億計者不崇朝而靡有孑遺矣雹不及遠林麓皆徧民田僅顆粒士眾歡呼以爲特爲蟲設也所殘樹萬餘株雨後復萌無一損者聖天子當陽百神效職擢呵守護分所宜然獨異夫斯役之協心齊力趨事奏功若約而同期而應者是豈區區禱祠之誠所能致乎蓋必有使之者矣余始謁於祠見以雹神配詔

其不倫未暇問也而神之效靈如此蓋凜然示我以廟食於此而非素餐者余既驚且愧因敬書之以答神庥且志吾過

重修新鄉錢公祠記

鄂山

新鄉城南趙村有錢公祠焉公於乾隆辛卯夏來宰是邑明年冬遷安慶司馬以去涖任僅年餘而民心乃久而不忘也斯何故哉蓋公之爲政務在愛民表懿行恤刑獄嚴保甲教養兼施凡事之便民者靡不舉先是康熙間邑頻有水患沙積土礮田不可墾者三百餘頃賦無所出往往責近村富戶以償民苦其擾公下車之日見獄中多以逋賦頌繫者廉問得其實惻然憫之以爲盡免累年之積逋猶無益也必永蠲其額而後民困可蘇乃躬自履勘詳請於大吏中丞何公具

章入奏部議不許事幾中寢公又力請至以去就爭何公乃復爲申奏於是奉 特旨俞所請嗚呼

聖天子懷保惠鮮行不忍人之政固靡幽弗燭靡遠弗屆矣亦由良有司之勤恤民隱俾不壅於上聞也百世之祀不亦宜乎公諱汝恭字雨時一字旣齋浙江嘉興人刑部尙書贈太傅文端公仲子歲丁卯舉京兆試丁丑就挑始仕江南歷高漚江甯沭陽興化丹徒諸縣所至有惠政如在沭陽亦嘗減賦額以振貧民折運費以省轉輸又開柴米河以通食貨其在興化一日理積案二百立捕盜法禽其魁使互相糾摘徒黨解散具詳於江南志乘中公自去茲邑抵皖未幾丁太傅艱歸里以哀毀卽世而公諸子先後第進士爲郎官翰林歷中外皆有清譽是則廉吏有後天道無爽世有蒞民之責

者益當憬然於爲民興利除害者其遺澤爲無窮也曩乾隆  
庚子先大夫方宰長興分校浙闈得公仲子漆林檢討卷登  
於賢書迨子丙辰會試又出公季子雲巖學士之門兩家世  
相契故知公行事稍詳今年二月子奉命廉訪中州入境  
訪公遺祠蓋自邑民創建以來烝嘗弗替六十年於茲嘉慶  
戊午前邑令牛君步奎嘗一葺之爾來又二十有七年矣乃  
偕今邑令胡君謀所以新之者爰出俸金鳩工庀材而邑之  
士民不忘公之遺愛踊躍子來百堵皆作丹雘一新不數旬  
而事竣夫安民之道必始於吏治而吏治之興必有一二賢  
哲鉅儒倡導於前以爲矜式乃相與觀感興起敦勉於弗替  
然則是役也庶有以裨風教之萬一而豈徒一家淵源之私  
也哉敬摭公遺事勒諸貞石以勸來者

命名記

滿保

古之命名有信有義有象有假有類五者凡以其別也又曰諱名不諱姓姓所同也名所獨也余則以爲名取其獨而獨之中有同則紀世次別長幼聯宗族之道於是乎在焉粵自始祖世居哈達地方至庫拉海公隨侍

太宗文皇帝膺騎都尉世職迄今十二傳矣族姓繁衍源遠流分命名者率皆任意重複心竊惡焉迺集族人公擬二十字編爲次序告於宗祠代用一字以爲後世子孫命名之準約曰毋紊序毋雷同毋負異以鳴高毋恃貴而不屑昭穆有序不至分卑而踰尊昆季連枝尤當顧名以思義是則余紀世次別長幼聯宗族之意也夫嘉慶二年四月記

新建粵秀山學海堂題名記

樊封

六經之道猶淵海也學者不能探其源竟其委譬諸泛舟者欲問南溟而北掉其楫雖窮年於洪流中終不克覩百谷之王夫聖賢垂訓示人開通明暢本爲易知雖中材皆可訓行後之釋經者務高以詡奇務新以矜異經訓於是乎晦漢人去古未遠猶能得孔門之傳授故許鄭詁經不過因文立訓求其章句詳明而已六代以後始尙名理蹈虛索漠取古聖諄諄教人之旨與老莊同揆學者乃更畏經訓之難而不敢學宮保制府阮公以儒術施諸實政教不違俗民安其便訓士則專導以古每有課課必及經而旁及文筆躬自甲乙孳孳不怠粵人皆曰制府能造士歲甲申秋乃造學海堂於郡

城粵秀山之半爲諸書院稽古士講誦之公所粵人皆曰制府能養士并述公前撫浙時構誥經精舍於西湖以課士不數稔上舍生登巍科掇膺仕者數十輩兩粵夔掄六元皆以科名淵源出公門下今茲山堂將毋同封曰否此非制府建山堂指也學校書院之設徧天下儒生競爲文以博進取兀兀窮年不外帖括聖經賢傳之旨不暇寓目卽長吏愛才養士亦不過校其時藝之優劣量加勸獎而已其他亦非所計也嗚呼學雖盛而未探其源未竟其委也諸生誠能奮其稽古之志篤其修身之力取漢唐經疏諸史精研博考之而無浮慕乎外如漢書所謂修學好古實事求是者豈非今日之學海足以比美於西湖哉能如是庶幾無負作堂之意若徒謂制府善養士爲山川增長氣色仍囿於俗學勤始而怠終

視稽古爲難無所著作與草木同腐則此堂亦不過如郡縣書院義學而已制府造士之意終虛而名山亦因之減色也不可不勉哉古人登臨宴集皆有紀述之碣矧茲盛事烏可不記謹撮其略願書碑陽更欲仿漢人紀姓氏例取來學者及修粵志諸人書於碑陰庶後之人得所考也道光四年十二月日

復閣古堂記

寶琳

定武爲漢唐郡國宋時置重鎮慶厯閒以儒帥坐鎮其地安撫其民一時如韓忠獻公蘇文忠公尤至今稱述者也文忠治此期年頌及千載忠獻公政蹟傳者尤多乙巳秋余來守斯土方慮無所觀感效法將無以質古人卽無以仰對



君上俯念斯民取舊志而披閱之知忠獻嘗起堂於後圃撫  
前代良守將之足以爲法者凡六十事繪左右壁顏其堂曰  
閱古夫忠獻公在古人中當不居三代下而當日猶懃懃法  
古如此此古人所以不可及與堂旣廢明刺史宋公質建續  
閱古堂前刺史中州王雨農修葺之而志所謂列忠獻政蹟  
三十條則闕如也州治第三堂東屋三楹爲接見賓客所歲  
久旣壞限於例無修款余來定三載幸獲屢豐次第捐修壇  
廟並韓蘇祠楊公祠眾春園將畢遂捐俸鳩工思有以復忠  
獻之舊焉堂所繪故事不可考因摭定之名宦鄉賢可師可  
法者亦足三十事州司馬勞佩蓀博雅善書畫厥弟杏莊亦  
工繪事凡可形諸圖畫者則杏莊摹之屏其有不能形容者  
則佩蓀書之壁工旣成卽名之曰復閱古堂朝夕處其間觸

目興懷黽勉從事以日遠於罪戾非余後古人而生之幸事  
乎後之莅茲土者閭是堂而興起必有以古人之澤加諸今  
以後之民者亦定民後古人而生之大幸也此堂之復所繫  
豈淺鮮哉道光二十九年己酉秋九月謹記

八旗文經卷弟四十終



八旗文經卷第四十一

記己

銘岳賴灘記

麒慶奉使科爾沁行記

麒慶奉使鄂爾多斯行記

錫纈盧臺述

鐵齡許氏山莊記

賴灘記

銘岳

章水合於貢眾流附而匯於虔此虔之名爲賴也勢據上游  
溜甚急舟逆流而上牽挽若排冪諸灘絡繹怪石出沒行人  
視爲畏途庚子春逆夷鴟張東粵軍書星火來往江右時南

安備軍需趙竹泉中丞以方伯典其事余以備員隨行數涉  
灘險嘗訪諸土人略得其梗概萬安距贛可三百里奇險之  
灘十有八而諸灘之能爲舟患者不可指數灘各有神分主  
其險去萬安三十里瀕江有古刹則灘神廟也神之狀不一  
過客皆蒸瓣香爲祝而舟師事之尤謹廟前爲長年受傭所  
長年者熟於灘路能曲折拏舟以避險者也灘之始爲黃公  
巨石怒濤衝激澎湃令人不敢正視故又名爲惶恐卽文信  
國勤王所經處也越黃公十五里爲漂城又五十里爲棉津  
又十五里爲阜口三灘相望水迅急若奔馬江中醜石露伏  
無常長年點篙惟視水理其旋渦而浪激若噴者其下皆有  
石也阜口之下爲蓼灘蓼有大小而灘石之密布若九宮故  
土人以之命名長年握其篙縱橫馳突怒鬪若轉陣者則出

入八卦石也過二蓼約十五里爲武朔灘塘汎爲武索其石爲蹲鴟爲猴子爲飛魚飛魚之險甚於鴟猴觸其鱗尾無完舟由武朔二十里爲崑崙灘灘石皆伏其可見者若牛馬舟抵格石脊剝剝作怒響聞者惴惴心悸無人色舟師亦數視其艙有罅漏艙以衣裯少不經意舟裂矣越崑崙入贛界十里至良口過良口二十里爲金沙爲錫洲錫洲土人名爲銅盤灘者也石有鼠尾伏龜諸名若夫其銛上指而布若兵仗者則翦刀諸石也故舟之出必曲屈數折以避其鋒由錫洲至攸鎮十五里至大湖又十里至蘆岡又十里至夏澗夏澗之險以狗腳爲最次則龍梗鳧頸鷺嘴皆取其石之似而名之者而橫互江中如醉夫卧路則睡石之截舟也蘆岡之石如弩機其方面稜者若觚圓而柄者若壺土人以其形似以

東壺西壺名之越夏滸至介平可十里則天柱灘在焉未至介平石卽漫衍相接人頭虎頸齧齧可怖尤奇者數巨石矗峙江中黝而醜相向如人立而羣右森列若拱若揖若跪若伏土人呼爲羅門水風陰冽寒氣凜毛骨石罅聲若牛吼復深暗莫測其底故又名之曰閻羅灘過天柱者舟三折始出險舟爲水激動盪震懾爲諸險冠過天柱四十里爲水口爲白澗爲桃源水勢雖溜平沙見底卽有伏石不妨舟而帆檣密樹隱隱與粉堞朱樓相映射者望之則贛城也長年至此邀賞行客亦於此慶更生焉噫嘻造物一大順之機也而爲江湖以利行人復爲此奇險以危舟楫徒使僕僕者以七尺之軀託命於長年亦可慨也記之以告來往於贛灘者

奉使科爾沁行記

麒麟慶

咸豐七年丁巳夏五月二十三日癸酉奉

命往科爾沁致祭惇恪親王之女和碩格格故事內外札薩克汗王貝勒貝子有物故者理藩院以其名達於侍衛處請遣使致祭侍衛處列散秩大臣乾清門侍衛滿洲蒙古四五品京堂銜名以聞汗及王遣二人貝勒以下遣一人近屬諸王之女下嫁藩部者亦得視貝勒焉格格爲惇邸太福晉所出下嫁科爾沁達爾漢親王旗頭等台吉前乾清門侍衛多布沁拉布齋道光間格格每歲入都輒畱居八九月宮府供億無使乏咸豐初太福晉薨格格不得久居京師六年八月以疾歿於游牧以其爲

仁宗女孫故特遣官致祭云凡往蒙古各部致祭者理藩院



例派司員一人隨行惟喀爾喀四部則由附近游牧司員內  
調派一人所需官物用勘合一兵票一烏拉票一烏拉兵票  
一及祭文勅簡等件使者自備祭品牛犢一羊四酒五尊折  
銀五兩有奇盛以黃綾小袋閏五月二十二日壬寅詣圓明  
園恭請 聖訓 賜對於勤政殿二十七日丁未啟程京營  
武弁一人負祭文前行行四十里館通州二十八日戊申渡  
潞河行七十里抵棗林二十九日己酉渡洵河行七十里宿  
薊州西門六月初一日庚戌出東門四圍山色蒼翠撲人望  
桃花寺行宮松杉掩映樓閣參差行六十里抵石門鎮初二  
日辛亥避雨義井鋪涉清水河又涉沙河六十里抵遵化州  
州城宏整爲畿東冠前明設巡撫於此以爲關門後距本朝  
建 陵後升爲直隸州初三日壬子行五十里過鹿兒嶺抵

三屯營爲遷安西北界南直景忠山峰巒秀拔林木蔥蒨  
聖祖御題靈山秀色者也初四日癸丑循三屯城而北過元  
武山渡灤河過鞍子嶺十餘里過一廢城西倚平岡飭餉尙  
存爲灤河故縣縣置於遼金廢於孩兒館置灤陽縣復廢元  
更置縣明改爲營舊志稱在遷安西北一百六十里者道里  
約相當郭造卿永平志謂遼縣在灤陽營金縣在孩兒館二  
城各別今城東北距孩兒嶺不及十里且與三屯城新舊略  
相似意館卽因嶺得名遼縣明營一也是日行六十里抵喜  
峰口初五日甲寅出關關門凡四重因山築城回環相抱過  
夢子嶺九宮嶺下嶺後望黃土崖峭壁如屏高入天半松亭  
行紀所云七十石塔可見者十餘座至山半木橋則已無其  
跡矣過冰窖爲遷安平泉分界過偏嶺抵寬城驛是日行七

十里自秦皇築長城以禦胡漢唐及明恃爲捍蔽本朝中外一家朝使往來不絕於道數千年阨塞蕩爲夷庚緣邊無業之民大率出關謀食嘯聚旣衆椎埋剽掠所在而有實北鄙之隱憂也古之爲關在禦外侮而勿使人今之爲關在扼內奸而勿使出蓋千古之邊防至此而大變矣初六日涉寬河越豹河厓孤黨壩出大礮口抵第一臺地名浩沁塔比格爾譯言舊五十家子因台上有五十戶蒙古也台北有察汗城卽古會州城館舍整潔本台昆都所居也康熙中設立外藩各蒙古驛站自喜峰口至札賚特置驛十六每驛駐蒙古五十戶築室授田俾之耕牧遇有差徭戶出馬一匹以給其役每台設章京一秩五品昆都一秩六品其下畢齊克齊撥什庫阿敦達等十許人皆隸於理藩院管站司員本旗不得而

役屬之每使者將至除館舍備車馬簡夫卒具米以俟既至  
迎於台外半里許就館後以次入謁瀕行賜以刀燧煙茶諸  
物皆奉持加額再拜而後受是日行一百里初七日丙辰抵  
平泉州譯者益福興從本臺之必齊克契也自平泉迤北山  
勢平遠過卧龍岡五虎馬嶺黃土岡至第二臺地名克思呼  
譯言越過以往者大風吹人自山顛而過故以名之是日行  
一百二十里初八日過舊青城涉巴爾漢河至故大甯城城  
周二十餘里遺趾尚存爲遼金中京大定府治明太祖封子  
權於此是爲甯王兼設大甯都指揮司東接遼瀋西控宣大  
爲塞外重鎮建文中成祖誘執甯王革除後改封南昌移都  
司於保定以其地畀朶顏東北邊患遂與有明一代爲終始  
過城而北陟呼爾敦達巴呼爾敦譯言速達巴譯言嶺地舊

多盜屬行者當急過也涉老河水極深廣幾及馬腹蒙古謂之老哈穆楞卽隋書契丹傳之託紇臣水唐書地理志之土護眞水金之土河元之塗河源出永安山會諸小水東北逕大甯故城入赤峰建昌界會英金河又東北入朝陽界與潢河會爲西遼河一統志以爲卽古白狼水者誤也河北卽第三臺地名拖和圖拖和譯言釜以山形如覆釜也自第一臺至此皆喀拉沁旗所管站喀拉沁卽明朶顏衛故地東自全甯歷喜峰西近宣府地險而強時陰附兀良哈諸部爲邊患後爲察哈爾所滅別以元太祖功臣濟拉瑪之後主其地國朝率屬來歸分左右翼置扎薩克郡王貝子各一其境周千八百餘里與遷安承德平泉建昌犬牙相錯人皆構屋而居藝禾黍畜雞豚日用飲食多與內地同間有習漢人文字

者蓋彬彬乎有華風焉是日行一百四十里初九日戊午過  
拖和圖迤北諸山抵噶海溝達第四臺地名百爾克譯言難  
易之難臺上章京言驛路比年爲水衝斷多所繞越故尤爲  
迂遠臺屬土默特旗土默特古龍城地明設泰甯衛爲三衛  
之一嗣爲元太祖十八世孫圖蒙肯之裔及濟拉瑪之後所  
分據境周千餘里 國初來歸設左右翼扎薩克貝勒貝子  
各一與喀拉沁旗畧似而富强過之是日行一百六十里初  
十日己未行一百二十里抵第五臺地名洪郭圖洪郭譯言  
鈴以其地有塔如鈴也是臺仍屬土默特旗十一日庚申行  
一百十里至第六臺地名沙拉諾爾以地多沙水色黃也是  
臺屬放罕旗前阻沙山後界老河章京進黃油燭米爲餉自  
出口七日至此爲異域矣敖罕本喀爾喀別部明時入據漠

南方四百餘里役屬於察哈爾 國初來歸設札薩克郡王  
一其地半沙磧人鮮耕作俗益樸儉亦無解漢語者十二日  
辛酉循老河東南岸而行豐草叢生蒼耳高至二尺許山柳  
極多深蔚無際行百餘里抵第七臺屬柰曼旗地名庫車爾  
譯言二水交處以老河至此將與沙江合也柰曼亦喀爾喀  
別部之人居漠南者周六百餘里 國初爲察哈爾所迫率  
屬來歸設札薩克親王一十三日壬戌過老河涉西拉木楞  
志謂之潢河土人稱爲沙江源出克什克騰部之博爾赫賀  
爾洪經巴林阿魯科爾沁翁牛特境入柰曼界又東北流老  
河自西南會之爲西遼河之上源是日行一百三十餘里抵  
第八臺名三音哈噶譯言好地面以其產氈甚厚也是臺經  
阿魯科爾沁爲札魯特旗所屬阿魯科爾沁者元太祖仲弟

哈薩爾之裔周四百餘里明兀良哈地也 國初爲察哈爾所侵率眾來歸置扎薩克貝勒一札魯特者與土默特右翼同族亦圖蒙肯裔也地方五百餘里明時役屬漠北 國初其汗名內齊者舉部來歸分左右翼置扎薩克貝勒二十四日行一百里抵第九臺地名西那郭勒譯言新河以其地近日積水成河也臺上蒙古爲博多勒噶臺親王僧格林沁所屬已入科爾沁境矣科爾沁者亦哈薩爾之裔明初自黃泥窪歷鐵嶺至開原置福餘衛與朶顏泰甯並爲東北捍蔽後自立國號科爾沁 國初以壤地相接結婚姻後爲察哈爾所侵舉族來歸分左右翼設札薩克親王郡王各三今郡王僧格林沁復以勦寇功晉親王其地東至札賚特西至札魯特南至 盛京北至黑龍江方二千餘里爲內札薩克蒙古



二十五部之冠代著戰功連姻 帝室故其室廬服飾雅有  
華風惟土壤雜沙俗鮮耕作解漢語者無多稍遜近邊諸部  
云十五日壬子行一百四十里抵第十臺爲達爾漢親王旗  
界地名魁蘇布拉克魁蘇譯言臍布拉克譯言泉水其地窪  
而多泉故名過沙江後絕無溪澗惟地形污下處輒積水成  
淵蒙古語統謂之諾爾附近多斥鹵大抵流水所盪土多散  
而爲沙積水所浸土多凝而爲礮土木尅水而爲水所制遂  
變其性如此十六日癸丑從東北折而東南行一百二十里  
抵阿木喀朗地爲達爾漢王下佐領卽以佐領之名名之十  
七日甲寅行九十餘里至特克蘇臺吉駐所十八日乙卯行  
一百二十里抵固林哈噶固林譯言苔以地有大淖爾多苔  
故也十九日丙辰行七十餘里抵西遼河卽潢河合老河之

下游也土人亦謂之沙江水深不可徒涉達爾漢王設威呼一以通往來置官掌之威呼者剝木而虛其中銳其兩端長約丈許可容三四人放渡時一人立水中引繩曳於前一人立舟上持篙刺於後比及中流曳者竟返持篙者亂流以濟水去舷僅寸許幸兩岸相距不一里往返十數次徒從車裝始畢渡惟馬須浮過耳渡河後復行二十里至赫騰他拉赫騰譯言城他拉譯言牧所其地四面土阜環繞如城故名卽多布沁拉布齋駐所也是日行一百餘里自京師至此凡二千一百餘里二十日己巳多布沁拉布齋遣人具車馬導往祭所時格格厝一穹廬中棺前和繪番字外構陳祭品設祭文案及奠案主人率其子弟及族人等序跪於右理藩院司員及隨往之譯者立於左使者居中向棺立譯者展祭文宣

讀訖二蒙古人跪擎奠案二蒙古人跪奉杯壺使者立奠三爵每奠主人及眾各一叩奠訖主人興復率眾向闕行三跪九叩禮又向使叩謝禮畢旋寓二十一日庚午由赫騰他拉起程行七十餘里抵河路營二十二日辛未行一百餘里抵特們格爾又名南營子二十三日壬申行一百二十餘里抵畢契罕蘇巴爾噶郭勒譯言小塔溝是日入哲里穆盟長科爾沁卓禮克圖王旗界二十四日癸酉行六十里抵柰曼王所屬拜薩朗台吉駐所二十五日甲戌行八十餘里抵策都拉木策都拉木者台吉之名卽以名其地如云某佐領也凡地名無漢文可譯者視此自十六日由第十臺分道在蒙古境中行十日每日烏拉契數人持長竿縮鞞索於其上策騎以從遇牧馬者輒持入其羣繫其良者以備驅策馬主知

之亦策騎持竿踵其後復繫他人之馬以吏之一日無慮數十匹比至館又往羊羣捉羊以給食羊主亦供應惟謹所謂拿烏拉也宿頓無定所率台吉等之居當孔道者前驅至主人輒掃除以俟薪水器皿占用無所忝所居無論虛帳恆向東南而背西北其他與各臺略似云二十六日乙亥行一百一十餘里抵第七臺二十七日丙子抵第六臺二十八日丁五抵漠郭圖二十九日戊寅抵第四臺三十日己卯抵第三臺七月初一日庚辰抵第二臺初二日辛巳信宿以俟行李初三日壬午行五十餘里過五虎馬嶺嶺北水皆北流老河出焉至和河齊爾東北與潢河合爲西遼河嶺南水皆南流寬河出焉至寬城南偏嶺迤西入於灤河是日行六十里抵平泉州初四日癸未三涉寬河抵第一臺舊館初五日甲申

進大磯口兩面皆崇山曲折相向水貫其中凡七八里意卽  
松亭行紀所謂達希哈布齊爾者行四十里抵黨壩復行六  
十里一路盡在山中或懸厓對峙或平嶺交通中惟龍須門  
地少平曠有民居市肆焉寬河環山而行自豹河厓至寬城  
凡五涉初六日乙酉進喜峰口初七日丙戌抵三屯營初八  
日丁亥併行二驛抵石門石門者夾山築城爲詣陵及往  
喜峰通衢石路舊崩劣不可容足陳李二姓捐修土道並置  
田納租以爲每歲增修之費往來稱便較丁未年督工

景陵時大有夷險之別矣初九日戊子抵薊州初十日己丑  
抵棗林十一日庚寅抵通州十二日辛卯至圓明園寓翰林  
院朝房十三日壬辰詣宮門覆命賜對於勤政殿已  
正始退

奉使鄂爾多斯行記

麒麟慶

咸豐十一年冬十一月廿七日辛亥奉命前往鄂爾多斯致祭已故諾塔克旗札薩克多羅貝勒額爾德尼綽克圖鄂爾多斯明史謂之襖兒都司在歸化城西二百八十五里河套內東至歸化城土默特界西至喀爾喀界南至陝西榆林府界北至吳喇武界東西北三面皆距黃河自山西偏頭關至甘肅甯夏府延袤二千里有奇本秦新秦中地漢初爲匈奴所有武帝中置朔方郡屬并州後漢末廢晉永嘉後歷爲前後趙前後秦地義熙中赫連勃勃據此後魏爲統萬鎮地後爲夏州北境隋於其地東置勝州西置豐州大業初改勝州爲榆林郡豐州爲五原郡後廢唐初復置勝豐二州天寶

中改榆林九原郡乾元中復故名並南境之宥州俱屬關內道唐末拓跋思恭鎮此五代至宋金皆爲李夏所有元滅夏立西夏中興等路後廢以其地隸東勝雲內二州及延安甯夏等路明初城東勝等州並立屯戍耕牧其內天順間蒙古酋長阿羅出與毛里孩始入河套訖加斯蘭復糾合滿都魯倚爲巢穴宏治中火篩復入其中嘉靖中套西吉囊部落擊破火篩居此後屬於察哈爾是爲鄂爾多斯 本朝天聰九年滅察哈爾林丹汗鄂爾多斯額林臣來歸仍賜濟農之號令招集諸部落順治六年封額林臣爲郡王色凌額凌臣均爲貝子善達爲貝勒沙克札爲貝子阿濟格札木素爲護國公其子都楞晉封貝子雍正中又封定札拉錫爲一等台吉凡七旗先時奉使內外札薩克各部者或一人數次一歲兩

使嘉慶中

仁宗睿皇帝憫臣工勞苦飭曾使各部者毋再以名上故諸曹於咨取銜名時已奉差者向不開送余於丁巳歲曾奉使科爾沁而翰林講讀學士與廳員不相習從前奉使既不及知又不遣吏問訊輒咨部達侍衛處遂蒙此命自奉 明旨後文臣中再使蒙古部者鍾仰山少宰昌及余二人而已十二月十九日壬申奉 旨簡放內閣學士兼禮部侍郎銜同治元年春正月十一日甲午恭請 聖訓十二日乙未理藩院送到勘合兵票烏拉票烏拉兵票及勅箭祭文黃絹袋等件定例往蒙古各部致祭者文臣三品上不得與而拜 命後無改派例往歲文百川少僕祥於奉使後擢宮詹仍以新銜出使余升任後咨商理藩院依二品例填給勘合及領到



各件仍用原銜不及更改二十日癸卯啟程出安定門行二十五里至清河河出玉泉山分流而北東會沙河入白河行三十里抵沙河店東爲鞏華城南沙河出昌平州西南龍泉寺合西山諸泉東流至竇家莊與北沙河合北沙河出昌平西南四家莊既與南沙河合又東南至通州入白河二水跨河各有橋行二十里至昌平明景泰中設衛於此曰永安後并昌平縣徙治於此旋升爲州本朝因之二十一日甲辰出昌平西門漸入山中至南口入關溝兩山相夾亂山交午是日行四十里至居庸關南門西北距延慶州五十里二十二日乙巳出居庸下關亦曰下口又名夏口路皆積石雜以沙礫凡八里抵上關過八達嶺抵北口是日行八十里至懷來縣二十三日丙午行九十里經土木堡沙城堡至雞鳴驛

二十四日丁未循雞鳴山足而行經大河灘香水堡鷓兒嶺抵宣化府是日行六十里二十五日戊申出宣化南關過洋河抵胡家屯明懷安右衛也是日計程六十里實八十里二十六日己酉行六十里抵懷安縣洋河循山而行繞越河流路頗曲仄二十七日庚戌抵枳兒嶺入山西大同府天鎮縣界行夾溝中山勢起伏相間是日行八十三里抵天鎮縣本明天成衛後併鎮遠衛於此 本朝改天鎮衛雍正中設縣二十八日辛亥行六十里抵陽高縣陽高南距白登山二十餘里爲明陽和衛設督臣駐此以爲宣大聲援後併高山衛於此改陽高衛 本朝順治五年移大同府來治升爲陽和府八年府治仍還大同雍正中設縣二十九日壬子出陽高南關涉河向西南行南北去山俱遠抵王官人屯北山逼近

多沙石是日行六十里至大同縣屬聚樂堡三十日癸丑行六十里抵大同府城周十三里有奇東南北三面各有小城環之雲中自漢以來夙稱重鎮遼金又建爲西京以故雄麗爲西北冠二月初一日甲寅行數里入山中三十里至雲岡店詣石窟寺志稱元魏高宗時僧曇曜請於城西武周山鑿石開窟鑄建佛像雕飾奇偉冠於一世意其遺蹟康熙三十五年冬

聖祖仁皇帝西征回鑾駐蹕寺中 御書莊嚴法相額懸之厓間有阿拉善王題額曰雲護蘭山大抵西北各部皆所崇奉自入懷安間有穴山而居者至此窟室尤多又三十里抵高山堡明衛城也自宣化而西山多平衍迨過大同峰巒陡起山徑崎嶇至高山乃復平迤初二日乙卯出高山南門向

西行入山溝行六十里抵左雲縣明原設雲川玉林兩衛於邊外而設大同左右衛於今朔平及左雲縣地後移邊外二衛附入兩城有左雲右玉之稱雍正中改爲縣初三日丙辰行九十里至朔平府南關初四日丁巳出朔平北門一路平沙河流環繞遙望西南山頂廢堠頽垣隱隱可辨皆長城故址也行二十里抵殺虎口向奉使各部者管站處當派通使隨往有撥碩庫巴圖虎曾往鄂爾多斯能通蒙古漢語因攜之往初五日戊午涉柴河登白坡梁比至絕頂羣山皆可平視至佛耶溝復涉柴河抵新店子臺上章京昆都叩謁如儀口外西行之路以和林格爾爲第一臺因路遠而險故於此增一腰站焉山勢平行無險可扼較之喜峰古北紫荆居庸諸口大不相侔惟佛耶溝一帶尙爲要隘耳初六日己未入

山溝陟榆樹梁穿胡同壩至烏蘇圖魯譯言水好是日行六十里抵和林格爾譯言二十家也初七日庚申西行至察汗胡洞察汗譯言白胡洞譯言坑以地多沙而中窪也行五十餘里抵第二臺地名都爾格爾格爾譯言房都爾譯言足數言房閒足五十家之數也初八日辛酉西南行五十里過托克托城抵河口鎮不里許至河岸寬一矢餘水經注所謂君子津也過河後沙岡環繞土人號爲十二連城行四十里至第三臺地名東素海河東二臺皆歸化城土默特地過河而西卽鄂爾多斯境初九日壬戌西北行北望峰巒疊起蜿蜒無際知當爲陰山矣行四十里抵胡素臺河康熙三十五年聖祖仁皇帝親征噶爾丹凱旋駐蹕鄂爾多斯朝見王貝勒等卽此地是日行九十里抵第四臺地名吉克素初十日癸

亥西行抵西拉烏蘇譯言黃水自和林格爾以西至此乃復入山迨出山行八十里抵第五臺地名巴顏卜拉克驛言大難言路不易行也前往科爾沁時第三臺亦名卜拉克其險仄迂遠畧相似自入鄂爾多斯境第三臺棟格爾旗界第四臺達賚旗界此臺入旺蓋旗界自此以西率不通漢語是日計程一百五十里十一日甲子西南行過紅沙梁至馬廠又行三十餘里宿草匝地柔潤如生至第六臺入杭靄旗界地名阿魯烏爾圖譯言地勢廣濶也是日計程一百里十二日乙丑行五十里許至察汗蘇巴爾噶以喇嘛廟旁有白塔也行五十里抵第七臺入鄂爾多斯盟長烏申旗界地名巴爾素海自出杭蓋界無漢人寄居地不開墾草極蕃茂兼生沙柴又名萬年蒿高二三尺土人採以爲薪黃羊野兔百十爲

羣見人輒驚竄無跡十三日丙寅行五十餘里過一大招復行五十餘里抵第八臺爲諾塔克旗所屬地名察汗札達海譯言土白而地勢不平也沙草相開石子率潤潔可愛十四日丁卯西行八十里抵巴顏諾爾以地有大澤產鹽故名復行四十里抵諾塔克旗駐所其地西去甯夏三百餘里南去花馬池約六百里自京師至此計程一千八百九十八里實二千二三百里云十五日戊辰致祭於府第設位讀文酌酒各如儀時額爾德尼綽克圖之子察克多爾札布幼本生弟臺吉巴勒坦綽克圖與圖薩拉噶齊班雜爾西特台權主祭事圖薩拉噶齊率各官望闕謝恩凡內外蒙古各部每旗設札薩克一人以親郡王貝勒貝子公台吉等世掌其事其協理旗務者爲圖薩拉噶齊秩二品主家政者爲札噶拉齊

秩三品下此爲梅楞札薩克駐所謂之和邵所屬之區各有台吉分駐謂之牛彖台吉以下有章京昆都畢齊克契撥碩庫等畧如台站之制十六日己巳由諾塔克言旋至察汗札達海從者尋取石子拾獲浙字康熙通寶一枚感賦二絕云愛石從人笑米顛披沙何意選金錢分明認取康熙字想見仁皇駐蹕年年來泉府事紛更當十何曾出帝京卻憶當時圍法好不論胡越總流行十七日庚申抵第七臺十八日辛未至阿魯烏蘇自察汗札達海以西絕無溝澗今日涉兩水冰已漸開意黃河當解凍矣十九日壬申抵巴顏卜拉克二十日癸酉抵吉克素臺澗冰盡解水流有聲二十一日甲戌至東素海自吉克素臺以東始間有樹木二十二日乙亥涉河而東行五十餘里抵黃河西岸遙望河東山勢橫列如屏



時河冰甫解傍岸有水處橫以木版河夫扶掖而過中泓猶凍渡水與踏冰并行乃濟四十里抵杜爾格爾二十三日丙子抵和林格爾二十四日丁丑至新店子二十五日戊寅抵朔平府二十六日己卯至左雲縣二十七日庚辰抵高山自朔平而東斥堠極多故堠多在山上較新者尤爲周密足見古人之布置矣二十八日辛己抵大同滌邑令假得京報知各路屢有捷音殊釋積慮二十九日壬午抵陽高縣三月初一日癸未抵天鎮縣初二日甲申抵懷安縣初三日乙酉行二十里洋河冰始半開河聲如呴亂流以渡又二十里抵夏家屯兵部由驛遞到公文知於二月十七日蒙 恩補授鑲黃旗蒙古副都統又二十里抵胡家屯初四日丙戌避宣化洋河之險改由萬全所屬之太師莊渡河水田鱗次溝洫交

通是日行七十五里至宣化府初五日丁亥經雞鳴山清泉  
灑灑隨處涌出皆入洋河洋河出天鎮入懷安河勢或南或  
北自過太師莊後河遂南趨經老龍背逼近山厓水勢深濶  
兩日來皆循東北岸行不復涉矣是日行六十里抵雞鳴驛  
初六日戊子抵懷來縣初七日己丑入居庸關初八日庚寅  
至昌平州初九日辛卯進安定門宿法華寺初十日壬辰進  
內覆 命兼謝授副都統 恩直吏部引見詣養心殿叩謁  
如儀

### 盧臺述

錫穎

道光三十年庚戌大人爲直隸通永鎮總兵官駐盧臺盧臺  
甯河縣治甯河故寶坻縣之梁城所雍正九年設也總兵官

則道光二十三年裁陝西西安鎮移設以防海疆也改歲咸豐初元辛亥纘爲觀海之行輒灘嫩堰沮如不可蹟而返遂諏父老以盧臺沿革利害莫能對纘迺前席而告曰青縣之衛河西南有城三十二里陷入契丹者唐之盧臺也燕劉守光更置盧臺軍爲晉周德威所拔在寶坻東南百六十里俗名將臺者五代之盧臺也今之甯河卽守光所據之梁城盧臺亦卽守光所置之地也且夫枕渤海踞大野非由枝峰蔓壑可効深測險以爲固也鹽利之所在男薪女汲煮土而食其力羣不逞之徒伺居者所獲啖之而不畏法者以廣漠無際之易於逋逃也

宣廟上酌古昔下爲瘠苦之民捍患禦侮于是虔擇高曠之地簡精勇之軍設重鎮焉其爲海疆防抑末也然則海無用

防乎曰奚而不用也籌海防之策之上焉者非防也海不可至於用防時也然非纘所敢議也父老曰諾遂書之

許氏山莊記

鐵齡

吾友許君買山於昌平之北鎮壁之麓其林壑之威紆麋移之結構與山田一歲之所入可以忘憂可以娛老許君將解組與其夫人及其幼子偕隱於此又將攜其書畫金石之可寶者盡聚於此又將擇於其山之左右可以藏者自營生壙於此鍊盦聞之曰許君誠達矣未知其遂能焉否也卽能矣未知其樂且安焉否也許君弱冠時與其先方伯長笏臣先生治盜於沈沂數百里之間匹馬短後恬於殺人不爲怪吾少時猶見其意氣之盛矣君今將老矣而精悍之色見於眉

宇一旦有以兵事來請者猶可以一奮其所爲而固不虞人之馮婦我也其於茲山有終焉之志能不能則未可知矣且古之隱者皆憫其時之不义身之不用發憤太息而爲之者也有大不樂於彼故有所樂於此而其窮餓困乏窘辱無聊不平之境且幾幾不能以自勝若其功成名遂身退者可以樂矣而造物之於人則尤靳之君雖隱於下僚乎而若以不可知之富貴奔走於形勢之涂敝敝焉自役其心與力吾知其有不爲也然則君之澹泊優游遂有以忘憂而娛老也猶信他日幅巾登堂相與歌招隱之詩飮我以青精沃我以白雪卽以此記爲蒿矢也君其許我乎

八旗文經卷第四十一終

八旗文經卷弟四十二

碑甲

卅三元重修盤江鐵橋碑記

劉秉權重修廣州府學碑記

吳興祚秦伯墓碑記

王永譽廣州將軍府題名碑記

于成龍不改亭碑銘

鄂海 萬壽亭碑記

鄂海 聖德撫苗碑銘

年希堯怡賢親王廟碑記

重修盤江鐵橋碑記

卅三元

盤江之源出烏撒繞曲靖西導七星關而下安南境爲入滇  
渡處兩山夾峙類巨靈擘之以界滇黔者也兩崖中絕壁立  
如削江水注之淵澄而湍激比險於瞿塘濫堆雖差狹其濤  
瀾頌洞不可嚮邇魚鼈弗窟蛟龍弗宮鯨鱷怪物弗能游是  
以方舟無功用楫無力雖忠信如梁之父莫敢涉也顧盤江  
之外滇實宅焉茲爲黔脣齒輔車之昵若之何其隘而不可  
渡也前方伯朱公家民頗出奇思迺錘鐵以爲絙鑿崖以爲  
椽互兩壁而貫之緯以板其爲絙也其爲板也如其度蓋亦  
棧之類橋者名曰鐵鎖橋始通道云卽莊蹻以下曾未及此  
不知當日何以飛渡而迄今有之抑亦海內之奇制也歟第  
鐵之性也剛絙之性也弱橫互幾十澮其中自弗能強矣行  
其上者足左右下絙輒因之升降而板則或起或伏敲躍呶

軋人之體亦與之搖撼不能自持如乘巨浪之艇如履將泮之冰鮮不掉眩而寒栗者且眠前者陟岸而後者始登不則相躡而愈震殆欲前欲卻俱不可得危孰甚焉況萬騎萬卒之邁邁乎我大清削平海內拓土暨滇而疆場猶未盡靖恆遣禁旅更班彈壓歲運數百萬金錢以供芻糗月頻至焉此外飛章羽檄及他遞郵絡繹不絕而昔之七經今爲寇燬者二則力益弱而度益危人胥患之督憲趙公統攝二省大政嘗往來於曲靖安順閒歲數道此橋乃熟習形勢則謀於予曰盜亟圖而新之予拜手曰可於是營諸鐵索之次鼎建輿梁焉石之不可而取諸木迺命官督丁役采於山得巨柱二百二十八株排連之使卧於兩岸臨水復鎮之以巨石柱之以勁榦各層累而加率如之凡疊序出焉咸鑄其本加固



及埒木之末不接者僅三十有四尺選材可六丈者矩之以交其上而彌縫之植者爲檻幬者爲屋闕者爲門無不宜焉於是乎騰未雲之龍駕未雨之虹矣則與古之鐵索並存於險阻之間雖踵事增華神明其物不可謂非奇思軼出者也視故橋之用則可以雁序而前可以魚貫而越可以方軌聯鑣攜笈荷僮千萬人逐隊建旗而坦行且不知有山水之厲甯知有風搖電掣之驚乎於戲水上之窮前人濟之以金今也繼之以木五行之利溥矣哉是役也授略於總督趙公廷臣濟其用者藩司顏敏糧道王廷弼程其工者安順司李沈璣永甯刺史徐國維董其役者盤江游擊王官姚有智安南守備程璧余則贊成之而已工役之值則取諸關稅三閱月而就不足以爲勞費俾由滇黔者自今無恐公私賴之僉曰趙

公濟川之功哉

重修廣州府學碑記

劉秉權

環粵皆山水也介在荒服自秦始置郡州剖符嗣後賢哲輩  
出遂稱名邦子生長三韓距粵萬里曩者備官侍從搜祕石  
渠流覽版輿緬焉神往我國家以文德治天下聲教久敷  
於遐方予叨承簡命謬膺節鉞撫茲南服控五嶺之嵯峨  
三江之澎湃紫海滄萍朱崖奧折所披圖者今則躬歷矣美  
哉山水標險抒奇育靈挺秀惟其風土擅勝是以人才蔚起  
先達名世難以悉數如唐宋之最著則有張文獻余忠襄崔  
菊坡其人於明則有智略之何東莞儒雅之邱瓊山經濟之  
梁文康理學之陳白沙氣節之海忠介其人昭代以來蒐

羅俊又接武聯翩迨三十年凡茲彬彬崛起者多文學之士  
郭璞所謂南海衣冠之氣方開而未艾亶其然乎夫端章服  
者攝其領樹巨蔭者龐其柢會省固十郡之宗源而巒宮實  
多士之淵藪廣州郡學據佳趾於靈洲之東左則虎門潮汐  
層涌而來右則西樵峰巒疊嶂而峙珠江一水盈盈洄繞於  
前白雲諸山嶙嶙互懸於後志所載禺山者屹居於宮之中  
陟嶺而望之形勝宛在矣宮之襟對爲文明門向因戒嚴守  
扃術家者謂氣脈壅窒有關庠序予與前督軍周公會商於  
藩府洞啟有日矣但茲數仞之內自兵燹之後未經修葺以  
至棟宇將頽壁垣半圯橋門鞠爲茂草泮水率爲污萊有事  
茲土者未嘗不躑躅興嗟矣迨夫庚戌秋祭予屆齋期是夕  
隱几之間恍見先師冠佩雍雍向予告語焉夙興盥沐展

拜傾誠起而循宮諦瞻有動乎中因首蠲俸金百鎰構材鳩  
工良賴在省三司各道及太守相與協心經畫共勩盛舉爰  
是整復舊制廓清故基約椽之舉大興丹雘之地加飾櫺星  
有伉戟門將將矣首正殿以崇 至聖次兩廡以妥先賢又  
次及明倫堂以宏開講藝之地至於啟聖及名宦鄉賢諸祠  
在在加修所以追尙淵源而興起後學也旁闢西圃肇建一  
亭顏曰觀德俾濟濟多士爲肄射之所猗歟萬年之俎豆聿  
新百粵之文風攸繫將來階此發祥者霞蔚雲蒸麟麟炳炳  
余撫茲土亦與有光庶幾仰佐我 國家右文之治工師告  
竣援筆記言壽諸石以志垂永久云是役也不煩公帑不勞  
民力亦不敢苟簡從事其督工之員效有勤勞者例得並書  
於左

泰伯墓碑記

吳興祚

周有天下受之於殷傳八百有餘歲泰伯讓國而逃之荆無  
尺土之基所居成邑遂起句吳至於今三千三百有餘歲自  
伯以來禪位號有天下者不可勝紀皆已不得名其故居惟  
句吳一彈丸地猶得名之曰泰伯之里嗚呼是蓋六國之所  
不能侵而秦皇之所不得併者也嘗試推之古今之所謂可  
欣可豔可守可傳而不能忘之於心者亦多矣吾觀泰伯之  
心皆擴然而無一有而其所有者僅此忠孝之性受之於天  
以爲人造次顛沛不可以貳值時之沮則旁行異志冀一遂  
焉譬如水之百折而必趨於海非有所爲而爲之也及乎所  
至之地義而歸之奉以爲君遂能立國啟土龍旂介圭傳數

十世亦忠孝之理自不泯於天壤耳當其逃之之日始志豈及於此哉嗚呼所以爲德之至也伯有廟在梅里其墓在皇山南徐記及聖賢墓記皆同非若史遷所稱箕山有許由冢滅沒恍惚不可徵信又非若虞舜崩於蒼梧大禹葬於會稽遠其國都而離其人民者比也則以吳民而修伯之廟若墓譬如以子孫而修其始祖之廟若墓宜乎歲歲從事弗怠也乃明季以來自姜尹文魁倪君埕華公允誠而後無有過而問者今墓道之間荆榛叢之樵牧游其上矣小子興祚伯裔也又官茲土其何能辭爰以俸錢供埽除之役邑人助之自癸丑歲某月經始畢於某月爰謀建碑以識久遠後之讀是文者深思三千三百餘歲不替之故而以伯之心爲心則伯之垂教其猶未遠也夫

廣州將軍府題名碑記

王永譽

五嶺以南廣州爲一都會西控牂柯北匯湟武東跨龍川二  
三千里閒其安危常繫於廣州廣帥得其人則一邇盡治有  
明之世嘗以一都督總兵鎮之而屯衛之軍則屬之都使司  
叅聽節制於兩廣總督其或有所征討然後命將軍佩印以  
出廢置無常員我 國家平一字內兵不畱行而嶺海之閒  
獨煩再駕平南靖南二藩率師環攻厯九閱月然後克之  
世祖章皇帝因命兩藩畱鎮末年移靖藩於閩中

今上之十二年命撤雲南廣東福建三藩之師踰年而滇閩  
逆節交偪廣州十五年春廣州亂明年夏平南嗣藩以廣州  
歸正十九年爲其下所告其冬 命撤其眾歸於京師二十

年臣不佞特奉 簡命爲鎮守廣東將軍領禁旅三千與副都統二員協領八員參領八員防禦四十員驍騎校四十員同事於廣州廣州內城舊居兩藩兵目眾多凡有司之署庶民之家皆權移於外二十一年奉部文復官署於內城兵民東西分居不令相襍自歸德門以西爲旗兵居焉比歲又改左右翼鎮四千人屬之將軍標下分左右前後四營每營游擊一員守備一員千總二員把總四員蓋翼鎮之設昔隸於藩今而改屬將軍固其宜也謹按今制十五京省之大有將軍者六江甯陝西荊州浙江福建廣東皆重地也夫提鎮經制之兵棊布於天下節之以制府綏之以撫軍固足以救寧中外防患未然然猶往往用禁旅將軍之重爲之鎮守若無事於地方而坐糜歲月者 廟堂之上籌之審矣京師居重



馭輕之勢東南內地雖無所用其防閑而四方耳目相承一  
旦盡撤諸藩則若覺其闕略故慎簡親賢分遣精銳落落然  
參錯其閒若五岳之拱太陽股肱之承元首於以昭朝廷之  
德威增皇圖之鞏固任綦重矣臣實何能足當其選賴先將  
軍向嘗節制兩粵遺澤在人七載於茲差免瑕咎今當赴  
闕之日念廣東之有將軍予爲首任得與二三英僚朝夕斯  
堂綢繆謨議而外讀書說劍作字賦詩入奉母夫人溫清定  
省之懽出接搢紳先生文酒過從之樂皆有不可忘者此坊  
舊名貞烈牙署建自靖藩平南嗣藩益增修之其改爲將軍  
府自予始也古者百官聽事皆有題名之石所以勸戒將來  
余不敢昧斯義謹書氏籍於左方嗚呼慰 九重南顧之思  
當萬里長城之寄可不慎哉可不慎哉康熙二十七年戊辰

仲春

不改亭碑銘

于成龍

保定張氏園井亭者爲前明光祿寺少卿張公建也當崇禎十七年三月流賊猝陷京師保定櫻城拒賊有死事之烈首其事者公也

世祖章皇帝時有科臣疏聞於上從郡人請祀於學旣而常郡丞申請表揚闔郡之抗節死難者復同祀於忠烈祠茲則其死忠之地也方保定守於京師之旣亾也賊攻城羣呼公舊官名張吏部公罵賊城陷大書壁上曰大明光祿寺卿張羅彥義不受辱縊死井亭婦女俱投井死闔門殉者二十有三人所最奇者公配宜人趙氏先從公自縊不死又入井三

日不沈家人投綬出之賊恨公堅守既大索城中復於城門嚴詰得一張姓者賞五十金宜人方在憂懼中忽而假寐夢公曰孫出矣解己朝衣覆宜人宜人覺語家人家人共以筐舁宜人用被蒙筐比至城門賊蟻聚無一人問去城四十里遇老嫗抱公孫至卽今之秉曜也彼時方周歲秉曜成立家已落園已他質弁亭已圯迄今三十餘年不爲張氏有也園井偏近余牙舍余爲捐俸贖園構亭祀之亭落成取易井卦改邑不改井之義題曰不改亭張生請紀其事勒諸石竊謂古今有大戒無所逃於天地之間者節義也節義不明人極不立人極不立則天地之心無所寄而帝王之教無所施然每讀史至鼎革之際士大夫爲禍福所動苟一時之生而貽萬世之譏者多矣仗節死義代不多人如公者豈非有明一

代之臣哉嗟乎公之忠烈已登明史逸事盡於墓碑首事拒賊詳於保定紀事不具述茲特識其建亭始末如此公伯兄癸未科進士羅俊罵賊於城頭六弟武進士羅輔於戰四弟文學羅善公子文學晉從子文學伸於園外井其於此井者則公妾宋錢子婦師暨公一幼女也其闔門婦女或纓於或井外皆得祀於亭倡義者公例得從公也公諱羅彥字仲美號二酉崇禎戊辰科進士銘曰

昊天降割殄有明鴟鵂奮怒獬豸掩遏赤鴟敞陽精宮殿流血傾神京撓膺稽顙多簪纓有勇光祿張少卿京師已陷奮忘生攀弧擐甲櫻孤城一木難支六日傾從容就義毗裂經寫頰忠字耀日星二十三人同沈冥用酬養士彰地靈易水湯湯郎山青千年萬年仰此亭

萬壽亭碑記

鄂海

欽惟

皇上乘乾御極秉道綏猷備聰明睿智之資兼五帝三王之學文治丕昭武功赫濯固已措萬方于磐石之安鞏社稷於金甌之固矣於時深仁廣被至德宏敷萬國民心咸懷望幸維此秦民向罹災祲實蒙拯濟賴以生全於康熙四十二年春合詞籲臣恭請 聖駕西巡以遂就日瞻雲之願我

皇上俯念輿情允荅民望於是年冬十月聿頒 詔旨陝西巖疆重地乘此冬令農隙之際觀覽民風詢察吏治簡閱禁旅整飭軍營實爲要務用是輕裝減從諷吉西巡凡往反供億皆取給於官府纖毫不累百姓卽有市易亦飭所司依時

給直沿塗官吏禁借名科索及與扈從官妄行餽送有不恪  
遵生事擾民者以軍法從事 天語遙頒歡聲動地臣等聞  
命之下偕陝省文武大吏預期星馳十一月朔有五日恭迓  
聖駕於山西平陽界越十二日 鑿輿入潼關億萬臣民趨  
迎道路黃童白叟瞻拜 天顏獻果捧漿者駢肩累跡十三  
日 駕抵渭南校閱軍士褒賞有加馬十四日 上至零口  
小獵鳴弦激羽中必疊雙十五日 駕抵西安自斜口至城  
東門旌旗耀日鼓吹溢途士女分行香煙四十餘里不絕是  
日也太和之氣洋溢宇宙風和景明深冬如春天人心意益  
交暢而僉符矣十七日 駕幸演武場大閱

皇上親御戎衣設鵠樹侯連發五矢無不應弦洞的一時文  
武大小諸臣滿漢官軍及塞外來享之苦苦磻兒王貝勒台

吉俄爾多斯貝子台吉輩莫不欽仰

聖天子智勇天錫神武光昭懽忻舞蹈咸呼萬歲於是聖心喜悅溫言獎勸各將士實心盡職出大庖芳饌綠酒瓊酥飲勞之以示慈惠頌天府文錦貂裘錦韉名馬彤弓盧矢賜予文武諸臣各有差而行閒介士賞賚餉銀復以百萬計云二十一日特頒 恩詔秦省爲天下要地曩歲荒旱所司未經奏報朕訪聞得實多方籌畫運米拯救分行蠲賑秦民始得少蘇自三十二年遣皇長子致祭華山以來雨暘時若年穀豐登茲見百姓歡迎載道且知今歲有秋地方文武官吏能恪勤奉職滿漢軍士亦皆訓練有方朕心甚慰凡巡幸所至必大沛恩膏今將陝西甘肅所屬康熙四十二年以前各項積欠銀米草豆錢糧盡行蠲免 玉音宣布萬姓歡騰復

優恤在籍老臣禮問山林逸士厚施粟帛頤養高年將士曾致命行陳者賑其家室其子弟有才能英異者越次錄用凡行慶施惠恤忠勸節之典靡不備至而我

皇上道藝兼綜八體六書駕唐軼晉詩聯題額超聖入神於閱武蒞政之餘親染宸翰普賜羣臣人人如獲重寶數日之內萬幾之勞而精神萬倍綽有餘裕益無逸作所行健法天自開闢以來所未嘗有也二十二日 聖駕回鑾臣民遮道跪泣如赤子之戀父母途次絡繹至潼關不忍舍去臣等恭送 聖駕目擊秦人瞻依眷戀忭舞之誠并滿漢大小臣工軍民人等頌祝 皇恩永不忘之意臣等叙其大槩敬勒貞珉樹之

萬壽亭左仰見



皇上聖神文武昭示億千萬世與南山華嶽地久天長同爲無極不獨西安履任諸臣受恩深重各宜公忠廉潔咫尺天威務盡竭力致身之義卽三秦老少士女霑被鴻恩爲臣者當相勉於忠爲子者當相勉於孝兄弟當相篤以恩室家當相安於順擊壤歌風無忘 帝德此則臣等惓惓勒石之微意也

聖德撫苗碑銘

鄂海

我

皇上智勇天錫自臨御以來仁育羣生義征不惠德威遐暢遠邁前古始者三藩肆逆臺灣負險  
皇上神謨獨運指授方略決機萬里以次削平及噶爾丹跳

梁沙漠特勤 法駕三征不庭元惡就殲脅從率服由是薄  
海內外盡入版圖航浮索引重譯稽首獻見於 闕下者皆  
書傳所未嘗紀自生民以來未有功德若斯之盛者也維紅  
苗僻處南服虞夏以來未聞向化依巖據谷時出爲民患康  
熙五十年臣鄂海騰 命總督湖廣披圖按籍以鎮草邊牆  
宜因舊址修築繪圖奏請

皇上睿慮淵深謂如爾議未足扞禦紅苗 令同提督巡撫  
會勘臣鄂海於九月己酉偕提督巡撫總兵諸臣自司城北  
出舊邊牆馳入苗地庚戌至毛都塘苗人吳老鐵等遣其子  
弟導迎申述誠款壬子復自司城至乾州苗境宣  
上德意徧諭諸寨渠長羣苗踴躍抃舞咸頓首曰

皇上如天覆幬物各得所苗人雖阻絕荒遠然戴高履厚何

敢自棄皆願爲編氓輸賦供役以奉

天子於是本年十二月至五十二年五月毛都塘等五十二寨計口八百有八計口三千一十二相率至武昌歸順自六月至八月盤塘窩等生苗八十三寨計戶六百八十三計口三千一百八十一亦先後來歸臣鄂海等次第奏聞

皇帝曰惟紅苗憑恃深阻從未歸化今旣各輸悃誠嚮風慕義朕視天下內外一體地方文武諸臣務體朕懷令皆安堵樂業咸遂生養從容化導教之禮讓其有侵蝕擾害者督撫糾察以聞臣竊思自古以來未能馴服之苗乃不耀一兵不折一矢而絡繹內附願同蒸黎皆由我

皇上天授神武赫聲濯靈有以懾服羣苗之心而又湛恩汪濊浹髓淪肌故一旦革面洗心與萬邦黎獻共沐聖化

自今伊始凡三楚文武大吏暨郡縣令長其務保護勸導輕  
徭緩刑以仰副

聖天子勞來匡直之至意而苗民世世子孫畏威懷德長爲  
良民我

皇上神功駿烈永永無極是宜勒諸豐碑昭示萬世臣鄂海  
拜手稽首而作銘曰

帝德廣運澤被萬方顧茲鎮筸與苗接壤率梗弗順僻在要  
荒

皇帝仁聖不剿而撫苗悔前非式歌且舞相率來歸永甸禹  
土

帝有恩言恤苗新順爾官爾吏懷撫誠信耕織以時孝弟是  
訓苗民樂業供輸恐後萬口一辭祝

天子壽視此豐碑與天地久

怡賢親王廟碑記

年希堯

雍正八年夏六月內務府總管差督淮宿權稅臣希堯請就所居之房山縣建立怡賢親王廟以修歲時祠祀 敕曰可竊以詩人之美衛武公也曰有斐君子終不可諉兮而傳之推原其說以爲君子賢賢而親親小人樂樂而利利益其所施者遠則其所慕者深是以聖人通人情而定禮曰有功德於民則祀之誠以知天下有難已之思無忘之誼也我怡賢親王以介弟之貴獲奉元良翊聖戴天勤民恭己八年之間天子方運堯舜之治而王卽宏皋夔之業天子方隆手足之寄而王卽效心膂之忠

天子方除莠刷瘡以播上蟠下際南曜東漸之澤而王卽手奉風霆雨露以整齊而鼓舞之故其德業之盛如日月之得乎天而益明江河之振乎地而益沛春風之得乎時而益偃是雖子淵之善頌有不能形容其際會焉而王金玉其度彌慎彌恭嘉謨忠告善必歸君是以道濟天下而不知功在社稷而弗有至於庶績百度靡不裁成中則汎應而曲當焉未幾王以疾薨于位

天子震悼弗甯凡所以致哀榮於王者無所不備而其讜言隱德造膝陳情於從容密勿之間者又悉以敷告中外天下臣民奔走謳思若將弗及 朝廷用矜其志許祭許祠而後天下之人得以尸而祝之是豈王之私義感人哉王之忠誠足以動物也故享於大烝禋於太室酬庸之典亦云備矣而

非以慰四方尚德之情也希堯從大夫之後沐浴王之德澤勤篤王之訓誨出於凡百有位者奚啻萬萬又何敢自遺其鄉邑而徒殷邦人以袞衣繡裳之思也哉用是庀材於林伐石於山旣構旣塗越明年而廟成而王之靈如水由地中宜亦無往不在也將使祝釐介景者恆於是祈年溧雨者恆於是王之蔭佑則固然已然非所以奉而祠之之微願也夫希堯受生成於王者至矣一念不忘行年六十惟有矢此心以奉

君國以勤職業以淑其昆弟子孫歌之詠之至於沒齒若徒云俎豆烝嘗而已是豈王之所降鑒者乎書曰黍稷非馨明德惟馨嗚呼其敬之哉

八旗文經卷弟四十二終

八旗文經卷第四十三

碑乙

福敏重修英衛公廟碑記

鄂禮重修歷下亭碑

李鐸贈忠武將軍周公碑記

常安修造廣西司監碑記

常安邱氏祠堂碑記

雅爾圖惠濟河碑記

覺羅雅爾哈善重修于清端公祠并清理祭田

碑記

黃廷桂重修通濟堰碑文

重修英衛公廟碑記



福敏

英衛公廟祠春秋吳行人伍公也公歿吳人祠諸江上號胥山廟唐封廣惠侯錢武肅王奏改惠應旋晉吳安王宋賜祠額忠清改封忠壯王又建英衛閣以祀元季疊晉八字王封明釐祀典詔郡長吏歲以九月二十日祀而祠額不改 國家祇膺寶命百神率職薄海際天颺紓濤謚雍正紀元之元年勅封英衛公 詔發帑銀以新公祠於是知杭州府事臣魏定國知仁和縣事臣胡作柄知錢塘縣事臣楊夢琰祇承祠部牒檄選材鳩工肇工於秋八月之十有六日葺事於十一月之十有七日堂寢門廡彤碧絢耀而役不逮坊里杭人士聚觀新額謂宜有以宣 上德述神貺臣福敏時署巡撫事爰紀其源流暨歲月鑱諸麗牲之碑謹按公懋勳偉績春

秋左氏傳史記蓋綦詳矣獨沒而歸神大海依潮來往其說始見於越絕書吳越春秋而越絕謂捐於大江中或疑當屬揚子又越境北至秀之語兒吳山地本隸越不知章沅番禺胥號大江而是時吳適棲越今棠邑姑蘇諸地雖雅多公蹟胥山要以杭爲準至其神之揚靈潮汐也如武肅王禱於祠而沙漲十餘里宋馬亮禱而潮卻且出橫沙數里趙與權肅禱而江干七十八里之決以塞英威燁赫焯有可紀

天子軫念浙東西耆庶敬舉秩祀崇號上公而祠部檄守臣新敲腐剝泐之棟墉以妥公靈視前代禮有加焉宜矣昔漢有防海大塘唐史載鹽官塘浙江惟富陽塘錢塘長隄差可考然白居易任刺史業慮濤激西北而大曆八年宋祥符景祐慶歷元豐淳熙紹熙元致和暨明洪武後五大潰決毀陷

漂敗不可勝紀唯 國家修舉水政警惰覈冒其於捍江捍  
海實克舉端木氏趙氏暨范陽酈氏之所錄王充虞喜盧肇  
燕肅余靖張載蘇軾史伯璿金履祥之所覃思而極論華信  
李濬李蟠後諸賢之所昕塗夕燎而僅獲集事者胥營萃其  
經畫以見諸石固木櫃絡竹排椿間而祇薦罔獲矯誣水害  
迄用是息然則山陽之材鴻鷺之羽百鍊之鏃有所不能抑  
鐵輪鐵紼以貫鐵幢有所不能鎮而稽望秩於虞書繹懷柔  
於周頌此其克符祭法禦災捍患之指而神職以其民生以  
乂者也且杭郡東南形勝遙控海疆當桐江入境東觀定浮  
錯對裏山漁浦諸峰峙青點黛及其出龕赭厯沙潭會錢清  
上虞兩江而東也近則石墩白埕遠則花鳥陳錢以迄於葉  
壁疊島斜鳥盤臺之外且不啻億萬里而鯨鱓鱷霧訖偕鹽

官潮胥帖粹然則於越之西陵衝波可以無庸擊禹航之西  
津恬流可以無庸渡而靈戈威矛恆偃戢於浪山濤屋之中  
俾杭郡百萬戶廬舍塋壙無虞震騰者惟公衛於斯滋固而  
聖天子之德海涵天覆而莫之有涯也臣敏等備位列嶽爰  
敢附唐宋守土臣後肅撰廟銘焉其辭曰

艾陵退息城山進攻凡爲臣者孰如公忠昭關東奔紀南西  
越凡爲子者孰如公孝維忠維孝千人之英歿而歸海海若  
震驚一日再來素車白馬火霆錯擊銀潢倒瀉揚波重水異  
壤同神忠孝協軌以衛斯民

帝德覃敷爰被二浙濤清噴玉隄堅屹鐵乃報公功崇封肇  
開瑩參星斗楹餘雲雷醞酒刲牲雅歌節舞湖平山碧樂此  
終古

重修歷下亭碑

鄂禮

歷下亭者唐李北海杜少陵觴詠處也亭在歷城西北隅四面環湖遙對歷山之下故曰歷下云雍正十年壬子春正余奉命督鹺三月巡視山左其時歲比不登災沴洊告目擊凋瘵餘生凡瀕海之民私相熬波煎素蹈法禁繫狴犴者肩駢趾錯方憂民不暇奚暇尋幽問壑以博游騁之一快也我皇上軫念東省宵旰焦勞開倉困賑貧乏截漕糧平糶糶以拯民艱濟民食仁恩所沛周於茆葑以此感召天心庥和協應嘉祥疊至卿雲屢徵雨暘時若而歲乃大豐及季秋再巡茲土輜軒所經無復昔日鳩鵠之狀愁歎之聲而沐浴聖德歌詠大平者與車塵相接比至歷城彌覺民氣和樂

豐稔之象室家相慶公餘少暇與寅僚諸君子詢風問俗訪山川探名勝而歷下亭則逼近子署齋之後由署而北少折而西爲明湖一曰西湖於是駕湖舫湖水清瑩可鑑毛髮荷池蒲沼菱汀芰沚曲折迤邐與湖逕互相組織輕舟飄渺波穀潏澗如坐冰壺之中行蓬萊之上幾不知身之所至也遙盼一亭翠水環繞聳矗雲端艤舟相向指其地而泊焉乃升亭四望而天空水清山高岸闊譙樓壯麗綺陌參差曠然在目循亭而北碑石排立北海少陵之句左右並懸循碑而北迴廊曲檻窗櫺洞然折而西南廊檻宛轉相承幾十數楹西向一小門復承以十數楹再折而北石欄四抱築臺中央覆屋臺上或升臺而眺或憑檻而臨忽坐忽立忽步忽倚仰見夫雲之流鳥之飛俯瞰夫魚鰕之游躍荇藻之繽紛無不悠

然自得隨所至而憩焉恍與李杜諸君子謳吟而上下也抑聞之歷山舜耕耘地也揮絃解慍之風猶有存焉者乎方今聖天子之播南薰而阜民財者尤使者之所樂聞步山東諸父老扶杖而觀德化之成也則歷下之游豈爲一觴一詠遂足以紹前賢而誇盛美乎溯亭之創造顯於齊州李君之芳此北海太守所稱吾宗固神秀體物寫謀長者也嗣此或廢或興明滄溟李公乃大修於前 國朝賢使君皆能踵其事於後庚戌秋水泛漲惟遺一亭餘皆傾圮今運司楊使君樂其歲之豐也復倡而修之視前規模益宏敞增麗不逾月告成而予適乘驄而至遂卽其亭之興圮之自與登斯亭者忻戚之由而書之非僅以紀游觀之盛云

贈忠武將軍周公碑記

李鍇

公姓周名遇吉遼東錦州衛人營州之墟蒼龍漏精溟渤噓  
氣雲蒸焱舉而公生焉有明失馭寇盜亂紀鼠齧蠶蝥合離  
無常公起家甯遠勦力戎行累樹懋績崇禎十三年擢同知  
總兵官援勦河南屢大破賊擊敗李自成禽渠魁朱連李清  
山俘諸京師公一誠浹中五德備具用能天弧準狼有發必  
中賊懲威稜凶箠遠戢十五年作鎮甯武公以國家丁搶攘  
之會黔黎枕萑苻之憂以爲所恃在心匪險與馬於是倡勇  
揭義作氣厲忠是以蕞爾三關嚴障萬里明年正月賊犯太  
原公飛馳赴援軍裁出而太原陷賊前鋒過代聞公至踞朔  
州脇公舅氏以書喻公公立斬之賊以虛聲謀犯京師會元  
崗副將熊通貳於賊盛賊威公手斬之手提通頭腥血污衣



慷慨神踊集眾議曰賊且犯京師千里望風未聞騁一騎以  
扼之者我伏精銳萬乘其驕阻隘以擊之賊必創創則京師  
之圍解矣同知吳鉉不可公曰太原已破忻崞代朔賊悉有  
之我嬰城守賊必并力困我是坐自斃也而京師且危議未  
定鉉陰塞門堅不令出公仰天歎曰唉死矣復何言賊宿憚  
公偵知兵不出乃率二十萬眾二月己卯薄城下門其四門  
連日夜公一士心整惰氣輸巧墨閒捍禦以幾藉兵寇械餉  
卒虜肉於是僵尸溢隍熱血殷堞賊憤益力攻辛巳平明城  
東門陷公亟升埤反擊之有所指撝輒貫腦洞胸肉飛骨糜  
自成以騎邀公公曰民無罪勿殺退十里當見若自成佯退  
踞文昌閣而徒騎實充斥扼衢巷公知不守縋而出自成立  
起迎之公曰告若所以出者明殺賊購若頭吾所命也民無

預矣速死我賊脇以刃不動瞋目如炬許詒羣醜賊怒披腹  
出腸死年四十有四若公者保民於危以仁畢節臣德純一  
死國爲烈矣諸將聞公死愈益奮呼謀并命於是游擊將軍  
崔雲及王前士呂品貴王尙慎張大選高日光俱死之楊鼎  
勳鼎樞兄弟者博士弟子也善火鎗當其守禦也公手簪以  
花曰努力賊退聞於朝及是亦死之若諸君者沈毅剛果激  
烈有發明斷在中誓爲鬼雄抑公有以結之也夫人劉氏集  
僕婢於庭曰死于賊孰若生殺賊皆曰諾乃先樓積薪爲死  
所然後人飲以酒操弓矢登屋大呼自辰至未射賊尸相枕  
藉賊震駭縱火火後垣夫人殺過當乃相率赴火死若夫人  
者猛鷲柔脆冠冠於笄智以輿勇外內合度抑公有以式之  
也賊大憤曰兵興殲我卒未有若是者毒掠數日去越四日

癸未麾下材官侯劾義斂公尸葬於城東郊我朝追贈鎮  
守山西三關太子太保忠武將軍夫人劉氏殉難節烈夫人  
祠於城中街春秋祀之銘曰

建極失中皇輿傾仄沴氣公行牽正作慝獨復之行簡珠于  
礫野火手撲妖狐風擊與土死生遑計無益乾坤載息日質  
月死金苦火烈各有所矢大同錄忠貴遠是視左晉右順曰  
祠曰祀嗣以貞孺用翼前史

修造廣西司監碑記

常安

古今執刑之官誰不以囹圄一空爲志而設獄造監以爲阱  
民之具者何哉古者圍土聚教罷民有害民者寘之圍土而  
施職事以嘉石平罷民凡有罪而害及州里者桎梏而坐諸

嘉石刑獄之設由來久矣後世奸僞日滋豪彊貪暴之徒謀人取財至於蔑國典害良善往往冀倖法網脫諸桎梏之外於是限之以囹圄繫之以縲紲守之以犴狴環之以荆棘有遂士縣士之官各以其人罪之輕重而告之大司寇司寇以其獄讞成於王而後刑之所以奉天討之公而重明弼之任者制甚詳也我國家之制郡邑各有監禁而臬司總滙一省刑名其監禁尤重非豪彊貪暴罪罹不宥者不以入粵西苗獍之藪獍悍出入命盜重案較他省爲多舊制有司監二所年久屋傾遂以其基改建經廳而增其監於府旋亦傾倒仍寄監於縣纍纍者枕相藉也微論防範易致疏虞卽屋隘人稠卑溼鬱蒸瘴癘穢毒之氣觸者輒病病者輒死與古者納諸圜土之意不其遠乎使者提刑茲土怒焉傷之急謀擇

地得於城東之官舍高平寬廣無狹小卑溼之患爰捐清俸以臨桂令董其事鳩工庀材葺舊者五間增新者十間有板有檻有屋有門有厨以供炊爨有井以備汲飲有丰房以便巡邏有官署以司提典繚以長垣扃以鍵戶然後規模嚴肅內外整齊可以杜奸宄縱逸之心并可以酷暑無蒸嚴冬有庇使身陷重辟者猶得假一日之安處以遂其飲食餘生庶求無忝厥職而已雖然此其制也竊猶有志焉昔漢以張于爲廷尉民自無冤庭可張羅唐之時徐杜號稱平恕史不絕書之數賢者余固不敢比迹追蹤然幸值 國家欽恤明允遠邁漢唐年來漸摩格被安耕鑿而事詩書聲教所暨雖殊方異俗雕題鑿齒之儔罔不革面傾心沐浴於大化而漸泯其凌競行見清風貫索草滿園扉刑措之休隆於三代得以

藉手仰答

聖天子刑期無刑至意則茲役之舉且爲虛設夙昔所志固  
圖一空者際此時爾余適奉 命調滇臬旣數月令來告曰  
監犯疏虞絕矣狹斃鮮矣請書其事於石余維余之所以設  
獄之意不可不明故因其請以記之仍使臨桂令董其役而  
勒之於逍遙樓側焉

卹氏祠堂碑記

常安

唐袁氏以先廟繫牲有石屬篤古而達於詞者韓氏退之爲  
文以著其先人名跡退之猶謝以非其人余何敢望退之而  
山陽卹氏聯其族屬紳士近百人以祠堂立碑公狀請文余  
惟奉

天子命謹司職事漕運外非所能知顧忝爲大臣而弗加意於地方風俗人心使善者隱而勿彰好善者末繇興起非所以稱朝廷德意卽氏自有明以來代有聞人爲山陽舊族自其先參政俊孫侍講象升卽建立祠堂以祀其祖宗收其族屬而洗馬象隨學正邁太守璋復先後置祭田若干畝謀裕永久又昭垂訓誡佑啟後人至今山陽卽氏之子弟多克孝謹守家法其秀異者方且聯翩鵲起通仕籍著作承明士大夫詒厥孫謀子若孫聰聽祖考懿訓而盡如卽氏豈非閭里之榮邦家之光歟昔左太沖吳都賦曰高門鼎貴魁岸豪傑虞魏之昆顧陸之裔今江東著姓惟顧陸尙有人文其歷代相承世家名閥不知其幾過其地匪當年矣可勝歎哉爲人後者誠能孝弟忠信以讀以耕弓冶箕裘不墮厥業卽無

通顯而克自蘊蓄其氣脈養之益深息而愈大久乃溢爲昌  
熾積無厚而流不光古與今無異理也余旣嘉卹氏之有後  
又欲以其道樹之風聲故不拒所請略爲述其所見爲卹氏  
者長守此意可也卽凡爲人後者咸存此意以教家其於風  
俗人心庶有裨益也哉

惠濟河碑記

雅爾圖

豫之水患自河奪汴始蓋歸淮之水汴爲大汴固挾眾流以  
入淮者也汴治則梁宋陳蔡許鄭之水皆有所洩元至元間  
河決奪汴故道汴遂湮卽今浚儀渠乾河涯皆其蹟率成平  
陸賈魯者元臣也魯濬汴自中牟經祥符而東漚潢河歷陳  
州境入江南潁上以達於淮汴得入淮賴此人戴賈魯功遂



以名河而河淺而窄上水驟輒溢乾隆四年夏秋大雨兼旬  
開歸陳許六十餘州縣漫爲巨浸平地水深數尺會城中積  
月不退其橫流下奔並入江南之潁亳長淮衛漂民田廬甚  
多前巡撫尹公具以狀聞

皇上惻然軫念發數十萬倉穀帑金賑之民無饑餒流移之  
患旣忘其災矣復念致災之由 特降旨命巡撫尹會一總  
河白鍾山布政司朱定元勘濬乾河涯用洩開封積水全豫  
水利使原委疏暢毋致泛溢又計入淮之水道經江南恧下  
流人情阻撓 命江南水利大臣共議之所以爲豫省計者  
甚至於是前巡撫尹公河督白公遵 旨悉心籌議委熟悉  
水利之管河道胡君紹芬履勘原委度地相川議以開封城  
中積水第濬乾河涯可洩而將使開歸陳數十州縣永免水

思莫若分賈魯河以廝其流請於中牟西賈魯河北岸別疏一河導入祥符之淺兒河接濬至高家樓則乾河涯之水入焉又東滙於沙河卽循古汴蔡河入渦故道湮者淪之淺者深之又東過陳畱杞縣經睢州之挑河柘城之永利溝淮甯鹿邑之老黃河抵安家潘以入渦而歸淮則賈魯河水勢得減而瀕河各州縣潦水有歸均免旁溢商船亦可直抵汴梁是不惟祛水患兼可收水利巡撫尹公上其議

制曰可方議舉行尹公遷內余奉命來撫是邦於是年冬十月莅止目擊災傷之象沮洳載道諮詢屬吏父老知是舉爲豫省要務不可緩也五年春先令爲渠導城中積水從東南水門出門小則添一門以暢之使歸於壕壕東則濬乾河涯穿護城隄至高家樓而城中之水頓洩旣而分疏賈魯河

之議江南有司果議論紛起乃復移江南督撫各委大員會勘重以水利使者汪公德公按圖履迹僉曰是誠有益於豫而無妨於江南濬之使覆 奏得報乃令管河道胡君指授程式於各縣令各縣令按其境土募夫開濬河廣十丈深一丈爲率長六萬五千一百九十四丈出土爲堰以備漲溢各離岸十丈以防土頽入河堰爲涵洞以宣田閒之水建閘於中牟分疏口門視賈魯河盈縮爲啟閉復高其底二尺使賈魯河常畱二尺以下之水以利舟楫爲橋三十六以便行旅凡土以方計者一百二十六萬七千二百有奇方直銀八分一釐出土於水加一分有八計動帑金一十一萬五千七百有奇自乾隆六年正月二十日興工至本年六月初四日工竣吏不辭瘁直無侵漁丁夫踊躍旣成開閘進水暢流而下

仍議歲動帑金四千於農隙疏浚以杜淤澱瀕河州縣從此  
永無水患士庶歡呼額謝

聖上澤我豫民世世無疆之福因請 錫嘉名有 詔名惠  
濟河嘉名旣錫偉績孔昭不可無紀也夫惠民之大者莫如  
水利因所利而利之孔子所謂惠也顧水利之難成則誠如  
睿慮所及下流阻撓往往績用弗成不思水必有歸下有  
所洩卽上有可受今天下四瀆之水已盡歸江南入海非以  
江南爲壑以海爲壑也水性東下自高而趨存乎地勢故淮  
受百川派與渦其一二耳自禹以來未之有改卽汴失其道  
而橫流亦必漫入江南乾隆四年之淮潁閒可驗矣有河以  
分之力緩而軌順下流亦有利焉况茲惠濟河之水特分賈  
魯河之水而非有他水特疏古汴蔡河入渦之故道而非創

闕無庸過慮也茲河之成幸遇江南督撫水利使者一時鉅  
公咸矢公忠仰體

皇仁化畛域之見惟利濟民生是務協謀僉同以成此惠濟  
之功實豫民之大慶焉

重修于清端公祠并清理祭田碑記

覺羅雅爾哈善

兩江總制于清端公之歿也距今六十餘年其清風遺愛民  
猶歌道之不衰金陵吳下祠宇非一在蘇郡者凡二一在府  
學爲于湯二公合祠一爲公專祠在城中金母橋側初名立  
人書院康熙中閩郡士民所建以祀公者暨公之冢孫準撫  
吳時爲置祔田十三畝有奇畀守祠僧人掌之以供香火祭  
祀之用歲久弊生田既盜賣祠亦傾圮元和縣儒學訓導吳

中衡職主祀事每春秋入祠歎其蕪穢無以揭虔妥靈遂力  
任興廢白於郡守邵大業追田歸祠又捐俸葺修堂廡門墉  
並還舊觀工竣將撰日告祭請余爲記以垂久遠余惟清端  
公以廉明正直爲本朝督撫大臣之冠在江南二年墨吏  
改行包苴屏絕凡鉅姦戢軍安民造士之政次第舉行論者  
以比宋包孝肅趙清獻不愧韓宗伯蔡彭待講定求撰公祠  
記述之已詳而余竊有感焉督撫爲封疆重寄數千里民生  
休戚所關我朝

列聖相承知人善任凡以畀茲使節要皆慎選賢良閒有不  
宜輒易去百餘年來後先相代不知凡幾然金陵吳下清風  
遺愛歌勿忘者湯公而外必以于公爲歸是固實有以致此  
者自足長存於天地閒也豈偶然哉余奉命撫吳兩載兢

兢業愧無補于教養溯公休烈不勝高山仰止之思又嘉  
吳訓導能獨新公祠兼復久隱之田因爲書其始末并詳列  
田租之數及圖圩名號於碑陰以詒來者

重修通濟堰碑文

黃廷桂

余承

聖天子德意子惠元元常期陰陽和萬物遂匹夫匹婦無一  
不被皇王之澤以成熙皞之俗願立願雖奢而其措施無補  
中嘗歎焉敢曰美利自我作古乎夫蜀爲蠶叢之國厥田高  
亢自李氏父子鑿離堆導江入灌口沃野千里民用富饒其  
他不近川澤之區旱乾時告石田用嗟官斯土者能無望前  
人之澤而勃然興起者乎癸酉余奉 簡命復制全蜀蜀之

民皆余昔時煦嫗而嘔咻之者也其痾癢與余爲最切值此邊隅綏輯之餘時和年豐欲與吾民謀生養安全可大可久之計則善政莫大乎水利蜀地溪澤陂沱以及濱江枕河之區所在多有高者可濬而蓄下者可引而注誠因其勢而利導之則以時樹藝亢旱無虞何在不可藉人力以補天功者耶蜀南通濟堰唐制置使章仇兼瓊所濬也按古志引武陽南河之水入彭眉灌溉民田數萬頃自明季兵燹民無孑遺堰水盡廢昔之岸然爲隄者淪於水嗟巨浸焉昔之泓然爲渠者堙於土嗟石田焉眉彭之人不知斯堰水利者百餘年余前制蜀時曠覽洪波夷考古制蓋嘗欲取而盡復之築隄濬溝由新而彭得水利者萬餘畝功未竣余旋奉召入都復因奏準給官錢五十緡以作歲修斯堰之僅存而不至泯



滅者賴以此是深望後之人覩斯堰之僅存因其勢而利導之盡復其沃衍之舊以利濟吾民乃二十餘年來水利未加廣也田疇未盡闢也其忍聽吾民負向隅之泣而不一動念耶因檄下所司復圖興舉令集吾民而諮曰南河之水發源於邛其來也緩而疾緩則春水不足恃而耕作後時疾則大雨時行一沖而後田閒無涓滴之惠曷若引西河之水合南河而入堰以時蓄洩之則源遠而流長且亦二王之餘澤也乃吾民果能踊躍赴功以時趨事父子負鋤兄弟裹糧駢駢而來魚魚而赴汙萊闢魚龍游不數月而大功成彭之民實開復古渠二十八縣延八十里直抵於眉嗚呼厥功懋哉維時父老走相告曰彭眉之苦旱也久矣我民之白髮蒼顏者曾不知有春水到田之事百餘年來今始見之實灌我彭田

三萬畝眉之田亦不下萬畝焉今日者我黍與與矣我稷翼  
翼矣何莫非仁人之賜其能昧天良以忘所自敢乞明訓以  
垂不朽夫乃知造化之恩有缺也人補之王政之美有盡也  
人永之古今治化之成就不賴有人哉斷自今牧斯土者其  
無廢前人之業我耆老百姓其無忘今日之功率作興事歷  
久彌勤毋游佚以失時毋紛爭以僨事厥利其永永哉是爲

記

八旗文經卷第四十三終

八旗文經卷弟四十四

碑丙

福康安重修雙忠祠碑記

鼇圖重建徐州府節孝祠碑記

法式善重修尙氏家廟碑文

法式善明大學士李文正公畏吾村墓碑文

英和半壁山魁星樓碑辭

西凌阿乍浦城隍廟碑記

海忠夏公祠碑記

錫纘寧夏滿城文昌廟碑

錫纘故明梁烈女碑

蔡士英正法禪院修造碑記

附

重修雙忠祠碑記

福康安

雙忠祠在前藏大招東北向爲駐藏大臣行署朱爾墨特那木札爾之難駐藏大臣傅公拉公死焉署亦燬於火番民感二公之忠烈因其舊址請立祠肖像以祀蓋以二公之大有造於衛藏也傅公諱清爲康安世父乾隆十五年公以都統奉命駐藏左都御史拉布敦副之時朱爾墨特那木札爾襲其父頗羅鼐郡王封專藏事多不法稍裁抑之橫如故公廉其叛逆有迹密疏請便宜從事以絕後患奏入上以公孤懸絕域未可輕舉命都統班第代拉公將明正其罪以申國法旨未至反謀益亟廣布私人凡駐藏大臣一舉動輒偵邏之禁郵遞不得通潛結準噶爾爲外援藏中有異已

者將盡誅之勢且延及達賴喇嘛爲雄長一方之計公如坐  
待其變事發而公必死誘而誅之其羽翼已成眾寡不敵而  
公亦死均之死也毋寧變速而禍小遂與拉公定密計以十  
月十三日告其黨羅卜藏達什曰召藏王來有 旨令議事  
朱爾墨特那木札爾以公勢孤聞召不之疑亦不設備公與  
拉公登樓待之止其眾於樓下隨上者四五人公見之顏色  
不動如平時引入臥室門卽闔急掣襟底預藏前藏王頗羅  
鼐所獻之順刀連砍之中項而什從者進前以楛擊其首立  
斃羅卜藏達什在門外聞格鬪聲知禍發抉窗跳越告其堵  
第巴喇布坦等號召賊眾須臾麇至鎗礮競發環攻之牆高  
而固不能入賊乃積薪樓下烈燄四起樓焚賊遂攀援而登  
公手刃數賊身被三傷力竭自刎以殉拉公亦中創死吁烈

矣哉夫衛藏距京師萬有餘里公鎮其地戍兵寡弱外不足以制其力內不足以奪其權使朱爾墨特那木札爾竟舉兵反番民性怯懦勢必舉而從之以向隸版籍之地一旦陷賊即使以身殉事已無及勞師糜餉致貽

聖主西顧憂疇職是土顧可以一死委其責耶公獨奮不顧身毅然定大計乘其未發誘而誅之餘黨雖擾攘而渠魁已殲如瓦解冰泮無能爲難不旋踵而就縛盡伏厥辜公雖死而全藏以安國威以振是非傳介子之誘斬樓蘭所可同日而語也事定班公及四川總督公策楞至藏列二公死事狀上聞天子震悼下詔褒嘉諡以襄烈與拉公俱贈一等伯入賢良祠昭忠祠復敕建雙忠祠每春秋二時特遣大臣致祭子孫以一等子爵世襲罔替卹忠錄庸延及苗裔

嗚呼公之心其可慰矣康安以五十六年奉命督師進剿廓爾喀來藏謁雙忠祠瞻拜遺像距公殉節時蓋四十餘年矣藏番追念兩公遺澤歲時奔走香火不絕至今猶有能道當時遺事者惟碑碣缺如堂廡垣墉間有傾圮爰於班師之日葺而新之且恐歲久遺跡或湮敬書其事以示後人其時同殉者爲主事策答爾參將黃元龍並爲位於廡以配食傳云能捍大患則祀之如公者番民雖百世祀可也

重建徐州府節孝祠碑記

菴圖

徐於春秋爲宋地經書宋伯姬卒左氏譏其女而不婦穀梁臆厥婦道盡矣婦人以貞爲行穀梁說是范史沛有行義桓菴今祠於郡屬之沛縣而郡祠託始封卓妻魏世比之秦嘉



妻者也由魏至於今得 百 十人蓋共姬之流風遠矣竊  
尋王制孟子義謂寡爲天民之窮窮非必凍餒之謂寡者僕  
也僕然單獨含悲極思而誰與語甚者觀閔受侮湮沒於溝  
瀆而莫之知故曰窮而無告也余從母長白常節母有傳余  
跋而梓之季妹潔字若素適四品宗室魁明二十而寡有節  
行法度余哀之敬之自余服官江南十餘年閒知五縣一州  
所至必葺節孝祠春秋承祭不敢慢嘉慶四年冬奉 命來  
守徐行視舊祠風雨不蔽於室雞犬跡交於庭迺謀及銅山  
令丁觀堂等以俸錢鳩工庀材廓故宇而新之堂序階陳內  
外噲噲五年 月 日余率所屬行畿珥禮成揖所屬而告  
之曰嗟刀筆筐篋吏事也移風易俗治體也古文尙書曰王  
敬監厥亂爲民又曰至於敬寡至於嫗婦此言先王建牧立

監欲其惠於嫺嫺也毛詩故訓傳甘棠行露美召伯聽男女之訟而貞信之教興疆暴之男不敢侵陵貞女又大車陳古大夫能聽男女之訟乃使夫婦之禮有別故其詩曰穀則異室死則同穴以此見古大夫聽訟蘄至於移風易俗夫然後民被其德思其人而敬其樹也而俗吏聽訟如嬉戲遇矜寡以侮慢則是彤管靡紀而門閭罔表也其何以建風聲美教化經夫婦厚人倫哉洪惟我 國家仁邁雖麟典崇旌別俾矜寡各得其所聲教訖于無外夫宣 上德意下化民成俗則余與公等之職也謂此地有古之遺風願公等以經術飾吏治遂興貞信之教也謂公等不侮矜寡不畏疆禦願以古大夫進公等也公等勉乎哉旣以告於眾遂勒諸貞珉以俟後之官斯土者

重修尚氏家廟碑文

法式善

洪惟我朝肇基東土定鼎燕京佐命諸元勳彪彪麟麟光於竹素偉矣其籍隸漢軍而世篤忠貞尤著且久者則惟平南敬親王尚氏王初以從龍入關削平楚粵始終臣節比薨遺命歸葬海城雖沒而拳拳不忘於近依

先帝朝廷鑒其誠予祭備禮復置閑散佐領二員護其塋酬王志也王有子三十二人其七子諱某尚和碩公主特置在京佐領五員始有賜第于京師其後遂世居焉孫諱某者嘗釐正其關東祠田圖冊咨部籍記以奉海城之祀而賜第亦自有家廟至四世孫參領公玉德隨其兄侍衛兼參領公諱玉成以乾隆辛未就舊祠基拓新之閱三十餘年

丁未歲侍衛公已卽世參領公復率其兒子參領惟慎重修之堂扉礮雷奔如奐如歲時偕宗族子姓會祀廟中穆然感世澤之長油然而生孝弟之心也參領公有子十人官總兵副將參將游擊者六戊申歲安南之役公七子諱維昇以廣西左江鎮總兵從征會戰富良江庚戌歲正月歿于市球江南岸事 聞予卹視提督諡直烈入祀昭忠祠世襲輕車都尉越嘉慶丙辰冬四川教匪之亂公冢子諱維岳官順慶營游擊首率兵入達州境猝遇賊矢斃賊帥賊益集力戰歿于陣有 敕軫惜之予卹視參將仍入祀昭忠祠世襲雲騎尉嗚呼大丈夫效力戎行臨危致身如二子可謂無忝祖德矣參領公痛二子之歿于王事也乃耐其主于廟礮具碑石以余與修 國史手二子傳屬爲記不敢以弁陋辭竊惟昔者魯

僖能復周公之宇命奚斯作新廟史克作闕宮詩以頌之其  
旨歸于保世滋大今尚氏之德澤延及五世垂百五十年簪  
纓蕃衍 國史家乘大書特書不一書而參領公念祖之勤  
眉壽無害與夫二子報 國之義相得益彰實由先敬王之  
聲靈赫濯有以啟之觀於廟者可以想勛舊貽謀之遠可以  
覘 國家錫類之仁爰書其事以諗後之人家廟重修落成  
在某年月日記成在某年月日

明大學士李文正公畏吾村墓碑文

法式善

余居近明李文正公舊宅遺址所謂西涯者也嘗考公軼事  
哀集爲記復欲尋公墓所屬同年宛平令章君訪於畏吾村  
不可得又屬武進胡君及大興令輅縣郭君訪之一日二君

過余言適因事過畏吾村問公墓于土人皆不知有大慧寺老僧云識一古墓相傳爲前明顯宦今其子孫已絕往視之良然然亦不敢遽定爲文正墓也翌日余親訪會老僧他去徘徊久之遇石翁者年八十六居畏吾村且六世叩以文正墓亦弗能舉舉僧言相質乃指寺西北土阜云是閒舊墓五余兒時猶及見今惟三墓在耳余周覽而諦視之慨然曰此爲文正曾祖墓文正墓從可知矣文正曾祖洪武初以兵籍隸燕山右護衛其祖方幼孥與俱來稍長卽代父役靖難兵起有功弗見錄以藝簡內局製軍器作賈爲養以終文正父微時爲舟子有陰德遇異人爲擇吉地瘞祖父骨文正集中有復畏吾村舊塋及合葬告妣諸文是文正曾祖暨祖俱葬畏吾村文正父改葬樹村地不吉仍遷葬畏吾村文正子兆

先先卒耐葬於此文正卒亦葬畏吾村五世昭穆班班可考  
劉世節瓦釜漫記謂其家族姓漸微至以墓前白石碑搥碎  
與販鹽者攬和以賣蔣一葵堯山堂外紀謂兆先卒公竟無  
嗣查禮銅鼓書堂文集載畏吾村始末甚詳由是觀之公五  
世之墓聚于一域身歿而子孫不振至於肩穹碑爲灰塵夷  
馬鬣爲隴畝不亦深可喟耶然以文正之勳德雖無子孫能  
使後之人不忘其窳藏之地而咨於野人老衲卒得其實不  
至終淪於蓬蒿非文正之靈而能若是乎墓在大慧寺西距  
寺三十步墓之西爲畏吾村抵村口一里許小徑北通石道  
白塔菴在焉南則長洞一帶由枯柳樹迤邐東南行卽望見  
極樂寺後有欲展公之墓者視吾文庶幾有考焉

半壁山魁星樓碑辭

英和

熱河半壁之山武列水逕其麓壁高百餘仞臨流嶒峻爲此郡東南常羊之維形家言其巔宜樓則文明盛太守海公忠率邑人士規而葺之設魁像于其上謂奎與壁連體人有疑以魁爲奎不知奎爲文章之府居北方元武七宿之一而魁則北斗之第一星或曰斗一至四爲魁史記天官書斗魁戴匡六星爲文昌所主不同而皆爲文昌之宿魁與奎一也樓成太守摹其月日于石屬余辭以泐諸壁曰斗爲帝車運乎中央而斗之魁主爲文章攜參枕角上戴六匡星曜眞形作作有芒石挺之右武列之陽層樓峩峩峽影堂隍邈拱宸極遠傍帝鄉騰輝壁府耀我文昌

乍浦城隍廟碑記



西凌阿

明洪武十有九年命湯襄武王築海上大小七十二城乍浦其一也先是張士誠據吳時嘗築城崇德制甚嚴固襄武墮之移建乍浦城屹然爲瀕海雄鎮及襄武薨民卽奉爲城隍之神立廟崇祀示不忘也嘉靖三十二年五月倭躡浙西由海鹽陷乍浦大肆屠戮民有匿池葦中者見神率兵衛從廟門出羣倭羅拜遁去其禦大災捍大患有功於民又如此廟在城東門內自明以來屢經修建嘉慶十九年里人復葺新之增閒飾墉丹碧照耀庭階堂寢神儀列從罔不輝煥視舊制更崇且麗祀神之禮斯爲大備矣我 國家防海綦嚴于城中添設滿洲營分駐八旗勁旅余奉 命來此值海氛充斥羽檄交馳於道寧波上海之間其民一日數驚莫或遑處

而乍浦風濤寧息商旅安堵如常蓋非靈爽默佑不至此繼  
自今氛祲不生而水旱無患神之惠寧有極乎城隍之神郡  
邑所同祀顧或傳會緣飾妄指其姓名以眩世此獨原版築  
所由始以報襄武之功其事也不誣其于禮也有秩誠足  
光昭祀典也已是役焉經商士著之民咸相率輸助監生劉  
潮敖煜路守管徐光煥等實司其事計土木工匠之費銀三  
千六百八十四兩有奇于仲春二月經始至六月落成屬余  
爲文勒諸麗牲之石竝係以神絃之歌曰鐵券兮金符飛乘  
黃兮巡海隅築堅城兮百堵扼雄關兮控南土芳菲菲兮森  
木稠運指畫兮升崇邱霓旌兮電馬膾鯨鯢兮大旗下山翠  
兮娟娟溪瀨兮潺湲愴猶夷兮煙浦颯靈風兮隕秋雨魚龍  
若兮海不揚颶颶息兮禾黍薌縵瑤瑟兮坎壈鼓永保民兮

長樂康

夏公祠碑記

海忠

聖王之制祭祀也曰能禦大菑則祀之能捍大患則祀之不必問其秩之尊與卑時之近與遠凡有功德於民者則統在祀典之列而苟祀未聞於朝廷若百姓賴其利思其澤尸祝於野如漢桐鄉朱邑之類則亦爲聖朝所樂許郡有夏公祠熱河之人祀故少尉春臺夏公也公以巡司官於斯者十餘載池善政不可枚舉考傳惟浚河之蹟爲最著熱河當萬山之閒地陜而水仰民畫山趾以處東北武列諸經流以平地爲壑冬涸或褰裳可涉夏秋盛漲則汪洋恣肆奔迅無所歸宿而民居廬舍乃歲受其患公籌之首爲浚渠而瀦之

導之規其廣輪而利達之今之所謂旱河者實公始之也會  
乾隆己卯夏大雨西南諸山水猝至決橋梁壞廛市至民居  
無算

天子發內帑因舊河而加浚之公以有司操畚鍤之役凡向  
官力所不能到者今得藉 帝力以暢所欲言治而終始其事  
焉河成而熱河之民安公之心亦與安夫河渠之治亦守土  
者之職所當爲蓄而後圖之與夫先事而爲之計者有閒矣  
不習而有爲與夫素得之者有閒矣公末秩也克舉此大政  
今熱河之民士者農者商者賈者其祖父卜居於是其子孫  
樂業於是安土重遷終其身不見蕩析離居之患誰之力與  
郡之人僉曰是與禦大蓄捍大患者無以異是宜祀卽他日  
或附以名宦請於 朝亦必奉

天子詔曰是宜祀嗚呼廉吏其可爲也哉忠莅斯土已有年所每春秋必率賓屬謁公祠下冬則式公之政給糜粥於祠之左見夫枵然來盜然去者咸追美公澤勿置郡之人士因請曰願有記余樂敘之以慰熱河人之思將使吏有志於斯民者推公之所行以爲治其爲澤豈小且近乎公名熙字春臺浙之上虞人

寧夏滿城文昌廟碑

錫纘

陝甘分井鬼之埜爲古雍州地于九州最大寧夏環賀蘭山帶黃河沃埜千里于甘肅地最利而無害用是赫連勃勃趙元昊坐抗中原雄據隴外羆虎之士震夙生育至于今罔墮大清定鼎時將才如王進寶潘育龍趙良棟父子者皆于此

庠取之其予謚世爵與我滿洲佐命勳臣同受上賞也固宜承平久不以馬上治天下

聖祖駐驛孔林按六經妙古昔教澤所濡南徼北塞靡弗屆者

仁廟以文昌實主文運載隆秩典肆勅尊帝君具祝版命禮部太常寺奉牲實帛以獻鸞輅親莅祀事孔明罔有內外胥崇奉敬戒唯親唯馨用是朝廷滋能以文治被于民寧夏自雍正八年設將軍統滿洲駐防兵百餘年所教達禁成滿城北舊有文昌廟狹樸陟剝不足致禋祀防禦某以道光戊申之秋聚貲鳩工因故爲新而旣厥事大人方攝總兵官續侍養于斯遂相與屬爲文辭焉續迺告于有眾曰若不觀遷史天官書庠續爲若徵之斗上之星有六爲文昌之宮實有上

將次將之名中國之西北主之者昴星其維在隴是以秦好用兵我滿洲之鎮撫茲土也豈直與衣旃裘引弓之儔寄腹心干城云爾其必出爲上將入參文昌兼文武者爲良不者他屬猶可奚足爲吾黨先哉且時危則文弱時平則武弱吾黨苟與時爲轉移

天子亦安重吾黨也而用之防禦以白將軍將軍舒倫保公陪都老將才也揚袂鼓髯而笑曰知言哉縝迺作詩云斗魁戴匡六星之芒天下文明迺祀馨香揭揭有神弈弈有廟照臨下土桴芬瓏耀肇造西夏肆弭戎兵文恬武嬉告虔妥靈厥或隕侈庫嗇黜弗崇弗砥牢犧弗薦載价其藩業業言言輝輝殿宇桷楹灼丹唯神所依唯軍所福細柳之風賀蘭之麓

故明梁烈女碑

錫纘

岐山縣舊志載故明梁烈女珊如殉節事崇禎十六年李自成屠鳳翔時也烈女家浙江石門侍其父大業主岐山令單世賞自成既犯肅州永昌山丹而東女請大業說于令練義兵守城令遲不行城破令逸大業罵賊死女未及死俘焉囚之樓不飲啜桑日給守者去觸壁死年十六烏虜女死之易也然而自決之甚難矣南安臨淄諸鉅公爲明季龐臣傑輔負海內重望皆習知與國存亾之義猝膺變難蒙恥而貳心不決故也嫠媪弱女子獨能決其當死而死彼濟濟者何以自解夫當死而不死也抑聞思陵之難宮女輩死御河者盈三百汪偉陳良謨馬世奇之妻妾皆同死所謂二南之化亂



離板蕩之日又何其速且遠也信序魏叔子之言也大清道光丁未岐山李大令文瀚買地于西郊爲烈女之墓屬纊書其事于碑銘曰不如是女也而組綬而兜鍪而況邑之侯如是女也而不組綬兜鍪明也以是可憂二百年後而發其幽

正法禪院修造碑記

附

蔡士英

古中盤者京之東五臺也千峰萬壑林木鬱茂稱冀北之名勝者多道之余嘗慕而登焉見其四山相接疊翠層巒中有數峰陡絕者勢插霄漢又其地多金沙雨過則星燦奪目更有舍利塢每除夕則光明徧山若列炬其中流泉瀑布儼若大江之怒濤焉誠巨觀也他如觀音洞談禪石蚪松蒼柏龍池映帶種種舊觀不一而足殆古之禪林歟大博禪師者蜀

之達州人也生五六歲卽知向佛十三而捨身西聖寺至二十五而精心參悟漸得旨歸因受萬如和尚法歷五十餘年精進不懈嘗南北行腳參訪不一家順治十二年遂說法於津門之地藏菴嗣是而開堂十有八修叢林有五言佛法者莫不宗師之康熙元年游盤山喜其崇峰幽谷欲止錫焉值劉州僧官來儀願捨山場有大檀越建爲叢林殿宇門廡輝煌並耀經堂齋室方丈庫藏靡不具備寺僧若干人參識本來鐘磬鈴鐸之聲不絕烏乎可謂祇園之一勝矣夫天下之福地寶林不乏也并之開義汴之福廣蒲之西巘秦之淨念趙之無際隋之智門亦指不暇屈矣而要皆有山川之勝雲物之異爲宗門衍法於無窮今之古中盤得大博禪師而傳之不朽者亦猶是歟余故樂得而記之康熙十四年乙卯

八旗文經卷第四十四終

八旗文經卷弟四十五

頌 贊

成哲親王平金川頌 并序

成德 萬年一統頌 有序

福敏日月合璧五星聯珠頌 有序

鄂爾泰 聖駕東巡 盛京恭謁

祖陵

大禮慶成頌 有序

阿克敦 萬年頌 并序

鄂爾奇河清頌 并序

李鐔青麟頌 并序

常安 盛京人物頌 并序

常安 皇太后五十萬壽頌

錫纘

皇上萬壽恭頌

謹序

代

和恭親王十臣贊

錄二

李鐸雷孝子讚

平金川頌

并序

成哲親王

小金川悖叛金川助之以抗拒 王師於今五年

皇帝命將軍阿桂等以次討平之告成功於乾隆四十一年  
二月四日臣永理謹作頌以獻以紀事之所由始功之所由  
成而有以見

聖人之舉之出於不得已也西南夷爲患自古而然矣其性  
貪頑而禦輕而又恃其險阻輒謂中國不可以驟至是以蠶  
食弱小以肆其隱志無所憚畏緩則相仇急則相親鎮之不

靖訓之不從臣聞王者有外內之分土無彼此之疆界有生殺之大義無棄取之成心既在我宇爲我民而遂聽其傲很屠戮不能報虐以威者固我

皇帝之所不取也小金川者釁拉之士司也金川者促浸之士司也當乾隆十三年促浸有罪興師問而定之越十年其酋郎卡長惡不悛封豕長蛇以爲九土司害九土司皆苦其毒然而無敢棄禮中國中國固置弗問如是者九年郎卡乃歸罪自服於督臣而女其子於釁拉土司之子僧格桑自是兩金川相比而爲厲矣悖違約法蔑視大吏如是者復六年乃議進討之策當此之時夫豈無謂地不足耕人不足用者乎如以地不足耕而勿取是利其地也以人不足用而勿取是貪其人也

皇帝順天心討有罪無所欲焉不可赦者母赦焉而已是故  
析羣言之疑參經權之用三十六年九月 命溫福桂林分  
道討賊此事之所由始也既而溫福自巴郎拉克資哩至布  
朗廓宗底木達執僧格桑之父澤旺桂林自約咱克扎哇窩  
至達烏以阿桂爲四川提督阿桂自古爾壘克僧格宗至美  
諾遂平趨拉卽進討促浸山川峻阻雨雪不息蜂蠱有毒不  
備不虞賊徒潛煽溫福失利三十八年乃授阿桂定西將軍  
以豐昇額明亮副之盡收復前所失地三十九年阿桂西路  
之師戰輒得當薄攻諸碉寨以臨遜克爾宗而據日則了口  
初小金旣破僧格桑遁依促浸及是索諾木以其骨乞降不  
許而明亮南路之師駐於絨布豐昇額亦駐軍宜喜未能徑  
進夫兵貴於速且貴於重

皇帝每以諭將軍等將軍等設偵通道出賊不意合分諸路而入皆有得也四十年八月阿桂克勒烏圍促浸之隘也一夕摧木城石卡六十賊奪其氣此離遁逃而歸我者日夕繼踵十二月克雍中喇嘛寺遂至噶喇依築圍以環之明亮取獨松河富德取馬爾邦皆以兵來會遏壅水道圍之四旬索諾木益困蹙自計無所追二月四日率其屬出見於將軍將軍乃露布獻捷焉

皇帝方謁 東陵十二日紅旗至臣竊惟師旅之事出於不得已天必佑之

皇帝念兩金川之構孽憫諸土司之及禍遲之以歲年而惡稔矣不有霜雪無以凝庶物不有震電無以達風雨不有征討誅艾無以靖亂略庇善良故螟螣去而嘉禾滋介冑舉而



疆場靈外內之分也生殺之義也興師以來

皇帝日三復籌策夜卽數問奏書奏書至未嘗不披衣起身勤乎九重之上心周乎萬里之外此豈欲於地五百里人三萬眾者哉藉使地大於五百民贏於三萬而無罪者又可用師乎然則師之舉措在罪之有無而不得已之實章章明矣此功之所由成也

皇帝恭奉

皇太后幸山東告成闕里命諸王大臣致祭

天地

宗社四月二十六日 鑾輿還至郊勞將軍阿桂振旅愷以入獻俘命勳旣還宮敬上

皇太后徽號詔四川全境師行五年百姓無乃勞苦施惠有

差於是諸典備舉臣永瑋觀盛德之形容願有言焉頌曰  
維 聖時武執競萬邦自我所覆莫不來庭孰有不臣以干  
紀綱蜀之西南曰兩金川負固而匿以日 帝念苗民  
自絕於天乃命將軍咨汝阿桂吉林索倫健銳火器畀汝用  
之汝實良帥凡軍所需悉出中府凡軍所經毋使民苦凡軍  
便宜一以委汝阿桂董眾由西路入陟鄴批巢其勝甚速將  
軍奏戒賊首匍匐 帝曰將軍知兵之道我師勤止曰歸孔  
好崇臺峩峩于郊汝勞乃望原寢松柏青青乃告 先師岱  
宗是登乃進玉冊孝道顯明自唐吐蕃竊攘伺窺至於今茲  
以其族來生熟之戶是闢是治 帝用師貞是合於天撫我  
中州及我邊壤有不得已大功成焉

萬年一統頌

有序

成德

恭惟

皇帝陛下神凝得一學懋通三建八柱於天樞張四維於地絡固已德隆宙始功煥乾金者矣至如敬

天深欽若之心法

祖大配京之烈龍驤奮武紹智勇於商湯虎觀籌經接心源於義易 聖孝之侍膳問安無間 皇慈之訓儲毓德尤勤莫非萬善咸該一中獨運故能萬邦和協而四海永清者也猶恐精一危微史冊有難詳之粹美聖神文武廷臣多未悉之載颺臣日侍螭坳親依 黼座游街衢而鼓腹比葵藿以傾心白鳥棲周圍之中飲和既久青莫託堯階之上霑澤惟多扈從之餘見聞無非至理趨躡之下紀述已積名言敢爲

擊壤之歌用伸天保之祝識同螢爝寧有見於曦舒才極涓  
埃曾何加於海岳第懸馬戀主自知盈缶之誠而梧鳳鳴時  
聊卜過歷之瑞云爾頌曰

巍巍惟天穆穆惟

皇帝力何有有此萬方有風有雨有日月光休茲皞皞澹然  
以忘萬年一統世躋義皇天祚有清萬方頌聖譬彼觀天在  
衡齊政譬彼測海蠡智私逞康衢之謠輔軒無靳臣師其意  
對揚 休命天眷在

帝

帝益虔虔陶匏彙桔匪直郊壇亦臨亦保舉念皆天懷柔百  
神爰及竺乾面稽昭格靈貺殷闐猗與那與世有濬哲紹庭  
上下無競維列開創守成同塗合轍萬物作覩續承不輟昭

克配功萬世是揭念典丁學遜志時敏樂此不疲廣覽博引  
理學洙泗異端無躋勤若儒生五夜功準況天縱資一覽  
而盡問夜辨色寒暑視朝天顏龍表雲日則堯委裘垂箴  
政簡科條惟廉與法以肅百僚無漢雜霸邁周誦釗勤政之  
後孝奉

兩宮問安侍膳尊養必躬

天子而孝其德彌宏而又齋邀以時謁陵六飛屢駕感慕  
遣弓重茲國本元良慶衍毓德少陽承華乃踐慎簡名臣  
論道以善鮑魚必除邪蒿弗薦禮樂詩書聖訓不倦鯨鯢  
橫海猘猱載塗不思報德恣其嘯呼爰飛金矢張我天弧  
皇威所暨拉朽摧枯山無伏莽海不揚波加以文治臨雍講  
學璧水環橋陳經揚推絕域從師虎賁磨琢四海弦歌九州

禮樂一道同風羣歸祓濯憂勞萬姓罔或宴安翠華所至親  
問閭閻民依軫念知悉艱難撙節愛養財貨無殫九年之蓄  
式是周官於鑠放勳昭茲萬世聲教四敷下蟠上際民時雍  
哉堯曰治未小臣何幸亦是悠想沐澤霑渥臣節自勵何以  
事君曰忠與愛暨清慎勤以效感戴踴躍歡欣頌其梗概

日月合璧五星聯珠頌

有序

福敏

雜

聖天子御極之三年大化旁流仁風翔洽

上天嘉應昭示休祥乃仲春庚午之旦日月會於營室五星  
聯絡晨見占象者曰是謂日月合璧五星聯珠上古聖世嘗  
一見之曠千百年不可得覩我

皇上至德格

天適逢斯會慶莫大焉一時在廷諸臣合詞稱賀  
御殿受朝

皇帝抑而弗居曰此

聖祖仁皇帝六十餘年福善積慶之餘也其薦告

景陵以昭嘉祥所自朕惟兢兢業業嘉與大小臣工矢誠心  
敦實政仰答

上天之眷祐祇承

皇考之宏猷若張大崇飾侈陳賀典朕無取焉羣臣懇請至  
再

皇帝再沛德音堅讓弗允於是羣臣相與言曰乾象之昭明  
若彼而 聖意之謙沖若此臣等既不獲拜舞 殿陛抒懽

忻之情苟緘默遂已無以示後如虛逢 景運何乃相率爲  
頌歌以獻冀昭茲簡編揚厲萬一臣叨沐 恩光最近且久  
幸覩嘉瑞恭釋 門綸仰見我

皇上聖德廣遠有昭事

上帝之誠心焉有善則歸

親之孝思焉有遇祥而儆不侈符瑞度越百王之卓識焉以  
此三德欽若

昊天靈貺所臻必且崇行鴻龐錫美無極臣不勝懼忭謹拜  
手稽首獻頌曰

倬彼七曜爲章於天次舍有度其儀不愆不期而聚互數千  
年昔高陽氏定爲厯元精英旁薄轉幹璣璇我

皇神聖建極乘乾適膺 景運兆符於前夾鍾應律胤鳥翩



翻日月所會營室是躔五緯同次  
娥訾之垣陽精宵朗華晷  
晨鮮璧影交映珠輝駢聯杲杲  
皓皓熒熒麟麟瑞色映靄祥  
光清妍二氣訢合萬靈同歡嘉  
貺炳煥

帝德廣淵

天眷有自予何敢專修德弗懈  
展孝益虔禮官承命祇告  
寢園榮光奔奔松柏丸丸陟降

帝右錫福孔蕃安阜殷盛昌熾  
絲延協和上下洋溢寔挺超  
軼萬古焜煌史編

聖駕東巡 盛京恭謁

祖陵大禮慶成頌

鄂爾泰

皇帝御極之八載歲在癸亥月在  
孟秋諏吉日飭乘輿奉

皇太后東幸 盛京展謁

祖陵禮也先時雨師灑道浹溼從官侍臣虎賁羽林七  
萃八校之士畢罕旄頭鉤陳壁壘千乘萬騎之眾夙裝以俟  
比 大駕行雲開天霽和飈拂旗

皇帝曰惟

天惟

祖宗佑予一人耿耿祉哉迺循畿甸出北口抵熱河遂巡省  
外藩諸部度白狼踰烏桓橋潢水徑龍沙諸部君長名王下  
泊且渠當戶千百爲羣治道供張奉迎厥角行負弩矢前驅  
居環 黃幄宿衛奉觴上 壽進膳獻琛 賜賚所加舞蹈  
呼嵩之聲殷地徹天間乎數千里之外

皇帝曰於我

祖宗盛德大業至矣哉自祁姚化所弗暨漢唐威所未暨我

疆我索一尉一候謚如也迺入柳邊迺沿混同瞻長白之峻  
極度納綠之蜿蜒谷邃山高水深土厚扶輿鬱積

王氣攸鍾神皋奧區上應析木形勢龍蟠虎踞揭八荒而包  
六合我

太祖

太宗櫛沐風雨規矩乾坤披荆棘刈豺狼畫井里蒐軍實所  
爲創業垂統作則萬世者山川城邑悉載赫聲濯靈土俗儉  
勤室居朴素有陶唐氏遺風焉

皇帝周覽遐觀喟然動容曰此我朝景亳邠岐也倚那濬哲  
之頌生民瓜瓞之歌欽念哉齋心凝神愾聞僉見迺以九月  
丙申有事于

永陵越六日壬寅有事于

福陵翼日癸卯有事于

昭陵祠官掌儀太常奏引

皇帝穆穆躬執玉瓚酌秬鬯以灌顯相辟公翼翼陪列庶司  
百職踴躄濟濟咸駿奔走執豆邊窮天產與陸珍緣博施而  
備物揚燎斯光炳玉燭升香遂瑞蔚慶雲乘龍

在天髣髴肸蠁九獻具舉百禮是洽迺御崇政之殿清寧  
之宮以朝以宴遂下詔書頒中外湛恩洪龐愷澤汪濊  
畱都皤皤黃髮之老扶杖而觀擊壤歌衢異口同辭贊歎曰  
盛哉乎斯世自

聖祖東巡以還又數十年而載睹屬車之清塵也

皇帝曰予一人承丕丕基觀揚

祖宗耿光大烈惟祀與戎國之大事可勿毖迺修祀典神示

羣望暨功宗元祀書太常者若廟若祠若墓牲幣酒醴咸秩  
無文迺纘武功教大閱申以三驅勒以八陣如山如人有嚴  
有翼迺整旌旆鳴和鸞度遼河循山海熙熙融融肅肅雍雍  
以旋乎 紫微之宮告至

太廟蓋自有簡策可紀以來未有祀事光顯合萬國之懼心  
極兩間之悅豫如 今日也臣以奉 命西京不獲與于扈  
從際此 大禮慶成繁禧總至 天章燦爛日星爲昭臣不  
敢以弇陋不文黯無紀述臣惟

上天眷佑我 大清

聖聖相繼累洽重熙薄海內外罔勿率俾自肇造以迄于茲  
百二十有餘載矣積厚基崇 謨烈旣超邁往古

皇帝以大孝鴻仁作求成孚尤非自古守文之君所能及卽

今恭謁

陵寢至誠至敬上明下察無所不通往來兩京時踰三月之  
久天晴日煦氣藹如春和風舒徐榮光煜爚醴泉膏露隨地  
滋潤

天心之感格協應旣如此其昭彰臣工景從士馬踴躍父老  
欣欣望幸屬國喁喁傾心自輦轂以至海澱山陬飲和食  
德若游華胥人情之愛戴悅服又如此其廣遠然則致治隆  
盛固已駕商戊軼周成追羲軒媲顓昊彼漢代侈言明章過  
沛幸宛曾何足以比擬萬一乎哉孝經有言聖人之德無以  
加于孝大學有言爲人君止于仁大雅有言繩其祖武於萬  
斯年受天之祜

皇帝孝通神明仁被草木太和洋溢萬福攸同臣敬以上我

大清億萬年無疆之休也謹稽首頓首而獻頌曰

天作高山曰維長白三江濬源地軸之脊

天眷 大清此維與宅殷土周原是墾是闢迺疆迺場建邦  
有奔

天命

太祖載旆秉鉞旣掃輝發爰拔哈達吳喇斯滅葉赫斯伐莫  
我敢遏聿造

帝業蕩蕩遼瀋峩峩宮闕 允文

太宗武烈是承東征北討莫我敢膺松杏麾戈如日泮冰詒  
謀宏遠大猷允升京邑相望曰盛曰興赫矣一統普疇八埏  
駿德鴻功

三后在天

皇帝續緒昭格有虔曰維舊京

山陵在焉駕言徂東王道平平迺謁

永陵開運蔥蔥迺謁

福陵隆業崇崇武庫之劍橋山之弓於穆清廟有恤闕宮蕭  
合羶薌清尊大房以格以享綏我思成工祝致告祀事孔明  
天錫

皇帝萬壽無疆時雨時暘豐年穰穰迺坐明堂以臨下土禮  
儀既備恩澤周溥內自州郡外及蕃部黃童白叟式歌且舞  
曰

皇帝孝光紹

列祖 至誠感神自

天祐之川祇岳靈助我孝思



皇帝所居景福維祺自秋徂冬周徧兩畿麗日和風春臺是躋春臺是躋普天胥樂順德之孚覃被廣博東鰈西鶉南交北漠式化成風入息出作曰孝曰仁福祿攸酢

皇帝之孝萬邦是式

皇帝之仁四海秉德

皇帝之福與天無極咸五登三嘉瑞畢集卜祚縣縣時萬時億

萬年頌 并序

阿克敦

臣聞天行健而運資始之功聖至誠而徵不息之久作君作師之寄天以佑聖者佑民大智大仁之全聖以壽身者壽世故正位凝命握符闡珍獨以參贊平成之績主持運會之隆

也欽惟

皇上聰明睿智文武聖神統遐邇以照臨致中和而位育符  
乾道利貞之保合斂皇彝敷錫之康寧享五紀之昇平光華  
復旦慶七旬之福履壽考維祺臣俯抱葵忱仰慚燕賀載稽  
史冊已比擬之無倫欲矢頌揚乃名言之莫罄敬述見聞鋪  
陳萬一

聖人首出臨御入荒用中建極歷服繇長涵蓋兩大度越百  
王自生民後未有我

皇昭事

上帝肅雍以將纘承

列祖謨烈孔張惟 聖至孝錫類無方惟 聖至仁布澤彌  
彰敦篤本支九族親睦恩先自近以受天祿人躋春臺耆年

多福引養引恬衣帛食肉惟 聖愛民蠲租賜復屢發帑金  
頻施倉穀念切農桑圖繪尺幅惟 聖重士菁莪棫樸皇極  
敷言課其誦讀廣額加科人文炳郁 聖世分理 帝簡在  
廷有賢必進有奸必屏 聖德如天刑期無刑赦過宥罪萬  
國咸寧惟 聖崇儒躬詣闕里表彰正學榮及諸子惟 聖  
勤政河干親視安瀾底定自今伊始惟 聖宏文心傳精一  
道徹源流學兼作述制歷授時依聲和律深究數元毫釐不  
失訓誥詩歌磅礴洋溢雲漢之章奎文之筆 御藻輝煌眾  
法俱畢惟 聖振武古莫與京逆藩蕩掃絕島澄清紅苗向  
化青海歸誠有元遺裔種落胥平大漠窮民叩附邊城乃有  
小醜自致王征六師親統雲捲煙晴不殺爲武 帝德好生  
宥彼餘孽未絕其萌背恩負固肆虐恣行爰命貔虎凱奏功

成烏斯進克 睿慮籌兵 聖壽無疆 皇圖永固 誕受繁  
禧 克享遐祚 三九頻紀 六甲初度 曠代未逢 休風廣布 微臣  
謏陋 幸附班聯 巍巍蕩蕩 測海窺天 太和翔洽 景運昭宣 民  
殷物阜 璧合珠聯 貞元之會 周而復旋 如岡如陵 如日如川  
稽首獻頌 億萬斯年

河清頌 有序

鄂爾奇

皇帝御極之四載 德無不被 恩無不周 萬類熙熙 百靈  
効順 休嘉之應 史不勝書 乃 睿慮廣淵 宸修益謹 至誠  
無息 宵旰乾乾 於是復有河清之瑞 紀日則逾三旬 紀地則  
接四省 考諸載籍 振古希聞 百爾臣工 莫不懽忻 抃舞咸願  
稽首 闕庭恭申 慶賀我

皇上執德彌謙宅心加謹卻朝賀而弗受普錫福於臣工  
大哉 雨露之仁涵濡無外矣臣欣逢上瑞躬被殊恩洪  
惟致瑞之由有源有本實由我

皇上鴻圖丕紹以來敷政靈人立綱陳紀無事不以繼述繼  
承光大先猷爲念無刻不以嚴恭寅畏奉若

天道爲心建極卽斂福之原大孝乃格天之本感應  
之理自然而然是以

聖祖仁皇帝鑒此精誠啟迪蒼昊錫茲祉福惠我無疆且  
以福祐

一人者並福我臣民於無旣也臣以史冊所未聞者身親見  
之慶幸之情不能自已是以忘其蕪陋拜手颺言謹作頌辭  
以獻頌曰

惟昔帝世地平天成修和府事德潤羣生溯彼河源崑崙是  
出維禹之功安瀾底績榮光四照紀在周年自茲以後瑞牒  
希傳

上天降祐篤生

聖祖乃聖乃神光昭萬古我

皇嗣之紹閔繼志聖德純全誠孝並至

上帝曰俞錫之嘉祥誕膺多福俾熾而昌猗歟上瑞惟德

是符日月五星合璧連珠瑞玉嘉禾奇徵疊告雨雪孔時豐  
年屢兆

上帝曰俞德修益懋宜申命之以昭篤祐丙午之歲月在嘉  
平綿延四省匝月河清皤皤黃髮逮於童幼載道懽呼從前  
未有雲則縵矣星則燦矣濯彼中流光其爛矣何其潔歟似

雪之瑩何其皎歟似鏡之明凡茲臣庶僉曰嘉徵乃抃乃舞  
翔於 帝庭維

皇日俞來汝臣庶益謹厥修保茲純嘏煌煌

聖訓光於典謨上超周漢遠邁唐虞微臣作頌敬效嵩呼億  
萬斯年式鞏 皇圖

青麟頌

李鍇

茫茫神寓建標四極天眷在茲維

皇有樞基命振靈陰闔陽闔溟海匯膺醫閭引脊百神叢虛  
開我 寶域蒼龍左蟠金虎右翊尺無所損寸無所益 大  
孝昭明迄有所格仁獸載臻協應方色青毛錯鱗赤燄蝕鬲  
飛文爛如遂洽 至德夏颺周烏焱焱比迹丹碧著圖萬年

無斃

盛京人物頌 并序

常安

蓋聞元運鬱興聖神首出則必有英豪磊落之才並時而起如三垣之表輔軸若木之生榦枝因以開昧靖氛化屯成泰記曰天降時雨山川若雲名世之重自古爲信非偶也夫其瑰意奇抱駢興四萃亦或蟠菌之器產自深山夜光之珍胎茲荒域材不擇地有由然矣然往往興王之地鍾毓爲繁舜有五人稷契同祖周列十佐召畢皆姬豐沛南陽於今爲烈大雅曰濟濟多士生此王國是知元氣盤結靈秀誕敷天人交應之際卽主臣契合之時奚事借才先代求賢他方哉我朝受命始自遼陽其地卽伏羲之成紀陶唐之丹陵詩曰



鳳皇鳴矣於彼高岡梧桐生矣於彼朝陽地實致之理有固然今遼陽山峙海滎英才鍾會偉烈鴻猷難以縷述而佐命元老與國同休汗簡所書千載不沒其勳功位次可考而知也夫配享巨典也盤庚之誥殷人則謂茲予大亨於先王爾祖其從與享之周書亦云記功宗以功作元祀方其冒霜露斬荆棘君臣之閒如左右手雖或身歸冥漠而精諒相依夫祭義稱有功德於民則祀之今茲提戈斬級勦力劬勤除殘明之耗蠹躋萬物於春臺功亦偉矣哉 本朝配享者十人或王或公各邀顯號禮緣義起則恩可加於死後爵必定於生前祭既從乎

祖

宗位必冠乎臣庶稽其人自多羅郡王以下親而兼賢魯國

亦可稱宗賢而非親尙父亦且胙土報功可謂極隆者矣嗣是錫封不配享者王二貝勒宮保各一禮不可過故親王無所私報不宜薄故班爵無所吝就中或諡曰毅或諡曰勇壯而易名之制起蓋日月有時用光泉壤不但明足以見仁足以與亦見大行受大名細行受細名兢兢乎其慎之也自達海以下 賜諡二十三人觀其膺美號錫顯名而當日之服勞王家厥有成績載之史冊編入家乘者可想矣求之於志又有雅希禪等八十人事業既殊寵錫各異要皆有必酬之功成不刊之典若夫武王伐紂與膠鬲期以甲子是日霖雨不輟武王曰吾疾行以救膠鬲之死則知聖主方興其臣不無履危蹈險之事我 朝武功赫濯將士懷忠如席漢巴圖魯等七十四人皆心同山嶽氣貫雲霓雖滎陽紀信滹沱馮

異何足數乎至若堯舜在上巢由著聲亦有純德琦能之士  
潛跡盛明自安適軸以孝著者繆鴻業等二人以義著者烏  
爾喀一人以隱逸著者朱國梓一人以神異著者賸人等二  
人附以不離步等三人所趨不同要亦各成其是耳不寧惟  
是王者之化始於閨門周南十有一篇召南十有四篇多言  
坤化克貞柔風丕著葛覃詠而標梅繼徽采蘋歌而行露下  
奏國運始亨陰陽交茂良有以也若阿克順妻趙氏等四  
百七十六人皆茹蘂飲冰沒齒無玷並有終身處子一意靡  
他聖人刪詩特記柏舟以示勸也安得以事在閨閣闕而不  
舉哉余攝官茲土徧訪懿徽蠡測管窺何裨史牒自以爲歷  
建章之門戶得識數楹覽岱岳之蒼蒼惟記合抱著爲茲篇  
庶以有功激勸益勵風聲並可備獻文缺失以爲傳信之資

云頌曰

仰惟 聖朝長白履武天人同歸中外共主 潛哲居尊

徇齊御宇奕奕 天潢繇繇瓜瓞附日騰光從龍致烈周則  
左提召乃右挈世德承休家相在列矯矯虎臣桓桓雄俊英  
略內含神采外峻應運而生乘時以逞黽勉贊襄慷慨忠蓋  
曠騎星聯壁壘碁布霜鏑林屯雁刀雲聚白草噴沙黃埃塞  
路職在臨戎義無反顧披堅陷敵爭先決戰矚目橫戈伸臂  
拔箐虎搏中原囊吞江漢重關堂堂層壙屹屹肉薄嗟峩梯  
登嶠吻巢覆臬屠窟夷鯨刺阜蓋專城朱旛列土四野仁風  
一天膏雨煦嫗恩深撫綏德溥卓魯同稱龔黃並數正氣冰  
嚴丹心月皎疾風拂拂朔雪皛皛翠挺蒼松榮敷勁草取義  
不回成仁獨早南陔依依白華戀戀潔爾晨羞甘爾夕饌冬

衾是溫夏枕用扇哀深風木悲含盟奠高義霄凌英姿漢薄  
行人杳杳長途漠漠誰金誰遺勿取勿攫鮑義重宣管風幽  
託清流泚泚高山岌岌五柳清深七松翠哀耽吟宴坐看雲  
獨立早晚蝸爭何知塵襲璿宮一脈蔥嶺一支神能伏虎德  
號全雞仙禪交鍾以寓奠棲窈窕淑媛婉變閨秀鏡不重圓  
松能長茂燕縷雙縈鶴操孤奏泣血茹冰光寒宇宙子子青  
年皎皎白首 帝澤遐敷 皇仁遠到有隱必彰何微不照  
嘉獎明恩寵錫示報竹帛畱書絲綸作誥遼海之陽瀋水之  
澣區宇盤鬱靈秀容與不琢不雕中規中矩玉出瓊田珠生  
合浦我

皇踐阼兆姓承德禮教旣彰風化彌飭益培愿慤盡忘知識  
優游飲和從容順則王曰咸休帝惟格被似草從風如陶作

器化首 留都模恢舉世千秋萬歲懸茲樂利

皇太后五十萬壽頌

常安

斗維表瑞沙麓毓靈應符協運

聖配篤生紫氣屬天黃雲覆庭正位璇宮體撰坤寧巍巍

列祖是左是右媯汭作嬪塗山稱后 仁洽已周 恩施已

厚日維是時馨妃堯母 母儀萬國誕育

聖嗣底定荒服用光文治 徽教遐暢頌聲四暨日維是時

商莘姬妣天祚

壽母載翼

先皇內總陰教外贊平章邁隆炎漢儷盛陶唐日維於今太  
任太姜歷勤 皇家三世有耀雍穆其儀重疊顯號春溫秋

肅克矜嘔笑九嬪是師六宮式效 慈逮窮檐頽沛 懿詔  
謂我黎庶日事田土毋擾毋驚務予安堵

皇帝曰唯誠諭督撫父母斯民其之甘苦謂歲瀉饑尤塵軫  
憐保我赤子毋俾播遷

皇帝曰唯廷簡能員輸金發帑動地呼天謂古明良股肱元  
首任賢則逸母拒苦口

皇帝曰唯廣儲薪樞 特詔旁求搜巖剔藪庶政畢舉 慈  
孝父孚昏定晨省宣和達愉 德永坤元敬恭匪倦玩絕珠  
璫御惟繒練持盈履貞去奢卽儉慎終如始壘承天眷天眷  
既集壽益嵩辰書雲應候萬國皆春陽回緹室氣轉洪鈞祥  
風習習瑞靄紛紛麟脂豹髓競進 紫宸稱頌 長樂羅拜  
臣民無疆之算豈羨南椿維此 遐齡乃祝黃耇 恩洽天

潢禮加勳舊居同星拱載侔地厚

皇帝祝釐陳詞進酒 睿藻天葩蒸雲燦斗 澤被八埏慶

流三后詩美有妣瞠乎其後億萬斯年咸歌 仁壽

皇上萬壽恭頌 謹序 代

錫嘏

維同治年月日恭逢

皇上萬壽臣以木本之親頌 天長之節屬對揚乎休命有  
拜獻之嘉言匪止遐殊祥介蕃祉而已且夫二氣合神九龍  
浴聖慶生辰之初度以誕降爲千秋僉謂令典之垂自開元  
始然而江漢之什曰天子萬壽天子萬年楚茨之章曰萬壽  
無疆萬壽攸酢拜手稽首旣申祝嘏之儀交錯獻酬又極宴  
享之樂凡億兆人所同慶實大小雅爲先聲是舉也將與成



周比隆曾何李唐足述哉是故百王不易之典必徵三代以上之書史傳或有諛詞經籍乃堪引證古訓具在不敢誣也  
欽惟

皇帝陛下運際乘乾祥符出震擬微庸之虞舜尙先十年比志學之宣尼更進五載乙覽則十行一目丹書之訓與古爲新亥紀有二首六身絳縣之齡自今伊始作樂而月諧辰律就班而臣矢寅恭百爾所司三祝載切抑臣近依 禁籞趨侍 講帷仰窺 允執厥中之心知有必得其壽之理

皇上自撫御區夏以來

兩宮垂訓四海乂安惟能使天下平斯能以天下養經所謂孝思惟則者也水旱罔不賑節孝罔不旌開宥罪之條拜蠲租之詔經所謂發政施仁者也江表悉定東南轉粟滋多隴

右既平西北流沙漸被遠收象郡載揚龍旂經所謂保大定  
功者也大猷允升宸翰斯作金簡玉字伯禹有其書垂露  
懸針過庭無其譜御弘德之殿詔進講之臣南齋考文西  
清鑑古經所謂博學審問者也故欽挹心傳既不在虞夏商  
周以後雖舉行嘉禮亦必與典謨訓誥同符天下之人第見  
慶孚華祝歡洽璇宮維受命之溥將遂躋民於仁壽夫豈  
知十四年之肇基皆十三經之運用所由凝庶績播修和者  
如是不易哉謹按康熙初元定隴蜀靖滇黔上悅護闈  
下垂簡冊維時近臣獻昇平頌焉今者恭膺誕節式觀耿光  
先聖

後聖其揆一也臣誠欣誠忭稽首頓首而作頌曰

維天之命斯壽如天何以徵之徵之歲年四方既平七德既

宣遂召天和而無風愆慶雲祥光油油薰薰豐本增歧芄芃  
縣縣滌場而秋條桑而春侯亞侯旅徂隰徂畛磽培良沃一  
十百千不知 帝力試看大田天之錫嘏 君之止仁令德  
壽豈日月山川於萬斯年就衡同權乃今天下沛乎 湛恩  
昌期是邁景命滋延徽音所敷 聖業孔安德勝之頌無逸  
之篇亦既紀止載曰降觀祇承上帝求覺下民萬世無疆視  
茲元元

十臣贊 錄二

和恭親王

范文正公贊

士子行己厥維有恥人臣事君維天子使右有左宜退義進  
禮卓哉范公無媿於此面折廷諍能光青史十事有疏參政

遂已不以己悲不以物喜同樂同憂所言所履將相兼資韓  
范媲美義田之設百世攸祉忠宣立朝正直是矢補闕盡忠  
燕貽式似明良顯於君臣而作述昭於父子

司馬溫公贊

誠以待人人化其德忠以事君君無不格義以爲路仁以爲  
宅處仁安義何假外飾唯司馬公心存社稷國之大計輸忠  
獻益抗表陳論古之遺直左右范韓廷折安石居洛多年聞  
望寫奕元豐之末遺老略盡新法勢張紀綱稍紊溫公處之  
剛毅巽順百度煥然速如轉瞬聲震寰宇誠感顛蒙愛如慈  
母僉曰公功鞠躬盡瘁古稱武侯公之憂國力疾不休朝稱  
良弼世號名儒編摩撰述翼程啟朱迹其一生氣配道義无  
妄爲基始終不易

八旗文經卷四十五  
雷孝子贊

李鐸

粵有孝子大梁陳州鳳羽雷君近蒞中土隱食大化德任樸  
醇補博士弟子員往以循謹著聞成均內充外容振振斤斤  
孝儀昭宣講學肄業用娛二老沙涓之濬父疾開作儻有可  
贖願百其身人氣合生抵足以手卒用復陽于陰父歿循禮  
母歿過清母嘗鮮民或三其年或五其年鮮民行天獨行若  
是黨正閭師鄉大夫女賓雷作草圻萌感交孚實我

后聖仁

八旗文經卷第四十五終

八旗文經卷弟四十六

箴 銘

恭忠親王擬姚崇口箴

常安屏風箴

常安躁箴

常安惰箴

常安畏言箴

承齡益友箴 并序

恭忠親王葆光室銘

鄂爾泰平苗紀功鐵柱銘

鮑鈇羹唐齋銘 并序

鮑鈇坐吟輶銘 并序

常安鏡銘

常安扇銘

常安筆銘

常安卮銘

常安半硯銘

勒保南籠紀功鐵柱銘

斌良雁足鐙銘

樊封粵秀山新建學海堂銘

并序

擬姚崇口箴

恭忠親王

人之有言口司其職言無口過爲天下則君子戒之德裕乃身勿以躁妄失口於人好言莠言皆出自口口以立言斯爲

不朽日費而煩伊誰之咎君子戒之惟默惟惺古訓是監口  
緘背銘先儒是式守口如瓶彼何人斯習爲辯給利口喋喋  
惡之所集讒口囂囂禍之所及君子戒之慎爾樞機至樂無  
聲大音必希其性存存其口訥訥孰司爾喉孰捫爾舌書誠  
起羞易傲騰說口無擇言希聖希哲

屏風箴

常安

屏風六曲橫施堂中綠沈隱約金鈿朦朧置之阿堵有物斯  
蒙將爾居前吾不見外將爾居後吾不見內外內旣殊無私  
不蔽戒之哉但能蔽形勿能蔽聲爾匿吾躬人窺吾情一葉  
之障可障太行尺地之隔如隔要荒勿云至近凜之肘腋勿  
云至常防之朝夕在昔哲后書疏自省在昔貞臣雕鏤有警



悠悠古人借茲糾繆吾以爲鏡列諸座右

躁箴

常安

陰陽闐闐動靜以形四時迭運得一以貞或違其則厥有躁  
名心躁亂思事躁害成獨居役役百念牽縈眾處擾擾怒發  
雷鳴言不見色視不在衡急流競進乃與禍并縱無獲咎匪  
浮則輕氣不可暴持以和平

惰箴

常安

業廣惟勤自強不息古人勵志所其無逸慎始圖終朝乾夕  
惕一念非幾恆爲過匿戲渝馳驅氣昏情溺九切勿虧半途  
勿畫翼之使前求之必得去日苦多分陰堪惜舜予何人惟

在努力願言思之永懷明德

畏言箴

常安

君子有畏三在聖言悠悠之口一任翻翻然吾嘗惴惴款款  
人以爲愚吾常聞聞侃侃人以爲懟始聞之而疑既聞之而  
笑終聞之而畏其將鉗其口乎其將捫其舌乎言如川流不  
可壅也言如燎原不可撥也惟反之於心與人言果中與否  
也不然人自取其窮吾何畏焉

益友箴

并序

承齡

歲在重光赤奮若季秋元月同人爲文字之約晦朔相聚各  
呈一藝麗澤講習之文佗山攻錯之義意甚厚也或者以閉

戶自精知音蓋鮮徒飾標榜莫聞會輔今者七子賦詩唱子和汝殆諸君之選事乎答曰妍媸之鑑必藉明鏡韶夏之奏豈惟鐘簫况乎集千秋之業而恃一人之智不亦傾乎直諒多聞益者三友斷金既協漸蘭不遠通其狂惑澤以文章僕雖鄙人願奉教焉乃爲箴曰

猗歟文章蔚爲國華苟爲不琢斯璧之瑕風雨如晦雞鳴不已金玉其音遐哉之子虛聲是盜酒食是議小人之歸君子所棄敝帚弗享獨角弗矜如集塵土乃成邱陵風雷貞吉錫以十朋僞體必裁譏彈是尙豈伊上人道在不讓蓋文字之禍烈于末流堅白同異比夫寇仇蜀洛之爭張陳之隙夫惟大雅好是正直和而不同輔我令名責善有道敢告同盟

葆光室銘

恭忠親王

山以玉輝而石胡爲乎磴磴川以珠媚而水胡爲乎茫茫夫  
惟韞而懷也乃鬱久而大其發揚今茲斗室 賜題葆光不  
滿不竭義取蒙莊釋高深之訓詰重五夜之徬徨無斤斤以  
自喜無赫赫以相將第加膏而希耳敢微炫其寸長而彼積  
厚而流者顧未嘗不精耀華燭炳炳而煌煌吁嗟乎天道下  
濟而光明地道卑而上行故君子之道闡然而日章

平苗紀功鐵柱銘

鄂爾泰

帝德光被臣功赫煜八萬古州生苗帖服鎔干銷戈鐵柱矗  
矗表烈垂謨載瞻載肅

羹唐齋銘

并序

鮑鈐

夢崦居士家既貧長物典鬻垂盡一室罄縣蕭然四壁插架  
惟唐圭峰禪師碑唐文粹唐詩數種每枵腹朝飢空腸午鳴  
一展卷冊如饜飫美食不爨而飽矣乃命吾室曰羹唐齋而  
銘于壁曰

都城人海深林鶴棲渺焉誰識已而已而火日一舉食月不  
葷咀茹蔬韭含味斯文斯文伊何殘碑斷簡聖唐膏腴腐儒  
羞膳勾我飽我我其貪哉匪見于羹乃作羹材昔聞寶晉今  
則羹唐彼宋之顛此清之狂苟適吾意其用則多以銘吾室  
遑知其它

坐吟軒銘 并序

鮑鈐

余在吳興嘗構一舫取唐張志和語扁曰往來蒼雪閒暇日  
數與錢唐詩人金壽門裘裳臨汎啜茗清談命工寫爲雙溪  
詩話圖邑人嘖嘖傳爲佳話北歸以來杜門屏迹每于春秋  
勝日思欲徧游西山徒有許掾之情苦抱深明之疾是以因  
循而不可得比聞鄰人造車詢其值僅十金度一驢之資不  
過五六金而已于是欣然動念擬置一乘爲消遙山野之具  
顧橐中羞澀未能猝辦預製一詩一銘以識之并字之曰坐  
吟輶示不與尋常車等也異日儻或遂其欲不與吳興故事  
並傳乎

詩載析  
津集

行宜陸居當屋像飛蓬利長鞍輪已膏驢已粟尋吾詩向巖  
谷

鐙銘

常安

微光盈寸照耀何富大禹之惜惟汝是助

扇銘

常安

赤帝來爾輕揚青女至爾退藏以道濟離明

筆銘

常安

肆其說也無形騰其口也無跡言之玷固不可毀也筆之玷更不可滅也

卮銘

常安

窪尊太樸瑤杯太靡斟酌之道貴乎適時舉則笏記置乃箋

題獻酬有節升降提提秉德若是終勿沈迷

半硯銘

常安

月盈則缺器滿則敝惟不求全乃不能虧况在處文章之爛  
漫欲與萬象而爭馳畱有餘而爲不盡吾將以此硯乎爲師  
南籠紀功鐵柱銘

勒保

聖武維揚誕及蠻荒興義洞洒撻伐用彰功成錫爵苗俗安  
良勦撫永制銘柱重光

雁足鐙銘

斌良

秉式在鎔趺而不翼攸居攸止以弗是繫帛惟休光之施也



粵秀山新建學海堂銘

樊封

道光四年宮保阮公因繕粵省城垣來相版築止于粵秀之山愛其古木環蔚望遠咸通且多兩漢五季陳跡爲粵人覽古處爰諮於眾謀建講舍以課士以揚

聖天子作人之化皆曰善乃鳩工興作伐其荆榛平其坎壈拓地百弓構爲高堂榜之曰學海學海者何公訓士名也今仍其稱欲粵士無忘初志學于古訓而有獲耳嶺海雖在荒徼位正南離夙號人文藪若白雲若西樵若羅浮在在皆有前人講學區斯堂將毋比其數與曰不然前之學掬涓滴而忘源流也今之學溯端委而達淵溟也粵人濡染陽明緒餘祖法乎良知之說與康成晦菴相違視六籍爲支離薄誦詁

研索爲末務士子稍解握管輒高談妙論凡目所未見之書輒指爲僞冊父誡其子師訓其徒牢不可破空疏無據流弊三百年公建此堂豈如州郡增修書院加士子膏火資爲培植人材虛聲哉蓋欲使稽古之士良秀者從實學而得所依歸魯鈍者知窮經之法不在高深元遠惟能通其古義自足取益不致以有用之才放心於冥漠拘迂之地馳情於浮華詞藻之間此大道所以昌明庶

聖天子造士之意廣播於炎荒爲無旣也茲彙述其顛末告於粵人復爲之銘其辭曰

於皇維清繼天立極聲教南敷維工維績乃命儒臣綏茲南國是引是翼南土是式惟茲多士孰不允臧傳經傳史訓於明良節使念之曰構厥堂乃命學官啟其高岡巍巍粵

八旗文經卷第四十六終

岡鍾靈毓秀重溟匯前層山擁後古木千章自成其囿以實  
闔虛以博啟陋惟此堂開毋日不顯獅海東來珠江右轉告  
於學人力求訓典盛跡千春壽珉垂遠

八旗文經卷第四十六終

八旗文經卷弟四十七

墓碑甲

安圖大通河墓碑

能秦光祿大夫一等阿思漢呢哈番兼管佐領

先考伊公府君行實碑記

阿金光祿大夫王府長史伊爾根覺羅公墓表

巢可託贈光祿大夫參贊大臣護軍統領兼佐

領鑾巖覺羅公神道碑

巢可託光祿大夫鑲白旗滿洲都統議政大臣

鎮安將軍那蘭公神道碑

巢可託資政大夫二等阿達哈哈番刑部理事

官古爾佳公碑銘

石芳資政大夫佐領兼護軍參領丞理護軍統領事赫公神道碑文

大通河墓碑

安圖

大通河之北岸古草廠里維我先人三世卜吉其上後孫安圖追溯本源勒珉於墓以誌不朽非敢作也有所述也吾父生前嘗撫圖而言曰我乃汝祖遺腹子也我上有四兄皆奉侍晨昏親承丕笑平居備述汝祖行誼告我今爲汝言汝祖關爾嘉氏世居上河德林志裕經綸性篤忠孝初仕內書院統理樞要纂修

太祖高皇帝實錄總裁遼金元三朝國史考定制度章程官級律令

太宗文皇帝改元崇德置三院內閣九臣汝祖班列第二繼  
有大凌河之役以豫親王奏請爲啟心郎參贊機略每隨諸  
王征討籌策決勝所向成功凡三十餘次屢奉使安撫蒙古  
朝鮮諸國

太宗親征特命畱守盛京轉給約束事事奏可恭遇

世祖章皇帝定鼎燕京統一海宇以佐命功累遷內閣學士  
兼禮部侍郎授拜他喇布勒哈番加爲二等阿達哈哈番  
世襲罔替維時汝曾祖早世爰奉汝曾祖母至都侍養雖夙  
夜靖共從無甯晷而溫清甘旨未嘗稍閒順治二年疾終享  
年三十有九汝曾祖母哭甚哀歎曰吾子云亡吾豈能久存  
乎吾沒必與吾子葬一所後遂謹奉慈命封墓於汝祖右上  
夫汝祖謙默性成端慤自守家居不言國事凡所建白雖子

弟罕與聞是以不得備紀惟載在史冊昭昭耳目者聊述一二汝其誌之嗚呼父言不可忘行又何可沒哉吾父事母克孝事兄克恭治家惟肅待下惟寬宗黨有貧乏者常振給凡民有厄難者必矜紓歷任禮部郎中居官清介守正不阿恪共在位名表容臺年踰六袞解組歸休以不逮事父抱恨終天廬墓頻年依依不舍悲號涕泣匪特春秋祭掃爲然也康熙己丑疾終享年六十有五因合皇妣繼妣附葬祖旁以慰魂魄夫吾祖之勳名事業允堪垂範後人而吾父之仁孝精誠卓然未可澌滅今於祖塋左右勒碑載篆惟述先人遺訓而已敢自謂表揚前烈也哉墓有三塚右上曾祖妣查喇喇氏累封太夫人吉兆右中皇祖諱詹霸內閣學士兼禮部侍郎二等阿達哈哈番投資政大夫祖妣覺羅氏累封太夫人

吉兆左側皇考諱安達禮禮部郎中加二級授資政大夫皇妣胡爾哈蘇氏繼妣博爾吉金氏俱封太夫人嗚呼後世子孫其亦讀斯碑而毋忘祖德也夫

光祿大夫一等阿思漢呢哈番兼管佐領先考伊

公府君行實碑記

能泰

世有積勳勞於國敦善行於家前業賴以光大後人資其佑啟食福報於無窮沒世而忍聽其實弗彰而名弗著謂非爲人子者之咎歟憶我先考光祿大夫捐賓客卜吉阡於廣渠門外八里莊距今已十載矣男能泰嘗欲從當時賢豪長者乞其言以永昭我先公行實每一念及輒爲潛然懼其功德久而無述將遺之也爰從給事兵科掌印時得窺 三朝實



錄及簡閱奏牘載先公功績甚詳謹按次戰功最著者而表諸原數年以來屢膺 寵命厯任川陝去國日遠無從得奉仁賢長者之教恐因循日久致先公功業湮沒無傳遂成沒世之恨故不揣荒陋約略撰記以俟名賢之纂述焉我先公弱冠時當喀爾喀遁回察哈爾饑荒之際先公以前鋒護衛屢從征伐早有決策制勝之譽

世祖章皇帝定鼎燕京削平禍亂關中盜寇旣殲我先公得功蒙賞又征討四川張獻忠我先公以前鋒護衛奮勇有功得受恩賞旣而 命將分取湖廣先公告出征以營總從事及大軍進勦雲南追擒永厯先公復告出征以營總從事皆著戰功康熙十二年癸丑逆賊吳三桂弄兵滇池變起倉卒雲南貴州四川陝西驕將悍卒乘閒竊發與吳逆遙相嚮應

上赫然發禁旅聲罪討叛先公又告出征以營總從事隨都  
統阿密達進次陝西甯州距城二十里偵賊眾屯聚遣先公  
相機勦撫馳詣門家寨宗令連據四寨薙髮投誠又隨都統  
阿密達進取甯州至米家寨僞千總米三春抗顏拒命又命  
先公率領官兵圍困賊寨止斬米三春等首亂四人舍其妻  
孥餘賊許其歸誠頒給告示導以向化由是曹社鎮等二十  
餘寨以次就撫遂復甯州賊僞總兵羅駝駝周門子魏虎山  
馮嘉德等率入千餘賊於甯州城東山口列陣拒敵都統阿  
密達令先公率本旗官兵擊敗之又離甯州十五里有僞總  
兵吳二袁四率賊千餘於通文安太平大路橫鑿濠塹列陣  
拒敵都統阿密達令參贊副都統鄂克濟哈同先公率領滿  
漢官兵抄賊尾後擊敗之又多羅貝勒董格進攻平涼離城

八里逆賊王輔臣之子僞總兵王繼禎率馬步賊萬餘列陣拒敵先公率本旗官兵力戰自已至未擊敗之僞總兵王繼禎等又率馬步賊萬餘於塔側山腰險峻之處列陣拒敵先公率本旗官兵復擊敗之大將軍圖海進攻平涼僞總兵王繼禎率領各僞總兵及賊眾萬餘於平涼城北護山墩步前馬後列陣拒敵先公率本旗官兵交戰自已至午擊敗之逆賊王輔臣於大將軍圖海軍前獻納平涼城池時先公亦在軍中又僞將軍陳君績率領各僞總兵及賊眾萬餘欲據益門鎮西南高山安營列陣由山左而上拒敵大將軍圖海特令先公相機進攻隨奪賊所據山頂瞰擊南山之賊不令安營日暮始罷先是先公自西安赴援平涼諸將帥皆欲棄涇州回軍邠州先公獨謂當固守涇州以待援兵若回邠州則

涇州咽喉之城必爲賊有凡諸險要賊得與我共之不但平涼難以規取而西安亦大可虞三秦且無甯日矣決以涇州爲駐兵固守之地不可輕移尺寸棄以資賊持議甚堅卒守涇州及進攻平涼時

已下佚

光祿大夫王府長史伊爾根覺羅公墓表

阿金

從來帝王受命開創大業鍾天地貞元之運發日星經緯之華天子旣以神聖文武首出御極其時英賢動舊爲名世之佐彪炳丹青焜煌奕葉世臣閎閎表先喬木良非偶也我

太祖

太宗肇建鴻圖握符御曆文武諸臣攀鱗附翼而起率皆遼瀋之彥

世祖統一區夏永造丕基入關元功龍驤虎賁濟美虞周圭  
鬯彤盧傳諸子孫稱極盛焉若光祿公以賈生之才沈屈王  
傅終其身世際太平無所設施則數之奇也公諱法禮生而  
歧嶷長而令望兼資文武年弱冠以世勳授多羅信郡王府  
三等護衛恪恭厥職旋陞二等護衛再陞一等護衛勳勞久  
著遂擢本府長史輔導賢王屢膺宸眷遇康熙二十三年  
九月二十四日 覃恩誥授光祿大夫妻郭羅洛氏誥封一  
品夫人公倜儻有大志而深沈渾厚不露圭角歷職藩府襄  
贊忠勤雖未究其展蕙而老成敬慎爲屏藩表率後來傅相  
莫能過焉俾祖父以來家聲勿墜亦有大過人者公之曾祖  
諱阿爾塔璽家木起天命初率諸豪眾歸附嘉其誠款妻以  
宗女稱爲木起姑夫官佐領命護治其屬二子長諱阿山累

功爵國公官都統次諱阿達海以材勇佐命在十六大臣之列卽公之祖也竹帛旂常載在盟府公之父諱查他以甯遠錦州松山功授拜他喇布勒哈番又以平闖賊及破騰紀斯圖謝圖汗朔壘汗功進三等阿達哈哈番世襲罔替歷任王府長史六子皆官顯要公其第五子也同出母太夫人傅察氏簪纓帶礪熊羆貔虎之臣莫有加焉公生於天聰九年乙亥十二月初三日亥時卒於康熙四十二年癸未三月十六日申時享年六十有九子益賽娶副都統張公女孫二尙幼女七人俱適名族卜葬於廣渠門外之郊亭公夫人孀姑母也知公勲德家世最詳述其大略表諸墓道以志不朽焉康熙四十三年三月初三日勒石

贈光祿大夫參贊大臣護軍統領兼佐領襲巖覺

羅公神道碑

巢可託

公諱紹茲建州靈樁里人也 國初同父毗炭摩訶槎漢歸  
命厯仕至昂邦貝勒府總管兼佐領配贈一品夫人古爾佳  
氏生三子長諱穆齊禮仕至前鋒校以子貴贈通議大夫三  
等護衛子二長鄔赫次克士圖皆官三等護衛授通議大夫  
次諱柯爾琨仕至參贊大臣護軍統領兼佐領世襲拖沙喇  
哈番授光祿大夫子二長巢可託官經筵講官議政大臣總  
裁律例兼管正藍旗官庫事務刑部尙書加三級授資政大  
夫次莫洛洪官宗人府員外郎署駝騎參領世襲拖沙喇哈  
番授奉政大夫季諱戚世拔仕至佐領授通議大夫子三常  
久官佐領兼管火器營營總事次哲庫納官護軍校兼管火

器季哲爾肯充護軍今巢可託以光祿公任子厚沐 皇恩  
忝膺九列仰追庭誨敬表光榮用承父志康熙四十七年戊  
子七月朔建

光祿大夫鑲白旗滿洲都統議政大臣鎮安將軍

那蘭公神道碑

巢可託

公姓那蘭氏諱馬齊先世爲哈達部落酋長

太祖滅其國以公會祖蘇伯海歸尙公主

太祖征高麗畱鎮遼陽祖馬烏官佐領父馬朗蚤卒公幼雋  
偉善騎射喜讀書弱冠充顯親王府護衛

上以嗣王幼特簡公爲長史府中無巨細皆決于公擢護軍  
統領太和殿災公以巨繩拽仆左右直廬俾無延燒



上知公能授鑲白旗滿洲都統吳三桂反廷選大帥命公督師

上親授方略俾親臣餞于盧溝橋公至柳州降賊二千僞官三十餘人由石門坎攻安陸所賊將扼隘值歲除公密令軍士進攻賊無備遂據山口公令諸將各率所部從徑路入而自統滿漢兵下馬步行山路險峻峰嶂盤迴三十里仰面莫窺其頂且隘甚士不能並進賊據隘待我漢兵先攻之少卻賊眾尾之而出公率將士扳木石奮擊自午及酉大破之生擒賊將兵校二百餘人奪其纛翌日令統軍俄和諾率師先發公與都統勒貝西弗等以大兵戰于安陸所破之拔其城賊將李法直降粵西遂平大兵之下雲南也至曲靖府公與大將軍賴塔軍合黃草壩黃草壩者賊之咽喉也僞將持重

兵連營泥淖中據險固守越數日賊忽出公接戰大破之復與大將軍乘勝連破賊營二十二生擒僞將王友恭王景陽又取賊膠水屯糧所令勒貝俄和諾率漢兵攻之僞將設伏公乘之奪其西門賊潰追殺殆盡又輕騎襲陽陵拔之令協鎮索捷堪都海進攻僞將軍獻玉於板橋大兵亦至擊破其軍渾水塘賊亦潰師至雲南僞將軍胡國麗劉其龍等驅五象以數萬眾逼我勢甚銳公直前搏戰自卯至午大破之追至城下斬國麗其龍及總兵十二人生擒偏校兵卒六百九人大將軍手持觴勞公進圍雲南依黃土岡結營城上礮石如雨公建議夜奪銀定山我軍移營俯視城中如指掌乘高以攻矢石連發賊不能支僞將軍獻玉僞巡撫李元慶等以城降賊首吳世蕃自殺雲南平

天子嘉公乃命公爲鎮安將軍畱守三載威信素著後削籍  
家居復從大軍征羅刹躡其城下受成而歸又數年從裕親  
王征噶爾丹遇賊于烏欄堡公奮擊賊披靡宵遁王嘉公忠  
勇慰勞倍至凱旋

天子愍公復命爲佐領公口不言功小心奉職卒年六十三  
葬廣渠門外三里小板橋之原自

皇上御宇以來削平禍亂開拓疆土武功赫弈前古罕及而  
平吳三桂降羅刹征噶爾丹諸大討伐維公實左右戎行懋  
著勞績何其偉歟公娶覺羅氏封一品夫人卒年七十五子  
男六人長巴金泰王府護衛次巴克達恩廕生次齊格刑部  
山西清吏司員外郎管佐領兼參領次長海恩廕生次常賚  
候補主事兼管

雍親王府包衣昂邦事次存柱候補主事女三人皆適名族  
諸孫十五人曾孫三人以其財伐石紀功者次子齊格也銘  
曰

以勞定國計功孰崇中跌而復其惟有終有質其文碣于隴  
首以慰幽靈永昭厥後

資政大夫二等阿達哈哈番刑部理事官古爾佳  
公碑銘

巢可託

碑蓋古以木爲之麗牲下窆後世乃易以石以之載文辭誦  
揚其人之德業政事文章搜潛剔隱務得其實始足以垂世  
示信夸者爲之未免作諛辭攫金帛往往爲人之所鄙賤求  
蔡中郎之於郭有道碑者實難其人託不文復不工佞世爲

侍衛巴海之所素知以其先人古爾佳公行實見示欲託質  
言之以傳其子孫億萬世巴海託從母昆弟也誼不忍辭遂  
忘其荒陋泚筆爲之銘曰

德林蔚居長白東王業興隆閒氣鍾篤生英傑皆人雄是爲  
資政大夫公公諱郝善德符充有祖查龍佐兵戎有考瞻霸  
列侍從有弟四人公其龍弱冠襲職爲郎中剛斷明允吏事  
通秋曹讞決囹圄空三載考績屢省同名譽大噪魁羣工清  
廉正直褒書封加階錫賚拜恩崇公年方妙清望隆是時海  
寇勢正訶波揚閩地起燧烽羽書直達甘泉宮親藩特將盛  
軍容公爲參佐領前鋒聞柳湖殿當賊衝公帥左掖右掖攻  
賊梟甘惠敗奔窮載驅鯨鱷列艤艦公用火迫蒸其蓬燭波  
沸浪焦鯨鱷生擒賊將如縛縱閩安一鎮時崧龍爲閩門戶

壘重重賊欲奔突來窺墉礮師驅車佚豐隆一震直擣鼉蛟  
胸劇賊窟穴馘其兇扶桑日出曉挂弓凱歌飲至當策功奚  
遽以疾告令終溯生己巳干支逢歲及三十未登庸彼蒼者  
天其夢夢賴有賢配相彌縫佛儀模氏號女宗遺腹生子賢  
且恭名曰巴海起孤童鷹揚執事侍重瞳孫色榜閣才其鴻  
黃榜題名標錦紅厚德之積報必豐在其子孫如在躬公亦  
何憾歸冥膺膺者原石新礱我作斯文表公忠奔葉丕顯  
光昭融

資政大夫佐領兼護軍參領丞理護軍統領事赫  
公神道碑文

石芳

雍正四年丙午歲五月朔二日叔父資政公卒於官本年六

月十一日葬於祖塋芳弟傅柱立將述叔父之懿行以誌不朽而屬草於芳芳不文奚敢言操觚事雖然芳於叔父猶子也芳而不言其何以使叔父之令德表彰於後世哉叔父諱赫騰額字子九行一生而岐嶷不苟言笑性至孝持身簡而御下寬與朋友交始終如一自念世受國恩情深報効忠愛之忱溢於眉宇始仕民部筆帖式黽勉供職大司農以下無不敬而愛之既而襲佐領以賢能特簡治揚州運河疏浚有方公私咸賴事竣之日一塵不染揚州人至今稱之官侍衛以小心勤謹選送澤布尊丹巴胡土克圖到西藏未幾管護軍參領丞理護軍統領事潔已奉公正身率屬寮案服其風裁兵弁深其愛戴詎意命隨星隕享年四十有八溘然一朝遂成千古易簣之日人人流涕非盛德入人之深感人

之切烏能若是乎芳也情關一本痛切九原想象音容徒形  
夢寐雖言之無文不足以傳叔父立身行己之萬一然後之  
人過邱墓而興思得以彷彿叔父之梗概者在於斯碑芳安  
能已於言乎芳安能已於言乎銘曰

邦之彥兮家之賢忠孝性生歸受全豐碑萃律何巍然佳城  
鬱鬱慶縣縣



八旗文經卷四十七終

八旗文經卷弟四十八

墓碑乙

李鐸資政大夫輕車都尉參領衛唐李公三世  
墓表

李鐸弼公王翁墓表

法式善例授奉直大夫禮部主事吳君墓表

法式善耿處士墓表

法式善贈武功將軍雲南通判岸亭陳公墓表

法式善朝議大夫禮部員外郎前翰林院編修

江南道監察御史謝君墓表

法式善朝議大夫甯夏府知府何君墓表

那彥成 予告三品卿前太子少保吏部尙書

梅菴鐵公神道碑

資政大夫輕車都尉參領衛唐李公三世墓表

李錯

李氏自朝鮮徙遼東之鐵嶺愛其風土厚遂家焉其時世皆莫可知知之自始祖英始英生文彬文彬生五子春美其長子也春美子涇涇子成梁故明太傅甯遠伯成積成梁之母弟成積子如梧如梧生二子宏訓繼先宏訓子獻箴繼先子丹箴秉箴遼陽失丹箴秉箴皆殉難無嗣而獻箴亦被掠獻箴者卽資政公也

太宗皇帝既定遼物色得公充侍衛累功授得世襲一等騎都尉官參領自始祖至公凡八世而公遂爲我朝建開國勳公子六向堯向舜向禹向文向旭向昱向堯官駐馬路參將

向禹陵川令順治五年姜壤反向堯向禹並死節向舜攻維揚亦戰歿公三子皆殉國喜於義而傷於情故未及引年而老向文遂以次襲爵向文者司寇公也司寇公初試官禮部副理事繼授佐領晉秩理事既嗣爵 賜名色冷 簡授正黃旗副都統六年使祭北鎮七年授刑部左侍郎先是漢軍任秋官多諉事不治司寇公則悉心平反孚刑於中

世祖信重之獄上公或以事不署名嘗俟署而後可八年晉爵輕車都尉十年出爲蘇州副將軍左侍郎如故出師浙江明年振旅還又明年復出師京口防海是年卒子林隆嗣林隆者都統紹銀也

聖祖御極之元年以本爵奉朝請八年擢副都統有 詔司空集議收天下礫畱者計輕重備不虞眾莫應公對曰隆聞

礮之攻城者率三千斤子十斤小則弱大則滯議遂定十三年鄖陽洪福叛出保鄖襄抵襄陽之明年調守鄖陽賊將楊來嘉陷穀城擾均州界都統阿夔告急鄖師赴援時我師裁六百人而均城參將曹進麟又謀爲內應公虛張軍實嚴其防曹不敢發而楊逆亦遁去十五年賊將譚洪來寇列十二營鄖東山相距久之賊忽以百餘舟順流下直趨城鎮安將軍噶爾漢遣師出擊不克賊舟泊琵琶灘我師屯山麓公進策曰相持兩月賊氣已燼無能爲也今敗其舟師則山麓自解矣不納公以青草口石屏風石龍窩兒皆故盜穴賊據之非數月不拔而我師糧不繼利速戰爭之再鎮安曰無船奈何公乃自往竟得船時賊於江沱壘石爲堞伏火器擊我師公偵知之與標兵結犄角三道進分賊勢而騎步不時至遂

無功公怒責不用命者明日復進騎兵前擊水師沿灘下步由南岸趨賊沱合勢奮擊兵交之際日在高春反景倒射飛鏃如雨俄頃洄波盡赤賊不支棄舟潰追至均盡獲賊舟而山營亦潰於是移駐穀城十七年委署河南提督駐夔陵公以夔陵扼衝要賊據險則秦蜀中斷乃築長壘自固謀相機定蜀十八年王師渡江取滇黔公曰蜀虛矣定蜀此其時矣致督師蔡毓榮書切言之卒不納十九年公赴萬縣與屯達貝子會重慶會萬縣譚宏受吳逆僞封反公曰譚眾烏合利急擊且請先據涪州制其通黔中路會宏死其黨推秦韜復爲亂公乃帥舟師進出銅鑼峽至木洞驛百丈梁梁突江中水分爲三梁北爲洪中大洪南平水而上游疊碎石曰緊急三貝號最險既至抵葭嚴鼓試之賊驚公謂諸將曰賊易

與耳與諸君約詰朝礮初舉集緊急三貝再舉張兩翼進三  
舉直前奪舟奪舟多者爲多縱者以敗論皆曰諾黎明師集  
礮三舉師爭奪舟賊眾大亂梁遂拔殲其魁時二十年之正  
月三日也明年班師還坐事罷二十九年復起授副都統噶  
爾旦逆 命公統八旗礮出塞與侍衛阿南大偕行忽一蒙  
古至阿前請

皇帝安旋上馬同行歡笑良久去公曰此何人使其主必叛  
矣目動而言肆遣游徼偵之果然眾驚服尋 命督火器會  
賊據烏蘭布敦之東以河泥爲險聯橐駝爲壘而往來其旁  
爲疑兵以誘我師我師擊之不動還乃躡我後公擊以礮賊  
遂披靡既卻公請乘賊師可得利裕親王不可旣而報失礮  
近賊壘公領前鋒百持矛馳十餘里得礮泥中賊遙指擊公

自爲殿賊不敢逼是役也公功爲多三十一年擢固原提督靖遠有五方寺番夷壤錯黃流爲限冰合則險失公立屯田互結法兵不增而人相保又設義學延明經厚廩餼以教子弟於是邊民爭向學剛猛之氣爲之一變或有請築黃城兒事營田者黃城兒本高昌王避暑之斡兒朶城城有二踞河東河流淤淺不能引漑午熱夜寒植物不穫且凶荒之後民業未復修築滋擾公力持不可事得寢秦民大悅

聖祖親征噶爾旦 詔公會師塞上旣至巴勒口賊已斃舟濟藍款服 命班師公策舟濟藍必奔達賴喇嘛要之可獲果獲之以歸京師三十六年擢鑲紅旗都統四十七年卒遺疏讓爵伯父向舜之子辭殊懇至

聖祖驚惋遣使祭奠 賜祭葬 召見公孫大均授佐領襲



爵嗚呼此資政公暨少司寇都統三世之大略也資政公字我敬號衛唐順治十五年正月卒葬上清河之北少司寇公於順治十二年十月卒葬左昭都統公字紹銀康熙四十七年四月卒葬右穆資政公與錯上同七世祖爲錯從伯父錯生也晚方總角時都統姪已皤然成老翁固不及見伯父及司寇兄然篤行遺烈頗孰聞之初伯祖宏訓公篤志詩書雅不樂仕進補博士弟子員優游盤阿伯父雖幼能先意承志鄉曲異之及生子以義方教故諸子皆能殉國難瘁王事都統姪善讀書行師以律大河以南號小李將軍方其馳驅萬縣也母蘇夫人歿軍中例不得奔赴泣血馬上竟墜澗澗斗絕馬泥爛萬分絕生理都統踞石乃無恙咸以爲孝感所致云及事定還廬墓次伏苫由嘔血幾滅性

聖祖彊起之嘗 御紫光閣大閱問曰若出師何處立功對曰臣於鄖陽破譚洪重慶滅譚宏

帝曰重慶若未與對曰臣以初三日破賊將軍以初六日進城時侍臣皆代之憤曰滅賊人知之胡不悉陳答曰臣職爾御前非爭功之所也所乘有名馬朝貴欲之堅不與曰受命出師而賂近臣吾不爲也嗚呼自伯父至都統姪歷三世忠孝大節炳然如日聞者靡不興起予小子爲一本之親故又能悉其行誼如此都統姪有子曰焯焯字在中美風儀尙遠略歷官參領

聖祖深器之日左右侍都統有事入 告輒命焯以 聞既而以家事得罪繫繫釋今在中年七十餘猶矍鑠善飯瀨死者數卒得免異哉一旦致余言曰國有史墓有表舊已祖

父立三世功旂常有紀而子孫無聞煒之責也然家中落樹石墓當不可得請爲文以先之俟後之子若孫繼其志噫在中老矣顧其志之遠也猶若此可喜也而傷之矣乃系之銘曰

離德耀震精芒坳揭我祖我伯電擊神扶四位載孚丞疑輔佛桓桓宗子屢何天畢田狐三獲仁止雕鍛

帝曰爵女錫女赤芾嗣克承義咸貞厥節太行匪高大江匪潔惟忠惟武赫濯颯颯澤不卒斬瓜衍其颯勇踵超軌陵不廣拂火燕鄖巴用友雙蘖北山巖巖清河湜湜示我子孫永昭鴻烈

弼公王翁墓表

李錯

翁姓王名某字弼公包衣人年七歲從其父居

景陵穎異善悟及長駘蕩而有守不樂仕進喜漫游田野或名藍精舍旣而欲藉祿養娛父母遂充茶上人又以父母老嘗疾苦乃研精岐伯書通其術葆攝縝密父母至八十餘乃終翁由是遂去官翁性樂施予鄉里有不能舉親喪者給棺衾如孝子意貧不能舉火者資以糧匄貸者度不能償焚其券求藥者必躬親而後予翁旣多樹德又以質直表當世人

有過面斥之不肯憎親知或相迂來卽平釋言必兩允以故受之者無伎心無怨言相率而稱之曰善人初翁在官時當事者擬以員外郎薦翁固辭至于主者怒卒不就至是官有疑輒就咨曰王翁畫必周其所以取信者如此翁旣老每秋風起輒令健兒臂蒼鷹走平原獵狐兔倦便卽田家食田家

爭款之曰翁故健不減少年時也年三十五舉子蓮游獵恣其性不甚加檢束或問之曰璞也厲其廉當自復比長果折節修儒行未三十膺鴻詞科今且爲員外郎矣翁娶劉氏劉事姑嫜謹及罹喪哀毀與翁等自含斂至虞祥儀與物必精到所親多之嘗援之以爲故實曰王媪之所行也媪性亦樂善助翁施不給則典粥辦善人之稱媪亦有以成之也翁病媪疾亦甚召子蓮曰謹藥食若父命在天慎毋遺終身憾翁歿媪曰喪具辦乎曰辦矣曰吾可不從乎遂亦瞑遠近聞之咨嗟惋悼有巷哭者翁以乾隆九年四月二日卒年七十後七日而媪卒年七十一錯與翁子蓮善翁亦雅愛錯錯知翁事最悉迹其行蓋王彥方之流然鄉里以善人稱則亦曰善人而已矣孔子曰善人吾不得而見之若翁者固吾夫子之

所願見者夫蓮葬翁媪某山之陽旣襄事屬錯爲之表錯不敢以不敏辭謹表其生平而爲之銘其辭曰

善協于一用厚其基盛德之容天副厥配蹈實以虛中行清  
且太白睽睽滄物而化水之澍澍山之崔崔億萬斯年後來  
其思

例投奉直大夫禮部主事吳君墓表

法式善

君諱蔚光字愬甫一字執虛自號竹橋世居休寧系出唐左  
臺御史少微公後遷環珠村又遷大棐君生於休寧四歲隨  
父居昭文之迎春巷而吳氏始爲昭文著姓曾祖國啟祖宏  
祖考敬俱以君弟熊光貴累贈資政大夫曾祖妣金氏祖妣  
查氏妣金氏俱累贈夫人君九歲喪母哀毀如成人輒有遺

世獨立之槩以父在不敢廢學姿性穎敏漢魏樂府上口不  
忘十八歲以錢塘商籍補博士弟子員乾隆丙申獻賦天津  
欽取二等第五名丁酉舉順天鄉試改昭文籍庚子會試  
中式 殿試二甲第七名選翰林院庶吉士纂修 武英分  
校四庫散館一等第六名改禮部主事是冬以病假歸侍父  
極生榮死哀之禮教子弟有法度宿疾旋瘳旋作因得退閒  
林下二十餘載從容言笑而逝年六十一歲其卒以嘉慶八  
年八月二十三日君愛郭西湖田曠幽欲構屋其上而未果  
故自署湖田外史其子將卜吉于其麓以成先志配邵氏子  
五人峻基候選府同知愷基邑庠生祿峙國學生候選直隸  
州同知象嶸廩貢生試用訓導憲澂增廣生孫八人孫女七  
人君生平抱負甚奇偉視天下事無不可辦及屢摧折于名

場而其氣亦稍衰矣願獨于文讌詩會酣嬉磅礴凌厲傲兀而曰造物扼吾以功名而豐吾以文章不猶愈乎故當其未第時江南北浙東西竹橋詩名已噪甚余既偕君同登第橐筆值詞館君殊以余爲可語時時近暱之越明年君改官去忽忽幾三十年而君外嗚呼可傷也已然君特屢以詩文寄示余余有所作亦郵傳質君今其子不遠千里以行狀來欲得余文以妥君之靈也邪君既淡于仕進而聲色無所累其心惟于佳山水好子弟則不能須臾釋情而又能嚴辨乎人性之善惡深究夫詩教之貞邪上不背古人亦不囿于古人獎其所已至而勉其所未至汲汲焉皇皇焉若不克終日者其誠篤如是蓋君之教可以化一鄉可以化一國也而其心則以爲可以化一國則化一國可以化一鄉則化一鄉矣此



其意度超越豈可僅以詩人目之也君少與黃景仁仲則高文照東井楊芳燦蓉裳汪端光劔潭齊名仲則東井死已久劔潭浮沈下僚蓉裳需次農部皆不獲一第余與君同登第矣同官翰林矣官之升沈不足言而二十餘年省躬自考要未有足以質諸友朋者持以較君固皆有所不及也君晚年蒔花藝竹淪茗滌硯不藉手于童僕春秋佳日杖履優游喜以圖書琴鼎自隨至亭樹潔淨手親播拂購王冕梅花長卷以梅花一卷名其讀書小樓歿之日遠近來弔者皆曰竹橋先生亾矣嗚呼觀君之所自得不誠使人有翛然遺世之思邪君所著有易以二卷洪範音諧二卷毛詩意見四卷春秋去例四卷讀禮知意四卷求閒錄十卷方言考據二卷閒居詩話四卷駢體源流一卷杜詩義法八卷唐律六長四卷詩

餘辨僞二卷姜張詞得二卷素修堂文集二十卷古今石齋詩前集四十五卷後集十五卷小湖田樂府前集十卷續集四卷寓物偶爲二卷

耿處士墓表

法式善

處士襄城人諱奇標字篤生先世稷山人明初徙河南父習吉官國子監典簿處士兩試有司不得意援例貢成均典簿君以老疾廢家事悉委處士處士既任家事和睦族黨爲務埽塋祭先必誠必敬教族人無少長皆崇禮教不使有詬詈聲急病讓夷汲汲如不及當鄖襄亂民擾楚豫閒凡官運糧餉有資于民者處士身爲眾人先蓋忠信出于天性然也平居誠諸子曰讀書以明理立品非僅科第計也與爲強悍寧

爲文弱與爲機械寧爲質訥蓋其言質而意不在於急功近名趨利避害也如此嗚呼使人人皆能勉處士所爲犯上作亂之風有不泯而禮讓仁厚之習有不成乎余故於處士他善事皆略焉而表是以爲世法至其族系子姓詳于墓誌茲不著

贈武功將軍雲南通判岸亭陳公墓表

法式善

吾二十年前於翁覃溪先生所知陳君廣寧能考辨金石文字後于儀徵阮侍郎所知陳君工詩逾十年陳君來京師借何氏園觴余十日乃閩行益陳君以嗣父難艱襲官而擢副將時也又逾年陳君擢總兵來京師以本生父贈武功將軍表墓文爲請今年八月郵銘傳行狀至且徵前諾余何敢辭

公姓陳諱聖修字念祖自號岸亭籍浙江之山陰以曾祖理官廣西遂移籍爲平樂人祖廷綸康熙庚辰科進士官至廬州府知府父齊襄舉賢良方正官至廣饒九南道皆能以讀書飾吏治公兄弟九人公行三少質性過人既長通經史舉乾隆二十五年本省鄉試明年上春官不第遂援豫工例爲縣令官蓋公以沈博之姿浸淫于載籍者深承其先世代有名賢樹蹟于東南公得有所則效歷數郡邑經畫數十大事民心靡不感動其宰桂陽也定分撥口糧之例桂陽人至今德之其調益陽也倡捐廉建城之議益陽人至今德之令太和雪楊氏婦之冤署阜陽調蕪湖減獄囚之死又能振荒修閘禱雨平糶太和阜陽蕪湖人至今德之而治祁門蛟患一事最爲大吏所重顧竟以此得勞疾公生平不徇利不避害

不薄以待人不厚以待己其辨賊據不實之不可定爲盜辨  
關死者之不可定爲拒捕時人或疑之久乃見信擢雲南通  
判未抵任卒時乾隆五十八年九月也年六十有一以子廣  
寧貴貶贈武功將軍配凌安人貶封夫人子二長廣福例授  
州同知次卽廣寧公仲兄聖傳官臺灣縣丞夙林爽文之難  
應得蔭無嗣以廣寧爲之子襲雲騎尉洊升福建副將擢總  
兵公少以文字見知于桂林陳文恭公新建裘文達公武進  
錢文敏公能詩善書著益善堂詩文集八卷審駁成案二十  
四卷歷朝詩選三十卷廣寧將次第開雕以顯公之志先大  
夫與公乾隆庚辰科同舉廣寧是以文屬余余于公爲年  
家子而念公之治績卓卓可述又知廣寧于卅年之前故不  
辭而爲文其隄上之碑其家世子姓之詳見墓誌茲不具

朝議大夫禮部員外郎前翰林院編修江南道監察御史謝君墓表

法式善

余與長沙謝君同于乾隆四十五年成進士入翰林年齒相若性情契合出入與偕游讌必共歲月遷易升沈榮瘁遂有不能同者而其用心之所在未嘗不同也君既棄世余猶奄息人間安得無言君氏謝名振定字一齋號薌泉湖南湘鄉人系出會稽徙長安遠祖諱惟興者始遷楚後乃定居墓潭祖如渾貢生父再詔乾隆壬午科舉人君兄弟五人君其季也十歲能屬文弱冠應試褚筠心學士拔爲弟子員第一自是君兄弟五人皆在學丁酉科君與仲兄振仁同舉于鄉庚子君成進士選庶常君父在家病卒君奔喪歸丁未散館授

編修戊申副胡文恪公爲江南考官得士稱盛當禘學士爲  
湖南學使時吳御史雲以諸生佐其幕激賞君文定爲弟子  
員第一者吳御史也及戊申君主江南試而御史乃出君門  
士林稱文章之契合不誣甲寅五月改監察御史九月巡視  
江南漕務多善政丁民稱便請建風神廟于江干君渡輒得  
順風京口人至今有謝公風之稱旋朝巡視東城大學士和  
珅妾弟與其家人橫于市懲之焚其車越二日有劾其縱放  
不合者乃罷御史職君固喜讀書至是益肆力於古文間以  
詩酒自娛樂署所居門額曰心太平書室以見志今

皇帝臨御知君名以主事用籤分禮部甲子科典試陝西一  
如試江南時陞本部員外郎簡放戶部坐糧廳刷洗積弊殆  
盡凡事不藉手胥吏監收天津北倉漕船火徒步往救其修

康家溝壩張灣故道開果渠溫榆河爲文以祭自比昌黎故  
事而工悉治遽以積勞致殞以嘉慶十四年五月某日卒年  
五十七君工古文喜吟詩性嗜山水不畏險阻至必窮其勝  
在都游必與余偕踰時必有詩文以紀登泰山華山造其巔  
記文皆傳于世明大學士李東陽君鄉人也余故得其墓君  
慨然募而修之病中猶捐貲鑿井灌林木土人呼爲薌泉君  
古文在歐陽詹獨孤及之間約余仿黃黎洲選明文海例輯  
國朝文爲一編曰今文滄上繼姚鉉唐文粹呂祖謙宋文  
鑑蘇天爵元文類自江南載十數書麓而歸執余手相諉託  
以其事爲不可不慎然終未能助君卒業是余生平之一憾  
也悲夫元配氏周封恭人二子長興曉嘉慶戊辰舉人次興  
垣監生皆周恭人出女一適李宗茂孫邦鈞垣出孫女二曉



出君病劇以自著知恥堂詩文若干卷付吳御史雲校定云  
朝議大夫寧夏府知府何君墓表

法式善

余交何太守二十年矣太守少余十三歲而精力血氣勝余  
不啻倍蓰官甘肅不知其病忽傳其病且外而凶問至矣嗚  
呼傷哉天不可信矣君豈可外之人哉而君竟外哉君之子  
乞余表墓經年而不能爲茲乃忍慟書之君諱道生字立之  
號蘭士先代由中州遷靈石曾祖諱溥貢生州同妣陳祖諱  
世基附貢生州同知妣鄭郝父諱思鈞乾隆乙未科進士翰  
林院檢討妣王梁張三代皆以君貴贈封朝議大夫妣皆贈  
封恭人君昆季六人君其仲也七歲梁太恭人歿哀毀如成  
人人塾爲耆宿所器隨檢討公居京師檢討公督課嚴江南

名士入京求爲弟子師者莫不知有何氏書塾君年十五下筆爲文已自不凡王蘭泉程魚門張瘦銅君父執也折輩行交年二十一歲舉于鄉明年丁未偕其兄道冲今改名元煇者同登進士一時傳爲科名盛事君以詩負重名既改工部主事習句股精算法日日入署與一二老成僚友講求切實之學上官胥賢之君散衙仍鍵戶讀書遵檢討公教也君四充順天鄉試同考官壬子甲寅乙卯戊午四科也得士如王紹蘭丁履泰梁承福王鼎文鄒植行鄭錫琦趙秉瀆張樹穀朱彬彭蘊輝張師泌劉燠楊景仁皆一時之選余官祭酒錄科列前茅者蓋十居八九云嘉慶元年擢本部員外郎陞郎中御史四年冬以大臣密保 召見命巡視濟寧漕務五年授九江府知府六年丁父憂十年服闋授寧夏府知府 召

見君奏宿病未瘳願就京職奉 溫諭以汝之為人朕所素  
 知寧夏要缺汝好為之如果不勝再請不遲君遵 諭往君  
 生平勤慎廉潔官部曹簿書錢穀叢脞紛沓親為籌畫及巡  
 漕供張饋貽裁汰殆盡山東巡撫惠公語人曰何御史少年  
 風骨峻拔如此且學問人品皆不可及方今第一流人也聞  
 者趨之九江凋弊素稱難治值湖湘亂民滋擾毗連九江兵  
 差絡繹不辭勞苦而心力固已大瘁焉其漉寧夏一如九江  
 時乃旬日假銀案發故事滿城兵餉由府庫支領府庫又由  
 藩庫支領君未任事有急需賞卹者前太守取兵餉墊之君  
 既任事餉不敷以廉俸委縣令於錢店兌往內微雜以鉛將  
 軍遂入奏奉 旨解任聽候察辦事白復任又以劉公大懿  
 陞臬司姻親例迴避去任而疾篤矣君工詩善畫豪于酒又

好隱憂數年以來時往京師就余所見無日不晝無日不詩  
更無時不酒無事不憂也乃以嘉慶十一年六月十八日以  
病驟亾于寧夏時四十有一耳可傷也已誥封朝議大夫配  
陳封恭人子二長熙績次耿繩俱讀書克家女五長適陳映  
輝次字楊寶元餘幼孫男四福星福寧熙績出福雲福安耿  
繩出余與君及吳穀人王惕甫張船山詩會最久君歿余爲  
訂其方雪齋詩集焉

予告三品卿前太子少保吏部尙書梅菴鐵公神

道碑

那彥成

道光四年正月丁卯 予告三品卿前太子少保吏部尙書  
梅菴鐵公薨越明年四月十六日葬于八寶莊之原公之孤

瑞元瑞恩郵書門下士那彥成請表神道那彥成乾隆己酉  
公總裁禮闈所獎拔受知至深不敢辭公諱鐵保字正亭號  
梅菴滿洲正黃旗棟鄂氏曾祖諱寶柱祖諱富起臣考諱誠  
泰字澗齋直隸秦甯鎮總兵妣輝赫太夫人生子二公其長  
也次爲閔峰侍郎諱玉保先公卒公生而異敏念家世習韜  
鈴當以文章顯攻苦顛壹年二十一成進士由銓曹入詞苑  
高宗純皇帝試翰林擢第一又嘗校射中三矢 賞戴孔雀  
翎先後爲侍講洗馬各一學士三鴻臚少卿少詹事各一內  
閣學士二禮部侍郎二吏部侍郎三禮部吏部尙書各一盛  
京兵部刑部侍郎各一奉天府尹一日講起居注官教習庶  
吉士各一管理咸安宮二總理國子監一稽察右翼宗學四  
譯館各一都統二副都統五山東巡撫一漕運總督兩江總

督各一廣東浙江巡撫未赴各一葉爾羌喀什噶爾大臣各  
一主順天江南山東鄉試各一總裁會試二知貢舉三主試  
咸安宮八旗教習一公天秉沈厚寬博有容涵操精明在割  
能斷於處曹司介然孤立意所不可廷辯無屈撓以是爲先  
文成公所深器由員外郎至副都統皆公保薦也其居卿貳  
也劾選司欺蒙請芟吏兵苛例條時政得失多見施行於當  
時襄贊 授受上儀海內稱美其涖封圻也於漕斥加賦籌  
卹丁斟酌科條可通可久於河不浚海不增堤堰斬復曩利  
去今害河以從軌於馭吏布公推誠進賢黜不肖務爲坦夷  
不設城府吏以大和於治民抽撻良姦區析淑慝彰瘡互施  
強威弱懷無敢不若所至建書院育嬰堂義學昭忠祠或創  
或因頌歎溢路誅水手張湖廣鹽梟田五董際雲洋盜蔡廷

秀周文達亂民劉茂修余連樊名揚殄殲渠魁鷹化鴟革其  
他飭士習肅軍伍改營制勤民瘼拯災黎權度緩急經緯衡  
從沈幾獨照赴義如矢引咎不以委寮屬建言不知有畛域  
綜而論之皆公緒餘

仁宗睿皇帝手勅褒曰治國如治家又白得大臣體煌哉

聖言微公疇克堪茲公督兩江四年以失察屬邑冒賑謫戍  
烏魯木齊旣而遷階 賜環游升冢宰矣又在喀什噶爾  
時過聽回民訟褫職戍吉林然公之西也甫八月而由辦事  
晉參贊升講學 恩綸屢賁在北庭稍久尋亦以洗馬 召  
還

今上初元因目疾乞休蒙 召對予三品卿銜致仕 恩禮  
三朝始終弗替何其媿也公憐才好士每司衡無不校之卷

己酉春榜擁節旄升槐鼎者相望壬子江南榜得大魁四人  
門牆之盛罕有倫比與閩峰侍郎最友愛人以擬之二蘇有  
惟清齋詩文字帖行世詩文爾雅沈實不事鉤棘動循規繩  
長慶會昌未足驂靳楷書樞平原草法右軍出入懷素孫過  
庭臨池之工天下莫及嘗輯八旗詩進呈

仁宗御製序賜名熙朝雅頌公論詩貴氣體深厚又云貴實  
境不貴虛詞論書云豐者無骨瘦者少腴尙氣魄者失怒張  
矜風韻者趨柔媚皆非書之正格也論者謂惟公不媿其言  
云嗚呼公生長動閭慨然自奮於詩書弱齡登上第數歷中  
外四十餘年持節東南澹沈菑夷巨盜曾不一動其聲色繼  
而出玉門涉龍沙重趼西北數萬里篤棊之忱訐謨之告未  
嘗一息以懈晚而考終邸第優被殊渥功名在天壤忠盡



在邦國文章翰墨在古今斯可謂無憾者已夫人甯古塔氏  
內閣侍讀學士諱巴克棠阿之女于歸後遂能詩工於草書  
子二瑞元辛巳恩科舉人刑部員外郎瑞恩國學生銘曰  
白山炳靈實生才雄二惠弱一爽惟我公我公堂堂少踔文  
囿有彌厥中日大以富出建旌鉞入登棘槐爰作舟楫以濟  
江淮道有卷舒時有通塞公一視之砥平繩直絕塞歸來皤  
皤鬢須疏泉蒔花揮翰以娛藝也繫道言也繫德益以事功  
不朽斯克有佳鬱蔥左林右邱勒此貞石用垂千秋

八旗文經卷弟四十八終

八旗文經卷第四十九

墓誌

恭忠親王第二女墓誌銘

鮑鈇陳姬墓誌銘

法式善南陽清軍同知林君墓誌銘

法式善封中憲大夫浙江分巡溫處兵備道李

公墓誌銘

英和侯先生墓誌銘

英和榮祿大夫太子少保直隸總督慎餘溫公

墓誌銘

英和贈中憲大夫例晉中議大夫亮齋朱公墓

誌銘

英和朱母劉太淑人墓誌銘

鄂恆贈太常卿棟鄂端節公墓誌銘

錫纘刑科給事中蔣君墓誌銘

錫纘太子少保漕運總督文公墓誌銘

李錯法天禪師生塔銘

附

第二女墓誌銘

恭忠親王

嗟乎吾初不料汝之遂居於此也方汝之卒吾固匆匆未暇  
爲汝謀葬事乃歲月倏忽距於今已十四年當汝之始生也  
爲咸豐十年二月二十三日辰時其時親鄰來賀多謂汝豐  
頤廣顙可以享福澤而登耆艾乃汝遽於同治三年二月病  
以二十一日巳時死嗚呼人事固有未盡耶抑天事固有定

數耶而汝遂長往耶汝卒之四月而汝弟濬生閱二年而濬  
又死其殆汝之靈不昧而故託伊以來耶然無端而來又無  
端而去抑何必爲此一見再見以重傷吾之心耶其當皆歸  
於命耶汝弟生之一月蒙 恩封爲輔國公今將葬之於昌  
平州翠華山之原而畀以汝附於其上又懼汝之無所表於  
後世也乃樹之碣而爲之銘俾後世以吾之故汝二人之墓  
胥勿樵蘇焉則汝雖死殆亦可以無憾耶銘曰  
汝生五載汝死千秋我銘此石天地常留

陳姬墓誌銘

鮑鈇

夢崦居士姬人陳氏小字卯生其父母向依居士家涿鹿生  
姬襁褓中隨居士游宦南國歷十有五年而歸姿性慧巧伎

倣過人凡絲纈文繡之事一見卽能爲之居士嘗教以文翰頗能領悟其他具有夙智幼侍箕帚已見憐愛迨薦衾枕了不以色事居士居士亦未嘗以尋常嬖媵昵之雍正元年九月壬戌病卒十月癸亥葬之順天府房山縣岡上村先隴之側嗚呼人世幻化固常理耳乃居士向於涿鹿睹其生今復於涿鹿哭其死年華馭促重有感于釋氏三生因果之說也旣悼之以詩復仿東坡葬朝雲之例志其墓銘曰

生于斯而歸卒于斯嗚呼酈亭溝水一去而無反期奚其不作堅牢之玉而爲頃刻之花也雖埋骨于西岡之陂乃魂氣則無不之噫

南陽清軍同知林君墓誌銘

法式善

君林姓諱適中字權先自號敬亭先世莆田人明宣德閒遷粵居和平梅林鎮曾祖叔瓚祖文植父蘭章俱以君貴贈如例君資性過人讀書數行下攬筆爲文驚其老宿十八歲補縣學生員食餼舉丁卯鄉試世重君媿博意必居清要君亦厚自期許六上公車皆僥得復失乾隆四十年選舞陽縣知縣四十二年充河南鄉試同考官五十二年俸滿引見奉旨回任候升署南陽清軍同知五十五年以年老乞休歸六年卒享年七十有五君坦易慈和與人無忤然持躬嚴整言笑不苟取與之際雖小必慎凡有所求者又未嘗不委曲以足其意人由是畏且德之君之宰舞陽也崇尙淳樸邑多姦民誘子女販鬻君嚴禁之其風遂息俗有親喪多用鼓樂法令不能遏君爲涕泣論之久皆感悟革其習黃河決公料量

工役民不擾而事辦以其暇煮糜施藥活民之貧且病者民多賴之既移疾歸春秋佳日極登臨山水之樂喜作擘窠書得之者珍逾拱璧後生小子有所質問誨導不倦人樂從之游君子來祥嘗讀書太學余官國子司業時知其爲好古士也旋官教諭去已十年矣頃以書狀來乞誌其先人之墓相去萬里以余言爲重是不欲誣其親者也配楊宜人有壺德子三長卽來祥次景鑑次景鑾女三孫六孫女五葬于某村之某原銘曰

君之性宜桂薑君之材宜棟梁肆力於文章而不登玉堂其宰舞陽也如出匣之干將而胡爲乎善刀而藏嗚呼河之水洋洋民頌君兮不忘

封中憲大夫浙江分巡溫處兵備道李公墓誌銘

法式善

公李氏諱學夫字青上明初自鳳陽遷山西之靜樂遂世爲靜樂人祖之檀官高郵州知州父暉官淮南儀所監掣同知生三子公其季也性溫厚生平無急言遽色父沒時食指繁弗獲已與兄析居公生長江南不諳西北風土習俗無術治家家益落嘗援例爲部寺司務居京師久之不得官歸而鬻其產皆盡又兩喪其配死喪之戚貧窶之况人有難堪者而公恬然也公事母沈太恭人孝沈太恭人愛長孫鑾宣曰汝種德當在孺子太恭人歿公哀毀不欲自生及鑾宣成進士官刑曹公所以誨之者如其爲諸生時鑾宣爲監司誡之曰無察察之政者有醕醕之德無赫赫之名者有冥冥之功吾願汝爲外吏如爲內官時旣官臬司則又誠之曰雉不隱其



文故麗於羅豹不藏其斑故陷於羿汝疏中而卞急不能忍  
吾且恐汝麗焉而陷焉矣公之教子如是人以爲善繼沈太  
恭人之意可謂以慈成其孝也靜樂賦重當公鬻田時黠者  
取其田而遺其賦餘田多沒于水入不足充正供而公之入  
賦如故至稱貸於人以應之人是以稱公爲長者鑾宣嘗疏  
公行事示余云人負己債置弗問己負人則罄所有與之質  
庫帖積如束筍弗計也公以鑾宣貴累封中憲大夫浙江分  
巡溫處兵備道嘉慶十二年六月十一日卒時鑾宣方戍伊  
犁及蒙 恩賜歸十四年秋擇吉葬于邑東凌華岡之東阡  
鑾宣與余交三十年在京師時無三五日不過從及旣官于  
外每作書問必述公意訊余今以銘幽之文爲請余安敢辭  
公配孫淑人繼配喬淑人先公卒子二長鑾宣乾隆庚戌進

士歷官雲南按察使次綸宣監生孫一復觀銘曰  
樸木無華其理必堅巉石不文其真必全高山蘊靈必濬於  
泉慶雲葆光必著于天哲人之後必有名賢

侯先生墓誌銘

英和

先生姓侯氏諱坤字礪石安徽無爲人祖亮論父一鶴生子  
三長履季鼎先生其仲也少好經學舉業入大家堂奧善書  
能詩遇事有定識性友愛兄履無子以子銜嗣撫弟鼎遺子  
鍾如己出乾隆戊寅補博士弟子員丁酉舉拔萃科丁父憂  
服除補廷試遂畱京師屢試京兆不第丙午考授州同知改  
鹽運使司經歷分發廣東嘉慶丙辰補官庚申攝運同事辛  
酉四月二十四日卒於潮州官署年六十有二先生在粵東

時以文行見重上官疑獄非先生讞不定僚屬皆師事之所  
轄育嬰堂歲久廢弛先生醵金修葺招乳婦收棄兒費不足  
捐廉佐之嘗謂育嬰之設所以廣慈惠也甯濫毋隘因署其  
楹曰莫隨手誤人家性命且回頭看自己兒孫嗚呼此可見  
先生之宅心矣粵東鹽場煎丁曬丁積虧鉅萬先生乞上官  
以積引彌補奏奉 恩俞一時疲丁乏商並感其惠服官凡  
五年政餘讀書不輟所著有蝨竹山房詩文集行世其南華  
經參解漱六集等藏於家所撫紫藤書屋古帖千文爲後學  
楷式配汪孺人賢淑慈孝勤操作先先生卒子六銜鈺鑄鐸  
鑄官長蘆鹽運司知事俱孺人出鏐鏃早亡側室黃出孫七  
以嘉慶甲戌十二月二十二日合葬於貴池縣郭港之原鑄  
以行狀來乞余誌壙余少從學於先生知之詳不敢以不文

辭因序次本末而系之銘銘曰

吁嗟先生遺惠孔長慈幼振之勿疋勿殤粵之民方飲食祝之而何遽乘雲以翔松楸奕奕幽宅臧詩書之澤遠兮仁表瀧岡

榮祿大夫太子少保直隸總督慎餘溫公墓誌銘

英和

慎餘制府之尊人印侯先生爲先文莊公視學山右所取士後乾隆己丑成進士再出先公門下官京師過從數歲戊戌慎餘以拔貢入都印侯攜之謁先公於私第時余方侍側先公顧而語曰印侯之入學也來謁時肩甫與案齊今其子乃以拔萃來則余安得不老相與嘉歎者久之此余識慎餘之始也後慎餘之子啟鵬又爲余門人三世至交垂五六十

年終始不渝今愼餘沒矣其孤以狀來乞余銘不敢以不文辭謹按狀公諱承惠姓溫氏字景僑愼餘其號也晚號七十愚叟先世出晉忠武公後世爲太谷人曾祖士恭邑庠生祖有裕優貢生鄉飲大賓父常綬卽印侯先生由翰林累官戶科給事中誥授朝議大夫兩世俱贈如其官後以公貴俱晉贈榮祿大夫妣皆由恭人晉贈一品夫人印侯先生生子三公其長也幼有至性七歲遭母夫人喪哀毀如成人長讀書不屑爲章句學倜儻有大略儀度岸然望而知爲偉人碩德焉其歷官由丁酉選拔貢生應 朝考 欽取一等一名以七品京官用分吏部考功司行走遷文選司主事本司員外郎考功司郎中調選司掌印出爲陝西督糧道丁繼母憂服闋補延榆綏道丁父憂奏畱軍營權原官服闋再補延榆綏

道遷陝西按察使布政使調河南布政使擢江西巡撫調福建巡撫署閩浙總督授直隸總督以林逆滋事褫職再以六部員外郎起用補刑部奉天司員外郎遷督捕司郎中 特旨充寶泉局監督出爲山東按察使緣事褫職戍伊犁

今上卽位召還未至而授爲湖北布政使旋降六部郎中補戶部廣東司郎中又以前所屬事褫職遂引疾歸其恩榮當高廟時以簡放外任 召見許其有膽識可用 駕幸五臺居憂在籍循例迎 鑾一見許其可大用任道員加按察使銜 賞戴花翎當

仁廟時任直督 賜五言律詩一章刻石蓮池書院 賞穿黃馬褂加太子少保銜勦長垣賊 頒欽差大臣關防授總統旋改參贊大臣其將兵則在興漢一路堵竹谿賊於白河

退川匪李樹於安康擊楚匪於鷹嘴山其時則有化龍山之捷石門子之捷平利孟石嶺之捷安康湘子坪二郎鋪之捷而軍務一疏謂宜扼要駐兵以逸待勞尤三省所賴以成功者至斷蔡牽於鹿耳門清滑縣賊於運河西特其緒餘耳其治河則有衡家樓之役睢工之役永定河之役而開溫榆河新支又余所建議而公成之者也嗟夫人臣之事君也苟依違澆澀以幸保祿位未始不可以功名終使克自樹立思有以表見於當時則蹉跌往往隨之公三仕三已亦旋廢旋興

觀  
仁廟之意特欲盤錯以老其材而大其用耳最後自戍所歸已見用而不終於用然 龍飛伊始首召釋還則

上之知公者久矣雖三黜又何憾焉公以歲丙戌歸歸七年

以道光十二年二月二十九日卒於里第年七十有八原配劉夫人繼配彭夫人今皆合葬子二人長啟鵬嘉慶己巳進士官內閣侍讀學士啟封嘉慶甲子舉人刑部候補郎中孫男五人女四人卽以其年十二月乙卯葬於太谷白城鎮之大棗園戌山辰向爲之銘曰

其將兵也如神其治河也底平由監司而作督先帝稱之曰能雖不克竟其用而國家諸大政則皆見諸施行歸老於田以佚其生歿而有知視此佳城

贈中憲大夫例晉中議大夫亮齋朱公墓誌銘

英和

余同年朱君桓前在翰林丁外艱今於嘉慶二十四年以高廉觀察卓薦入都將旋任途次聞劉太淑人喪比歸葬屬余



爲文以誌其墓并以考亮齋公先葬前有待未誌今墮其行  
狀屬余並誌之謹按狀公諱一照字臨普亮齋其號也先世  
爲宋徽國文公後明初自始祖輔國將軍贊倫公至粵遂著  
籍廣西臨桂縣曾祖若達年十二尋親踰十年始得遇遂終  
身不仕以孝行稱事載家傳祖依雯康熙乙酉舉於鄉祖妣  
陳苦節 旌表入祠事詳省志父純鑿雍正癸卯登武科以  
孫桓官初贈文林郎翰林院檢討晉贈朝議大夫再晉中憲  
大夫母徐初贈太孺人晉贈太恭人同懷六人公其叔子也  
公十餘齡失怙而大母篤老臥病叔父鳴遠公亦淹病在牀  
伯兄璞山幕游遠出餘俱就外傅家無儋石公泣然曰欲守  
故紙如堂上甘旨何遂從事計然術以孝養爲己任母憐其  
齒稚累重每浙米輒手撮少許別貯一餅公見而問故母曰

恐汝力偶不支卽以此供老姑饘粥吾與汝兄弟雖并日而食可也公聞淒其欲絕益自刻厲祁寒暑雨奔走未嘗少休卒盡孝養而門戶弗墜鳴遠公沒無子公奉叔母王孺人如母養生送死悉無憾兄弟中先公逝者三人公撫孤尤摯教養之俾各有成立嘗偕季弟愛軒客於外河流暴漲所居室已爲水阻急登樓水亦隨上倉皇間得一鎌奮臂斷屋梁衝瓦挈弟出旣獲免登岸猶雇舟以濟難民後愛軒病篤公自客中疾馳歸視中暑幾殆弟旣沒衝寒徒步登山視成墳乃返時公年已垂六十矣公天性孝友純篤讀書諳大義訓二子成立皆由翰林出爲循吏所謂不得於身則得於其子孫者歟生平體味及教人大率本朱柏廬家訓陳文恭遺規各書精岐黃家言有求卽往卻肩輿不乘曰彼貧病交加尙堪

以僕夫累乎或更解囊以資病者歲已酉疫大作公約友人捐資購藥活人無算兩湖暨西陲之役從征者爭求之軍中大獲濟有某爲公司出納頗肆侵漁公察其隱先爲代謀使不失所然後婉辭之曰其家待哺眾矣吾忍以一人之過而令一家凍餒乎公長者行多類此先是會垣東南有文昌閣肇建於隋大業閒久廢形家謂桂之人文所係乾隆壬子有欲於此別營梵宇者公慨然修復自任斥典服物經始其事以迄於成卽冢君桓領解之前五月也嗚呼士君子得志於時往往專於自爲澤不及物卽或有所表見又每出於沽名於物鮮有所濟而一介之士自傷貧困利濟未遑欲其不階尺寸見義必爲而不求顯白於人者蓋憂憂乎其難之聞公之行誼可以媿然矣公卒於嘉慶三年戊午三月二日生以

雍正十年壬子八月初四日享壽六十有七例授縣佐未仕  
以子桓官 覃恩勅封文林郎翰林院檢討晉贈朝議大夫  
再晉贈中憲大夫例晉中議大夫子二長桓乾隆壬子鄉舉  
第一癸丑成進士改庶吉士授檢討甲子順天鄉試同考官  
由京畿道監察御史除福建邵武府知府調福州府知府遷  
廣東高廉兵備道次榮嘉慶辛酉拔貢生朝考授工部七品  
京官丁卯順天舉人戊辰二甲一名進士改庶吉士授編修  
庚午癸酉順天鄉試同考官京察一等除廣東瓊州府知府  
調江西九江府尋調廣信府知府女二長適于鈺次適縣學  
生唐維鑣孫五慶祚嘉慶癸酉科舉人卽用內閣中書 玉  
牒館 武英殿功臣館校閱慶祖候選鹽大使慶祐慶熾俱  
桓出慶昌榮出女孫五曾孫四曾孫女二嘉慶四年二月初

九日卜葬于靈邑鷓鴣塘殿下嶺廂山之陽道光元年五月初一日修塋補誌銘曰

爲善克昌子孫鏘鏘爲邦家光勒銘幽宮以示無疆

朱母劉太淑人墓誌銘

英和

余同年高廉觀察朱君桓以今年冬卜葬其母劉太淑人馳書京師屬余爲誌墓之文誼弗得辭謹按狀太淑人姓劉氏爲贈中憲大夫例晉中議大夫亮齋公之元配也年二十五于歸先是亮齋公幼孤家貧慈親在堂兄弟俱業儒遂棄學以孝養爲己任至是太淑人善成其志躬執苦深得老姑歡又曲全門內俾一家和順相夫子無內顧憂數十年如一日故亮齋公承先啟後悖篤骨肉胥能纖悉無遺者太淑人實

有以贊成之迨亮齋公辭世時冢君桓官翰林而次君棨尙諸生也嘗教之曰汝父昔以有體方有用五字訓汝兄願小子交勉之嗣冢君桓遷御史次君棨亦以選拔廷試官工曹太淑人就養京師每於兩君退食承歡時孜孜以勤職訓勉弄孫之暇猶率婢媪於隙地植蔬菜以自娛示不忘鄉味且習勤也及冢君桓出守邵武治獄每有平反太淑人輒爲加餐是年次君棨以二甲第一成進士賜傳臚改庶常捷音至太淑人書諭之曰汝父生平好善嘗以不獲致身利物爲心疚汝兄弟渥受國恩當亟思圖報以償先志毋稍自負也旣而冢君調福州任適劇盜充積例由郡署會鞫敲撲聲或聞於內太淑人必問用刑者何官諭桓令其設法徐訊務得情而哀矜之由是任首郡七載獄無冤濫已巳海盜朱渥等將

投誠桓奉檄往探虛實人多危之太淑人獨勉以大義已而  
譌傳疊至太淑人曰吾兒急公而頗知審幾度勢必無他虞  
也尋受降海上晏然無警是年夏颶風爲灾郡廨震動危甚  
爭請太淑人出避不許焚香跪爲百姓乞命曰儻風不息所  
損性命多矣予何忍獨避乎風少息卽趣桓拊循灾黎務令  
得所又爲羈囚捐給醫藥紵衣棉被月給米若干石煮粥以  
助口糧及冢君桓觀察高廉由閩至粵方以山路崎嶇水土  
稍劣爲慮太淑人從容就道曰隨寓而安吾處之有素矣高  
州皆沙土十日不雨則旱每遇愆期桓率寅僚禱祈太淑人  
必親齋戒設香案於內庭虔禱每禱輒應五年無旱潦遠近  
咸傳頌之初次君槩除守瓊州及冢君桓有高廉之命吏議  
迴避調任江西至是由瓊來高省覲有畱戀意太淑人以大

義論之曰汝等蒙恩簡擢當及時圖報豈能以我故廢職勉之待汝等宣力有成再作歸養計可耳及槩赴九江任聞其瘠苦多波累猶傳論以盡職守分潔己奉公爲自立地其義方之教類如此性仁厚無疾言遽色貴而益儉不輕御新衣有收及數年未著體者不令特設甘旨喜食蔬菜謂此中有真味且曰吾甘淡泊非惜物乃惜福耳而聞人有急難解助不少吝嘗訓子孫以隨時知足無忘清白家風曰汝家世守詩書別無恆產計唯讀書明理不壞心田其爲產也多矣嗟乎古之傳母德者眾矣如太淑人之自少而老溫恭慈惠無一不歸於厚且皆出天性之自然者可不謂之醇且備乎宜乎膺福壽而垂裕孔長也太淑人卒於嘉慶二十四年己卯五月初七日生於乾隆二年丁巳四月二十二日享壽八十



有三初封太孺人晉封太恭人例晉太淑人子二長桓次棨  
女二孫五曾孫四嘉慶庚辰年十一月十九日吉時卜葬於  
靈川東山嶺之原銘曰

仁厚宅心德蘊而純燕翼貽謀宜爾振振簪纓繼起蔚爲國  
珍銘勒徽音允茲嗣人

贈太常卿棟鄂端節公墓誌銘

鄂恆

棟鄂維之孝廉延楨出其父殉難事請墓誌銘于予予風塵  
奔走蕪筆墨久何能文然弗敢卻其請夫臣死國難忠者所  
爲其家人先其死死之忠臣家之尤烈者孝廉奔喪于三千  
里外來往兵燹中九死一生得全家骸骨還成窀穸禮非孝  
者能乎予忠義後人也聞忠孝事則心喜敢不誌而銘之公

諱瑞元氏棟鄂正黃旗滿洲人字春山號容堂曾祖諱富起  
臣以始祖平吳逆陣亡世襲騎都尉祖諱誠泰官泰甯鎮總  
兵公爲鐵保冶亭先生子鐵冶亭先生晚號梅翁故公晚號  
少梅云梅翁先生文名徧天下桑梓當日有才子三先生其  
一焉書法高妙窺清臣室得之者如獲寶如賈人市太傅詩  
人莫不知至於教子之嚴諄諄以承家報國爲要而知者罕  
也公天性孝弟氣象端凝早歲有老成風好詩書重名節以  
恩蔭爲比部主事無畱獄因公被議入貲爲副郎道光元年  
舉於鄉八年昇賓旭都統之廿九年湯敦甫尙書鍾仰山侍  
郎之閩十年楊介坪鍾仰山兩侍郎之豫之楚之黔與滇十  
一年特芳山戴金溪兩侍郎之直隸訊案皆以公從多平反  
是年膺上考升郎中十二年從禧仲蕃尙書瑚淡如將軍理

粵東軍積功 錫花翎知嘉興府十六年升福建督糧道十七年升山西按察使二十年升福建布政使到處皆有聲有送扁額者亦謝不受二十年 賞副都統銜爲烏什辦事大臣二十四年因山西臬司任內失察之件議左遷旋賞三等侍衛辦哈密大臣事我

高宗豐功偉烈開新疆南北二萬餘里設將軍以下官簡有操守者令之往經數十年疆土如泰山之安厥後邊臣或非其人此道光九年張逆之變所由起也公歷各數任絲毫無取以練兵爲事勇者拔之弱者汰之攜歸者敦煌太守碑刻而已六月晉二等侍衛調駐藏大臣喇嘛有饋者堅卻之唐古忒近孱弱其鄰國廓爾喀屢生圖意籌鑄大銅礮爲之豫防奈無款以喇嘛月供商價積三千金貸唐古忒得不虞旋

有參贊科布多之命以頭等待衛任西藏地有名乍了者其地大小喇嘛互相仇殺歷有年所公過其地眾乞代陳慷慨允旨交總督將軍按之得白兩造息兵永絕後患公之力也四月抵科布多地界俄羅斯國人强悍善搶掠然無一人敢窺邊戊申冬召還三十年

宣宗上賓命赴藏聽經焚香跪道者指不勝屈如同紇之與令公也咸豐元年二月回京後改湖北按察使五月抵楚權布政使刑名錢穀一切講求胥吏咸束手退當是時粵西賊勢張甚出永安掃陽朔逼桂林如入無人之境至長沙不得意北走迫岳州岳州爲楚北保障山城陡險下臨八百里之洞庭所謂一夫當關萬夫莫開者提臣先賊逸城立陷屠蒲圻遂圍武昌先公下車時出廉俸治兵弓箭刀矛鎗礮以

及城垣斥堠無不完善事急公約文武員詣 萬壽宮前北  
向叩首誓死守眾感泣曰如公言傾舉家衣服釵釧入質庫  
爲戲下兵勇口腹計夜宿城上食日僅一且未曾飽目不交  
睫者二十餘日賊不得入恨之甚穴文昌門用地雷破磚瓦  
飛入空移時落時二年十二月四日也賊從缺處蜂擁入公  
聞警立下城戰於火星門手殺數賊力竭不能敵飛騎返跪  
庶母查氏前欲語而止者數查氏曰吾知之矣令仰視梁上  
有白練四懸已久色如雪目爲之寒公第五女與兩妾劉氏  
梁氏伏地與公別女昂首曰弟延本年十四手弱不能死父  
卽裁之趣公出門卽扃幼子倉皇無所措公欲刃僕四人執  
公膊不得行公急甚曰使吾子死於賊汝等忍乎眾脫手乃  
掩面背殺之毀門入四人已殉國難矣公大慟聲激烈震庭

戶遂自刎壯血如泉湧卒年五十九歲僕四僕婦一皆同時  
殉梁壽楊楷張玉金官楊氏也賊入署搜金無所得公雙目  
炯炯未閉光射賊作恨狀賊畏之走百姓感公德匿尸於土  
室事聞

上震悼以殉難慘烈贈太常寺卿與布政使梁星源加一等  
賜卹 諭曰該員嬰城固守臨難捐軀大節凜然垂型不  
朽準於該地方建立專祠以慰忠魂其殉難家屬均附祀子  
孫百日服滿後帶領引見並有每一念及悲憫淚零之語旋  
舉易名之典 賜諡端節 御製碑祭文遣禮部官致祭  
賞全葬銀 賞騎都尉世襲入 國史館忠義傳祀昭忠祠  
時子延楨卽日赴楚于土室中百姓示所在得全家諸骨還  
三年四月初八日葬于阜城門外之八里莊冶亭先生墓側

正室覺羅氏爲大學士長麟公女 誥封夫人生延榦咸豐  
四年七月二十七日卒是年六十二歲側室金氏生延楨延  
楷延本延楨以員外郎用分刑部延楷以主事用分兵部今  
以公殉難之烈與 國恩之重詳誌于篇爲忠臣勸以應孝  
子請至于嘉言懿行在人耳目間者概從略云銘曰  
馬氏中丞一門殉節惟我瑞公卓然同列閭閻效忠先時自  
絕手刃幼兒橫縱碧血一死酬君心堅逾鐵僕亦難從古人  
或缺誰使燎原致教棟折

帝憫忠貞涕爲數雪 錫諡增階 綸言痛切建廟尊崇樹  
碑爰業厚地高天陽日陰月於斯萬年永垂芳烈

刑科給事中蔣君墓誌銘

錫纘

蔣君子良與纘同舉咸豐六年進士君出郭毓麓戶部祥瑞之門毓麓故道光二十四年與纘同門領鄉薦輒語纘曰子良故中式第一進呈御改第二是能讀書非科舉速化之學也願自翰林轉諫垣歷京秩十有八年措衣食於文字不竟其用以同治十二年九月十三日卒年五十七其孤以行述乞纘爲銘噫可哀也已君諱彬蔚字頌芬號子良明正嘉中由葑谿遷婁關爲婁關蔣氏曾祖耀宗湖南武陵知縣祖元復乾隆四十二年舉人山西榆次知縣父兆鴻安徽蒙城知縣祖父均贈中憲大夫母呂氏贈太恭人太恭人兄孟巖大令子珏復以女妻君爲呂恭人以是君學業生計多藉呂氏蒙城公故廉以道光十九年十一月卒于官君暈絕十餘日始杖起乃扶櫬歸吳肄業取膏火貲奉母六應省試皆不



售二十七年正月呂太恭人卒君哀毀甚而家愈益貧服闋以眷屬寄外家獨赴順天試二十九年己酉中式又越七年丙辰始通籍貧如故而學益力續嘗綜括其平生著述其治史漢三國志則取張皋文吳仲倫諸先生評本考其天文疆域禮儀制度雖黃之無隙地再易本書之以審定其異同遂續成董方立先生之漢官譜又取李志常之丘長春西游記攷其山川道里釋以今名纍數千百言以補自來輿地書之所未備斯其可以經世卓卓乎大者他弗計焉以故充文淵閣校理武英殿國史館纂修官

文宗顯皇帝實錄纂修官充鄉會試同考官江西鄉試副考官皆稱職泊乎轉御史擢給事中不輕言事陳漕務荒政輒見施行巡中西城決事而民服無敢干以私者先以實錄館

議敘得四品銜至是截取以知府用又薦以道用人益以重君然纘視君之措於外而不愛其力約於已而不嫌其意不窺時頰叩赴勢物之會以同眾人之求是能讀書而明乎眞積力久之道卒用之未必無益於天下而惜哉不竟其施也君性肫篤能濟人之事同歲生張太史亮疇范侍御熙溥張禮部錫基死皆經理其喪華太史晉芳卒贖金歸其眷屬洪綬諫昌燕病侍其湯藥死焚所負券且助其歸葬呂恭人之兄堯仙中丞佺孫之撫閩也其停米捐稅茶諸善政多諮於君丙辰之秋江西賊犯閩陷光澤邵武中丞疾病甚君自京星夜馳至挈其眷口百餘人取道浙東而歸是非唯報呂氏抑其天性然矣呂恭人生子男一保忱候選鹽場大使女一適內閣中書輝彥暄以光緒元年某月某日葬君於吳縣某

鄉某里銘曰

不爲嶽嶽而爲徐徐斯外博而中不虛學于眾爲難遇于時  
爲難豈遇之難匪時所滅道乃不昌烏乎子良

太子少保漕運總督文公墓誌銘

錫纘

清故漕運總督文公以道光二十九年舉人咸豐二年進士  
任戶部主事員外郎在部者十一年授山東沂州府知府升  
充沂曹濟道按察使布政使署巡撫在山東者十一年任漕  
運總督者九年自咸豐二年訖光緒六年凡二十九年其於  
度支吏治漕運河防罔弗洞徹言必可行中外倚之而尤善  
於用兵百戰瀕死爲民捍患其始則蘭費墨膠捻幅授首數  
千計旣乃決勝於義勝常武之軍卒以綏靖徐海血食百世

戰功見於奏疏者盈數尺所以垂大名於岱南淮北之間竟  
其用可爲天下黎元造無窮之福而惜乎其遽卒於位也公  
諱彬字質夫姓輝發那拉氏隸內務府正白旗滿洲曾祖福  
勒賀祖明鐸父那峻皆贈光祿大夫母裴太夫人繼母劉太  
夫人皆贈一品夫人娶王夫人生子延煜延熙延燮延照女  
三妾趙氏生女一程氏生女一公以光緒六年六月初三日  
卒年五十有六公子奉匱回旗明年七月十六與王夫人合  
葬於東直門外東壩河之塋公幼以孝聞二十一歲而孤受  
學於伯父那崑峰先生吾鄉所稱時文宗匠者也顧不事章  
句而務力行下筆乃如萬斛之泉奏疏手出多可誦者蹟其  
平生智勇過人面青碧色目炯炯出光芒而語氣慈祥不使  
人怖公子科名蔚起詒謀及孫然後知其宅心之厚慮事之

疑古大臣所以爲邦家光者吾不知其何如若公者庶乎近焉嘻可銘矣銘曰

循吏將才有所自來

帝曰欽哉保障江淮受天之祿爲天下福

帝曰咈哉何奪之速昔也封疆今也祠堂明德馨香斯民不忘

法天禪師生塔銘 并序 附

李鍇

法天禪師名雲恆又自號藏山漁陽平谷人九歲薙髮盤山萬松寺年二十餘修白業於西甘澗遂不出山與盤相終始五十年彼之徒以爲固不顧也師貌枯貌語訥言此僧在山木彊而已然而妙姓內明行之以眞天獨童師而師乃童諸

一切無容心焉性喜詩無事卽微吟藁成輒毀之世無得而傳者蓄琴一明處士李孔昭之遺也不甚工嘗撫之以寄意與廣坐中言笑無閒默則睡相對無一奇而去輒令人思以故無忤於物而古處者樂與之接云人或問之曰師何以益人曰損之乎夫何益吁易所謂弗損益之之謂乎澗東有石屏師愛之爲生藏其下同好者襄厥事而爲之銘曰

無身無患損盡身全藏眞茲塏享彼大年物無成毀草木在山安所樂終乃完其天天不鑿師師完自然維屏之陽日月其便

八旗文經卷四十九終

八旗文經卷第五十

傳狀甲

范承謨蒙谷自序

佟世思先高曾祖三世行略

佟世思先淑人傳

卓爾堪遺民小傳

錄六

蒙谷自序

范承謨

承謨蓬頭垢面繫頸攀手者將三歲乘未灰餘燼志梗概於壁俾後日見者知謨遭時不幸云昔我

世祖章皇帝親政簡侍衛近臣念太傅公抒忠累朝謨以元勳子充選獨許在家誦讀凡扈蹕值宿游獵巡行悉免從惟



慶賀吉期隨班行禮是年辛卯 詔八旗從龍子弟一體鄉  
會試春秋兩闈得與聯幸科名叨選庶常告假奉親辭職無  
由每遇遷秩反越常次嗚呼

先皇帝之恩臣何以報也辛丑 龍馭上昇兄充總兵官於  
外謨以病請解任既廷議徹援勦諸路兄旋師日偕侍太傅  
歡丙午七月望闔族少長集東皋較射飲酒賦詩屬對太傅  
公顧盼怡然命之曰吾家世受 國恩而等速當補官爲國  
盡瘁毋以予老爲念八月二日太傅公卒戊申服闋補祕書  
院學士決志遂初伯叔昆仲皆謂而忘太傅公世受 國恩  
之教乎肝膽塗地無以酬甘自廢棄平日所談忠孝謂何謨  
聞之不敢行意初太傅公在日

皇上冲齡未親政一日謨偕同官進大內用寶

上詢曰爾爲誰氏子臣謨悉舉太傅始末奏

上曰爾爲若子邪如是者三後值朝賀期太傅公入朝

上曰此某公能稱說

祖宗朝事甚詳每指問左右不呼先太傅名謨又以病請解任補謨缺者

上問久不見范承謨此爲誰閣臣奏以病此補其缺者

上曰果病邪劇邪病痊尙起用閣臣奏病痊卽補

上首肯至再恭逢 親政臣以學士得侍從廷推浙撫列謨名

上曰浙東南要地爲國計民生承謨可臣受 命悚惶力微德薄旱潦頻仍蟲疫疊降三歲內勘荒拯災請蠲請賑免徵改折凡爲民請命之疏雖部議中格奉 旨必令再議或徑

得旨如所請行久之舊痾新疾屢體交攻又以病請奉  
旨準馳驛回京調理維時兵民商賈負販之徒擊登聞鼓叩  
闕乞畱者數月如狂荷恤勞臣未收成命其後以輿情從  
提臣請不準繼告畱浙年餘力疾撫事康熙十二年壬子會  
推八閩總督故事降級未開復者例不列特簡破格是年  
十一月二十五日邸報至重感氣逆證時減時發力辭未允  
冀得親籲病狀請陛見報可召對首詢江浙生民疾苦暨  
一路閭閻風景條奏無隱次卽殷殷問病遣御醫就宅診視  
方賜祕府藥頒尙方希有也值薦舉一案摭拾者以人材失  
眞具疏自認罪研究無瑕乃寢夫曾子大賢也其母賢母也  
三閩殺人之言投杼而走賢非曾子信者又未必如曾母之  
信其子實賴遭逢 聖明洞鑒心迹微臣清白忠正屢向左

右言之矣京察內外三品已上得自陳又以病請察典命  
下仍令速赴新任御醫奏少痊臣感知己之

主遭人言蒙疑諉而不加斥逐彌隆任用安忍以軀命爲念  
偷息衽席避難海疆陛辭舉撤藩爲問奏曰撤之甚當不可  
驟其時部臣已就道

上曰閩中海氛未靖民困已極爲天下繁劇地惟卿廉能素  
著爲天下最故特倚任乃賜御衣賜內厩良馬鞍轡命近侍  
就大廷宣前旨且溫語曰此朕時刻所御之服解之衣卿如  
見朕也次日 賜宴就道許國以身不遑將母矣抵山東界  
宿羊流店相傳折臂三公處其夜 賜馬殂歎息良久恐馳  
驅天末之匪吉踰浙抵仙霞層巒疊嶂瘴霧迷漫中藏猛獸  
毒蛇磨牙張舌擇人而噬至浦險灘怪石奔流急瀉崎嶇甚

於蜀道變幻疑於鬼穴周爰咨諏不覺失聲大呼曰閩事之廢弛者非一日也羣心之不堪問者非一事也大計軍政文武勸懲之道存焉此方有廉能循吏智勇干城而使之淪落一官淹蹇功名金錢不輦其室薦牘罕列其名是廉吏勇將之心不堪問矣黜幽糾慝么麼充數而貪酷方面悍焚巨鎮日惟苞苴是營安享富貴是握樞者與敗檢之心不堪問矣學校考取干情鬻賄而寒窗埋頭之彥百無一是奇才異能之士之心不堪問矣沿海苦兵二十餘年有司加耗重徵敲骨吸髓而蠲免之實惠不及蠹役訟惡之魚肉彌甚是父老子弟之心不堪問矣兵卒荷戈守山戍海負嶠則有虎豹窺伺則有鯨鯢藉其死力以爭此土而錢糧欠至半年庫銀缺額百萬餘兩協餉久不至是呼庚呼癸之兵心更不堪問矣

嗟乎半壁一綫雖智如良平勇如賁舍亦難展足措手而況蕭牆之禍已成哉癸丑冬部臣入境奉 旨藩下左右鎮歸并地方官卽與撫提會議分防量撥一二營暫住徐令遣行不致惶惑掌兵者始應之而中撓焉必圖盡遣脅渙散之軍心驅之使坳密語不聽日趣行告以少俟浙餉至補足舊欠預給兩月庶途次戍所無他慮急之倉卒變生亦不聽趣日急兵心洶洶矣方滇逆蠢動風聞煽沸而停止撤回之差齋命星至彼得復縮兵符矣繕甲練兵秣馬稱干比戈反形見矣不幸不得一同心同力者而罹於難也必矣然終不以時艱勢蹙而不急急收拾人心以補苴救漏也條奏請速展界者安民也請撥現在協餉者安兵也請將綠旗官兵裁去原額補足者實營伍也請免緝投誠逃弁許投到宥罪安插本

處者清山陬海澨也題補城守副將沿海勞弁敘攻苦而邀  
不次令彼感激報效也報巡歷邊海形勢起行日期者爲欲  
置身外郡便調禦防範也頒刊示而準採捕活溝瘠也弭盜  
賊而聯保甲者儲鄉勇也寬林簡修而招吳成者一安投誠  
一散島眾也天若假以時日獲奉 俞旨諸能就緒滇銳稍  
挫閩勢漸孤則逆謀不熾自戢天平乎何竟使承謨五月  
如寄一事無成乎當逆疾病居喪必親弔慰乘閒輒諷諭大  
義西席嵇子畱山心竊慮之曰昔魏文貞公有言甯爲良臣  
毋爲忠臣神龍見尾不見首公其慎之舊弁王天祐等亦曰  
連日之會輕蹈不測左右多戒心公談笑自如如入無人之  
境竊以撫提未可與心語咸應之曰吾非昧此也寄孤危之  
身處艱難之際當訛謗之秋惟示以誠使小人無能乘其隙

緩彼之疑濟我之事死生禍福誠不自計既委身事

主則父母之身卽君之身有死而已夫豈不知徒死無益而  
事勢至此舉動牽制上下左右皆彼腹心雖閉門築壘其能  
免邪嵇子畱山等歎息退閩安福省門戶也將帶兵奔數十  
人往閱形勢督營將佐皆以帳房什物弓箭器械錢糧不給  
朽壞未整爲辭逆卽遣官來言邇日謠言少息遠出恐復驚  
疑撫軍卽來力阻咸應之曰行不過一視海口非長往既止  
卽罷靖藩祖孫父子兄弟叔姪受恩異常今加親藩與公  
久在封疆乃心王室社稷蒼生之福也語竟退而鬱鬱不能  
釋一士進曰公旣不得閱海援滇事震楚設備鄰封出省會  
扼上流此一策也謨曰計過矣楚閩閒隔西江風馬牛不相  
及無論輕重貽笑且啟釁端招奇禍子不見閩安未果之行



乎約攜兵弁尙支吾未備今往據上流誰與爲徒況彼逆節  
欲發他日反得藉口爲我所迫激變軍心風聞者糾彈於前  
按罪者細苛於後合族無噍類累世忠貞一旦掃地子不見  
長沙撫軍之棄封疆乎負輕去失守之罪招激變隕滅之殃  
身名俱喪吾不爲也越數日爲康熙十三年甲寅三月十五  
日昧爽逆員詣院謂王守制數月未嘗清理軍務今海上乘  
滇南多故窺伺生心王新奉固守地方 敕命不敢以私情  
廢公事願與公會商爲護內防外策未釋喪服未便就教乞  
命駕撫軍卽來邀往是日陰雲慘淡愁霧迷漫冥冥漠漠太  
陽無光入逆巢廊廡殺氣不可以目已陷虎口挺身而入慷  
慨仰天厲聲正辭逆怒趨縛有誤持劉臂逆帥急叱誤者嗚  
呼痛哉君親倫理滅絕已盡張口切齒激速一死而不得則

以不食死逆羅列飲食揮之去古徹唇裂鰓肉俱腐聞者瞋目怒視而又恐致死夜然庭燎前後設炬環視層層縲紲肢體拘攣凡八日氣漸微聲漸細一息尚淹罵不絕口閱二日微者漸壯細者漸宏聞者回瞋反以爲異嗚呼痛哉豈臣當死于刀鋸鼎鑊而不當死于餓哉神魂恍惚常有所見近而世祖章皇帝式臨先太傅侍立遠而

太宗文皇帝暨先高祖大司馬公幼穉所未經事者音容笑貌夢若親承 慈旨殷勤嘉言慰諭豈臣思念結聚而爲形哉抑天錫 神聖默恤臣之堅貞憔悴哉計七百餘日舊時衣冠徂寒徂暑蟻蝨蚊蠅恣其攢噬逆時遣問狀日迫粥食沾唇不得死守者見謨多方慰解百折不回因爲謨言罹難時事署中賓客戚友僮僕被執勘訊桎梏窘辱各以忠義自

勵不爲少挫而二三婦女從容就義相聚投環嗚呼痛哉園  
之享高官擁厚祿者不爲不多矣仕於時者不爲不盛矣閨  
門榮誥之婦不爲不光且耀矣而望風稽顙保妻子活軀命  
蠅集蠟埒獨謨賓客戚友身未拖朱紫之榮口未沾升斗之  
祿感謨一人之意尙能念君父重名節皆以身殉孤臣囚繫  
三年如同一人卽健兒奔走之徒巾幗臧獲之鄙亦知寸心  
不二見危授命臣雖藉手以報稍維廉恥而勢窮力竭貽禍  
波累萬死又奚贖重垣扃壁中燒桴存煤畫字牆上前後凡  
得詩三四十首攻擊太毒左右輒刮去僅存若干自序以文  
見者知謨遭時不幸與求死不易云爾

先高曾祖三世行略

佟世思

先高祖諱週字儒齋世居撫順以撫順邊烽時警望遼陽有  
白雲冉冉於其上遂家焉自北燕時遠祖諱葛諱壽者俱以  
文字顯累傳至明洪武間始祖諱達禮以邊功加秩指揮同  
知世其爵五傳而生季甫公諱檣季甫公生心一公諱慈是  
爲儒齋公父公生而穎異讀書明性理家資巨萬謹恪自居  
教子弟以正事無巨細必取法古人公生曾祖諱養義字直  
菴念時勢多艱身家爲重教曾祖以恪謹居躬曾祖心父之  
心凜凜恐墜數十年如一日已而家難起以撫順族人諱養  
性者於明萬厯閒獲罪罪應族於是通族之人潛者潛逃者  
逃易姓者易姓更名者更名先高祖耿介性成語人曰族中  
有此皆我伯叔之咎正宜延頸待誅潛逃何爲易姓名何爲  
遂爲有司所執先曾祖相從於車塵馬迹中徒步奔走械鎖

瓊春氣苦寒淚凝冰合先高祖歸命於法始終無難色先  
曾祖躡躡號泣念先高祖以垂老之年罹奇禍呼天搶地以  
爪入肉血出不知時曾叔祖諱養歲叔祖諱純年同以事去  
熒熒異地父子祖孫無完卵向以家素豐饒爲捕按者魚肉  
奇貨之家遂破先是先大父諱方年字長公爲范公諱楠壻  
范公卽本朝師相文肅公父也百計周旋匿之館室先大  
父自分不欲生每思自首以從祖父文肅公屢慰之曰非不  
欲爾死也其如宗祀何久之人漸悉徙之沈香林詩不可東  
寄西遷心勞力竭又懼有司下除根之令欲使姑易姓先大  
父曰我祖父叔弟皆因不忍易姓而有此禍我豈忍悖祖父  
叔弟之志易姓以偷生乎文肅公彊之至再而後可先高祖  
入關後分禁永平諸邑獄旋復因邑有水災城爲水沒若祖

若孫若父若子若兄若弟不相顧先高祖暨叔曾祖叔祖俱以水死先是高祖蒞坐大呼曰伏朝廷之法而不死於法生猶不生也時先曾祖身在水中與怒濤爭上下流之門側聞先高祖之言如此隨自臆度曰是死終不明得浮木負之出投邑令令曰爾父死并以爾死上聞盍去之先曾祖告以前故因厲聲曰我何敢悖君父邪遂觸階死令曰孝子也鄉人過其邑聞其言與事而歸告之特於歸骨之地未詳嗚呼痛哉先大父既畱尙未婚文肅公彊之完娶先大父抵死不可入之乃成禮三韓一帶盡入我清版章族之人潛者出矣逃者返矣易姓更名者連袂而歸矣先大父相依文肅公雖曰無家可歸族人亦無許先大父歸者蓋因先大父爲人方巖侃直落落難合兼以家業飄零竊恐歸宗爲累也時旣爲

我清編氓從戎 大師冀立功疆 且欲覓先高曾遺行  
歸葬無如彼蒼不憫壯志未酬戰歿於灤州灤城潰日先大  
父躍馬入曲巷伏兵四起先大父矢已竭猶手格數人刃血  
流面歿後拂之氣象如生爲族人所目擊者以故先高曾終  
不得葬心一公之側并先大父亦不得歸矣先大父旣歿  
太宗文皇帝嘉憫其忠恩賚二百金日人命錢其時先大母  
已去世四載家大人僅六歲依外家有族人出語文肅公指  
家大人曰此我家子弟也當歸我族文肅公唯唯并出前金  
族人收之閱兩月忽使人送家大人歸僅遺布衣二領而二  
百金屬烏有矣嗟乎得人之父命錢而僅以二衣遺其子尙  
復有人心者哉幸文肅公視之如子撫育教誨成戊子貢士  
歷官江西巡撫兵部尙書都察院右副都御史以戰功授正

一品前涖任江南安徽按察使時以覃恩贈先曾祖及先大父通議大夫如家大人官高祖母梁繼高祖母金楊曾祖母李祖母沈患難之際俱以病卒曾祖母及祖母俱以家大人官贈淑人嗚呼痛哉思生也晚先世之事竊聞其略是傳也拊膺痛哭數四乃成庶幾仁人君子賜鑒之下知吾先人世傳清白不愧子臣之大節如斯而已至先大父之罹禍患愚父子抱終天之恨尤深苟非文肅公生成之德又何能有今日哉嗚呼痛哉

先淑人傳

佟世思

先淑人姓趙氏陝西鞏昌府屬衛靖遠人其先趙公率教明季拜遼東經略總兵生三子長爲光遠公以武舉充山海關



鄱司聞鐵嶺名家女往娶焉是爲先淑人母劉夫人既返靖  
遠去數里許見黃河中高阜獨出相傳爲大禹治水處公與  
夫人登之夫人歸夢神賜明珠一顆而孕先淑人一夕公  
復夢偕夫人游其上癸酉四月十有四日辰時生先淑人於  
蘆塘署中公無子僅生三女先淑人最少尤鍾愛之厥後公  
挂漢羌總兵印家僕甚眾公性烈每多杖殺之有乞哀先淑  
人者輒得免以是始成公之不嗜殺也時米脂賊起蹂躪海  
內親藩震驚禍且不測公衛之入蜀以先淑人未字且母子  
熒熒日縈念之先淑人謂夫人曰大人所以心故園者以我  
母子耳盍死之會公引軍勤王閒道出靖遠乃得全無何公  
與李自成會軍死先淑人泣血謂家人曰大人之死以我之  
不死也凡治喪營葬悉操自先淑人鄉里奇之是時亂作法

律不行竊遠以斗大孤城當絕塞世胄之家各立門戶柵寨  
滿街市道路爲戰場戈矛之禍起於同室先淑人年甫十一  
總角統家將環衛而披堅執銳迄無甯晷一日請於夫人曰  
彼所利者吾貲財耳凡珠玉玩好悉出以與之族人厭所欲  
始獲免於覆巢皆先淑人之早見也恭逢我大清定鼎范  
文肅公秉政家大人爲公甥亦以家難得公生全之蓋甥也  
而子矣公從弟出鎮鞏昌命家大人往省適元醜母蚤世聞  
先淑人賢遂問名焉奠鴈之日先淑人過趙公墓伏地長慟  
自訴不能守墓之罪又謂夫人曰母能憶譙女之初乎洋洋  
河水今得朝宗也始從家大人入都家徒四壁而家大人素  
性好賓客先淑人每脫簪珥以助之又以先王父母無墳墓  
時時卽位以哭之家大人屢病足長齋禱於神願以身代愛

家庶兄藍腴弟農司如己出先淑人與家大人結縭以來凡十有九年而十四年俱在官凡兩膺詰命相敬如賓客公退之餘對几案作字讀史無間也後以家大人裁缺去靖邊旋署篆榆林先淑人以產卒署中壽三十有一時癸卯之正月二十日也生子二長卽不孝世思次世男女四淑媛淑秀淑安淑惠者先淑人遘疾之由也嗚呼以先淑人之德與才而盛年蚤逝思等苦塊餘生幸得成立今夏過黎陽省墳墓陌草原松惟有腸斷尙何言哉嗚呼痛矣

遺民小傳

錄六

卓爾堪

方授字子畱桐城人文學國變後飄泊江湖自號圃道人攻苦食淡舖糜不給一似重有憂者君子讀其詩以爲多勞臣

怨婦屏營吟望之思既祝髮從浪杖人游屢游浙東或歌或泣卒流離轉徙悲困悒鬱以死年纔二十有七所著詩有三奔浙江草浙游四集奉川草諸集

錢澄之原名秉鐙字飲光桐城人甲申變後南都擁立親藩奸邪柄國羣小附之濁亂朝政而爲之魁者其鄉人也公以夙負盛名之士慨博好持正論與鄉人迂及其得志修報復凶命走浙閩又自閩入粵崎嶇絕微數從鋒鏑支持名義所至輒有可紀削髮歸老田閒著有易學詩學莊屈合詁及諸詩文皆根極理要而旨趣一歸自然

郝明龍字雲蒸江都人其父忠節公領楚房縣事值寇氛孔熾萬山屹屹成危疆當事者議撫議勦卒無成效忠節公嚙指出血書凡七上不聽事潰竟爲封疆死明龍走數千里長

途呼號闕廷匍匐忠節公竟得要旌郵優典授明龍蔭生乙酉後隱居著書年九十餘悲憤胸臆每見詩一門忠孝可以風世

方思原名孔炳字爾孚桐城人文學甲申後改今名別號退谷豪于詩歌紆衿方履嘯傲自如嘗取宋遺民錄各爲小傳人系一詩事核詞婉君子尙其志焉生平游屐多在吳越江楚間

方以智字密之桐城人進士官翰林檢討中丞仁植公長子當中丞撫楚時武陵督師與熊總理先後養寇之局成中丞獨激厲左帥誓共滅賊卒以失道對簿爲武陵所阱中丞以八戰八捷功免再起屯田都御史而時不可爲未幾京師陷南中黨禍興中丞與以智爲馬阮所首欲甘心者以智遂亾

去乙酉後逃于釋開法青原山稱無可大師又字藥地晚年  
工畫

傅眉字壽髦一字竹嶺山西太原人青主長子下筆能千言  
貫穿經史常負竹或鐵皆數百觔踰太行市以養親亦一奇  
士

八旗文經卷第五十終

八旗文經卷第五十一

傳狀乙

李鐸焦明子傳

李鐸馬山人傳

李鐸孝僧傳

李鐸張暈傳

李鐸楊成義傳

李鐸李處士傳

李鐸洪陔華傳

李鐸二陳生傳

李鐸少司馬宗室塞公家傳

李鐸石綱菴制府家傳



李鍇傳閣峰尙書家傳

陳景元李睂山生傳

焦明子傳

李鍇

焦明子者東海人其先人客蜀而生焦明子故焦明子生而卽爲客及長十九走天下中歲至盤山樂之遂卜居鷹峰之陰而後焦明子不爲客焦明子雅好山水雖旅游必采入之嘗艤舟采石旣夕江月起鼓櫂中流命琴客彈大雅扣舷以應其節水宿者皆起視以爲狂又嘗絕大漠五月聞山塢桃花開時馬已出卽騎牛往或沮之以多虎焦明子笑曰少見多怪此閒虎固以人爲怪也旣家於盤種樹蒔果蔬以自給苦嗜茗爲鐵鑄瓦缶使奚所至負以從茶煙起水石邊樵采

者咸知其爲焦明子也然性褊狹又鈍拙見事遲以故深畏與人接而人顧乃好近之嘗爲焦明賦以見意人遂號之曰焦明子嗟夫焦明者巢於蚊睫而蚊不驚細之細者也夫以天地視盤山豈僅一二蚊睫比而棲遲其陰者又惡足視夫焦明也哉

馬山人傳

李鎔

長海氏那蘭字匯川清癡其號也先世爲烏拉部長其高祖蘇伯海率所部歸我

太祖高皇帝授都堂父馬期累官都統以平滇功晉鎮安將軍守滇伯叔兄弟並後先登顯秩山人初肄舉子業非所好去繼以鎮安功予蔭又不就其伯氏爲之請補民政部後庫使

檄下矣山人始知之復堅臥不肯起母太夫人怪之山人曰  
庫使司帑藏歲豐入懼及焉逃死非逃富也太夫人賢聽之  
遂布衣終其身山人冲遠任真趣囊括一切了無容心遇佳  
客每疊疊譚再叩之則忘之矣杖笠有所如行輒遺之不覺  
也博古多識辨金石器往往而中酷嗜畫當意則傾篋購之  
嘗襲裘往弔所親劉氏喪劉氏貧事不辦山人濟之解其裘  
歸塗見未見書買之解其衣由是中寒疾乃夷然伏枕曰獲  
多矣山人既不事生產家遂中落然衣食或不給而所好未  
或移臧獲別有所之者聽大司寇巢可托寄齋牧山居士圖  
清格月坡並有別墅據佳勝每遲山人至輒林陬水涯相探  
索或篝燈命酒商榷所聞長安傳之舉以爲僅事云山人中  
歲愛易水之雷谿築大益菴復自號雷谿居士大益菴主晚

入長安居委巷又頽其閣曰玉衡懸畫四壁對之吟諷其詩  
矩矱古人而不膠於固斷句尤冠絕一時聲稱藉甚王公貴  
游爭欲識之而山人落落任放如故云乾隆九年三月卒年  
六十有七

孝僧傳

李鎰

孝僧者松安和尚也松安吳人姓某氏八歲時父母以罪譴  
松安育舅氏家既長業娶妻會其父母自譴所寄之書署曰  
自晡恢寄師得書號哭知其父母且在也然晡恢爲何所徧  
訊無知者師曰晡恢當不在天上當極詣求之既決志苦無  
資既而計之曰乞食僧徒便於是棄家之靈隱薙髮復再計  
曰襲其貌昧其律不可竟參學之五年登侍者而後曰可矣

乃北以爲五臺近塞首造之無有知晡恢者折而東在所求之亦無知晡恢者將入都中途覲一僧告之故僧曰余所親爲部吏試爲師問之及至其所親去迄無從知所謂晡恢者師悲泣不自勝它吏憫之爲之稽故案得實蓋其父母譴黑龍江爲奴而晡恢者其省會也師喜卽東至山海關關法無私出客師懇之七日卒不得出無可奈何循北而走偃寺僧南人也示之曰此間爲某口樵採者許之幸而得越如其言果得出出而歷大茅山山巒冥鬱岬榛莽翳夔虛虵虎叫嘯左右而萑苻藪之行者非結隊不敢入師獨行傍皇無所寄宿食叩牧牛豎達一庵庵主愕眙曰何以能獨至也翌日遣送之遂達中後所旣渡遼水天苦寒冰雪剝膚師寓客車多徒步時遂染疾臥數十日稍可復力疾行又數十日而後

達晡恢復得其父母然血枯肉盡鬚頰於死幾不起於是人爭異之贖其父母以金爲之具產馬事定師乃歸越數年復愴然曰生而不養非子也又復東侍父母誓終其身云

張翬傳

李鎔

張翬字羽軍又字采書吳人年二十游京師授館太史法保家法保者黠慧佻達貌脩而衷辟家不訾慕大俠豪舉又通時俗方言服官給事人以爲敏翬度不可與處裁一歲辭歸吳旣而法保遣其黨馬雄走楚聚羣不逞將爲亂而身應其內其庖人首其謀保亡奔雄適雄死眾鳥獸散保無所歸遂至吳投翬以夜造門聞翬方讀趙歧傳保喜曰免矣入告以情且曰鄉固烈士目生今縛我唯命有所哀憐而蔽匿之亦

唯命翬愴然曰君以窮蹙來翬不敢愛死願有父兄在未敢  
驟許君也告兄立人立人請謁之父父方應粵東募翬遂走  
粵以告父曰若死無憾乎對曰願之曰歸當與兄陽爭財求  
親族分若戶戶分得不坐毋使迺兄共糜爛也翬歸如父謀  
未幾保事急蹤跡且至吳翬謂保曰翬何足惜恐卒辱君奈  
何誠聽翬計幸薙髮爲緇流庶幾免保許之既而中悔計不  
果保有健兒多武力嘗齋多金往來任外事事泄獲保並逮  
翬備翬楚剝膚噬肉者七保伏誅翬竟繫獄先是有黃復  
菴者以他事繫黃善易翬旦夕與講復凡六年得道死成關  
中翬旣爲徒愈益讀書閒輒苦吟導悽惋又善琴嘗攷古說  
參已意所得輯音律纂要若干卷當事者聞之授之琴趣鼓  
之辭不能不可翬伏地泣曰廝也刑徒也實不敢褻先王之

樂卒不鼓會秦民欲壽某太守構文多不愜或曰彼徒工爲之竟用輦藁太守廉知之又義其人得免役家韋杜中方輦之成秦也父已歿兄立人亦破產從輦西已而立人北之京遂去不知所之輦養嫂撫孤終其身祭必虛左而攝事焉丙戌秋將之耀州道卒

論曰法保悖上肆逆輦義不得逃其死掩賊爲藏周有常刑矣然憫其窮蹙以匿之知難在前而不擠人於危亦長者之事乎初馬寶之赴市刑也法保適過而笑之曰丈夫舉事惡得至此及保死竟與馬寶同噫輦欲不死保又惡得之

楊成義傳

李鍇

楊成義者貴陽貴筑人寄籍大定之平遠州任俠多力能擊



雙鉞成義未嘗讀書然喜媿媿道故實遂以說書名每當筵說西漢及宋岳鄂王事搖箠指畫聲情激昂又善說勝國靖難師父老聞之多泣曰舊聞也領君談如目中事士之負氣者多之與之游成義雖善說書然奉母居貧愈益無聊嘗往來巴蜀閒旣而之烏蒙劉總戎客之會苗獠內屬當事束以漢法且厲遇之苗怒思有以逞烏蒙什伍之家給使令者皆苗苗陰相結尅期約舉火作亂於是鬻薪城中賤授不計直雍正八年八月劉適高會夜半難作內苗起外苗乘之城陷倉卒不可支劉自刃其室以十三歲孤付成義曰君可託其生孤劉奪門出成義負孤揮鉞以從苗躡之去城五六里劉馬躡大溪中被殺成義負孤亂流去走三十里比曙前後皆阻敵無所復之成義泣謂孤曰負若而戰必不免俱死無益

若幸匿密箐中待我我請援來活若孤匿遂挺身出苗爭搏之成義奮擊大呼頭顱肩臂負創六而竟得脫抵募行九十里至畢節之大關遇我軍軍中人遙識之諜而呼曰楊某來矣成義至請援主軍者辭以不得檄不可成義僵臥一夕黎明惘然起曰劉公子在我不可獨出將復入所識者力阻之曰君旣免再入必無幸矣而不念妻子如老母何成義曰許之矣不死無以報劉公按鉞而反卒不得孤遂死之

論曰汪錡死敵僮而不殤以義貴也成義存孤不濟而報之以死知所貴矣吳君士勝鄉與成義善爲予道其實嗟乎惡可以末技視楊子哉往聞柳敬亭亦著聞然技同而不類矣

李處士傳

李錯

李處士名廷貢字淑慕民村其號也行五郎邪沂人貌敦樸  
屹然如斷石操履貞固行意不惑父懋祖以楚衡永道攝粵  
西巡撫順治六年何騰蛟圍永州懋祖力守九月貢次兄廷  
賡前赴難疾戰夬角樓不勝死食盡援絕城陷懋祖死之事  
間贈中憲大夫光祿寺卿光祿之死也土人藁葬桂林郭貢  
間難號哭卽日西誓尋遺骨徒步搶攘間瀕死無所恤旣至  
粵塗滴血卒得父骨負以歸過武昌時貢從父蔭祖制楚中  
聞之要之人不可彊入之謂貢曰子誠孝然覓骨萬里事未  
可知滴血俗驗耳有如是合葬奈何貢悟乃卽馬房山而  
葬之母佟氏卒貢及弟廷貴廬墓側三年未嘗須臾離弟貴  
死旣葬矣貢一夕夢弟當復生亟啟壙出屍抱之宿終夜乃  
復斂其獨行類如此貢讀書不應科第不與俗慶弔禮著白

藳帽服土色布衣笑容不及面鄉里嚴憚之嘗有偷穴其壁  
貢覺之命家人起竄穴有所穴邊偷慙感去至京師不苟寄  
宿食每主蔭祖家事有不當意雖尊行輒面折之不省奔顧  
奔客曰此何爲者客笑曰固非君之所知也貢怒面枰竟夕  
比曉與客奔連勝客由是終身不復奔嗟乎若處士者非所  
謂善人者耶不踐迹亦不入於室跡其內行雖迂誕失中要  
之爲聖賢所不棄者乎都統林隆者其族子也一旦自沂造  
其家曰叔老矣欲得死所死所無逾子家願歸死遂畱居久  
之見林隆課灌花怒讓之曰任國大臣乃事此邪拂衣去已  
而臧獲歸報曰蘆溝遇五叔曰若主鄙不足死今歸沂矣及  
再入都遂卒年七十有五葬良鄉崇國莊嗟乎處士狐死首  
丘必正其終書曰考終命詩曰高朗令終死非其所貢不死

其視生也爲何如哉信乎貢之爲善人也貢及廷貴皆不取無子廷賡娶彭氏賡戰死彭事姑以孝聞守節六十年卒

朝廷旌其閭

論曰仲尼云事親孝故忠可移於君若處士父子忠孝不兼盡矣乎光祿之忠廷賡先之處士之孝廷貴贊之乃彭以區區臍弱亦截然離立而似續焉易曰鳴鶴在陰其子和之吁何和者之周也處士爲子兄弟行光祿伯之葬武昌也處士歲時詣楚祭先大夫繼制楚處士嘗一至子及見之體殊清羸目燿燿如有光子雖少嘗戒子曰好讀書務持身謹嚴吾宗雖繁我所主者裁三人耳三人者蔭祖伯及先大夫與林隆也

洪陔華傳

李錯

洪正治字廷佐陔華其號也歛桂林里人曾祖故太常卿諡莊定公文衡莊定公生隱君嗣憲隱君生玉振玉振字叔儼晚自號成齋正治之父也遭世亂隱君避地昌化成齋君從日左右艱危中隱君歿乃奉母東遷于揚正治之生也高顛隆頂清揚在目成齋君頷而笑曰鵠雛也要非樊中物耳及長倜儻有幹略機先而張慮多中成齋君力敦內行而以樸誠遇物正治濟之以和家尙儉循古風然人有緩急拯之若不逮正治體之出納當其意歲甲午歛饑成齋君贍桂林族正治廣其惠復太常故宅隱君讀書堂及里中舊費不貲正治多方畫之事皆集正治年五十成齋君示微疾遂不起喪葬如禮不修夸毗人或訾議之而識者未嘗不以爲中節也

成齋君晚舉數子七十餘復舉二子至是存者裁三人正治愛之逾常分推田廬美好者予之曰先君子之愛子也緝太常遺藁及像曰先君子之志也處鄉里以恭人以非禮干不校僕嘗挾重貲一旦遇之陽不顧而逸之去曰先君子之教也以故郡人爭嘖嘖嘉成齋君之仁而服正治之孝年六十有二卒成齋君嘗曰吾歛人死必葬我徽比正治卒兩世皆反葬于徽正治擇交審所從游者先涓裘張抑高宗人秋士三處士及青湘大滌子極而已善畫蘭工詩所著有華萍書屋集子七人烝烝秀出擘杼成雍正癸卯進士久通籍食報之隆必且稱其德云

論曰先大夫之持節三楚也成齋君嘗以陔華見見則深器之曰克家之子也遂訂二氏交後予四走江南北皆主陔華

家見其父子志行如一敦龐而和時成齋君年八十餘體豐下矯健善步寒不裘食肉盡一斤而陔華未五十且白首尪羸負孱骨所異者唯此耳舊傳盛德之家有潁川陳氏荀氏今洪氏其庶幾之

二陳生傳

李錯

石閭橘洲者陳氏兄弟也石閭貌類賈大夫而精鍊有器識又倜儻尙氣給捷於口犖犖乎具依隱玩世之概故狎於物亦迂於物善書畫尤工古隸世爭購之非所好不得也橘洲初工琴以其道與古戾去絕不復彈性恬退雖處約蕭然內足然迂疏嬾慢如虛舟御風頽唐行意詩曰戚戚兄弟莫遠具爾若二人者遠者其性而爾者其情乎橘洲好古唯恐後



祛俗惟恐不力客集嘗獨吟以自適有不得輒默世每訕笑之橋洲得之於天者既殊終不樂與世接中歲將家盤山事樵隱石閭則雅不好山水每聞欲山棲者輒蹙額曰予肉腥毋餒虎也

少司馬宗室塞公家傳

李錯

公名塞爾赫字慄菴號曉亭又自號北阡季子曾祖多羅清巴士魯貝勒謚勇壯諱穆爾哈齊

太祖高皇帝之母弟也穆爾哈齊生奉恩輔國公諱塔海塔海生輔國將軍諱泰蔭布祿泰蔭布祿生公公早孤母太夫人南氏撫成之至性孝謹孩提善承志及長遇母疾冒寒跪深夜禱於天絜月疾間乃已日爲母誦佛經母既歿食必祭

事必告示不敢死其親也遇忌則辟熟食啜粥地襲草薦臥示不敢忘其哀也康熙三十七年授奉國將軍雍正二年以薦補宗學正教長五年授監察御史尋擢左副都御史內閣學士裏行七年署總督倉場事侍 經筵充議政大臣晉工部侍郎署吏部侍郎九年改授內閣學士十二年署大理寺卿尋授總督倉場初漕河橋壩工積逋帑數萬金官吏數易不足償虛數害公私無益公悉奏免之運軍往來滋困嚴立法禁毋擾給餉慮不實每抽覆之以故內外被其德公服官十餘年靖共自飭彛任大寮不渝寒儉節

憲廟知其所居隘 詔賜第一區公固辭不敢受其疇昔故人來見其門館如初器物未嘗少移置歎曰徐邈之介不烈於此矣乾隆八年復改授內閣學士主 咸安宮學十一年

再署倉場事明年晉兵部侍郎未到官卒公少時母爲製布衣以其手澤也每旦服之拜家祠中歲久且敗補綴以完卒之日被之以終年七十有一公好修持身嚴恪先人嘗貸人財七十年而後得其子孫公如數報償之其子孫了不知辭公曰否不使我先人負遺憾耳兄缺官帑五千金竭蹶任之完其家其內行類如此酷嗜讀書雅工詩官暇輒與二三同好攜酒造人家詠花竹寮采爭傳謔曰塞侍郎日來又作春游已尤喜貌塵埃中人客好輒騎款段從小奚物色之遇落魄者益恭下不知者不知其爲卿貳也

今上御極之九年 駕幸翰林院簡詞臣三十八人侍宴賦詩非甲科雖公孤不得列 特命公以宗臣與又明年侍瀛臺宴如前 命一時榮之子三長伊都禮早卒次鄂洛順

奉恩將軍次治安尙幼女二長字大司寇邑公之子成緒罹  
患歿祕不使聞女夢得之寤便痛哭卻簪珥不食家人不得  
已以情告遂矢志不嫁侍父於家節煥寒議酒食竭孝養職  
雖孝子不是過也次字大司馬蔡公之子永福亦獲罪永成  
無還期致書罷婚女亦持不可待十年蔡遇赦還卒歸之  
論曰公以詩鳴公卿間海內莫不宗尚之然居常自檢云凡  
事務快於支體則心有未安此理欲之分不可不辨又曰鬼  
神與人呼吸通吾期無媿而已其於事也有恆行止坐臥有  
常處宅無隈隩有終身不踐地由此觀之蓋亦趨聖賢之塗  
者歟二子並工詩能紹其業若二女者持大節昭大信貞靖  
厲俗固皆承公之訓云

石綱菴制府家傳

李錯

公名文晟字公著號絅菴本瓜爾嘉氏滿洲蘇萬籍也公始祖卜哈明成化閒內屬授建州左衛都指揮僉事至曾祖翰避讐廣甯始以石爲姓生三子國柱天柱廷柱並隨

世祖入關而廷柱功爲多由雲騎尉都統入旗晉一等伯少保兼太子太保以鎮海大將軍守京口卒謚忠勇廷柱子綽爾捫官參領兼侍衛生四子公侍衛公之長子也少不急仕進家食以事親康熙初叔某征滇侍衛公篤友于之愛私憂之公從容進曰大人毋苦兒往當得報遂直詣行閒問起居而後歸某年試官江南蘇州府同知時八閩用兵三吳爲孔道公承委事一切辦尋以制府于成龍薦特賜袍擢知雲南開化府事道出楚南遇滇民舊被猓夷掠者遮道請贖公

到官首請之得反流亾三千餘口逆黨韓有昌謀亂獄不決  
公讞之誅亂首裁四十人盡釋其他以母憂去服闋起知廣  
東潮州府瀕海寇盜爲潮患公身歷雲青諸澳撫定之負固  
者偵其來禽殲其魁有吳岸之者將就刑大呼曰卽禽固當  
死然安能盡殺未禽者乎公異之曰釋若若能招之乎曰能  
遂釋之岸之叩頭請曰願質老母三旬當報德公勞之而去  
未及期盜爭就撫皆輕悍剽疾者潮向苦盜日未晡卽扃戶  
自釋岸之後適迎春東郊公命岸之率所撫四百人擐甲執  
兵按隊而出潮民觀者如堵復聽民上元張燈樂十日無所  
禁蓋潮俗未有者也潮民深德之祀之如昌黎以父憂去服  
闋起知廣西梧州府改知山西平陽府平陽旱民大饑公請  
賑不待報亟支官米十七萬石銀十四萬金身給散之當事

怒將坐以法公曰活民而死無憾會征西議府養馬公上議曰平陽距大同道遠有警不及赴且災黎忍令復困供億乎當事不可公抵印几上曰官可罷馬不可養事遂寢有頃事聞

聖祖嘉之擢貴州布政使所支以賑民者悉免無校尋授雲南巡撫前明沐英以屯租養操軍其租十倍民田久之籍爲正賦屯軍多逋逃田荒無徵公請如民田上則起科報可積困遂甦公入覲適安南請普洋河堞地公謂普洋故我地與我犬牙錯夷狼貪不可許又陳諸不便於民者事悉施行久之改廣東巡撫尋授湖廣總督公疾作再疏乞休不報丙戌年

聖祖南巡公迎至淮

聖祖慰勞之詢年齒疾狀日賜食復命之任是年五月始允以疾休公既歸構別業家瑩旁幅巾曳杖灌園自娛顏其屋曰安蔬嘗服一裘襍甚指示諸子曰此吾童子時製六十餘年矣欲不可縱志不可滿汝曹其識之著志說鐫於壁以示訓云庚子年八月四日卒年七十有七

贊曰綱菴公我之自出也少爲先伯父繩武公所獎誘與先大夫及諸父兄同學八人及長夔信虎變各樹所業爲名公卿光景照耀熊熊乎盛哉公嗣先大夫制楚江漢之化後先在楚人不忘固非予小子所得而私者

傅閣峰尙書家傳

李錯

傅公籛字閣峰世居長白號富察氏伯祖大學士諡文恪額



色黑祖護軍統領額思特兄弟並從

太宗

世祖撥亂定統勒功盟府統領子四其仲大同右衛協領驃騎將軍噶爾漢公之父也富察氏世顯貴驃騎獨尙清節及卒官公奉太夫人及幼弟扶柩歸以貧約任甘脆里稱其孝年二十應鄉試不售尋以世家子簡護

世宗於雍邸引疾罷久之復授 王子教授

世宗御極授 雍和宮總管兼一等侍衛尋晉副都統擢兵部右侍郎充

聖祖實錄總裁官時 廷議將斂旗人會居京城公以田廬墳墓安之且久一旦遷之是債之也如故便

世宗是之年羹堯既敗事多熾蔓公曰法外法非

聖主意悉從末減

世宗將任公制兩江公力辭雍正三年 命勘天津水師營營兵屋忤 旨左遷 盛京戶部侍郎初公通地理識形家言嘗 遣公求吉域於九鳳山之原會煩言興

世宗內疑又年羹堯之初逮也羣臣請加族誅 世宗屢詢公公唯唯至是詰所以不欲殺羹堯故公對曰羹堯妄而愚

明主審知之虞誅四凶初不孥也明年坐岳興阿事 召入質岳興阿者冢宰隆科多之子也故嘗同寮隆被罪公代爲申白之

世宗疑公與隆契故爲岳興阿地事既釋復奉 嚴旨勘奉天府府尹蔡珽事蔡故與公有隙至則報以直五月謫公戍

黑龍江初西事起

世宗嘗與公論準噶爾向背公言頗中九年特召公還賜衣食畱對竟日遂勅入宮參密謀十年假侍郎銜使鄂爾多斯四子部落簡卒赴查克拜達里克贊軍務適賊略地而西主兵者疑不出公以賊深入擊之便不可請要其歸不可爭之彊且長跼請卒不可公曰吾所部遠來力能搏之顧馬力疲耳願假我馬樂一戰敗罪我又不可公徑率所部出追之弗及事聞特頒雀翎示獎賞已而佐平郡王軍召入面受機宜十二年再入見會準噶爾死其子策凌立擬簡使諭順逆公請行遂以都統羅密學士阿克敦副公往各賜白金千八月發京師十二月入其國敵盛兵仗來迎及相見酒數行策凌微示羈畱意公笑折之此役也詔旨諭以

我鄙阿爾泰策凌曰

大皇帝天語使盲視聾聽幸甚顧阿爾泰地遼闊斥鹵不毛中朝有無無所損益且我先世披荆棘礪戈矛以與喀爾喀爭此土也雖不克有猶故物也唯

大皇帝命之公曰我

皇帝奄有九有十倍阿爾泰無所惜顧畫疆有界庸違舊章昔者若從祖噶爾旦負固不順我

聖祖天討有辭雷擊電掃將悉舉爾國重援三驅用釋前禽俾若族今茲蕃殖斯土非我之大造乎以爲若之故也則若土隸我久矣策凌語塞復遣十四鄂托寨桑來十四鄂托者華言十四路寨桑者宰相也合辭見公曰和我那顏敢不曲受命然下國戰守備下人匪所及其止公緩謀之那顏者其

主也公曰不有若主天隕厥身疾霆摧枯將見異日若屬其無悔乎若夫絕徼無歸已厲於受命之日矣麾之出翌日再具牛酒來叩頭謝乞解而後罷蓋策凌恫喝公陰嘗之度不可動乃輸誠謂公曰坎坷阻抑斃有所由匪下國罪其扃之乎唯

大皇帝命於是拜表奉三使歸其陪臣與焉十三年四月抵京師

世宗大悅納其請凡善後事如公議八月授都統會

世宗崩

今上諒陰喪制一委諸公授內務府總管尋擢刑部尙書署兵部尙書事公疏官吏決罰不如律所惡者予死比請重定律使畫一因斥司曹不法者時撫臣某歸塗恣橫逮廷訊

不承

上怒甚司敗者擬重典公曰失檢束耳依上書不以實論其人初未嘗謀面也明年檢會試遺卷公拔齒德著者三十五人上之悉報可有門下客貸人財丐公僕居閒書券嘗白之公事聞或謂公宜謝不知公曰吾實知之欺君罪滋大疏入

上切責公罷尙書改授正藍旗都統參領明山者宿多疾公廉其能軍政予卓異言者謂公徇摘明山事以劾公坐是逮上明聖尋釋之公入獄已病比出遂卒

憲廟之在雍邸也深倚重公每事諮詢之於公家事纖細具悉嘗聞公母病藥餌踵至謂左右曰其家一人病則眾皆病矣暨入纘大統股肱視公公閒疾作 敕光祿日賜藥聞有

弟喪面開諭之人以爲榮迨遭峻責被嚴譴所親代之憂公  
方率老僮腰斧伐山木故上有以結

主知而傍人莫窺其涯涘也公嗜易工詩歌通黃岐堪輿家  
言性恬退嘗構稻香草堂於南鄭村之獨樹里負山臨流蒔  
竹種稻布衣卓犖之士爭游其門其出處閒雅蓋有所守云

李睂山生傳

陳景元

李睂山名錯字鐵君其先居琅邪後遷遼世傳爲遼東李氏  
父輝祖以操行敦厚且積功厯官楚制軍晉司寇嘗爲蜀方  
伯生睂山遂以爲號云睂山故貴介然家無餘資以先人之  
廉也好讀書務窮源本爲古詩有漢魏陶謝風其它得少陵  
神采而屏絕麗襍以故以詩傳若其有良史材則人莫之識

積二十年著尙史凡八十餘萬言貫左國之離析補龍門之遺失訖秦嬴始于黃帝班掾以下莫能及也素貧不得刊布惜哉惜哉睂山旣肆于文不樂仕宦門功凡八職輒病不就襲居于盤與田父野老相周旋築室廡峰又自號曰廡青山人歲丙寅年六十有一矣



八旗文經卷五十一終

八旗文經卷弟五十二

傳狀丙

唐英陳勦天小傳

常安烏蒙烈女傳

常安烏蒙義役傳

楊應据賈烈女傳

愛必達開國佐運功臣宏毅公家傳

伊湯安杜尙書臻傳

伊湯安名宦郭公廷翥傳

陳勦天小傳

唐英

陳思相字勦天菖萍其別號也其先世隸平西藩下我朝

定鼎之初平西駐劄滇南父某爲平西屬大僚時勦天已舉  
孝廉列滇南才子之一迨平西逆命天討蕩平凡隸其  
藩下之員弁家屬咸械繫來京勸天其一也時

聖祖仁皇帝熙洽昌明注意人物廉得其才名赦之使供值  
武英殿充辦古今典籍刊刻之事月賞廩既予與今大府  
高公東軒先生猶及與之同事數十年故其爲人梗概得之  
目覩者頗詳第以俘虜之身繫逮萬里抵京之後貧窶困頓  
傍觀者爲之不堪而勦天澹如也性孤介質樸不善與人相  
接洽心口本色真誠篤摯如不識字人故所與同事咸以迂  
癡視之暇則終日卻埽枯坐人偶有呼之者回頭愕視噤無  
片言卽侮弄唾謔置若罔聞故常有野鹿之號家雖貧能守  
志不苟相識縱貴介富室從無一語及乞索稱貸事有以禮

餽之者少則受大謝之遇有窘迫枵腹衆日坦然不以寒酸  
狀示人所與契合者三四人率皆鄉塾韋布之士常攜匏樽  
市脯就其家則怡然相對酬酢盡歡醉則嘯詠譚諧拍手狂  
歌而已善書法不擇筆楮率意揮灑致趣天成喜作米海嶽  
草書而奇峭古勁過之人有索者磨墨濡毫飲之以酒立就  
五七十紙不倦常戲署以米芾字款襖工仿舊裝潢貨之多  
獲重值雖博古家不能辨也間有獲重值而分其餘羨以遺  
之者笑而卻之詢之則曰寫字破悶飲我一醉大可人意我  
不損使襄陽錢也此時日下米字盛行多出其手購求貢之  
大內者甚多竟至上動宸聰垂問索察勢不能隱人皆  
爲之寒心彼則貿貿自若及核其僞冒射利之事書則有之  
利則無與也 聖明奇而宥之第戒其毋再作米家書款而

勤天之名由是益著有子二三人其室人既逝人勸以附塾讀書則曰貧不能也勸以自教則曰我尤不能也叩其故則曰教者授也學者效也我教我子即使我子似我世則何取乎我又何取乎我子也聽之可耳家貧無書讀蕭然環堵中所日相對者跋案髡筆凹硯殘墨之外無長物偶得稗官野史則手把哦吟津津如有會人有以險僻典故叩之者靡不詳悉根柢百無一窮至於子史經籍今古中秘之書又源源本本融會貫通悉皆探囊而出不事稽索如建瓴注水不能窺其涯岸也同事少年輩往往以至鄙極陋之題難之亦皆連篇累牘咄嗟應之人雖訝其敏博而勤天究未嘗以聲律推敲爲斤斤偶有吟詠酬應旋成旋燬從無稿記時東軒具眼嗜學每憐重而就正之予則少年粗疏不解文翰雖同事

數年忽忽失之今東軒文章著作推重當代類得力于勤天非尋常章句家所能爲役也乾隆己未予與東軒相遇於淮陰談及勤天不勝人琴之感擬欲傳其人刊其詩苦散軼零落無可收拾適楚人隸遂翁劉瑄白者勤天塾友之一也時亦客淮行笥中檢得勤天詩一百十二首文賦四篇大抵皆入值時草率酬應之作雖一斑一鬣而就其命意落筆一爲追想如窺全豹如味太羹令人深過後之思至其生平著作與閱歷玩賞交游贈答之章想俱歸滇南劫灰中矣雖然勤天沒且久茲猶得以遺集傳其學品行事存姓氏于身世偪仄時命連蹇之餘要皆 聖鑒知人 天恩浩蕩之所遺留于無盡得不謂之厚幸邪行鐫其稿爰次其略以爲知勤天者道諒東軒先生當不以予言爲河漢也乾隆十年歲次乙

丑花朝撰

烏蒙烈女傳

常安

烈女年十五六姿色端麗不知其姓氏里居庚戌八月烏蒙  
猥逆作亂殺官屠城掠子女財帛女子年少者頭目自取之  
烈女同村婦二十餘人立棚下抵募猥乘醉持刀入以次叱  
眾女去衣不從者以刀背撻之從者九人次及烈女烈女不  
從猥欲撻之復止凡數次終不撻蓋以其美而憐之也忽小  
猥進曰某某持酒肴相賀猥棄刀出圍坐大嚼酣飲移時猥  
營有火坑襍置柴炭藝之以避寒烈女於猥出時收淚拾刀  
趨坑後把刀向外立村婦曰此將抗之耶恐不敵一婦曰女  
羞澀欲於無人處從之耳言未竟猥爛醉踉蹌入覓女不得

詢村婦得之回至火坑舉兩手前抱烈女烈女迎刺猓洞腹  
仆地立斃小猓驚走告眾猓眾猓至烈女已自剄死矣眾猓  
怒碎其屍村婦乘閒逃出者數十人時眾方鏖戰忽傷一大  
頭目猓氣爲之頓沮予聞之曰此烈女平猓第一大功也

### 烏蒙義役傳

常安

義役烏蒙武職之礮手也不知其姓名烏蒙之變文武多遇  
害逆猓猖獗乘我官馬披將帥戎服執軍器肆行無忌得鼓  
吹樂人與使令之役夫輒釋不殺令供其事義役之主死充  
礮手猓中猓戰不勝謀欲施礮不解施義役以口向上猓亦  
黠曰須向彼義役詭曰若然須別製礮猓許之義役於無人  
處碎其火門視傍近有藥一桶持火奔至桶前猓急禁之不



及火發桶爆裂響如雷山石爲之崩墮近火之猥悉死延及十里外而義役亦燼矣予嘉義役之忠烈將疏請於朝會調任於黔倉卒不得其姓名事遂寢君子曰嘻人而役賤也而義則役亦不賤也烏蒙之變何與於役而役死之天下後世誰知役之死者而役竟死之嗚呼義矣設義役畏一死而教以礮向我軍我軍無噍類矣以一死全滇南百萬生靈義役之死不死也

賈烈女傳

楊應琚

賈烈女者西寧人賈洪基之女年十八受聘周英俊嗣子琦琦暴疾死赴至女家女聞之裂頭上帕刺刺有聲悲哀欲死之父母不許欲往哭琦又不許自是遂縞衣素履號泣不輟

聲水漿不入口者七日夕焉見者皆爲流涕父母憐之爲好  
言勸解皆不答令弟妹家人環守焉久之有老嫗自鄉來者  
不知隱諱直於女前言婚事女正色曰馬無雙鞍女無二夫  
何婚之議卽之後院聞闔戶聲縊死矣家人隨跡之已不可  
救也容色如初口絕涎沫視其項瑩然無痕異哉計後琦死  
適半月耳先是琦之死其家已暫掩漏澤園中女死其父母  
因欲寄殯某寺夜見夢父母曰女旣死胡爲而置兩地也父  
母驚寤晨起聞棺中有聲如裂木父焚香祝曰已知兒意卽  
卜地令汝夫婦同穴毋怖家人聲乃止遂出城覓地遇有金  
姓者問何之告以故愕然曰有是哉疇昔之夜夢有舉雙棺  
至于地上者今聞汝言無乃欲予地乎予有地一區在東郊  
欲則汝售遂立券營葬至今郊外五里巋然高冢在焉

贊曰歸震川云女未嫁人而或爲其夫死又有終身不改適者非禮也此言其常耳人以廉恥爲貴眾人旣指爲某婦矣而又覲然他適乎是以節烈之女每欲輕生不謂邊徼之區有此女子感慨自決精通於鬼神豈易得哉余初莅湟中求問其所謂烈女墓卽在東郊道左至今每過之低徊感嘆不能去云

開國佐運功臣宏毅公家傳

愛必達

公諱額宜都所稱巴圖魯者其賜號也姓鈕祜祿氏先世長白山人以資雄於鄉至祖諱阿陵阿拜顏者移於英嶧峪家焉父諱都陵阿巴圖魯公生于壬戌歲卽明季嘉靖四十一年也幼時父母俱爲讐所害公匿鄰村家獲免稍長志趣超

邁武勇絕世年十三遂殺其讐公少孤無伯叔兄弟惟一姑適嘉木湖寨長穆通河至是往依焉姑子哈思護傑士也長於公二人相得懽甚居久之適

太祖高皇帝龍潛有所往過宿姑家公與

帝語意相合輒識爲真人欲從之姑不可公奮然曰大丈夫生世間能碌碌終老乎因請於姑曰此行任所之決不貽姑憂翌日遂從

太祖行公時年十九

太祖器之日見信用自是勦力戎馬斬將奪旗每戰輒先登績冠諸臣右事詳國史及我

太祖以丙辰年建元天命置理政大臣五人卽公蜚英東札爾固齊何和理額駙達爾漢侍衛虎爾罕嵩阿洛巴圖魯費

楊古也踰四年大破明兵於界藩山亦賴公排眾議耀兵列陳力戰而勝其他征哈達輝發葉赫諸國與明兵諸大戰皆力戰有功天命六年我師下遼陽

太祖命於城東築第賜公居焉公性忠誠果敢結髮從

太祖征討身經百戰金痍徧體其攻諸城寨時率隻身夜往佩火具旣登然之以爲軍號或遂燔敵營柵及爲將尤善以少擊眾攻城掠地所向皆捷然尤明於大義而謹於事上事有關於國家雖己子亦不稍存姑息公次子達啟少英異太祖養於宮中及長材武過人

太祖愛之俾尙公主達啟怙寵漸驕遇皇子皆無禮公患之一日假他事集諸子僮僕讌城外園中酒甫行公忽起命眾執達啟眾愕然莫知所措公大怒露刃厲聲曰天下有父殺

子乎誠以此子傲慢不馴不除他日必負國恩而敗門戶不從者血此刃眾乃懼引達啟入室以衣被覆殺之公詣

太祖陳且謝罪

太祖驚惋桑日深以讓公久之知公心彌加嗟歎其爲國遠慮忘已效忠類如此公爲

太祖股肱心膂功冠當時

太祖之所以寵錫公者更至優極渥其取巴爾達等城及敗薩克查兵也

太祖親迎郊勞賜爲一等大臣爵左總兵官給以百人廩食約身至孫三世食之其敗九國也以所得諸貝勒裘馬幄帳并御乘名馬賜公前後賞賚弓矢衣裘人戶牲畜無算常分給將士不以自私初設佐領之制詔以公所俘獲者益以賞

給戶口爲三佐領隸公家俾無預上役爲公私屬供田虞弁  
采人參備藥物以奉公下及諸子各有分贍蓋異數也公際  
會風雲身都榮顯敬慎之操初終一致有古大臣風公以天  
命六年辛酉歲六月十四日甲申卒於遼陽賜第壽六十當  
公之疾革也車駕臨視垂泣與訣及卒

太祖震悼墓祭時親臨慟哭者三

太宗文皇帝天聰元年贈開國佐運功臣追封宏毅公配饗  
高廟復授公子邁必隆爲精奇尼哈番世襲公初葬遼陽盛  
京建遷葬於城北十五里蒲湖山公卒後二十三年

世祖章皇帝撫有函夏中外一統於順治十一年特立碑以  
表之康熙三十七年

聖祖仁皇帝恭謁陵寢親奠墓次越二年復御書碑文勒諸

石

今天子龍飛御極追卹成勞於乾隆二年賜祭家祠乾隆八年駕幸盛京親臨致奠

聖聖相承酬庸報功之典蓋有加無已迥逾常格云公凡五娶生十六子名次官爵具譜牒中而最著者有忠義公忠直伯等四人別爲傳

贊曰宏毅公之起也偉矣哉復家痛於髫齡識真人於旅夜一朝萍水氣兆風雲卒之功勒旂常盟深帶礪伯食於在天垂休於奕葉膺系朝之寵錫動

列聖之興懷倣之於古庶幾十亂之宗五臣之首也歟若夫豐沛諸賢南陽羣哲有不可同日而語者矣公舊無傳

聖祖御極篤念勳庸旣以傳志裨史官又時召公孫敏慈公



從容論說往事且以大內所藏天命初舊籍宣賜并召族人  
咸得瞻

列祖實錄於是公之本末煥然簡冊然當日畫鑪秘計借箸  
英謀尙有不可得而見者嗚呼烈哉

杜尙書臻傳

伊湯安

杜臻字肇余以進士選庶常歷內閣學士國初遷沿海民于  
內地畫界而設之禁故界外多棄地而閩海流民蹙聚臺灣  
迨王師收閩金門廈門以次列戍海濱竄匿餘黨相率來降  
安插未有計督臣姚啟聖請以界外地按籍給還并弛海禁  
收魚鹽之利給軍食疏下廷臣議持不可康熙二十二年臺  
灣平 上諭海墾弗靖權畫地以民遷茲反側永清界外田

畝宜給還耕墾會給事中傅感丁請將江浙及粵東界外田一併招徠開墾於是別遣二臣往江浙而臻及內閣學士石柱往閩粵相度展界進臻工部尙書臻巡行自欽州之防城始遵海以東歷府七州三縣二十九衛六所一十七巡檢司一十六臺城堡砦二十一給還民地二萬八千一百九十二頃復業丁口三萬一千三百定懸軍之營二十八而廣東之疆理以復又自福甯州西分水關始遵海以東歷府四州一縣二十四衛四所五巡檢司三關城鎮砦五十五給還民地二萬一千一十八頃復業丁口四萬八百定懸軍之營三十而福建之疆理以復是役也臻往還嶺海跋涉三萬里勞來安集宣布 皇仁諮諏民隱海澨山陬各得其所論者謂功蓋於南國云丁母憂起刑部尙書尋改兵部時議裁各省

駐防及督撫提鎮標兵額臻謂兵冗可裁而不可驟裁請自  
今有老弱病故出闕者概弗補數歲額自減從之轉禮部尙  
書以疾告歸

上賜煙霞耆舊額以寵其行臻旣卒康熙乙酉南巡追賜額  
曰眷懷舊德臻少貧力學奉祖母暨父母盡孝好宏獎人材  
詩文剴切中條理著有經緯堂集及閩粵巡視紀略六卷海  
防述略一卷

名宦郭公廷翥傳

伊湯安

郭廷翥卽墨人舉人總督郭琇子乾隆二年知嘉興府莅任  
日惟挈二子自隨性廉介布衣蔬食不名一錢明于斷獄多  
善政嘉善奸民富大等誘孩提殘損之廷翥密訪寘之法人

稱之曰郭青天民有夤緣呈控者邑令與上官皆準其狀廷  
翦獨不許忤上官檄委權他郡事去後邑令及上官皆褫職  
廷翥復莅郡先後凡八載勤于造士每月試諸生以詩古文  
各就所長甄錄之政簡刑清訟庭草長冬無裘大吏知其貧  
予之金堅不受府堂多植梅有盛生者僵立中道適太守至  
頭踏擁仆之詢其故以吟詩對有放衙靜似阿蘭若官與梅  
花一樣清之句至今傳誦其清德槩可想見云

八旗文經卷第五十二終



八旗文經卷第五十三

傳狀丁

鐵保甘道淵傳

鐵保瑛夢禪慶似村合傳

鐵保恆中允益亭傳

法式善武虛谷傳

法式善周贊平傳

法式善侍衛恆公家傳

法式善先妣韓太淑人行狀

法式善洪稚存先生行狀

英和惲太夫人傳

甘道淵傳

鐵保

道淵姓甘名運源號嘯岩又號十三山外史道淵其字也漢軍巨族其祖諱文焜康熙閒建節滇南死吳逆難諡忠果數傳至道淵家中落道淵與其弟運瀚奮志下帷思以科第繼前業屢試不中遂侈然自放隱於詩酒二甘之名噪一時焉道淵性拘謹而疏慢睥睨一切與人無可否援之而止不論王公大夫與僕役下走與之飲卽飲與之博卽博人視道淵爲棄物道淵視眾人爲芻狗也性耽詩能書畫旁及篆隸八分詩學宋人遠追漢魏得其神而不效其體時李眉山陳石闓二先生方領袖詞林陶鑄後進見道淵詩許爲文壇健將朝夕觀摩學益進余嘗與道淵益亭上元作元宵聯句一百韻漏下得四十韻道淵攜歸以六十韻卒之典重博雅傳誦

一時畫學宋人楚楚有致篆隸八分俱有古法尤善刻小印  
純乎漢篆不屑作前明文三橋伎倆得者寶之口吃喜議論  
每一啟口座客鬨然猶憶冬夜與道淵論史事余謂古人作  
事有幸有不幸張子房博浪一擊似匹夫市井所爲使不能  
助漢成帝業又隨赤松子游以避禍亦不過於俠客列傳內  
增一荆軻聶政耳又何能功名烜赫如此其盛也道淵舉狄  
梁公受武后封屈身牝朝雖一語挽九廟之失其功甚偉儻  
其時五王之兵不競敬業之檄空傳梁公能以隻手復唐祚  
乎兩論默合相視狂笑道淵愈吃愈笑愈笑愈吃汗淚俱下  
戟髯怒飛座客俱爲傾倒其性情風致類如此晚年無子遇  
益窮不得已而考職赴廣東象岡司巡檢任年七十有七卒  
於官余採其詩並其弟運瀚詩入熙朝雅頌集以傳



論曰道淵其東方曼倩流亞歟澄之不清激之不濁與世和光而矯矯不汙卒之以名士作下吏執手版拜上官憤憤以老天豈亦以遊戲待道淵耶噫奇矣

瑛夢禪慶似村合傳

鐵保

夢禪名瑛寶滿洲人大學士永文勤公長子其先以開國功世其官蒞登顯秩簪裾赫奕至文勤公以吏部尚書拜文華殿大學士子三人夢禪居長翩翩佳公子也夢禪少讀書博涉典籍屢試不售以筆帖式外用知縣蒞任後頗著循聲上官欲與上考夢禪喟然歎曰功名吾家固有五斗米不足爲也遂解組歸年才三十時文勤公正秉政同懷弟伊靜亭亦由樞秘授山東巡撫烜赫一時而夢禪獨以韋布自安老屋

數閒冬一裘夏一葛不喜肥甘疏食飲水性喜畫尤善運指  
興酣時解衣磅礴潑墨如雲每作奇想不落古人窠臼近時  
高且園傅凱亭外無與比者然性孤介不多與人畫以故得  
者甚罕素與劉文清公壻爲文字交劉書夢畫每每合作得  
者以爲至寶雖連城不易也與余論交時年已五十餘白髮  
飄騷老而益壯面如渥丹紅白可愛蓋其得於天者厚游情  
物外不以榮落貧富動其心不以功名奔走勞其形俯仰之  
閒自得天趣故不必乞靈於金石託命於丹鉛泊然自保其  
天年也年七十餘以布衣終慶似村名蘭尹望山先生之公  
子也家世簪纓三代俱登宰輔以似村之才之學稍有志於  
功名取顯秩如拾芥而似村棄之如敝屣視之如浮雲獨構  
老屋數楹棲身僻巷以避車馬作小書室環種以竹性喜詩

每風清月白抱膝孤吟覺詩韻書香與竹聲相應答令人作  
秋水伊人之想總角時隨望山公兩江總督任以詩見許於  
袁簡齋數十年詩筒往來無虛日所作詩以風韻勝近白香  
山陸放翁雖風骨不及楚楚有致此外不交一人亦無人問  
似村者而似村亦駸駸以布衣老矣余與似村交最久每過  
訪一鬚頭婢應門引入室見主人不衫不屣案頭詩一本牕  
閒竹數竿別無長物烹新茗一甌味極佳不畱飲亦不答拜  
曰我無車馬童僕也其交游之落落如此年五十餘以布衣  
終余充八旗通志總裁列入儒林傳並選其詩入

熙朝雅

頌集

論曰士生貧賤目不覩金紫耳不聞鼎鐘進身無門自安淡  
泊不失爲佳士若生於閥閱襲祖父之榮處功名之地卽以

富貴終其身亦可謂克家子乃竟絕繁華棄軒冕以布衣蔬食終其身此非有定識定力不足以語此然則夢禪似村之爲人豈不卓卓然古君子哉

恆中允益亭傳

鐵保

中允名恆裕字益亭滿洲人與余同舉庚寅孝廉其先大夫索公乾隆朝官工部侍郎赫赫有聲不置生產歿後家無儻石老屋數楹亦典當作喪葬費益亭移居委巷間四壁蕭然以課讀生童爲生計欲博一第以繼先人業嗣舉鄉薦入詞林薄俸不足以畜妻子而益亭益窮益亭性孤介矯矯自持不少辱損又避俗如仇少所可而多所否侍郎公會充會試總裁得人最盛大學士于金壇尙書觀補亭德定圃周海山

等俱出門下誼重淵源不時存問而益亭以貧驕人足不履諸顯者門夫人爲大學士溫公猶女一時諸舅如六學士勒公兩廣總制永公山西撫軍衡公俱相繼登顯秩益亭概避而遠之不通往來以故親故中無一周濟者益亭之遇益窮益亭之品益高矣性喜詩多作六朝語唐人中尤近義山每脫稿輒曼音孤吟聲如金石聞之令人心醉書以小楷名家常爲余書選賦若干首一筆不苟合樂毅論十三行黃庭經爲一手得其神而不襲其貌時賢無與抗衡者醉後則潑墨如雲作顛素狂草春蚓秋蛇不可思議得意輒伏地跪拜昂首狂笑繼之以泣曰吾惜吾精神也與余爲性命交無三日不來來必小酌維時有甘道淵劉虛白及弟閻峰俱雄於詩道淵尤善畫能篆隸每來必俱或招邀作郊外游託興煙霞

寄懷歌詠每聚必飲每飲必醉每醉必吟覺彼時山川雲物  
月色花香俱爲我五人設前無古人後無來者迨酒酣耳熱  
益亭則吐氣如虹發言成軌一部二十一史供其談笑直有  
曹孟德釀酒臨江橫槊賦詩梗概同人俱爲傾倒不止酒氣  
拂拂從十指閒出也益亭尤通醫每能醫人不能醫之病先  
母輝赫太夫人及如亭夫人側室馬宜人每有疾一藥卽愈  
稍疏者請之多不去閒復精演六壬卜之多奇驗又其餘事  
也歲壬寅益亭以酒病以窮死易簣日執余手曰吾永別矣  
家室妻子都不問吾何以葬余泣對棺木衣衾及一切應用  
之物俱齊備可無慮益亭色喜慨然曰吾得友復何憾耶氣  
稍定謂余曰吾有研名山高月小者公素索未與今永訣矣  
贈以誌別因呼子某取研至摩挲移時謂研背有細爪痕未

磨去公自拭之無損石也遂溘然逝其死生之際了無罣礙  
如此嗚呼神矣閱年五十有二子二人俱未仕余充八旗通  
志總裁官列益亭入儒林傳選其詩入 熙朝雅頌集復刻  
其詩文全集爲序以傳之

論曰造物忌才其信然哉既賦益亭以聰明又假益亭以學  
力乃既困以酒又死以窮傷已然益亭不窮則學未必進今  
以窮而學以學而聲振里閭名登文苑天之窮益亭正其玉  
益亭於成也詩曰樂只君子邦家之光益亭有焉

武虛谷傳

法式善

君姓武名億字虛谷一字小石自號半石山人河南偃師人  
乾隆三十五年舉于鄉四十五年成進士五十六年選山東

博山知縣官七月而罷君之官博山也縣產煤炭上官咸取給焉民苦挽運又舊不置驛按戶納錢買馬以充郵遞芻秣之費民則供之君皆裁去民不務農以逐末而耗其財君繪流民圖以感之民多化者有奸民與商賈雜居寺觀爲諸不法事君嚴懲之俗遂革邑有孝子節婦必先榜其門而後具狀請旌又建范泉書院以教士居官數月所欲爲者將次第舉行而杖軍役之事興軍役曹君錫杜成德者隸步軍統領衙門假緝捕爲名而招結無賴十一人橫行州縣人莫敢誰何入博山三日不去君則悉禽之將治以法君錫成德出牌擲堂上不稍屈君撾其脛而數之曰此 朝廷縣堂也余奉 朝廷命宰是堂者也余知有 朝廷烏知所謂步軍統領且牌稱所到之處報縣協捕若來三日矣不吾面何也牌稱



二役耳十一人奚自來一一杖之君固以治營卒酗酒事上官欲君與某弁合君弗聽而積之忤也及聞是事慮獲咎于步軍統領又入丞劉某之謗遂劾君濫刑罷官日縣民赴省垣乞畱者數百人以上官悔之適入覲令君偕行爲謀捐復章佳文成公在朝堂抗聲謂上官曰君劾某令何不明疏其罪願乃以虛辭陷彊項吏耶時步軍統領意未解聞此言愈怒遂以吏議沮格之君乃以不能復官歸君少有異稟年十二卽能屬文塾師課之經輒能舉疑義以相質難十七喪父二十九喪母哀痛毀瘠益以讀書自勵君父官中外三十年無僭石儲君又不問生計衣食幾不能給歲大水伊洛漫溢家室傾圮君自負敗木植泥潦閒壅以沙石覆以葭葦穴一隙通天光傴僂而入不廢吟嘯嘗于風雪中取枯柳供爨薪手僵

斧墮傷足血淫淫誦讀自若君身長八尺腰腹十圍狀貌  
奇傑多膂力嘗攜弟樞南歸方盛夏多雨遇泥濘輒手助推  
挽足重繭不以爲勞方未第時居京師從朱笥河先生游及  
里居聞笥河赴徒步往奔其喪嵩縣典史某賢而死於官貧  
不能歸解衣資之去又嘗假賈息置義田以瘞遺骸在京師  
某顯官爲君父門下士願君一見終不往其天性摯厚而介  
介自守又如此君在笥河先生門以樸學爲同游所推服其  
自京師旋貧不能歸仍至博山授徒東昌主講清源書院修  
魯山郊寶豐三縣志凡五年始歸里安陽令趙君希璜與君  
同受業于笥河者乃延君至署訂金石文字而君則已病矣  
嘉慶四年十月廿九日君卒于家時大臣專疏薦君迨 特  
召之旨下而君歿已逾月聞者無不惜之所著有經讀考異

羣經義證三禮義證授堂劄記金石三跋授堂金石續跋偃  
師金石遺文補錄讀史金石集目錢譜授堂詩文集若干卷  
太史氏曰余與虛谷爲同年友交相得也君懷用世志慷慨  
自期許方在魯山時楚匪至唐鄧君議當于交口鎮設兵扼  
荆襄之險于西山諸村塢立保甲以杜賊之來計未行而賊  
果至苟充君之才豈不能有所樹立乃卒以忤權貴爲世所  
棄雖然棄之于千萬人而取之于一二人其輕重必有能辨  
之者况垂死而受

聖天子之知遇乎哉

周贊平傳

法式善

君氏周諱廷寀字贊平又字子同始祖諱堯宋隆興進士官

歙州太守遂家績溪世有隱德父諱思紹以孝友稱治家嚴肅子三君其叔也天性純摯方數歲時父偶怒長跪請色豫而後起見者呼爲孝子記誦過人而刻苦備至偕兄子宗杭讀書埭郭石鏡山中曉歸侍堂上莫抵山寺宿課諸子姪業不稍倦其勤懇如此乾隆三十七年補弟子員四十六年舉優行五十年食餼五十四年膺選拔以憂未與朝考五十八年補試肄業太學五十九年考取八旗教習嘉慶三年中京兆試四年會試薦而未售教習滿引見以知縣用揀發廣東署龍川令逾年而卒君爲諸生以正自守有以非禮相干者君正言勸止之而于鄉鄰之告貸則不問其虛實務有以滿其意故績溪人咸謂君爲誠篤長者及肄業太學教習守其道而不變太學人所以稱之者與鄉邦無異迨令龍川

也乃奮然敢于任事不尙權術而亦不事姑息嘗曰民亦人也未有民而無心者也我之心如是民之心亦如是緩者緩之急者急之夫何患民與我之不相洽乎乃條目其所欲爲者數十事上之大府總督吉公惠潮道胡公惠州知府伊公皆亟稱之不容口死之日龍川民靡不思慕之者君一以至誠自守而其居官能獲于上下又如此孰謂儒者不可以爲世用乎君生平無戚戚容而於治民事則如疾痛之在其身不欲自寬其責蓋居龍川卒以此致疾而歿可謂能盡其職者矣君所著有韓詩外傳校注十卷西漢儒林傳經表二卷行于世子一宗棟克繼其業

論曰世不患無醜實之士然往往自遷其所守豈世事之足以易人哉固其誠有未至耳若君之自居鄉以迄爲官始終

一出於誠此非人所難能者乎君兄子宗杭寄書告余云君母病割股進病因瘵舉家無知者惟君妻知之君今歿矣妻始出曩時縛股帛并刀示族黨血迹猶縷縷也嗚呼篤信自守不求人知觀于此彌可以見君之素也

侍衛恆公家傳

法式善

宗室侍衛恆斌字綱文隸正白旗

太宗文皇帝四世孫父薩喇善官吉林將軍公少喜讀書明大義慷慨以家國事自任乾隆二十四年以資授三等侍衛有能聲二十六年父以公事謫伊犁時伊犁甫闢距京師萬餘里將軍方病臥牀榻公奮然曰古人有身代父役者吾何爲不然遂陳情當事丐代 奏有 詔責其沽名褻職仍

命從父行

上意殊惻然也公竟行晝夜侍父疾至廢寢食父母怒其愚公無幾微怨抵伊犁父疾以瘳將軍廣庭阿公賢之尋哈薩克新埒遣使來朝奉旨擇賢員伴送公預其選馭陪臣忠信得大體入都

上召對加慰藉仍授三等侍衛畱京供職蓋特恩也公請畢伴送事仍往伊犁侍父上允之擢二等侍衛三十年烏什回人叛公隨將軍明瑞由伊犁倍道進比至烏什戰屢捷三月朔領兵爲左翼陣城南山下接戰賊更麇至公奮勇要擊之所向披靡賊懼隱城壕誘公公怒馬前萬鏃發壕中不及禦陣亡事聞

上軫悼因宥其父罪還京賜卹如例廕雲騎尉長子東林

襲越三十九年元配淑人那拉氏疾終以節孝 予旌表東  
林官 盛京岫巖城守尉次子東明官侍衛東林子雲奎余  
子婿也故得考其始末而詳著之藏諸家乘俾後人有所徵  
信焉

論曰觀侍衛公上書陳情蓋知有其親而不知有其身者人  
之事親履常境而不必竭其力若公侍行萬里外不憚艱辛  
歷久而罔懈非精誠者不能及其臨陣捐軀就死如歸誠於  
事君與誠於慕親一也古人云求忠臣於孝子之門吾子侍  
衛公益信

先妣韓太淑人行狀

法式善

太淑人氏韓父諱錦字靜存號野雲其先瀋陽人四世祖某



在國初以武功著隸內府正黃旗漢軍靜存公究心洛閩之學少爲東軒高文定公所賞妻以女太淑人高出也生有夙慧五歲喜讀宋五子書十三通經史喜覽古今忠臣烈女事年十九歸先大夫事舅姑備得歡心又能練習家政時方萃族居太夫人經理半年內外秩然乾隆十八年法式善生承先大父命爲府君後彌月就撫于太淑人時年二十餘其後無所出法式善妊七月而生稟質尪羸三月不能嘔四歲僅扶牀立一粥也太淑人嘗而哺焉一藥也太淑人審而啜焉晝依左右時時摩拊察寒暖夜漏下猶倚枕聽鼻間呼吸聲燈熒熒然手一編未輟也率以爲常法式善五歲痘疹劇太淑人百法調護廢漿米者三日不寢者二十餘日不釋衣襦者且七閱月如是而僅得生也六歲行不離腹背語尙不辨

聲音偃息而已猶未能讀書識字九歲先府君捐館太淑人年三十六號泣欲殉以法式善在決意撫孤而先大父以乾隆十九年罷官家業中落移居西直門外之海淀無力延師太淑人以教讀自任七歲後太淑人教識字誦陶詩其後稍長始知自勉然太淑人條誡甚密一篇不熟則不命食一藝不成則不命寢太淑人亦未嘗食未嘗寢也閒謂法式善曰我雖女流側聞大義甯人謂我嚴不博寬厚名誤兒業也迨法式善入庠食餼應試詩文太淑人必手爲評隲辛卯京兆試報罷太淑人頗勸慰之而諄誨不減曩時中年喜靜坐焚香淪茗終日垂簾顏其楣曰端靜室自號端靜閒人乾隆三十九年春患肺疾以積勞不起臨逝猶執不孝手曰汝能登第當以名宦自許否則亦當作一正人嗚呼言猶在耳何日

忘之法式善德業不進深以負太淑人教爲懼顧每一循省太淑人以母而兼父師卽史策所載罕有倫匹太淑人之歿而葬也法式善孤賤飾終禮闕如迄今二十二年矣幸以朝恩叨從大夫後敢忘所自耶太淑人喜爲詩不自收拾稿已無存所記誦者雁字七律詩三十首詠益松七言絕句一首耳謹撮生平崖略濡淚以書敬竢當代碩儒錫以傳記感且不朽

洪稚存先生行狀

法式善

君姓洪氏初名蓮改名禮吉後又改名亮吉字君直一字稚存號北江晚自伊江歸乃號更生然人皆稱爲稚存先生云先世居歙祖娶于常州乃居常爲陽湖人君生四歲伯姊教

識字五歲能背誦大學中庸六歲而孤蔣太宜人攜居外家  
自課君所以繪機聲燈影圖也太宜人嘗舉宜其室家命屬  
對君遂對云飽乎仁義蔣太宜人頗奇之十三學作詩詩以  
排稟勝蓋少年時卽能爲盤空硬語焉二十四補博士弟子  
員與同邑趙懷玉黃景仁爲友至江甯袁大令枚以爲逸才  
朱竹君筠督安徽學賞其文似漢魏與黃景仁俱延入幕中  
嘗稱二子才致書京朝官謂如龍泉太阿皆萬人敵君旣居  
學幕交江都汪中餘姚邵晉涵武康高文照高郵王念孫會  
稽章學誠興化顧九苞歸安吳蘭庭學日進會 朝廷開四  
庫館命浙江搜采遺書而安徽省設局則君總其事錢侍郎  
維城彭學使元瑞蔣編修士銓爭稱之乾隆甲午科中江南  
副榜第一里人以君與孫星衍黃景仁趙懷玉楊倫呂星垣

徐書受爲七子四十一年佐浙江學幕聞蔣太宜人病馳歸  
距常州三十里徒步入城途遇僕以太宜人卒告君方渡橋  
遂墮水隨流下數里人救之出久乃蘇歸家水漿不入者五  
日終喪不肉食不入內寢自以未及親含斂哀戚終身遇諱  
日輒減食雖客中途次不變中式四十五年順天鄉試會試  
報罷與孫君星衍游秦中居畢制府幕爲校刻諸古書而日  
游秦中名勝詩文益富庚戌科成進士 廷試一甲第二名  
入翰林爲編修壬子充順天鄉試同考官闈中奉 命視學  
貴州翰林未散館而爲學使者前韓城王文端近則吳縣石  
殿撰韞玉元和吳殿撰廷琛及君而已秩滿還 朝入直  
尙書房嘉慶三年翰詹 廷試 欽命題有征邪教疏君下  
筆數千言觀者皆動色旋以弟喪歸里君于兄弟朋友之喪

皆力行古道當黃君景仁客死秦中君實經紀之徒步送至家云今

上親政朱文正屢言其才既入京自以翰林無言事責乃以己意論時事上王大臣乞轉奏

天子鑒其愚戇僅謫戍伊犁不一年赦歸而所上王大臣書天子特置之座側而嘉許焉君感激

聖恩既返里閭杜門著書以嘉慶十四年五月十二日卒于家得年六十有四娶蔣氏先卒子四長飴孫戊午舉人次符孫胙孫齧孫女二孫凱曾序曾孫女一君生平著述極富其刊行者卷施閣詩文集若干卷埵鮎軒詩文若干卷更生齋詩文若干卷三國疆域志二卷十六國疆域志若干卷乾隆府廳州縣志五十卷當君臚唱日余方侍班一見卽與訂交

君子節孫居喪次不能爲文以余久故知君深乃寓君年譜  
丐爲行狀以待他日求當世能文有道之士爲銘幽者之采  
擇謹狀

惲太夫人傳

英和

吾從姊歸完顏氏爲河南布政使諱岱之夫人生吾甥泰安  
知府廷鑑以大母命求得寮友陽湖惲少尉之賢女以爲子  
婦今世所稱蓉湖夫人是也夫人爲儒雅世族其生也祖母  
唐夢老嫗授大珠有異光遂命之曰珠稍長知學能爲文辭  
適字以星聯別字珍浦云生子三長麟慶次麟昌麟書初以  
吾甥守郡封恭人旋以麟慶貴晉太夫人以道光十三年四  
月十四日卒春秋六十有三夫人之歸逮事王姑及舅姑以

孝聞相夫以敬理昏嫁以禮奉祭祀喪葬以誠教子以嚴且正發言動容皆有法則於儒書無所不觀而以餘事工詩作繪所纂有蘭閨寶錄六卷 國朝女士正始集若干卷戚鄰咸稱之麟慶既奉夫人喪歸葬會迫 朝命將起權總督南河乃述其言行乞余文余惟古者婦人言行不出閫闔其傳焉者必所遭不幸激而爲絕特之行至家室和平則謹職承順以率其常賢亦無由自見至爲令妻爲壽母而傳者寡矣若夫人之醞粹明達近之作型於家遠之教成其子以施澤於世余所聞見彰彰如是揆諸古之女而士行者其庶幾乎雖欲弗稱將焉置之因詮次爲之傳

論曰憚之族有子居氏者傳其宗女名冰工繪事粉墨映日有光冰於夫人爲諸姑何憚氏之多才媛也然冰適毛鴻調



築小樓借隱以終論者比之運期之偶觀夫人之相夫教子較之於冰更足傳焉且夫人嘗刻李二曲先生與其先遜菴先生遺書以傳世其所以教厥子者時舉先哲之訓言而長嗣守穎時以民俗獷悍爲憂夫人命疏濬潁川以宣鬱蕩穢厥論尤爲知本於此知夫人所學趨嚮之端其過人遠矣嗚呼是可多得哉是可多得哉

八旗文經卷第五十四

傳狀戊

錫纘書李孝子

錫纘浙江按察使國公家傳

治麟先考秋坪府君行狀

書李孝子

錫纘

自岷山負地絡之陽互終南太華爲北紀山河自盤屋山曲  
水曲迤邐達終南枝峰蔓壑統謂之秦嶺盤屋李氏子業樵  
入秦嶺見亂草搖動作分裂狀小禽叢舞啁啾不已心動欲  
還大聲出草中虎隨聲出張爪伏李盥其腦悅習聞霹靂聲  
虎隨聲去張目見巨人執挺立於前李匍匐出山已去盤屋

數百里佛坪境也李七八歲而孤或奪母志及期鼓樂於門  
李始知之痛哭母前淚涔涔迸出曰母棄兒邪何以慰泉  
下人且兒無姓氏何人爲母曰然則止也李亟出竟日哭止  
輿不得入母所適故長者感焉遂寢佛坪司馬陳君堯書先  
給李資歸蓋屋後聞其故歎曰至性之所激神人欽之其於  
虎固不啻驅而遠之矣天道福善固若此哉李爲人忠厚家  
小康事母孝養有加蓋屋每稱道之或曰救李者山神也

浙江按察使國公家傳

錫纘

自有天地事遂盈乎天地之間事滿而人半又半不能治所  
事五千年來或以一人治數事治數十事數百事不者天地  
且爲事所塞而閉國公故以治事聞也道光二十年考筆帖

式隸兵部歷升主事員外郎郎中掌各司印鑰以呈遞捷報  
賞藍翎換花翎加三品銜布政使銜除直隸口北道山西  
歸綏道廣東鹽運使擢按察使轉江西按察使病罷痊授廣  
西按察使光緒九年調浙江按察使十年召歸三月十五日  
卒於京畿楊邨驛旅次年六十有二公之所到矯翼厲翮隆  
隆有聲家居建宗祠立義學起其讀樓實書籍假里黨讀凡  
吾所見其治家事莫不綽綽然成始成終以視坐而不能治  
自謂能治治之不如不治輒追非者蓋爲天地閒有用人矣  
公諱英字鼎臣吉林索綽絡氏隸滿洲鑲白旗公子和爾賡  
額以遺命請作家傳

論曰吾嘗以謂能治事必於無敗事之人求之於讀有用之  
書之人求之與公交垂三十年未嘗籍籍論讀書顧可謂能

見大意者顏柳作字瘦硬通神所謂神者其用筆之意乎不得其意而作字俗筆也不得其意而治事癡人也嘻通其意者蓋寡也

先考秋坪府君行狀

治麟

府君姓顏札氏諱景廉字儉卿一字季泉號秋坪先世爲吉林滿洲鉅族隸正黃旗入京始祖諱喀爾吉善官前鋒統領雍正中以副將軍出師西藏凱旋授內大臣再傳至府君曾祖考諱長生官頭等侍衛妣氏尼嗎察祖考諱和英額官頭等侍衛妣氏舒穆魯考諱彥德乾隆癸卯科舉人官綏遠將軍妣氏瓜爾佳生妣氏任三代皆以府君官 誥贈光祿大夫妣皆一品夫人先大父生四子長諱景布候補庫使次諱

景祿出後先叔祖棣菴公官盛京戶部主事次諱景符官兵部筆帖式府君最幼生時天大雷雨嘯聲遠振四乳平列識者決爲國器幼沈敏厚重好讀書不以貧病輟弱冠入泮道光己酉膺選拔會考冠一軍是秋中副榜咸豐元年辛亥以第七人舉於鄉明年成進士改庶吉士癸丑散館授編修遷侍講充 國史館協修時粵匪北竄京師戒嚴府君集西北城居人爲守助約稍稍以兵法部署之而接以謙待以誠人皆樂爲用十二月充 文淵閣校理甲寅充 日講起居注官十二月晉侍講學士充 文淵閣直閣事乙卯二月充 咸安宮總裁三月

上謁

陵充管道大臣四月擢內閣學士兼禮部侍郎銜五月充福

建鄉試正考官丙辰四月充會試覆試閱卷大臣散館閱卷大臣 殿試讀卷大臣 朝考閱卷大臣公愼爲同列所推六月授鑲白旗蒙古副都統十一月充 玉牒館副總裁上御洞明宮府君讀句到本風度凝重音節琅琅

上嘉賞焉丁巳正月授工部右侍郎兼管錢法堂事務時鑪匠爲姦利錢寢輕小愿任無如何府君杖其首事者弊遂革每有興作嚴禁陋規商人感激不敢欺工料特堅實然亦以是爲人忌講求水利稽覈工程準駁必要諸是緘默自守者竊議其喜事侵尙書權府君不顧也二月充考試漢御史閱卷大臣三月管理火藥局事務監督者聞府君至盡革出納之弊五月補進文職六班六月管理鑲白旗蒙古新舊營房七月充考試漢教習閱卷大臣十一月奉 旨賜奠朝鮮府

君嚴體制絕苞苴途中賦詩皆寓意撫綏東國傳誦以爲得使臣體戊午三月覆命適英人至天津

上召見問今所使者能任事否對曰其人怯懦恐辱國上不悅已而果然

上以府君先識名 眷顧有大用意四月充考試試差閱卷大臣天津事日急奉 旨帶本旗兵二百五十名巡守汛地聽調遣府君檢精壯激以大義有泣下者六月調鑲紅旗滿洲副都統八月署正藍旗滿洲副都統充鄉試監臨府丞聞中與府尹不相能負氣竟出府君劾之且自請議處與署提調毛文達公昶熙竭力整飭夜恆不寐事竣而房考舞弊之案發忌者欲因是中府君雖無可文致卒以降調處分上上察其誣改爲降雷己未二月調刑部右侍郎府君與僚屬



討論名法之學讀律恆至丙夜最其要凡細書成數帙八閱月遂精如老吏三月署吏部右侍郎十月授伊犁參贊大臣上召見曰汝年尙壯須歷練邊疆重寄非左遷也府君感激流涕誓心以死報

上復諭曰奏疏以明白曉暢爲要比年伊犁言事率艱深其詞且襍以四六工對想將軍札拉芬泰不能文任幕友爲之耳汝到任後須自屬橐府君自是奏疏不假手於人庚申四月抵伊犁故事哈薩克貿易事訖卽出境後以商貨帶粥許畱兩三人守以度歲於西門外支穹廬樹木柵棲身防暴客而已比築室易柵而垣將軍初議毀之惑於佞口中止且許爲請 命於朝府君履任時已成屋三百餘間周二里許矣府君謂患伏肘腋猝發不可制毀之便將軍不欲失信於夷

執不可六月將軍卒府君權將軍乃疏陳利害請以便宜先行平毀或忱以勢重恐激變府君不爲動又請候 旨府君曰

聖明在上理無不允卒毀之 命下如所請眾乃歎服都司馬舉貪橫不法倚同官楊成王重福爲助府君得其實未發三人者憚府君英果乃互訐冀自免府君分別劾罷之軍中肅然旋奉 旨鞫塔爾巴哈臺參贊大臣濫保異姓台吉冒襲哈薩克汗爵事得前駝馬章京納賄愚弄長官情弊擬如律辛酉八月以阿克蘇辦事大臣改征回賦私設鹽課奉 旨往鞫忽聞

文廟升遐府君泣血攀號猝至昏眩蓋府君受知

文廟由庶常不五年陟卿貳雖僉壬交構而帝眷不衰故哀

慕尤切至也未及治疾輕騎取道冰嶺十一月復奉 旨鞠  
葉爾羌參贊大臣苛斂擅殺獄府君所至皆得情實成信讞  
壬戌三月回伊犁任往返所資均自備屬吏供張一概謝絕  
七月調葉爾羌參贊大臣九月抵任其地爲南路八城之表  
漢回襍處逆首倭里罕及邪黑阿渾逆裔往往潛蹤各城以  
圖煽惑喀什噶爾境內安集延時入滋擾而俄人復於西南  
邊外往來窺伺哈薩克布魯特部落多貳於俄府君籌餼用  
兵稽察綏輯皆持以鎮靜八城以安時

上方倚重府君府君於中外交涉事屢密疏以聞皆閉戶自  
繕寫防兵久不換知回情貪而愚每以重利盤剝傾其產府  
君嚴禁之人心大悅去官之日男婦數千相率哭於瑪札爾  
聲振大地瑪札爾者回部棲神之所有急難則哭禱蓋欲神

止府君之行也癸亥九月伊犁邊外不靖府君知伊犁兵疆而乏食亟撥庫儲濟之十二月因舊疾舉發乞休同官中以事遂落職往甯夏軍營效力甲子臥病於綏遠幾五月乙丑四月抵甯夏爲將軍都清愨公與阿總理前敵糧臺營務十月故安徽巡撫翁文勤公同書卒于花馬池軍中府君代領其眾防勦後路屢著戰功饒道得無梗丙寅十月奉旨授頭等侍衛充哈密幫辦大臣以甘涼道阻暫畱將軍穆圖善公軍中總理文案丁卯十二月募勇得千餘人騎不滿百軍裝器械糗糧僅支二十日以記名總兵張玉春爲統領副將蔣富山范如松都司金永清副之取道金塔堡赴哈密時屆隆冬士不宿飽日行冰雪中僵仆相屬府君勉以忠義數下馬步行爲之先夜支單帳然馬矢席地坐時出撫循以是人

心固結飢寒不潰戊辰正月會辦事大臣文麟公于玉門甫到聞肅逆三百餘騎沿南山西竄府君令張玉春敗之于黃花營月杪肅逆大股擾安西州屬之三四道溝府君檄安西嚴備令張玉春帶隊往勦賊聞風退我軍追及大勝賊委駝馬旗幟遁府君念哈密兵燹之餘戶口彫零商賈裹足軍食所仰惟安西敦煌玉門而肅逆窺伺已久脫有失則哈密竟成孤注而新疆之門戶危矣巴里坤雖天險可守然力單不足倚爲援疏請暫駐後路布置防守輓運得旨報可閏四月抵安西肅逆數百騎擾玉門之黃花營楊家莊旋竄至安西之雙塔堡橋灣四五道溝清水泉府君派隊跟蹤追勦迭有斬獲賊不得逞五月復擾雙塔堡府君令張玉春率馬隊迎擊金永清率步隊繼進敗之於車轂轆壩復戰於小宛殺

傷相當援賊突至幾不敵我軍退入羅家莊偃旗臥鼓賊莫測不敢攻久之大風驟起我軍乘勢殺出呼聲震地賊錯愕火器不及施負創狂竄七月肅逆大股擾八九工旋入南山另股撲犯敦煌爲官軍擊退合夥回竄府君陽令蔣富山邀擊于南乾溝而密伏勁旅於橋灣三水梁賊果由插花營取道三水梁之南戈壁統領張玉春夜移營嚴陣以待黎明賊至金永清范如松當先鏖戰兩時許賊氣衰而死拒不退張玉春率親兵大呼陷陣所向披靡賊始紛紛東竄我軍追殺四十餘里斃賊百餘名奪獲旗幟器械無算駝馬三百餘匹捷書上得 旨嘉獎八月初肅逆千餘騎擾安西七八道溝突至十工就廢堡紮兩營距州城僅三十里志在久踞伺隙府君令張玉春率蔣富山都司邵得林力攻拔之追至大山

口殺賊如三水梁之戰中甸肅逆大股直撲敦煌府君聞警  
飛飭所部堅守毋浪戰令營官張騰蛟參將雷國良伺其懈  
擊之設伏新店子白家莊要其歸別以營官向永福截其尾  
賊大創棄輜重遁府君謂敦煌蕃庶當守以重兵於十月移  
鎮敦煌畱隊安西玉門以爲犄角建堅壁清野之議完城浚  
濠躬自督率擇要築空心墩臺守具畢備以衛露糧牧畜復  
以商團民練輔翼官兵而保甲之法寓焉飭安西玉門一律  
倣行親率小隊往來察驗於是肅逆虜掠牽制之計沮後路  
羸定得以其暇綜覈安西燉煌玉門土著得上中下三千六  
百餘戶委曲勸捐糶糧兩萬一千餘石於三處分設底臺立  
轉運局於馬蓮井而以塔爾納沁哈密兩臺總其成宏綱細  
目皆府君手定詢之官民咸以爲便乃與辦事大臣文麟公

聯銜入告得 旨允行後路布置已定乃前進己巳八月到哈密任漢城殘破築壘於蔡把什湖與文營相聯絡時烏魯木齊回逆妥得璘句結吐魯番和卓東拉葛易替古牧地瑪納斯僞元帥蘇化保馬四等合漢回纏頭萬八千餘東犯全隊駐沙棗泉子先以游騎三百窺我二堡悍賊二千餘繼之潛約哈密回王邁哈默特爲內應王素駭其母福晉邁哩巴鈕以賊書呈官軍誓眾力守府君遣使獎慰并助以兵隨令蔣富山會同文營統領孔才率靖邊威儀馬步隊迎勦賊敗走次日辰刻賊復大至我軍苦戰復勝之府君慮二堡兵單商之文麟公令統領魏忠義趙萬海率勁旅往扼要隘以爲聲援其夜亥刻賊以萬騎攻二堡勢張甚蔣富山斂兵固守天明偕孔才率哨官張士魁張忻等分三路衝擊大戰幾三



時賊氣彌盛魏趙兩將聞殺聲赴援適押解軍火委員常祥等亦至遂合力夾擊另派一軍襲其後賊猝見驚卻我軍乘之大潰追殺二十餘里戍刻賊復集數千騎劫營爲蔣富山擊退次日孔才策其必來設三伏以待賊果至戰久伏發復敗走我軍躡之四戰皆捷直至瞭墩賊始棄營鼠竄歸巢是役也連戰六晝夜斃賊千七百餘名生擒三十餘名奪獲兵仗牲畜不可數計官軍傷亾僅百餘奏上蒙 嘉獎辛未八月奉 密旨以俄人已得伊犁將謀烏魯木齊 命府君先往規復而後路屯防專屬文麟公府君聞 命卽令孔才帶隊馳赴奇臺古城一帶據形勝築壘屯田且聯絡民團徐學功趙興體沈廷秀等以壯聲勢而自帶馬步三營度天山駐巴里坤十二月授烏魯木齊都統新任哈密幫辦大臣錫綸

公奉 旨隨同府君辦事卽府君所密保也壬申正月張玉春自安西帶隊至令與金永清次第西進前鋒直紮至濟木薩八月奏委錫綸公赴布倫托海酌調額魯特官兵沙山子民團進規瑪納斯爲夾攻之計時古牧地僞元帥馬明屢以反正殺賊餌前敵統領智如徐學功勇如張玉春均以貪功違節度先後墜其術中復假貿易分布逆黨二百餘于濟木薩木壘河城內府君密令孔才金永清一夕殲之敗其援師于滋泥泉生擒烏魯木齊賊目旣往子馬三馬四瑪納斯僞總領史姓何姓古牧地賊目買應伏楊伏腹地旣清外防彌固更以選騎連得關內外往復賊書賊遂不得施其詭計是年俄人挾蒙古哈薩克入境意欲通商府君以干戈徧地恐致誤傷卻之且以兵衛之出終府君任俄人不敢復以通商

請癸酉正月

穆宗親政府君以爲致治在乎始基上崇正學開言路慎牧令簡軍實重農事弭異端六事四月進紮古城府君徧閱形勢以其地孤立無援必能守而後可言攻足食而後可言守急功近名徼倖一試非計之得也於是撫恤災黎招徠商賈於奇臺古城濟木薩木壘河大興屯田以將弁之樸勤曉農事者領之且耕且防暇則操演陣法立車局駝廠以資轉運建水磨以代舂簸開官錢鋪以便交易復設科布多之蒙古三臺古城之漢三臺而北路之饒道利自巴里坤至木壘河設九臺而前後之文報通奏派副都統吉爾洪額爲吉林黑龍江馬隊翼長記名提督瑪納斯協副將張玉春爲靖邊振武等營翼長記名副將署濟木薩參將孔才爲定西等營翼

長而以領隊大臣沙克都林札布爲全營翼長後沙軍移鎮沙山子以總理糧臺候補道裕厚代之朝夕經營不三月屹然成重鎮賊大懼以乞降款我師府君知其詐然是時兵力未厚姑羈縻之益選閒諜深入西南兩路賊中離合疆弱之勢遂十得其八九是秋歲大熟官屯積穀至萬石民間尚可採買乃奏停歸綏口北糧運七月陝回白燕虎糾西甯回逆萬餘將奔烏魯木齊所過蹂躪賊勢梟悍官軍莫敢撓其鋒進圍哈密文營精銳傷亾過半塔爾沁積蓄悉爲所虜旋破回城游騎越天山擾巴里坤以遏援師兩城告急相望於道時西逆妥得璘病死安集延酋怕夏并僞元帥馬明眾合烏魯木齊古牧地昌吉瑪納斯呼圖壁漢回撲沙山子遙應白燕虎統領振武營游擊徐學功不能支府君一軍擋拄其

開四無援應亟飭孔才嚴守濟木薩滋泥泉及各屯要隘令  
黑龍江營總依勒和布率精騎援沙山子令吉爾洪額沙克  
都林札布率營官田錫禮等援哈密巴里坤先以糧三千餘  
石潛濟兩城軍食府君坐鎮古城飲酒射鵠以安軍心七月  
初伊勒和布與徐學功營于沙棗園賊以馬隊三千來撲我  
軍僅五百騎鏖戰兩日斃賊無算怕夏遁歸吐魯番沙山子  
之圍以解月杪吉爾洪額等抵巴里坤與賊連戰於三塘湖  
大紅旗溝獲勝中秋度天山吉爾洪額笑曰不此之守我知  
其無能爲也十九日敗賊於哈密之泥基頭我兵少結方陣  
鼓行而東白燕虎率大股悍賊四面撲犯大戰兩時許斃賊  
千餘城中聞援軍至傷痍盡起大呼突出賊敗入回城虜回  
王及其母福晉載子女玉帛歸南湖老營畱壯健櫻城固守

我軍圍攻二十五日破西門入賊走南湖我軍乘勝進薄二十九日拔之餘匪由五堡分兩股向西北竄於是哈密巴里坤以平是役也論者謂新疆治亂一大關鍵使賊據有哈密巴里坤古城豈能獨完安西敦煌玉門亦必相率而潰東西數千里賊勢如長山蛇雖阿文成公長文襄公復生恐難收功於談笑閒而府君則口不言功惟幸邊疆之無事而已十月白燕虎竄唐朝渠將入瑪納斯徐學功奉令偵探得實并得賊口號乃選勁騎四百僞爲瑪納斯接應迎之於龔家瀧口握手慰勞賊不之疑次日誘至三道廠子前臨大河我軍從後突發賊大驚白燕虎引四十餘騎逸去餘盡殲焉徐學功者烏魯木齊農家子沈勇多智略軍興集鄉團自衛或離合於怕夏妥得璘之閒爲以賊攻賊之計奇才也府君抵古

城後招之來推誠委用遂願效死至是果得力府君上其功  
爲之破格請 獎前之疑且懼者始服府君之知人十一月  
府君以憂勤致疾殆不可支乞解職 溫旨慰畱子假一月  
緊要軍務仍 責令籌辦甲戌二月西逆時出沒於滋泥泉  
西泉等處梗前敵糧道府君令翼長孔才統領興祿率勁旅  
進剿十九日敗賊於西泉之西陣斬悍賊百餘生擒逆首蘇  
保沅馬得河馬逃香李遠王沅訊係西甯河州老賊凌遲梟  
示白燕虎爲之氣奪三月府君病甚恐誤軍事不得已再申  
前請

上以府君久居塞外悉邊情 予假兩月且 勛以顧全大  
局勉爲其難用副 委任府君感悚強起視事雖極困憊不  
敢復言病六月白燕虎糾馬明等數千騎犯濟木薩孔才設

伏殲其前鋒既賊大至斂兵退守夜選驍騎疊出擾之使不得刈我禾府君聞警面授興祿方略帶隊往援敗賊於濟木薩之二工距城二里紮營夜賊至猛攻我軍息燈火伏地不動伺賊稍懈突起縱擊賊狂奔次日會城兵與賊戰於柳樹河金永清步隊居中田錫禮候補同知倪敬修馬隊翼之箕張而進興祿孔才往來策應潛以游擊楊朝勝率精騎三百繞伏賊後酣戰逾三時興祿田錫禮率死士衝入出其背孔才督隊繼之賊殊死鬪伏發乃潰僵屍枕藉於道我軍追殺二十餘里振旅而還府君復念沙山上馬橋逼近賊巢令徐學功隨時偵探相機雕勦連敗賊於綏來三道河白噶達二工呼圖里克芟芟墩子率以少勝多陣斬逆酋拜林生擒賊目狄麻娃金尙保并焚毀余小虎糧臺於甘溝賊氣愈餒



八月授 欽差大臣督辦新疆軍務府君謂同情陰鷲與安集延狼狽爲姦近得陝回惡燄彌熾當統籌全局爲一勞永逸之圖奏請與幫辦軍務大臣故都統金忠介公順直取古牧地今山東巡撫張公曜由天山南取吐魯番另派大員偕領隊大臣沙克都林札布錫綸由沙山子取瑪納斯三路齊舉使賊不相顧畱營奇臺古城以固根本爲哈密巴里坤屏蔽副都統額爾慶額孝順福珠哩駐西湖防賊逸入北路又以烏魯木齊南喀喇巴爾噶遜俗呼爲搭坂城者實通吐魯番要路賊以重兵守之宜潛師攻據以搯其吭并請 飭故陝甘總督左文襄公宗棠總司後路糧臺委司道大員駐劄肅州督催轉運酌移甘肅民千戶實奇臺古城屯田又按市價購蒙古內外盟各愛曼健駝數千先由理藩院札知以示

信借撥部款六十萬以濟要需而補以各省歷年欠餼疏上  
悉蒙 嘉納忌者尼之未竟所施然布置周密後之成功者  
卒莫能出範圍焉光緒元年乙亥五月拜正白旗漢軍都統  
回京供職之 命府君自咸豐己未 簡任伊犁至是十有  
七年在軍中者十年律已嚴治軍整悍將驕兵見之莫不氣  
肅一隸戲下自循循於禮法而推誠待人語無矯飾能得人  
死力謀定後戰倉猝中彌鎮定搏節兵饒如用私財羨餘奏  
明歸公出納句稽一責之糧臺已惟總其成而已鄰封有警  
必竭力救援置死生於度外奏疏書牘皆自草請兵籲饒艱  
苦之狀令人不忍卒讀猶復修 學宮建昭忠祠投揚碑版  
歌詠篇章其神明靜定因應不窮有如此湖南羅君世瑤曩  
戍伊犁爲府君幕僚沒後其子陷虜中府君以計拔之出并

歸其喪此雖盛德之一端而幄奇著籌可以概見袁文誠公保恆總理西征糧臺最重府君推爲西北諸帥中第一左文襄公亦有此論逮因糧運齟齬始目府君爲書生不知兵矣九月入覲授都察院左都御史充覆勘各省鄉試閱卷大臣佩帶正紅旗滿洲都統鑲黃旗蒙古都統鑾儀衛掌衛事大臣印鑰補進文職六班入值園明園班十月充繙譯覆試閱卷大臣武鄉試監射大臣小考宗室翎緞大臣 賜紫禁城內騎馬十一月充武鄉試專司稽查大臣奉 旨恭詣

東陵

毅皇帝几筵行周年禮充典驗軍器大臣丙子正月署步軍統領正白旗蒙古都統二月 御賜勦平粵匪捻匪 方略充補行大考閱卷大臣文會試監射大臣署工部尚書三月

奉 旨在軍機大臣上學習行走充考驗幼官出學大臣四月充會試覆試閱卷大臣五月充教習庶吉士 御賜

列朝聖訓

御製詩文集七月充崇文門副監督十月署正紅旗滿洲都統充總理各國事務大臣丁丑正月授軍機大臣管理內  
繙書房事務授工部尚書管理火藥局事務二月署正藍旗  
蒙古都統四月充繙譯會試副考官十月充考試應封宗室  
閱卷大臣戊寅二月調戶部尚書七月管理戶部三庫事務  
十二月充 國史館正總裁己卯三月

毅皇帝永遠奉安奉 旨隨入

地宮八月充覆覈 朝審大臣九月充鄉試覆試閱卷大臣  
十月充小考宗室翎緞大臣庚辰二月充順天補行鄉試覆

試閱卷大臣三月充會試正考官四月充 朝考閱卷大臣

十一月管理左翼幼官學事務辛巳二月充考試孝廉方正

閱卷大臣四月充前引大臣十二月 賜服帶膝貂褂

慈禧皇太后賜澤從雲游扁額壬午九月充覆勘各省鄉試

閱卷大臣十二月充 經筵講官

慈禧皇太后賜御筆松竹竝茂條幅化洽道豐扁額癸未二月

月  
慈禧皇太后賜御筆蘭花旋充各省鄉試覆試閱卷大臣各省  
省繙譯鄉試覆試閱卷大臣四月充散館閱卷大臣六月以  
雲南報銷屬官納賄曾經保列一等降二級調用奉 旨仍  
留軍機大臣總理各國事務大臣七月補內閣學士九月遷  
吏部左侍郎十一月授兵部尚書十二月

慈禧皇太后賜圭璋有聲扁額甲申三月奉

慈禧皇太后懿旨恭親王等開去一切差使府君以祇能循分供職經濟非其所長降二級調用乙酉四月補內閣學士八月署鑲藍旗蒙古副都統而府君以脾泄久食少元氣日虧服藥罔效勢漸不可爲矣府君雖世家大族然少孤起自寒素敷歷中外三十餘年惟以忠亮端謹結

主知不廣聲氣不尙牢籠特立獨行一空依傍屢起屢蹶而信道之篤晚節愈堅自入樞廷兼總署早夜孳孳不遑食息政之得失惟於府君顏色之欣戚辨之難言之隱雖子姪輩不盡知壬午以來言事尙激切或不平府君曰政府如射之有的言者期中的耳於我輩何憾且以赫赫政府詆之者卒無罪未必非大臣之福也不則曰年少氣盛不知擇言奚足

校雲南報銷一案以歸善鄧君之疏誣始白旁觀爲扼腕府君處之泰然且調護原劾者俾安其位以作敢言之氣在戶部五年開源節流不遺餘力然務循舊章持大體不輕更張不事苛細所任用皆老成輕薄喜事者流雖有才每裁抑之戊寅冬停捐 旨下府君極力贊成或曰能保後之不復開乎府君曰名器濫則廉恥消慎重名器最當今急務復開與否姑勿論也掌諫垣時風規清肅首以不諂政體恐誤大局劾署兵部侍郎郭嵩燾管正白旗漢軍最久以爲教不先於練縱極精銳徒血氣勇耳捐私囊立義學延循謹之士授幼丁讀閒一察閱爲懲勸尤重兵食每領甲米必親莅事竣然後行無閒寒暑八年如一日用是主者不敢以秕稗塞責全文恪公慶拜大學士所遺協辦

皇太后意屬府君府君以靈文恭公桂先進力讓之越二日  
文恭公遂膺協揆之命新疆既定金忠介公上府君昔年  
戰守功請旨獎勵府君謂邊帥推功樞臣恐開迎合之漸  
請旨勿許府君天性純孝七八歲卽能委曲承堂上歡道  
光戊戌先大母任太夫人棄養府君年甫十四哀毀如成人  
閒一歲丁先大父憂一慟幾絕竟成療疾服除始漸瘳事諸  
兄姊敬愛交至老而彌篤所以安養之者無微不至撫諸姪  
如子諸姪亦事府君如父平生無聲色之好自奉儉約待族  
黨極厚婚喪恆獨任族子之可造者必多方成就之歲時周  
給惟均而義有不可則一介不與子姪有過不輕加訶責或  
正言以告之或泛論以悟之語無多而親切入人肺腑門以  
內規矩嚴肅下至僮僕婢媪莫不化焉居恆寡言笑起居以



時於書無所不讀尤精於儒先性理然未嘗分門戶招生徒  
惟以心得力行爲務口不談釋老有以二氏之說進者謝曰  
吾不解也著有奏疏四卷冰嶺紀程一卷古近體詩存二卷  
府君生於道光癸未年六月二十五日午時卒於光緒乙酉  
年八月二十四日申時享壽六十有三配吾母宗室夫人齊  
齊哈爾副都統署黑龍江將軍諱玉英公女子四長治麟光  
緒丁丑科進士官國子監司業娶賽密勒氏正藍旗滿洲廣  
西南甯府知府景雲公女繼娶薩爾圖克氏正白旗蒙古山  
東登州府知府諱衡光公女次雙格殤均宗室夫人出次樹  
格殤側室張孺人出次兆麟甫三齡側室王孺人出女三長  
殤次未字卒均宗室夫人出次殤張孺人出不孝治麟庸闇  
多病不孝兆麟年幼深恐府君豐功懿行湮沒不彰厥罪滋

重用敢濡淚和血略陳梗概伏乞當代立言君子賜之銘誄  
以光泉壤則不孝等世世子孫感且不朽

八旗文經卷弟五十四終

八旗文經卷第五十五

七

覺羅桂芳七觀

連珠

常安連珠六首

承齡演連珠四首

恩隆演連珠四首

設辭

錫縝所樂軒解

錫縝所樂軒後解

七觀

覺羅桂芳

皇帝御極之七年，詠吉戊撫橫庚，循四巡之盛軌，享三陵以精誠，齋心凝神，肝鬢太清，挹祥神皋，延釐億齡，三輔大稔，迄於東瀛，禾黍油油，九穗一莖，禮成歡洽，民大和樂，飲衢詠德，中外頌作，則有芝館庶士，謁銀潢末胄，而有請曰：幸與子遘，重熙景懿，鑠簪赤管，於石渠習杜史之舊學，值聖人舉上儀禮，珠邱子以世僕在講官之列，扈黃幄於福壤，奉清塵於宸游，屬車載筆，見聞較實，斗柄轉而雷動，絲言布而雲霽，景孝德之休光，瞰扶桑於初出，請道鉅觀之萬一，證典禮於前帙，廣弁鄙於後進，俾載筆之有述，可乎？銀潢末胄曰：依赤輪之景者，知其溫不能繪其光也；臨滄澥之流者，知其富莫能窺其藏也。國家受景篤祐，源遠流長，天女降斝，朱果發祥，締造經營，雨沐風櫛。

列聖作求繩繩奕奕

高宗純皇帝加勞動闢地二萬餘里繼序追遠歸功 佑  
啟四幸粉榆 孝思無已

今上心畫籌幾神樞運紀法 考綬猷 陟庭咫尺往者曾  
從 六龍而謁 神宇親睹 薦馨誠達禮舉閱二十三年  
而規成則踐 帝武萬騎雲同千乘風從絲邈幽館崢嶸  
闕宮煌煌儀備翼翼意通御福錫福歡聲震空其澤如春其  
需如雨其清明而廣大如乾端坤倪貫上下與今古豈捫燭  
測蠡之見所能鋪陳而揚詡哉庶士日子得觀於 盛典願  
有以廣我也

於時銀潢末胄正襟改容盥手抽牘而有述曰居華胥於雷  
澤誕庖犧於成紀生重華於諸馮育炎帝於姜水降神孕奇

地詳前史况我 大清之始基也孚出震之占受承乾之錄  
下荒大東上應析木光垂雲漢勢維地軸總川陸之隩區收  
幽并之全局 啟運之山萬峰所宗 天柱 隆業鬱鬱蔥  
蔥 靈佑旣集王氣以鍾長白橫亘千里川源匯焉小者爲  
河大者爲海鴨綠溶溶東注天外渾河混同如襟如帶

太祖

太宗規矩方圓披荆作宅環山與川 興京始作 盛京次  
遷表裏深厚規制宏遠億載根本丕基 天建 鑿輅新莅  
地祇來會嶽呼水朝祇謁 行在一勺皇澗一隅舊豐瞻言  
遼瀋包垓控紘可以觀形勢之雄矣庶士曰願更有進也  
銀潢末胄曰 橋山靈淑磅礴鍾奇土沃泉甘華實繁滋徑  
寸之珠三楹之筏實萃於斯物產之美見於

高宗純皇帝聖製之賦者殆張華郭璞之博物所不能知荆揚雍豫之州吳越楚蜀之國產豐者心習於侈地腴者業窳於逸維我兩京尙勤返樸思居瞿瞿有陶唐氏之遺躅焉女修織維男務耕耘抑工商之末業惟僭僞而歸眞周斐賽斐施函額林物不傷財利用因心霞縹代燭以資作勞服御儉嗇布棉陶匏昔我

太祖雪後出獵擷衣而行儉德允協

太宗持盈等威攸判護軍以下不得衣緞鞍轡尙樸不得飾金訓儉齊俗一哉 皇心

高宗念典勒石以箴桑梓敬恭仰廬 聖意玉輅憑軾問俗知志農夫紅女各事其事國語練熟且射且騎二百年來我疆我理國俗不變飲和茹旨里社熙熙媿於



天子可以觀風俗之美矣庶士曰願更有進也

銀潢未胄曰 陪京之立以衛 大都建城疊道帑項屢輸

環水之宮藏書之閣繡櫺綺窗津梁末學

先帝以締創爲守成禱乎卓矣德不恃險三關自設結柳爲  
邊莫敢私越居安思危有備乃競儲上駟之選速郵傳之命  
豫將弁什伍之用莫重於馬政上都鹽澤大凌河非耕桑之  
地馬場置焉水草字育共二十萬二千八百餘匹兵不缺騎  
民不耗力 大駕履行營閱弓矢遵習射於 家法召弁兵  
而簡視且此 開國勁旅之遺昔以十三甲破百萬眾者儲  
之豫而教不弛也可以觀武備之美矣庶士曰請更有進也  
銀潢未胄曰舜巡四岳羣后覲焉禹會塗山文閭帛填未合  
萬國以祀其先也周文郁郁駿奔辟公奉璋峩峩曰在廟中

上陵景從古尅有聞 大清六合一家梯航如雲值

皇上升饗於 丹陵東瀛瞻霞知

大聖人之莅止鯨鍾甫鏗夾道踰濟道左鞠脰朝鮮國使蒙  
古諸部君長名王輻湊而至震動不遑居則列於宿衛行則  
負弩前驅 御崇政殿受賀有儀或升自東或升自西內臣  
外臣夔夔祁祁汗王肅拜覲 顏丹墀可以觀柔遠之威矣  
庶士曰願更有進也

銀潢末胄曰 帝業初興宗臣是毗稟成算於廟謨資將材  
於本支

先皇篤念親賢普錫章服麟族奉 祀將迎誰肅邇者甲子  
萃一本之親合九族之睦聯句肆筵賚予優渥既定年而勘  
陵工先宗臣而派遣俾各奠於先塋 恩愈隆而愈行施

於三事宴 大政殿本支所先外藩並醮朝鮮陪臣亦飫珍膳 頒珍幣於內府導和氣於大東 世德之舞有節有容張 上儀於 舊京坐百寮於春風可以觀 恩禮之隆矣庶士曰願更有進也

銀潢末胄曰國之大事在祀天下之要道曰孝 玉輅東行先告 陵 廟 陪京祭典厥有常度遶豆屬於祠官 弓劍關於 聖慕敬德日躋嚴假無言 壇 廟 堂子僂見愾聞艱難之業具瞻霜露之感有繹 永陵首謁佳氣來集

福陵

昭陵丸丸松柏緬維癸卯 親陪 禹跡 寄託宏慈默禱翼翼 天人意符 眷授峻德灌秬鬯而仰 三靈之合觀

甲冑而思百戰之初當璧久協乎 成命執圭重饗乎 神  
居以妥以侑洞乎屬乎若夫北鎮北海旁逮百靈 遣官分  
祭允愜禮經又推

先世褒功之典徧酌親王勳臣之瑩可以觀祀事之明矣庶  
士於是瞿然起軒然舞曰

聖人孝治天下其至矣乎四時之享歲暮之禴 奉先殿之  
祀詳且盡矣溯 軒升而展 舜慕誼美儀粹又進乎是巍  
乎哉斯世神人和而幽明治也子之言 聖得其似矣

銀演末胄曰未也追遠薦誠孝之事也繼志述事孝之至也  
皇上受璽

高宗延禧

列聖實惟 仔扃堂構之艱不徒瞻禮 橋山之敬禁祥瑞

之陳卻貢物之進不顯亦臨如初受 命水旱偏災蠲賑並  
施潦歲加粥蕭辰給衣 帝曰是林林者

列聖之遺也奠河渠以保成功之允洗氛祲以慰 眇捷之  
心每叨 神佑遂利蒼生 家法恪守誓言勿聽上蘭秋爾  
習勞不甯內而六官外而置吏教以經正民興之道督以循  
名責實之治不尙虛文務觀實效先行其言以身示教弼之  
以刑輕重無私萬里之懸燭照不遺所以踐孝思之實酬付  
託之慈也所過免租減半正額從官守吏賜爵一級庠序員  
增宮牆喜溢獻賦 輦路內帑優錫居鄰 穀林 帝澤宜  
徧丙寅正供許爾全蠲施於旗莊寬貸亦然銀粟布帛徧給  
遐齡喜生囹圄分別弛刑是以苾芬初薦 神馭如臨錫以  
蕃昌畀以大亨和甘綏乎萬紀仁壽施於四瀛庶士曰巍乎

吾今而知

皇德之峻孝之大也觀止矣識子之言藏之以待金石之播

連珠六首

常安

蓋聞病目者眊見空中之花而不見寓目之物病耳者聵聞  
空中之聲而不聞入耳之言故情意一移乾坤可以易位而  
寸心旣惑是非乃以旋昏

蓋聞攫金於市心眩者利故不見耳目之眾敗軍於陳心慌  
者害故無非兵革之聲是以大道可尊雖萬鍾千駟其弗貴  
至人不惑卽烈風猛雨而奚驚

蓋聞震靈谷者以中虛而聲應鑿澄川者以外朗而貌呈是  
以淵衷開眾妙之門燦矣如銀漢之輝列宿曠襟無夏蟲之

見皎然若玉壺之貯清冰

蓋聞鈞天重廣樂之音而鄭聲轉以悅耳南郊貴元酒之味而甘釀適以腐腸是以僞能亂真痛靡蕪細辛之莫辨緇可奪素嘆綠衣紫帔之增光

蓋聞豐城之劍不以未淬掩其光合浦之珠詎以未剖失其彩是以攀桂枝而招隱逸願焚荷芰於巢由賦卿雲而進股肱先集冠佩於元愷

蓋聞醢雞以獲爲天奚以究乎雲衢浩渺井蛙惟幹是宅曷由盡乎珠海洞漩是以退食未諳徒貽譏於覆餗奏刀罔識空博笑於烹鮮

演連珠四首

承齡

蓋聞伯牙鼓琴駟馬仰秣由基調矢白猿嘯哀是目精義入神則風雷不能入至誠感物則金石爲之開

蓋聞裘之珍者腋集百狐獵之多者功非一鶚是以十圍隆棟不能支大厦之傾數石阿膠不能止黃河之濁

蓋聞干將不可以補履騏驥不可以服箱是以賢者違才治不成於百里霸王器使功或擢於五羊

蓋聞嗟來之呼匹夫不受意氣之感九原可思是以一舛酬恩媿眾人之目我千金報德豈一飽之無時

演連珠四首

恩隆

臣聞空谷滋蘭必翦蕭艾高岡引鳳必斥鴆鷓是以共鯨既誅虞廷有咸熙之績管蔡既放周室有濟濟之休



臣聞驥足善馳無戾天之翼鵬翮雖健非行地所宜是以神禹惠疇不侵工虞之職周公制作必慎籩豆之司

臣聞燕昭市駿得骨爲貴葉公好龍見眞乃驚是以敷納之君或受欺於捷給奇偉之士或見抑於聖明

臣聞大鏞閔響遇觸則鳴良鑑斂形得影則照是以由基弛附不知穿楊之奇公輸輟斤莫睹斲輪之巧

所樂軒解

錫纈

乘遣風籥浮雲爲龍友爲地類廣溟萬里馳地飛塹力罔置焉徙洞虛之膏腴處句曲之地肺不孳不孳伏櫪而蹶北冥之鯤鯨鮓之魚暴鬣於緯路織塗則游魂於昆侖之虛商庚楚雀託命枝柯雕籠錮之鳳靡鸞叱澀勒之竹誕種嶺南日

精之果迺載湘潭稻不播而生草不植而孕在彼童山則重  
泉弗鮮而地氣不奮是故寬賒簡闊得所是休若解胃春含  
哺嬰游不得其所辭隆從窳腹誹心悒側目而瞋夫敷文析  
理以自娛驅染搖嬖目自曠脣吻適會情靈恣蕩骯骯擗犁  
乾慮渴思詞源翰藪窮攤不疲骨鯁所樹肌膚所附窺覩文  
權寢餽書樞雖復舍芳飪割白越迺菲枕圖史覩面而算知  
作况虜勺貪無節不足目豐饒齧齧無識不足目善交目語  
頷瞬不足目爲黠神藥形茹不足目爲臯弱顏不毀算勝羣  
呶嗚噓而笑跢然而號曷如蕭楓於一室迺澹澹目自豪然  
而支離颺泊駑馬乘輪里區謁舍燕代西秦相怒飛之鳥爲  
積感之民噫嘻是不讀夫張子東西之銘也浮游於天地而  
不知橫緯縱經也寫佃交鄉靡所定處豈其靡慶玉烏目爲

榮知止眾止隨遇寄形撮囊眎肉抗心汗青毋亦排迂征營  
有咎於門庭戶庭且夫御珍駕於六藝游平林於道德結罟  
於典籍驅禽於儒墨誦思元之賦樂閒居之樂將冀心易行  
目臧吾身不愈於微賤勞苦而無所託乎於是得斯義呂名  
吾之軒听然而笑厥心孔甘彼事誣諉呂相屬物翰張呂來  
于僂身屏氣陰愒而不敢言而猶羨孟獻尤其室鄧通銅其  
山則非吾之所敢知焉

所樂軒後解

錫纘

錫纘既呂所樂名軒而析其義纁夏元冬十更歲紀渴日競  
辰俄晷是貴然而昏昏索索聰明算竄火燠水埒露初星晚  
不已於行迷途又遠或有非笑之者曰子呂是爲樂庠屈子

輕舉遠游而不問字於揚雄之宅跋涉心憂靡時偃息何如  
綠幘傅講爲之衣山膚水豢爲之食哉錫纘曰志骨蘭形要  
君屐冠裳燕會擗博僕馬姬姜馭賈夷昧呂巨方洋三舍避  
之敢與彼京老外一編窮歲佔畢乾喉溼哭伎哀詐泣吾伺  
其閒身寒而噓夫降衷之不同或毘陽而毘陰寄蓬廬之內  
成吾性之存存豈其踦閭而闔門得團焦目棲遲指房舍目  
歸說鰾白水之漿飫邯瞻之味蘧曲可眠六經斯醉彼官攤  
使駭之靡常豈能煩吾牽率而儻蕩不備庠若夫屈丐擗豎  
所立不堅喬詰卓鷲所習或偏昏營不可目聞道阿匱不可  
目取憐罔兩問影昌陽引年日居月諸險阻難難飲馬城窟  
西越罕汗黑水白山據槁梧而瞑蓋不自知其所目然而然

八旗文經卷五十五終

八旗文經卷弟五十六

哀祭

卞三元祭少司馬范公文

成德祭吳漢槎文

達禮弔漢江都相董子墓文

宗室敦誠璞翁將軍哀辭

并引

宗室敦誠祭周立厓先生文

佟景文完顏憚太夫人誄

寶鋆擬祭鄂博文

宗山祭錢子奇文

祭少司馬范公文

卞三元

慨自成仁取義之學不明而士大夫始願爲良臣不願爲忠臣以飾其保家營私之智求其丹心化碧白氣成虹者蓋曠世而一見矣不知忠良一道也能爲皋夔稷契卽能爲龍逢比干當其生而功施于朝澤沛于野則生賢于外當其外而綱常以正名教以扶則外賢于生若張許兩顏以及文謝諸公豈愛外而惡生哉惟見義精求仁決生應川嶽之靈外配郊壇之位故名畱天壤節貫古今以其外爲榮如公尤表表者也公于大司馬爲順孫于太傅公爲肖子則得于家學者素公在侍從有不次之遷于 陛辭有溫言之喻則受于國恩者厚其撫越也風俗爲之不變飢饉爲之不驚則蒼生之倚賴者實深其賜見也疾則頒尙方之藥出則解御服之裘則 朝廷之寄託者重公安可以外而公竟外矣公不止

以一身殉國而能使幕客從容臧獲激烈其長者畱漢廐以俟田橫其下者率潭吏以從李芾吁何其壯哉方

天子聖神四郊無壘而逆瀆忽爾肆惡假令疆場戮力何難滅此朝食乃一方震動粵閩隨身此時卽有一二臣工捐軀盡瘁而守土者率皆徘徊觀望以爲雲霾之曠不日旋消我姑養其身以鼓舞太平坐觀鏡吹而此念一萌勉圖後補以比較彼必有辨之者故公外而人思悔過士盡投誠不逾年海波清晏陬澁靖安則公之一外足以感動羣情嘿扶國運也夫人誰不外或牖下外或馬革外或患難憂慮外或愧悔不寧外或五日不汗外或瓜蒂噴鼻外及其外也颺颺嘯其旁樵牧游其上錫朋算惜國史泯然迴思昔年竟無一善可以長畱世閒則外亦爲不幸矣公拘繫三載械鎖卽當噴血



裂皆旁觀嘆息一言一字可泣鬼神造宗社衽席之安增山  
河帶礪之邑由今以思嚙齒穿齧更韻於引商激羽也斧鑿  
縲紲更貴於錦衣狐裘也畫炭成書挑煤作字更香於陸海  
潘江史籀斯篆也座客之遺詩賢於凝碧池頭之句婢僕之  
姓氏愈於天祿閣上之投也人身自古誰無外畱取丹心照  
汗青公之謂矣公既與張顏文謝比烈則外應爲神余辱交  
最深於其祭也做昌黎之祀柳州者爲迎神送神之曲俾世  
世歌之辭曰涂水黑兮風腥雲淡淡兮雨冥冥公之來兮不  
驚乘玉麟駕瑤鯨撫長劍兮悲填膺顧吾民兮笑與顰并又  
曰翳巫閭兮會稽靈之游兮山曲水湄公今去兮何歸排閭  
闔兮騎箕扶犇狂兮捐魑夔東方昇兮日照回公不我吐其  
必欣之

祭吳漢槎文

成德

嗚呼我與子昔爰居爰處誰料倏忽外生異路自我別子子  
病雖遽款款話言歷歷衷素初謂奄旬尙可聚首俄然物化  
楊生左肘青溪落月臺城衰柳哀訃驚聞未知是否疇昔之  
夜元冕垂纓呼我永別號痛就醒非子也邪彷彿精靈我歸  
不聞子笑語聲子信外矣傳言是矣帷堂而哭寡妻弱子七  
十之母遠在故里返輻何日倚閭何俟嗟嗟蒼天何厚其才  
而嗇其遇亦孔艱哉弱齡克賦左馬右枚未題鴈塋先泣龍  
堆中郎朔方亭伯遼海蕭蕭寒吹荒荒破壘子窮過此二十  
四載凌雲欲奏狗監安在自我昔年邂逅梁谿子有外友非  
此而誰金縷一章聲與泣隨我誓返子實由此詞

皇恩浩蕩磅礴無垠阜帽歸來嗚咽雷中我喜得子如驂之  
斬花閒草堂月夕霜辰未幾思母翩然南棹憑艦發詠臨流  
垂釣舟還巨壑鶴歸華表朋舊全非容顏乍老中得子訊卧  
疴累月數寄尺書趣子遄發授館甫爾遂苦下泄兩月之閒  
便成永訣自古才人易夭而貧黃金突兀白玉嶙峋以彼一  
日易我千春知子不願卓哉斯文子志未竟子勞已息有子  
與女塊然苦席言念交期慰爾營魄靈兮鑒之無嗟遠客尙  
饗

弔漢江都相董子墓文

達禮

六經之道如日中天秦政焚書聖學殆絕漢興至於孝武乃  
始崇尚儒術延致文儒而廣川董子蔚然爲羣賢之冠天人

三策大醕無疵尤深明春秋災異之旨推究天道祖述公羊  
其肄業之精至三年不窺園圃故漢儒之治春秋者張丞相  
蒼發之董子擴而大之其有功於聖學也重矣予嘗謂漢人  
治經之學樸實深厚沿至唐宋漸次發明人第知二程朱子  
剖析義理至於毫釐畢照而不知漢人之抱殘守缺篤守遺  
經其功正不在宋儒下也西安故有董子祠家君開府於秦  
已飭有司謹爲修葺城南有董子墓予謁假省覲過而式焉  
乃爲文以弔之

維聖學之不絕兮賴大雅之儒宗經秦灰之虐燄兮俾六籍  
之昏蒙提尺劍之炎劉兮斬白蛇於當道貴叔孫之綿蕞兮  
嫉賈生之年少嗟武功之初定兮嘆禮樂之未遑况經傳之  
粹密兮孰夫子之升堂聿孝武之右文兮課羣儒之講讀收

斷簡於複壁兮發遺編於幽谷惟董子之在漢兮獨肄業之  
精專述春秋於三傳兮明災異於千年窮斯道之大源兮對  
天人於當亡洗虞淵之紅日兮滌羣言之宿霧不曲學以阿  
世兮異牧豕之公孫守師傅如拱璧兮等富貴於浮雲作傅  
相於親藩兮能正身以化俗嘗守禮而自防兮貴不欺於幽  
獨遇漢廷之疑義兮每就正於先生引師傅以抗對兮俾經  
說之昭明夫何竊藁於主父兮致門人之妄對在吾道之可  
信兮雖吏議其何畏伊宋儒之問學兮剖理義於毫芒自河  
南與徽國兮使聖典之光昌遡原本於江都兮實黃河之星  
宿讀繁露之奇書兮闢麟經之戶牖歸斯文之正脈兮遂俎  
豆於宮牆固先賢之如在兮覲名德之耿光埋遺骨於西陲  
兮欽哲人之古跡撫淺土之一抔兮看長松之千尺對終南

之翠色兮挹秦水之洪流發珠光與劍氣兮長綿亘於斗牛  
子小子之入關兮從吾翁於分陝每過車而必式兮磨短碑  
之碧蘚撮瓣香以致敬兮伸仰止於高山願千秋與萬世兮  
永焜耀於人寰

璞翁將軍哀辭

并引

宗室敦誠

小至日大風吹野祁寒折綿凌晨往弔璞菴老人於南甸之  
亮瑩旣回車秣駟於村店命酒自酌半酣忽念人生亦何所  
樂哉世俗之所恃以不恨者惟年與位耳然而兼得之者恆  
少得其位不得其年得其年不得其位偶有兼得者又不得  
行其胸臆或盡忱悃於上或施功德於人不尸其位不枉其  
年而徒以袞袞之頭銜逐悠悠之歲月如此雖登三事乃不

如聞壽百歲亦謂之天也今翁之位曾都統將軍矣翁之年八十有五矣亦可以炫頑俗而盡世人之所以欲也然其中有大不然者翁少爲王長史積年遷擢五十始爲都統六十爲將軍旋罷去馳驅於二萬里之邊陲復褫職籍其家翁遂赤貧寄跡於先人丘壠之側妻孥子孫幾三百指每至嗷嗷又二十年年然以翁之生平不可不謂據台輔享大年矣而其情狀可哀如此況位不及翁之崇年不及翁之半而其遭如是者又何可勝道哉不禁惘然竟夕吁嗟太息而還辭曰

驂紫鸞而駕白雲兮翁其上翔拾瑤草之芬芳兮邀游乎帝鄉下視人寰兮悲浩劫之茫茫昔日之富貴貧賤兮中情未能以相忘今日俱何有兮夢電倏忽以消亾大風刁刁兮披總帳而登牀吁嗟翁兮猶彷彿古道之餘光

祭周立厓先生文

宗室敦誠

孟秋八月侵曉嚴驂將問疾於聽雨之樓甫出巷有白衣冠人持訃紙急趨至前余曰吁先生逝矣卽往哭臨之入其門見花竹依然琴尊無恙而先生晏然寢於巨室余亦何能不噉噉然邪記先生與先公始交時在戊寅己卯閒是時先生在西臺烜然有直聲每過靜補堂與先公樽酒相對未嘗不慷慨論當世事雅以氣節自負誠嘗侍几杖側得以窺先生之梗概如此迨庚寅先公卽世先生哭之過時而哀足不踏西州路者三年卒以余兄弟故不忍終捐乃復登靜補堂時時以先人交誼相勸勵先生何以重有愛於余父子兄弟閒邪先生性耽幽散雖僑寓京都於所居必疊石爲山引泉爲



池庭前花樹蔥蘢竹藤交錯入門者幾疑爲塵外人且嗜古善書每得古人金石墨蹟不惜重資購貯常輦西山貞珉盈庭充壁鐫劂之聲無虛日舊有軒名得石先生易名石寄自跋云得邪失邪寄邪今石尙寄而先生安在哉先生之再入長安也自以爲

君德未酬不敢以林泉之適自逸其身故不憚萬里奔涉卒叨殊恩一擢光祿再擢廷尉兩蒙召對綸言優渥行見有不次之用而先生年命相迫當此際遇之機竟不克遂其志溘然長往先生其亦能瞑目邪誠追述平生恂恍若夢回念靜補堂几杖之側已二十餘年矣不禁吞聲嗚咽乃復以歌代哭曰公昔歸兮非爲田園之荒蕪抑身老而心孺眷戀乎先人之墓廬公昨來兮非好爵之是縻抑

君恩之未報將竭誠而瘁軀何大鳥之來速兮鱣堂閔而鮀  
颺居梧竹搖落兮耿秋月而鳴狐魂其歸兮故人執紼以相  
送溟雨瀟瀟兮溟雲夢夢騎天上之箕尾兮畱人閒之草聖  
公其瞑目兮今閉棺而始定

完顏惲太夫人誄

佟景文

完顏惲太夫人歿之二年嗣君今總督江南河道見亭侍郎  
郵示行略逸事且告曰母氏之卒也當世有道德而能文章  
者既各爲傳志銘誄以光家乘矣惟先生曷可闕於辭敢請  
景文受而讀之卒業三嘆以興曰烏虜太夫人行成於己澤  
施於民以康其身以昌其子孫蓋修德而獲報若斯之不爽  
矣古所稱公父文伯雋不疑韋逞歐陽永叔諸母類皆垂譽

後世傳之無窮太夫人景紹前徽推崇先哲獨能明心學重  
孝德既以體諸躬行復表彰絕業俾天下後世得見古醇儒  
孝子之用心私淑其身而漸摩於人心風俗蓋其學有本原  
抑亦近今士大夫所難而敬美以下諸人殆未足多也今太  
夫人之嫻德懿行已備於侍郎所述暨有道能文之士所爲  
傳志銘誄之文景文特舉其大者倣宋玉閔師之意以備一  
體而系之辭曰繫堃輿之翊贊兮遂淑質之挺生孳遺徽於  
曩哲兮垂彤管之令名唯賢母之好修兮洵柔嘉而可則夢  
五色之入懷兮迨降生之前夕宿慧既其獨擅兮申女戒以  
自持始爲嬪至爲母兮爲戚鄰之所師溯相夫於魯越兮洎  
就養於汴水資內助與慈訓兮聆輿誦猶在耳紛吾欲陳此  
懿美兮曾不可乎殫紀獨志切夫景行兮詎女宗之爲美曰

風俗其日媮兮由心理之不明亟闢幽以式頽靡兮宜先民  
之是程惟醕儒與孝子兮庶觀感乎齊民覲音容於壺簡兮  
絲墜緒於旣傾斯薦紳所難能兮羌何論乎翟莠他若廣列  
女之前編兮標正始於尹媯偶伸紙而濡豪兮慕熙荃之點  
筆曾多才之足炫兮乃餘事之所及謂仁者其必壽兮胡百  
年之難假仁靈旗之先導兮乘白雲而來下慰孝思於罔極  
兮申明發於庭幃敢作歌以詔將來兮請徵信於此辭

擬祭鄂博文

寶蓋

繫石丈之有靈兮實降鑒於山川懿五嶽視三公兮雄氣象  
於峰巔肇出雲而降雨兮羌烜赫而持權伊上帝所倚畀兮  
必聰聽而無偏何水旱或不時兮豈斯民之罪愆本太蒙之

境域兮羣寢饋於裘瓊胡啟牖之不早兮任貪縱而弗悛既  
養姦以姑息兮復降罰而承天徒崇高以自處兮何尊位之  
能賢願長顧而卻慮兮籌操縱於萬全呼鄒衍以吹律兮化  
沙漠而腴田菇含香而養大兮黍被隴而珠圓佑牧馬之蕃  
息兮燦五色而相宣助牛羊之量谷兮胥博碩而肥鮮鍾材  
武於比戶兮飲讓水與廉泉維季夏之六日兮告牲醴而潔  
虔靈之來兮風肅然赤豹後兮文狸前享馨香而醉飽兮動  
脍蠶於賓筵靈之去兮空蒼煙野蕩蕩兮雲絲絲閃山花之  
撲簌兮極水草而芊眠昔李衛公之祀太華兮疑怒氣之胸  
填余小子既和且平兮望服膺而拳拳

祭錢子奇文

宗山

嗚呼金刀掩夜文梓徂秋悲風陰噎匡宿寒流千年華表終  
古山邱惠心永謝詩卷長畱猗歟我君洵邦之彥眞美家聲  
廣陵鄉貫蠟鳳雕龍慧根夙擅時譽爭推南金東箭旣冠之  
年橐筆京圻芹宮釋菜園橋習儀學宗服鄭行企淵思教胄  
典樂經師人師越歲己酉君登於鄉夙夜退食校士東庠三  
年課最擢陟才良膺百里選君焉允臧癸甲之交紅巾倡亂  
煽毒東南徐揚淪陷痛君一門丁禍罹難變服星奔車輪腸  
轉蕩然四壁孑然此身硯田可耕吾舌尙存單車襍被京雒  
緇塵垂十五年備歷艱辛千里之官武林觀政分校秋闈得  
士稱盛臺諫郎官後先掩映衣鉢爭傳元籙炯炯君之攝篆  
首在瑞安化行三月及瓜而旋民之去思曰使君賢天從民  
欲合浦珠還期年解綬金處告急戎馬驅馳炎熇赤日軍歌

凱旋復我四邑庖代龍泉頌聲洋溢蠢茲萑苻揭竿而鬪甌  
東一隅突來羣寇力疾誓軍登陴拒守克保危疆無驚耕耨  
維時省垣餘孽未平無乞糴糧無應召兵隻身赴閩乞師秦  
庭天用勦絕東海波澄三莅瑞安克善其後飢鴻無噉狂獠  
絕噉解燒除苛返樸歸厚婦豎攀轅仍思借寇君治餘杭開  
闢榛荆君治縉雲首舉賓興君治永嘉姦宄潛形十年一日  
虎尾春冰甲戌之春眞除安吉土著流氓爭先掎擊君持以  
平無判畛域耕鑿自安不知不識命宮磨竭聲起鄰封桃僵  
代李魚網離鴻賦續閒居文成送窮一視浮雲無滓太空上  
游重君復莅其位王事敦我形神交瘁自顧衰年陳詞乞退  
未復遂初竟厭人世君之績學搜括羣書箋疏訓詁同臻殊  
塗著作等身不脛而趨文追漢魏才媲歐蘇同人結社已迄

十年孤雲僧舍落日湖船白公隄畔放鶴亭邊騷壇耆宿拔  
幟登先天不愁遣又弱一个琴已罷彈遂還寡和溯彼前游  
依依如昨涕淚浪浪衫袖幾澆某浙水同僚香山共社言潔  
芳蓀虔斟醕罍暫駐靈旗魂歸旅舍覲面河山人間泉下嗚  
呼哀哉尙饗

八旗文經卷弟五十六終





八旗文經卷第五十七

作者考甲

睿忠親王多爾袞

太祖高皇帝第十四子初封貝勒天聰二年從征察哈爾有功 賜號墨爾根岱青貝勒五年初設六部 命掌吏部事十年敘功封和碩睿親王順治元年 賜大將軍敕印統眾入關封攝政王七年薨於喀喇城八年追削王爵乾隆四十二年復封號 賜今謚配享 太廟

卷三十二 與明福王史相書

誠隱郡王允祉

聖祖仁皇帝第三子

卷六 八音樂器說

卷三十六 劉麥記

果毅親王允禮

聖祖仁皇帝第十七子雍正元年封多羅果郡王三年兼管國子監晉封親王十一年管戶部事乾隆三年薨謚曰毅有春和堂集靜遠齋集奉使紀行詩集嘗屬方望溪爲輯古文約選

卷十一 刻春秋左氏傳序

卷十二 工部事宜冊序

卷二十一 書朱子五朝名臣言行錄後

卷三十六 宗學記 工部藤花廳記

慎靖郡王允禧號紫瓊道人

聖祖仁皇帝第二十二子有花閒堂詩鈔一卷紫瓊巖詩鈔

三卷續刻一卷據經樓詩選十四卷書畫自署春浮居士  
莊恪親王允祿瑤華道人宏旰宗室穆堂柳泉均能書畫  
卷十八 花間堂詩鈔自序

多羅誠貝勒允祁

聖祖仁皇帝二十三世子字東山原封固山貝子乾隆四十七  
年晉封多羅貝勒郡王品級五十年薨謚曰誠

卷十八 曉亭詩鈔序

和恭親王弘晝

世宗憲皇帝第五子有稽古齋集八卷果恭郡王弘瞻有鳴  
盛集履端親王永瑛有寄暢齋稿質莊親王永瑤有九思  
堂詩鈔貝勒永琪有日課詩彙皆 天潢近屬也

卷四十五 十臣贊

錄二

成哲親王允理

高宗純皇帝第十一子乾隆五十四年封成親王嘉慶四年  
在軍機處行走以精於書法 命書

裕陵聖德神功碑道光三年薨年七十二謚曰哲著有詒晉  
齋集詩六卷文二卷續集二卷隨筆一卷別有倉龍集一  
卷

卷一 鬥鹿賦 四松賦 南苑雙柳樹賦

卷六 唐論 駁鄭康成論族師康誥異義 儉說

卷十八 愼郡王詩序

卷二十 姚息齋先生號序

卷二十一 書闕里新廟記後 題董文敏公赤牘四冊

題黃忠端公黃忠節公書 記元蘇宏道書延祐甲

寅科江西鄉試石鼓賦八篇 再記石鼓賦 孟法師

碑跋 梁越州城隍廟碑記跋 清暉閣帖跋 四體

千字文跋 跋阿文成書樂志論

卷三十六 守經堂記 銅雀臺瓦記

卷四十五 平金川頌

恭忠親王奕訢

宣宗成皇帝第六子咸豐十年授議政王同治四年改軍

機大臣十一年 命以親王世襲罔替光緒二十年再起

病仍爲軍機大臣二十四年薨謚曰忠配享 太廟著有

樂道堂集續集萃錦吟

卷二十一 讀蘇老泉六國論書後 讀歐陽子朋黨論

書後

卷四十六 擬姚崇口箴 葆光室銘

卷四十九 弟二女墓誌銘

鄭獻親王濟爾哈朗追封和碩親王舒爾哈齊弟六子號和碩貝勒天聰五年管刑部事十年敘功封和碩鄭親王順治五年以定遠大將軍平湖南貴州十一年薨康熙十年追謚獻乾隆四十三年配享 太廟

卷二十五 請順民心信詔令立史官奏

克勤郡王岳託禮烈親王代善長子初號台吉天聰初封貝勒五年管兵部事十年敘功封和碩成親王崇德元年降多羅貝勒三年以揚武大將軍征明四年卒於軍封克勤郡王乾隆四十三年配享 太廟

卷二十五 善撫人民奏

平敏郡王福彭多羅郡王品級納爾蘇子

卷六 九河考 三老五更辨 京房考功課吏論 卦

圖先後天論

簡儀親王德沛字濟齋追封和碩親王舒爾哈齊四世孫固  
山貝子福存子應封鎮國將軍讓爵入西山讀書以果親

王薦

世宗召授兵部侍郎歷古北口提督甘肅巡撫湖廣總督調  
閩浙再調江南乾隆七年 召補吏部侍郎兼國子監祭  
酒尋遷尙書十四年簡親王神保住削爵 詔以王襲封  
明年薨年六十九著有周易補注八卷實踐錄二卷厥後  
冰玉道人亦號賢王鄭慎親王石琴室稿瑞愍郡王樂循  
理齋集定敏郡王行有恆堂集最著



卷十一 周易補注自序 易圖解自序

卷十四 實踐錄序

禮恭親王永恩字惠周禮烈親王五世孫康修親王崇安子始封貝勒乾隆十七年襲封康親王後復祖號曰禮親王嘉慶元年與千叟宴明年薨年七十九謚曰恭著有誠正堂豪詩八卷文一卷時藝一卷律呂元音四卷金錯膾鮮八卷子汲修主人昭槤所輯禮府志已成書未梓詩集二百餘篇皆往體武進費氏得之以畀伯熙其文彙叢殘已甚在鐵齡家鐵齡歿後圖籍散佚不可究詰惟嘯亭雜錄行世燿年所刻多所刪節

卷十八 棊漪園懷舊集序

范文程字憲斗號輝嶽瀋陽人系出宋忠宣公純仁隸漢軍

鑲黃旗

太宗文皇帝卽位簡置帷幄領樞密崇德元年授秘書院大學士順治元年 賜巴克什號二年修明史爲總裁九年加世職至一等精奇尼哈番任議政大臣十一年乞休加太傅兼太子太師康熙五年卒年七十謚文肅五十二年御書元輔高風額其祠雍正中 詔入賢良祠

卷三十二 上諸王啟

甯完我字公甫遼陽人隸漢軍正紅旗天聰初 召直文館辦事官參將後閒廢順治初起爲學士二年擢內宏文院大學士爲明史副總裁七年晉議政大臣八年改國史院大學士十年入滿洲大學士班位十五年致仕康熙四年卒謚文毅後入祀賢良祠

卷二十五 請立言官奏

朱延慶隸漢軍鑲黃旗甲喇章京朱繼文子天聰閒在文館辦事順治二年出任兩淮鹽法道歷浙江嘉湖道五年擢江西巡撫七年卒于任

卷二十五 條陳時政奏

張存仁天聰五年授副將世職隸漢軍鑲藍旗崇德元年擢都察院承政順治二年總督浙江福建六年總督直隸山東河南九年卒謚忠勤

卷二十五 成大業貴得人心奏

蔡士英字伯彥號魁吾錦州人隸漢軍正白旗順治元年授牛糸章京五年授僉都御史征山西功授阿思哈尼番世職九年巡撫江西十二年總督漕運加兵部尙書十六年

卒謚襄勤有撫江集督漕奏議滕王閣集

卷二十一 書通鑑本末紀要簡端示仲兒

卷四十四 正法禪院修造碑記

增

趙廷臣字君鄰鐵嶺人隸漢軍鑲黃旗性至孝順治元年由附貢生授江南山陽縣知縣歷江甯府同知下湖南道僉事十五年從王師定黔授貴州巡撫十六年擢雲貴總督康熙元年調浙江總督八年卒謚清獻有奏議

卷十四 使琉球紀略序

卷二十五 請寬臣工小過奏

甘文焜字炳如其先江西豐城人遷瀋陽隸漢軍正黃旗由筆帖式遷禮部啟心郎康熙初爲順天府府尹累擢至雲貴總督駐貴陽十二年吳三桂反馳赴鎮遠時提督李本

深等先已從賊援絕自到年四十二四子國城從外贈兵部尙書謚忠果廕子國璧入監建祠貴陽 御書勁節二字額同時馬文毅殉節桂林著有彙草辨疑

卷三十二 復貴州提督李本深書

范承謨字覲公號螺山范文程次子順治壬辰進士改庶吉士散館授宏文院編修累官福建總督耿逆叛不屈 王師逾仙霞被害謚忠貞贈太子少保兵部尙書入祀昭忠祠集十卷首 諭祭文 御製碑文 御題祠額附以家傳及祠堂記共一卷次撫浙奏議一卷次督閩奏議一卷次吾廬存稿一卷次百苦吟一卷次畫壁遺稿一卷次雜著一卷次增錄題跋哀輓詩文三卷惟館中酬唱詩未載

卷五十 蒙谷自序

折庫納納喇氏隸滿洲鑲白旗順治壬辰麻勒吉榜一甲二  
名進士授編修十五年設翰林院由國史院學士爲掌院  
學士十六年裁康熙九年由左副都御史再任掌院學士  
十一年授兵部督捕右侍郎十六年卒

卷二十五 密陳四事奏

阿什坦

題名碑作  
何錫謀

字海龍金裔完顏氏隸滿洲鑲藍旗故隸

內務府正黃旗順治二年選授內院六品他敕哈哈番繙  
譯大學中庸孝經通鑑總論諸書壬辰進士是年擢刑科  
給事中康熙七年爲 實錄纂修官二十二年卒

聖祖嘗召問經義稱爲我朝大儒又嘗召試侍郎布泰階平  
褒以不由科目出身克敦實學侍講德格勒有學行與徐  
文定元夢並爲李文貞所薦納蘭成文綱齋文貞高足與

修周易折中惜均無文字流傳湯文正僞笑德公之文今亦不知何語必觸時相之忌而燬之矣其爲子之學者漢軍賈士珩崔璠郭金湯金城申奇章于鯨楊勤

卷二十五 重經史以養人才奏

佟鳳彩字高岡隸漢軍正藍旗順治元年由國史院副理事官授香河知縣擢御史厯湖廣武昌道湖南督糧道廣西右布政使四川貴州巡撫康熙十一年移撫河南題蠲夫柳修復彰德萬金渠十六年卒於官謚勤僖有栖友堂集佟匯白有撫虔奏議姚熙之有憂畏軒遺橐李協萬有梅崖集田端肅有撫豫宣化錄高韞園孫緯文李湛亭王含谿張卜臣均有集

卷三十六 修成都府學記

卞三元字月華一字桂林隸漢軍 旗崇德辛巳舉人順

治九年任荊州道副使累官雲貴總督康熙三十六年卒  
謚恪敏乾隆四十六年奪有公餘詩草崇德辛巳解元麟  
閣參政鄂貌圖有北海集圖爾宸自中禪岱靜齋佟藹怡  
公皆滿洲文士之最先者

卷四十二 重修盤江鐵橋碑記

卷五十六 祭少司馬范公文

劉秉權隸漢軍正紅旗歷官兵部主事刑部啟心郎戶部員  
外郎僉都御史康熙六年授廣東巡撫十三年討潮州劉  
進忠卒於軍謚端勤

卷四十二 重修廣州府學碑記

董秉忠隸漢軍正白旗累官奉天府尹



卷十二 盛京通志序

格爾古德鈕祜祿氏隸滿洲鑲藍旗康熙三年由內院副理事官升宏文院侍讀歷侍讀學士詹事府詹事內閣學士二十一年授直隸巡撫二十三年卒於官年四十有四謚文清

卷十二 畿輔通志序

吳興祚字伯成一字留村世居舟山祖大圭教授遼東居鐵嶺隸正紅旗包衣順治七年以貢生知江西萍鄉歷山西大甯忻州康熙二年改江南無錫累擢福建按察使福建巡撫二十年以功授世職擢兩廣總督徙古北口都統卒著有宋元詩律選史遷句解粵東輿圖

卷十二 廣東輿圖序 讀史方輿紀要序

卷十八 詞律序

卷四十五 秦伯墓碑記

蔡毓榮字仁菴蔡士英次子由牛彖章京補刑部理事官歷京畿道御史祕書院學士刑部吏部侍郎康熙九年總督四川湖廣駐荊州十七年爲綏遠將軍平定雲貴二十一年授雲貴總督加兵部尙書三十八年卒著有通鑑本末紀要女琬季玉高文良繼室有蘊真軒小草

卷二十五 籌滇善後十事奏

靳輔字紫垣其先濟南歷城人徙遼陽隸漢軍鑲黃旗順治九年以官學生考授國史院編修康熙十年由武英殿學士巡撫安徽十六年總督河道二十六年落職三十一年起督西運十一月卒年六十謚文襄四十六年贈太子太

保予世職雍正閒贈工部尙書入祀賢良祠著治河書十  
二卷奏疏八卷

卷六 論賈讓治河奏 論賈魯治河

卷二十六 生財裕餉第一奏 防河事宜奏

卷三十六 重修余忠宣公祠記 培原書院記

成德字容若避 東宮嫌名改名性德納喇氏金三十一姓  
之一先世星懇達爾漢據有葉赫之地所謂北關也隸滿  
洲正黃旗葉赫東城貝勒金台什曾孫大學士明珠子康  
熙癸丑進士丙辰廷對與十名中授侍衛嘗奉使覘梭龍  
羌乙丑五月卒年三十有一善爲詩尤工於詞嘗輯全唐  
詩選詞韻正略刻宋元以來經解書學褚河南有通志堂  
集十八卷

卷一 金山賦 五色蝴蝶賦 雨霽賦

卷六 易九六爻大衍數解 賦論

卷十一 經解總序 周易義海撮要序 合訂大易集

義粹言序 杏溪傅氏禹貢集解序 儀禮集說序

禮記集說序 河南聶氏三禮圖序 龍學孫公春秋

經解序 趙氏春秋集傳序 張翠屏春秋春王正月

考序

卷二十一 題米元章方圓菴碑 題董文敏秋林書屋

圖 自題淶水亭雜識

卷三十一 擬設 東宮官屬謝表

卷三十二 上座主徐健菴先生書 與韓元少書 與

梁藥亭書

卷三十六 石鼓記

卷四十五 萬年一統頌

卷五十六 祭吳漢槎文

施琅字尊侯福建晉江人隸漢軍鑲黃旗積功至同安總兵  
康熙元年擢水師提督二十二年臺灣平封靖海侯世襲  
罔替三十五年卒謚襄壯有奏議及靖海紀事子世綸有  
南堂集

卷二十六 陳臺灣棄留利害奏 論開海禁奏

曹寅字子清一字棟亭號荔軒一號雪樵世居瀋陽地方隸  
漢軍正白旗工部尙書曹璽子累官通政使江甯織造兼  
理鹽課有棟亭詩鈔八卷詩鈔別集四卷文鈔一卷詞鈔  
一卷詞鈔別集一卷甥富察昌齡字謹齋閣峰尙書子有

時名集未見

卷三十六 重修東關石閘記

黃桂字漢柱隸漢軍由官生官至通政使參議外轉貴州分  
守思仁道布政司參議康熙辛亥改補江南太平府知府  
卷三十六 重修太平府儒學記

王永譽字孝揚隸漢軍正紅旗鎮海將軍王國光子襲一等  
男康熙二十年由江南提督授廣州將軍二十七年調本  
旗漢軍都統王漁洋南海集有唱和詩

卷四十二 廣州將軍府題名碑記

宗室岳端或作袁端或作蘊端如鎮國愨厚公高塞池北偶  
談作國蘊白山詩介作國蘊先八世祖諱討塞氏族通譜  
卷七十六書作陶色譯音無定字也字正子一字兼山號

玉池生別號紅蘭室主人以春郊晚眺詩時稱東風居士  
多羅安和親王岳樂第三子原封固山貝子有玉池生稿  
一紅蘭集一蓼汀集一出塞詩一無題詩安邸文學最盛  
從弟問亭將軍博爾都別號東臯漁隱著有問亭詩集白  
燕棲稿汪鈍翁陳迦陵均亟稱之宗支如福喜損亭德普  
修菴宏曠思敬書誠樗仙永恂嵩山永忠臞仙均工詩文  
卷十八 雲笥織字軒二詩序 寒瘦集序

靳治荆字熊封隸漢軍鑲黃旗歷官安徽歙縣知縣甘肅固  
原州知州浙江甯波府同知江西吉安府知府嘗刻明嘉  
靖間歙人王寅仲房新都秀運集二卷著有思舊錄

卷十六 南雷文定序

于成龍字振甲先世蓋平人徙廣甯隸鑲紅旗漢軍由蔭生

知順天通州以于清端薦擢知江甯府康熙二十三年擢安徽按察使明年以僉都御史巡撫直隸三十二年遷河道總督三十九年卒謚襄勤

卷四十二 不改亭碑銘

蔣國祥浙江布政使蔣毓英子順天寶坻人隸漢軍鑲藍旗累官長蘆鹽運使

卷十二 合刻南唐書序

卞永吉字謙之卞三元子歷官江南揚州府推官四川縣州知州有來遠堂集兄永譽累官刑部侍郎有式古堂集書畫彙考

卷二十 冒徵君七十壽序

佟世思字儼若一字葭沚又字退菴一作退之先世居佟佳地方



姓佟佳氏省言以佟爲氏隸漢軍鑲藍旗兵部尙書國正次子生于無爲州署康熙壬子停八旗制科以任子得官丁卯之令臨賀庚午調思恩越年卒年四十有二有與梅堂遺集十二卷附耳書一卷鮓話一卷弟世集益菴哀而刻之佟世南有冬白堂詞萃湄大令佟鏞有沓渚集淵若先生法海有悔翁集景菴先生介福有西清載筆錄退思齋詩野園詩集畱都集關中紀行草采江小草

卷十四 耳書自序

卷十六 劉蒙園龍沙遺集序

卷二十 贈吳彥長表弟序

卷三十二 與周雪客書 又與彥公表叔書

卷三十六 游紅螺山記 悠然堂記 重修思恩縣公

堂記

卷五十 先高曾祖三世行略 先淑人傳

喻成龍字武功隸漢軍正藍旗由蔭生任安徽建德縣知縣  
歷池州府知府江西臨江府知府官至湖廣總督著有塞  
上集

卷三十六 池陽書院記

張純修字子敏號見陽溇陽人隸漢軍正白旗山西巡撫張  
滋德子貢生累官安徽廬州府知府

卷十八 飲水詩詞集序

卓爾堪字子任雅頌集  
作子立自號寶香山人明靖難忠臣惟恭先

生裔隸漢軍 旗乙卯從李文襄征閩逆爲右軍前鋒

嘗集勝國遺民詩十二卷附自著近青堂詩宋牧仲吳蘭

次爲之序同以詩稱者蘇良嗣吳秉謙于養志張雲翼梁  
儒婁鎮遠卞之鑰孫川于鼇鍾喟韓奕徐大枚羅萬成

卷十八 遺民詩序

闕

卷五十 遺民小傳

錄六

范承勳字蘇公

一作銘公

號眉山別號九松范文程弟三子廕生

兵部員外郎歷官御史廣西巡撫雲貴總督兩江總督增  
修文正祠墓撰世德源流碑康熙四十三年以兵部尙書  
致仕又十年卒著有通鑑參注雞足山志世美堂詩文奏  
疏

卷十八 龍淙雜詠序

卷三十七 清溪莊記

郎廷極字紫衡號北軒先世居廣甯隸漢軍鑲黃旗山東巡

撫郎永清弟四子歷官河南鹽法道山東登萊道福建按察使浙江布政使江西巡撫漕運總督康熙五十四年卒謚溫勤著有文廟從祀先賢先儒攷勝飲編集唐要法

卷十二 題蔣毓英重刻漢紀序 蔣刻南唐書序

金德純字素公遼陽人隸漢軍正紅旗著有旗軍志一卷曹倦圃輯入學海類編

卷十六 或語集序

范承烈字彥公范文程弟四子康熙三十八年由內閣侍讀學士遷內閣學士累官戶部侍郎兵部侍郎有雛鳳堂集卷十六 與梅堂遺集序

劉廷璣字玉衡號在園隸漢軍鑲紅旗由廕生累官浙江溫處道康熙四十年遷江西按察使降江南淮徐道著有在

園雜志四卷葛莊編年詩十三卷五十三年合已刻未刻  
總爲葛莊分類詩鈔十四卷

卷十四 在園雜志自序

卷十八 葛莊詩鈔自序

揆敘字凱功號惟實居士成德弟任佐領康熙三十五年由  
二等侍衛授侍讀累官都御史謚文端有隙光亭雜識六  
卷益戒堂詩集八卷後集八卷雞肋集一卷雜識強半說  
經鍾義別錄出刻入畱坵叢書

卷一 刻漏賦

卷十八 益戒堂詩集自序

鄂海溫都氏白署吳遜世居納殷江地方隸滿洲鑲白旗由  
內閣中書累官陝西布政使陝西巡撫川陝總督康熙四

十九年移督湖廣五十二年仍督川陝雍正三年卒有撫苗錄

卷三十七 重修西嶽廟記

卷四十二 萬壽亭碑記

聖德撫苗碑銘

范時崇字自牧號蒼崖范承謨子以廕入監讀書康熙二十三年授遼陽州知州歷官直隸順德府知府天津道貴州福建按察使山東布政使廣東巡撫浙閩總督左都御史兵部尙書

卷十六 抱犢山房集序

阜保號鶴亭丁氏世居遼陽地方隸漢軍正黃旗原任郎中丁應元子康熙十三年爲內府郎中累擢內務府總管因

老乞休食一品俸乾隆十一年年九十有八爲建坊表又  
一年卒謚文恪

卷三十七 恭誌 追賜御書奏對始末

宗室文昭字子晉號菴嬰居士自署曰北柴山人原封鎮國  
公百綬子從漁洋游辭爵讀書杳夏重以宗室高人序其  
集康熙己卯 特命宗室應鄉試以後場用于書語被放  
居臺溪有疏桐閣松閒草堂味根書屋棗香閣晚梅軒坐  
忘菴笙廬枕柝軒曳履齋若近郊草堂醉煙亭杪欒樹菴  
水南莊縱目樓說餅齋則別業也所與往還者姜西溟查  
橫浦王樓邨郭于宮沈椒園張匠門符幼魯柯南陔王載  
揚鮑冠亭巢寄齋諸人雍正壬子九月卒年五十三著有  
紫幢軒詩曰古緝集三卷松風塵餘集二卷蟄吟東屯集

在告集交春集各一卷古瓚續集二卷龍鍾集飛騰集知  
田集各一卷雍正集二卷松風文集四卷檜棲草二卷畫  
屏齋稿槐次吟各一卷艾集二卷臺溪集石孟集盤山紀  
游草瓢居草病榻吟各一卷康熙庚寅錄天演詩爲宸夢  
集三卷各箸小傳手錄漢晉至漁洋山人詩爲古詩管唐  
詩管五朝詩管十四冊舊爲松禪居士所珍弄戊戌四月  
舉贈韻詩題云敢問伯羲是紫幢一流否

卷十八 古瓚集自序

卷二十一 手鈔詩管跋尾

安圖關爾嘉氏官書作瓜爾佳或作古爾佳今俗自稱關氏  
世居蘇完地方隸滿洲正白旗內閣學士詹霸孫官郎中  
卷四十七 大通河墓碑



劉淇字武仲一字龍田號南泉其先確山人隸漢軍鑲白旗  
父毓英官山東按察使遂家濟甯工詩古文著有周易通  
說禹貢說助字辨略堂邑志衛園集

卷六 堂邑賦役論 里甲論 設險

卷十一 助字辨略序

劉汶字魯田淇弟康熙丁卯科舉人受知

憲廟當時有二難之目以候選終著詔對一卷太極答問一  
卷陳言一卷女訓一卷詩一卷雜文一卷

卷三十 預備倉貸穀私議

能泰那木都魯氏世居瓦爾喀渾春地方隸滿洲正白旗參  
領伊瑪喇長子襲雲騎尉世職

卷四十七 光祿大夫一等阿思漢呢哈番兼管佐領先

考伊公府君行實碑記

阿金字雲舉郭絡羅氏隸滿洲鑲白旗康熙辛未進士出王  
漁洋之門改庶吉士散館授檢討有培風堂集索泰介山  
塞爾登紫峰明鼐遠邨吳孝登夔倫貴昌禹恭富森泰秋  
浦郭潔激泉德昌樹堂皆詞臣之有撰述者

卷四十七 光祿大夫王府長史伊爾根覺羅公墓表

巢可託

一作綺  
克托

字素侯一字寄齋巖覺羅氏官書作阿世  
顏覺羅

居瓦瑚木地方隸滿洲正藍旗由廕生授主事累官刑部  
尙書致仕後居房山有花雨松濤閣詩文集

卷四十七 贈光祿大夫參贊大臣護軍統領兼佐領巖

巖覺羅公神道碑 光祿大夫鑲白旗滿洲都統議政

大臣鎮安將軍那蘭公神道碑 資政大夫二等阿達

哈哈番刑部理事官古爾佳公碑銘

高其倬字章之號芙沼又號種筠先世自高密遷鐵嶺隸漢軍鑲黃旗康熙甲戌進士改庶吉士散館授編修五十九年以內閣學士巡撫廣西遷雲貴總督調閩浙復調兩江雍正八年以定萬年吉地授一等輕車都尉世職併前所得騎都尉爲三等男九年總督雲貴廣西三省平普思苗及猺獠乾隆元年改湖南巡撫三年以戶部尙書召卒于寶應諡文良有味和堂集六卷

卷二十一 自題白蘋紅杏集 自題懶後憂餘集

石芳字蘭汀一字雲樵隸滿洲康熙丙子舉人官佐領兼散騎郎有自怡堂詩草

卷四十七 資政大夫佐領兼護軍參領丞理護軍統領

事赫公神道碑文

年希堯字允恭廣甯人隸漢軍鑲黃旗湖廣巡撫年遐齡子累官廣東巡撫工部右侍郎雍正三年革職四年授內務府總管管理淮關稅務十三年削職乾隆三年卒著有視學測算刀圭面體比例便覽對數廣運萬數平立方表算法纂要總綱集驗良方同時疇人自顧用方奉 勅撰歷象攷成後編外蒙古明安圖靜菴子明新景臻滿洲博啟繪亭皆有論著

卷四十二 怡賢親王廟碑記

阿爾賽字弼臣一字雲谷隸滿洲鑲藍旗康熙丁丑進士改庶吉士散館授檢討累官光祿寺卿

卷十六 眞文忠公文集序

蔡珽字若璞號禹功別號無動居士又號松山季子蔡毓榮  
子康熙丁丑進士改庶吉士散館授檢討累官吏部尙書  
兼掌院學士直隸總督降奉天府尹有守素堂詩集

卷十八 味和堂詩序

福敏榜名傳敏

傳一  
作富

字龍翰號湘鄰富察氏世居訥殷地方

隸滿洲鑲白旗康熙丁丑進士改庶吉士散館歸班

世宗在藩邸時侍

高宗讀雍正元年特授內閣學士歷官吏部侍郎浙江巡撫  
湖廣總督吏部尙書掌院學士協理兵部侍郎左都御史  
十年入直 尙書房以署工部尙書協辦大學士乾隆三  
年授武英殿大學士十年予告加太傅二十一年卒諡文  
端六十年追贈太師

卷六十 稽古齋集序

卷二十一 樂善堂全集恭跋

卷四十三 重修英衛公廟碑記

年羹堯字亮工號雙峰年希堯弟康熙庚辰進士散館授檢討四十八年由侍講學士遷內閣學士歷官川陝總督甯遠大將軍加太保封一等公雍正三年調杭州將軍降防禦世所傳兵法天文術數諸書多僞託

卷十六 陸宣公集序

朱蘭泰朱一作誅字庸伯號會侯舒穆魯氏世居朱舍里地方隸

滿洲正白旗康熙庚辰進士累官翰林院侍講學士有於止齋詩同時儔同格承之有守餅集納喇芳泰次山官太僕爲左氏春秋學均爲諸襄七所推重

卷十一 饗禮補序

右作者六十九家文一百七十一首

八旗文經卷第五十七終

八旗文經卷弟五十八

作者考乙

鄂爾泰字毅菴西林覺羅氏

西一作錫

世居旺沁隸滿洲鑲藍旗

康熙己卯舉人襲佐領用侍衛雍正元年由內務府郎中  
授江蘇布政使累官雲貴廣西三省總督西北兩路經略  
投保和殿大學士入直 尙書房 南書房乾隆二年封  
襄勤伯八年兼掌院學士十年加太傅卒謚文端配享  
太廟有西林遺稿六卷于虛亭尙書鄂容安書類張文敏  
所見題詠有在詩草外者文則不可得矣

卷七 先農說 藉田說

卷十二 紫陽書院志序 大學士白公家傳序

卷十六 壬戌會試錄序 南邦黎獻集序



卷二十一 日知薈說恭跋

卷二十七 論人材奏

卷三十 聖廟歷代名賢從祀議

卷三十五 徵滇士入書院教

坊

刻期會課示文

坊

卷四十五

聖駕東巡

盛京恭謁

祖陵大禮

慶成頌

有序

卷四十六 平苗紀功鐵柱銘

宗室塞爾赫字慄菴一字曉亭號北阡輔國將軍泰蔭布素

子襲封奉國將軍官至倉場總督有春雪集三餘集懷音

集秋塞集各一卷大題曰曉亭詩鈔于伊都禮鶴鳴集坊

卷二十一 雷溪草堂詩跋

阿克敦字立恆一字恆巖章嘉氏先世居長白山斐雅那阿

地方隸滿洲正藍旗受學於王崑繩康熙己丑進士改庶吉士散館授編修五十六年以侍讀學士六十一年以內閣學士雍正二年以兵部侍郎三使朝鮮雍正十二年乾隆三年再使厄魯特十三年以刑部尙書協辦大學士兼掌院學士乾隆二十年致仕二十一年卒諡文勤有德蔭堂集十六卷

卷四十五 萬年頌

岳禮字蕉園那木都魯氏世居渾春地方隸滿洲正白旗康熙辛卯舉人累官陝西分巡漢興兵備道乾隆三十六年卒年八十有四詩文甚富子先福知黃州燬於火哀輯爲蘭雪堂集

卷二十一 鳳嶺雲屯圖自跋

鄂爾奇字季正一字復菴號驪客鄂爾泰弟康熙壬辰進士  
改庶吉士散館授編修累官戶部尚書兵部尚書兼步軍  
統領鄂忻文端弟五子有清虛齋集

卷四十五 河清頌

鄂禮鄂爾泰弟累官京畿道監察御史巡按直隸長蘆鹽政  
署理天津鎮總兵官

卷四十三 重修歷下亭碑

朱倫瀚字涵齋又字亦軒號一三先世山東歷城人隸漢軍  
正紅旗康熙壬辰二甲二名武進士官侍衛以書畫兼直  
武英殿養心殿改郎中出爲浙江甯波府衢州府知府  
升浙江糧儲道乾隆二年以御史用出署湖北驛鹽道復  
入爲御史兼公中佐領遷給事中擢副都統署侍郎二十

五年卒年八十有一著閒青堂集疏二卷詩十卷劉蓉洲  
賽都武狀元官總兵有滇南游草金班武舉人有聚英堂  
詩李紹祖官總兵亦能詩勦川楚逆匪歿於陣

卷三十七 重修林和靖先生墓記

達禮

鑑古堂帖題  
跋作達禮善

字履中鄂海子折節讀書從張匠門游詩

文清健官郎中有拳石堂集二卷

卷一 華山賦

卷三十七 重修杜工部祠堂記

卷五十六 弔漢江都相董子墓文

畱保字松喬阿什坦孫康熙辛丑會試

雍親王檢落卷 賜進士改庶吉士散館授編修三年中遷

侍講學士歷通政使禮部侍郎署掌院學士爲明史總裁

晚年以吏部侍郎調工部乞病自稱恤緯老人十餘年卒  
年七十七所居臨積水潭有含青樓宜亭諸勝

卷二十七 請耗羨不歸公奏 請休養旗人奏 陳山

東州縣被參緣由奏

莽鵠立字樹木一字卓然伊爾根覺羅氏先世居葉赫地方

隸蒙古正藍旗

世宗御極由理藩院筆帖式擢御史恭繪

聖祖御容改隸滿洲鑲黃旗巡視長蘆鹽政歷大理寺卿兵  
部禮部理藩院侍郎陝西甘肅巡撫正藍旗滿洲都統乾  
隆元年卒諡勤敏

卷七 鹽法沿革論

卷三十七 環水樓記

馬林保字聖謨號客齋輝發納蘭氏隸滿洲鑲紅旗

卷十八 種墨齋詩集序

唐岱字毓東號靜巖一號默莊隸滿洲 旗以蔭官參領

內務府總管盡付祖業與弟工山水出王原祁之門

聖祖御賜畫狀元時且園都統高其佩凱亭供奉傅雯均以

指墨稱

卷二十一 仿關仝廬山白雲圖跋尾 題山水册

伊福納字兼五一字肩吾又字抑堂馬林保從子伊麟子雍

正庚戌進士由員外郎累官御史雅頌集列伊麟前誤有

白山詩鈔誤菴農部卓奇圖有白山詩選

卷二十一 母太恭人手書孝經跋尾

徐炎字伯鈺號崑山隸漢軍正藍旗雍正庚戌進士官吏部

郎中有唐宋詩選

卷十八 誠正堂稿序 閒青堂詩集序

李鍇字鐵君一字眉山鐵嶺人隸漢軍正黃旗湖廣總督調補刑部侍郎李輝祖子原任官庫筆帖式隱盤山號鷹青山人別號幽求子又號焦明子乾隆丙辰薦試博學鴻詞復舉經學年七十卒工詩古文詞精力尤殫於經史著有原易春秋通義尙史睫巢集後集石東村永甯同舉經學亦家田盤方望溪爲作二山人傳盧雅雨刻鐵君與陳石閩戴遂堂詩稱遼東三布衣宗室恆邕邕兆處士牧牛拙巷老人明泰皆一時隱君子鐵君兄鉉有惟清齋詩藁

卷二

景陵九芝賦 擬西征凱旋賦 太學石鼓賦 焦螟賦

紫瓊巖賦 齊陰陽賦 吉慶草賦 青麟賦

卷七 伍員諫平越論 三史論 漸離論 理數論

武庚論 飼牛說 蠅說

卷十一 原易自序 春秋通義自序

卷十二 尙史序傳 陳氏譜系序

卷十六 馬司寇集序

卷十八 睫巢後集自序 石東村詩序 祝豫堂詩序

陳石閭詩序 遡源堂詩序 汪青蓮維頌二君詩

序 陳石閭選詩序

卷二十 送陳橘洲之古北口序 贈唐青照序 贈藏

山上人序

卷二十二 金魯山別駕全城圖跋 題友人邊事後



鎮安將軍馬公告身跋 題殉硯說後 題戴竹圖

卷三十一 擬 詔錄八旗漢軍舊家子弟羣臣謝表

卷三十三 辭薦舉詞科與友人書 與王蘭谷書 上

濟齋夫子書 與王蘭谷書二 上望溪侍郎書 與

陳橋洲書 上濟齋夫子書二 報王蘭谷書 與陳

盍公隱君書

卷三十七 廡青山堂記 梅子塢記 倒景潭記 牯

牛精舍記 樗移小記爲納蘭克明作 是亦樓記

汎泉記 高寄亭記 卜研記

卷四十三 贈忠武將軍周公碑記

卷四十五 青麟頌 雷孝子讚

卷四十八 資政大夫輕車都尉參領衛唐李公三世墓

表 弼公王翁墓表

卷四十九 法天禪師生塔銘 附

卷五十一 焦明子傳 馬山人傳 孝僧傳 張翬傳

楊成義傳 李處士傳 洪陔華傳 二陳生傳

少司馬宗室塞公家傳 石絢菴制府家傳 傅閣峰

尙書家傳

吳麟字子瑞號晚亭別號黍谷山樵吳查拉氏隸滿洲鑲黃旗康熙戊子舉人官內閣中書舍人乞休乾隆丙辰薦舉博學鴻詞與修明史本紀出其手又爲明史綱目纂修官奏食中書俸兼工山水有黍谷山房集

卷三十七 江源記

黑瑒字石夫舒舒覺羅氏世居葉赫地方隸滿洲正紅旗歲

貢生乾隆丙辰薦舉博學鴻詞時同徵者眉山晚亭外濤

園太常西成納蘭慎齋峻德王蘭谷長住原名陳橘洲景

中其遺文皆不可復得矣

石夫姓詞科寧錄  
作葉赫覺羅誤

卷三 秋懷賦 弔金臺賦

陳景元字石閻隸漢軍正紅旗有居白室詩集

卷五十一 李睂山生傳

鮑鈺字冠亭一字西岡號辛圃自號夢庵居士晚號待翁山

西應州人隸漢軍祕書院大學士鮑承先裔由貢生歷官

浙江長興縣知縣海塘通判乾隆十二年署嘉興府海防

同知嘗爲長興王豫敬所梓孔堂小草以行世卒葬杭之

青芝鵑吳越相鮑慶臣采地著有道腴堂全集

卷三 滋蘭賦 查賦

卷七 風論 雜說二首

卷十四 裨勺自序

卷二十 送金壽門序

卷三十八 俊逸亭記 前度軒記

卷四十六 羹唐齋銘 坐吟翰銘

卷四十九 陳姬墓誌銘

顧琮字用方伊爾根覺羅氏先世居松阿里烏喇地方隸滿洲正白旗改隸鑲黃旗禮部尚書願八代孫由監生修算法授員外郎遷御史雍正四年巡視長蘆鹽政厯官太常寺卿直隸總河河道總督漕運總督河東總河江蘇浙江巡撫協辦吏部尚書事乾隆十九年卒有靜廉堂詩文集

卷十六 方望溪集序

卷三十八 靜廉堂記

傅澤洪字育菴一字穉君號怡園隸漢軍 旗累官江南

淮揚道按察司副使有行水金鑑一百七十五卷

卷十二 行水金鑑序

高斌字東軒世居遼陽地方隸漢軍鑲黃旗雍正十三年改隸滿洲稱高佳氏歷官蘇州織造廣東布政使河東副總河江南河道總督乾隆十年以吏部尚書協辦大學士十二年授文淵閣大學士十八年以內大臣卒於南河工次謚文定有固哉草堂集兄述明有積翠軒集

卷十二 焦山志略序

卷十八 敬一堂詩鈔序

卷三十四 答中州陳汝咨撫軍書

趙宏恩字芸書隸漢軍鑲紅旗由歲貢捐納道員累官兩江總督工部尚書京口將軍左都御史乾隆三十二年卒有玉華堂詩集趙濂竹漪有焦雨山房集

卷三十八 朱文公闕里廟記

唐英字俊公一字叔子晚號蝸寄老人瀋陽人隸漢軍正白旗內務府員外郎兼佐領歷官淮關九江關粵海關監督工書畫顧震滄爲選錄詩文自標目曰陶人心語以督陶政於浮梁最久云子寅保以編修改內務府郎中有秀鍾堂詩鈔佟儼若子鉞字秉虔有爾爾齋詩存

卷十二 史氏譜序

卷十四 醫學全書序

卷十八 固哉草亭集序

卷二十二 題吳堯圃先人譜牒卷子

卷五十二 陳勳天小傳

常安字履坦葉赫納蘭氏隸滿洲鑲紅旗康熙癸酉科舉人

雅頌集作岸生  
今據梓里文存

刑部筆帖式山西通判雍正戊申年由冀

甯道遷廣西按察使歷雲南按察使布政使十一年由貴  
州布政使遷江西巡撫終浙江巡撫少學文於韓文懿有  
受宜堂集受宜堂者官山西時

世宗憲皇帝以潛藩降香五臺所賜奎墨也及撫浙遂以名  
其集其子目曰醉紅亭集者文二卷詩一卷詩餘一卷官  
黔時所刻也曰瀚海前後集者乾隆元年由江西入都  
命督理北路糧餉駐鄂爾昆時所輯也曰瀋水三春集者  
文九卷詩三卷四年授 盛京兵部侍郎後所作也曰班

餘翦燭集者文九卷詩五卷五年內 召改刑部左侍郎  
時所編也日駐淮集者文七卷詩五卷五年冬至六年冬  
官漕運總督時所作也編有廿二史文鈔一百九卷古文  
披金二十四卷書肆通行其得禍也以論著譏刺時事中  
蜚語舛非其罪

卷三 盛京物產賦 盛京瓜果賦 盛京蔬菜

賦 杏花賦 永平梨賦

卷八 魯仲連論 賈誼論 王景論 嚴光論 謝安

論 李光弼論 韓琦論 姚景行論 馬人望論

內族襄論 曾銑論

卷九 明儒論 尙儉論二首 眞僞辨 武帝斥方士

罷田輪臺說 謙說 制鼠說 史評 錄二



卷十四 箕踞冷語序

卷十六 瀚海集自序 拙存堂文集序 廿二史文鈔

序例

卷十八 吳穎菴滇南雜詠序 澄觀樓倡和詩序 懷

清堂集序

卷二十二 跋老泉審勢論後 題晁補之雜論石奮傳

後 題葉適論罷宏詞科後 題阮嗣宗詠懷詩後

題五代史宦者傳後 題石介陰德論後 題徐孝節

先生文集

卷三十 上諾大中丞開汾河議

卷三十四 二復方中丞書 與吉安徐太守書 致雲

南臬司書 與貴州屬員書

卷三十八 游臥龍山記 來牛石城記 盛京風俗

記 游西山記 堂子山藥師院記 下河水利記

游蜀山湖記 游東磊記

卷四十三 修造廣西司監碑記 邱氏祠堂碑記

卷四十五 盛京人物頌

皇太后五十萬壽頌

卷四十六 屏風箴 躁箴 惰箴 畏言箴 鐙銘

扇銘 筆銘 卮銘 半硯銘

卷五十二 烏蒙烈女傳 烏蒙義役傳

卷五十五 連珠六首

伊都立字學庭伊爾根覺羅氏先世居瓦爾喀隸滿洲正黃  
旗大學士謚文端伊桑阿第三子康熙己卯舉人時年十

三雍正元年由內務府員外郎遷詹事累官雲貴總督書  
學李北海有嘉樂堂詩集弟伊爾謹字翼庭有印月齋詩  
集滿大臣如澹士司寇赫奕焜山尙書覺羅滿保夏陳光  
祿國璠松如侍郎德齡桐軒尙書夸岱雲依少宰嵩壽有  
亭宗伯雙慶魯望將軍薩哈岱虛宥京尹博清額斗南侍  
郎全魁瞻園尙書託庸蘭崖侍郎恭泰贊侯侍郎福增格  
時泉閣學圖敏皆有集

卷十九 明善堂詩集序

耿鱗奇字念亭隸漢軍正黃旗雍正十二年官廣西按察使  
卷三十八 陡河海陽隄記

服庸號費隱山人東鄂氏先世爲棟鄂部長隸滿洲正紅旗  
承襲騎都尉兼一雲騎尉

卷十九 餘廉堂詩序

雅爾圖隸蒙古鑲黃旗雍正十三年由工部郎中授副都統  
歷官參贊大臣副都御史兵部侍郎河南巡撫刑部侍郎  
倉場侍郎乾隆三十二年卒

卷二十 紀 恩序

卷四十三 惠濟河碑記

覺羅雅爾哈善字蔚文隸滿洲正紅旗年十七舉翻譯科官  
中書應陽城馬周科改御史歷內閣侍讀學士通政使乾  
隆三年革四年授四川龍安府知府歷江蘇松江府蘇州  
府知府擢福建汀漳道王次山爲撰去思碑且贈序以旌  
其治行歷福建按察使江蘇浙江巡撫戶部侍郎兵部尙  
書終參贊大臣靖逆將軍其外也七十一訟言其寃藏有

舊本韓文今歸常熟瞿氏

卷十六 在亭叢彙序

卷三十九 吳縣陶氏義莊記

卷四十三 重修于清端公祠并清理祭田碑記

那蘇圖字義文戴佳氏隸滿洲鑲黃旗襲雲騎尉世職雍正五年由鑾儀使授兵部侍郎旋授黑龍江將軍歷奉天將軍兵部刑部尙書乾隆二年授兩江總督歷湖廣閩浙直隸總督十四年卒諡恪勤

卷十二 海國聞見錄序

黃廷桂字丹崖隸漢軍鑲黃旗襲雲騎尉官侍衛雍正二年由宣化總兵擢四川提督九年授四川總督乾隆元年缺裁仍爲提督遷古北口提督甘肅巡撫兩江總督十八年

再督四川二十年授武英殿大學士移督陝甘二十三年  
加太保封忠勤伯二十四年卒諡文襄入祀賢良祠圖形  
紫光閣

卷十七 兩江探風錄序

卷四十三 重修通濟堰碑文

尹繼善字元長號望山章佳氏原居長白山俄漠和蘇魯繼  
遷宜漢阿拉地方隸滿洲鑲黃旗大學士諡文恪尹泰子  
雍正癸卯進士改庶吉士散館授編修五年由侍講署廣  
東按察使一督雲貴三督川陝四督江南乾隆十三年以  
吏部尙書協辦大學士歷文華殿大學士 尙書房總師  
傅兼掌院學士三十六年卒年七十六贈太保諡文端有  
詩集十卷

卷十四 義學彙記序

卷二十

皇上六旬萬壽序

卷三十九 畱松裔少宰樓居圖記

布顏圖字竹蹊號嘯山烏亮海氏世居喀拉沁地方隸滿洲  
鑲白旗累官綏遠城副都統著有畫學心法問答一卷集  
古一卷

卷十四 畫學心法序

愛必達鈕祜祿氏隸滿洲鑲黃旗恪僖公遐必隆孫乾隆九  
年由吏部郎中署江南布政使歷貴州布政使山西浙江  
貴州雲南巡撫雲貴湖廣總督二十八年謫戍伊犁三十  
六年卒有黔南識略三十二卷

卷十二 黔南識略序

舒赫德字伯容別字明亭舒穆魯氏世居琿春都瑪呼村地方隸滿洲正白旗協辦大學士徐元夢孫由筆帖式授中書雍正七年入南書房預機密乾隆九年任兵部侍郎兼步軍統領累官參贊大臣陝甘總督伊犁將軍三十八年授武英殿大學士兼掌院學士充文淵閣領閣事四十二年卒贈太保謚文襄經理準回二部最久回部金川平定兩次圖象紫光閣

卷二十七 八旗開墾邊地奏

楊應琚其先山東沂水縣人徙遼陽州隸漢軍鑲白旗改正白旗廣東巡撫楊文乾子歷官河東西甯道甘肅按察使甘肅山東巡撫兩廣總督乾隆二十九年以陝甘總督拜



東閣大學士終雲貴總督吾宗之以文學著稱者扶九洗  
馬萬程補籬先生天樞復菴太守天寵敬齋大令師震逸  
菴司庫永清先高祖侍郎公有椿蔭堂詩文存稟

卷五十二 賈烈女傳

常鈞常安弟雍正四年由繙譯舉人授中書累官甘肅安西  
道乾隆二十五年由江南淮徐海道擢副都統刑部侍郎  
署江西巡撫歷雲南湖南巡撫降三等侍衛五十一年與  
千叟宴五十四年卒

卷十四 劉念臺人譜序

李瀚字文瀾又字受川先世居遼陽地方隸內務府鑲黃旗  
漢軍雍正壬子舉人初知山東榮城縣官至雲南巡撫乾  
隆四十年卒

卷十九 南阜山人詩集序

愛必達阿拉克奇特氏隸蒙古正白旗官副都統蒙古先進  
遺著傳世甚稀大谷山堂外嵩貴郵囊存略景文抱筠亭  
集其表表者

卷五十二 開國佐運功臣宏毅公額宜都家傳

觀保字伯容一字補亭索綽絡氏曾祖都圖 賜姓石氏隸  
內務府正白旗滿洲石東村子乾隆丁巳與從弟德保並  
舉進士改庶吉士散館授檢討累官禮部尙書左都御史  
嘉慶四年追諡文恭有補亭詩稟

卷二十 孝義贈言

國梁字隆吉一字丹中號笠民榜名納國棟奉 敕改今名  
哈達納喇氏隸滿洲正黃旗乾隆丁巳進士改庶吉士散

館改吏部主事歷階宮庶外授秦粵丞守洊擢貴州糧驛  
道有澄悅堂集十四卷佛喜怡仙文明魯齋額勒洪坦菴  
蘇章阿雷巖保祿在中羅泰西園柏格行園額爾登夢恩  
胥傳顯令宜永亮蕪洲那霖雨蒼穆丹荔翁覺羅成桂雪  
由懷謙地山皆滿洲詩人

卷二十二 自題河橋集

德福伊爾根覺羅氏隸正白旗滿洲由刑部郎中累官福建  
布政使乾隆三十二年謫戍明年擢湖北按察使歷署湖  
南巡撫四川雲南總督降侍衛累官至刑部尚書署協辦  
大學士四十六年卒諡勤肅

卷十二 鼓山志序

瑪興阿字敬齋乾隆間官武功縣知縣漢軍白登明林九沈

光榮親如佟國瓏信侯遲維坤簡堂董宏毅任菴楊朝正  
匡齋郎廷棟樸齋馬文毅曾孫日炳皆以循吏名於時

卷十二 重刻武功縣志序

阿桂字廣庭號雲巖阿克敦子乾隆戊午舉人以蔭生補大  
理寺丞乾隆十年以吏部郎中出爲江西按察使累擢至  
工部侍郎二十六年擢隸正白旗金川平封一等誠謀英  
勇公以吏部尙書協辦大學士四十二年授武英殿大學  
士四十九年加輕車都尉世職嘉慶二年卒贈太保諡文  
成平定西域金川廓爾喀三次圖象紫光閣

卷十 心悟 摘錄

卷十九 西林遺彙序

卷二十一

皇清開國方略恭跋

卷二十七 論增兵籌餉奏

卷三十一

皇清開國方略告成進表

卷三十九

聖駕東巡記

舒瞻字雲亭他塔喇氏世居札庫木地方隸滿洲正白旗乾隆己未進士預修八旗滿洲氏族通譜歷官浙江桐鄉平湖海鹽知縣乾隆十九年署乍浦理事同知工詩有蘭藻堂集十卷嘗爲願行之珽周徵君京刻遺詩

卷二十二 飛鴻堂印譜書後

鄂寶乾隆三十三年官山西巡撫

卷十二 壽陽縣志序

博明字希哲一字晰齋博爾濟吉特氏隸滿洲鑲藍旗兩江  
總督邵穆布孫乾隆壬申進士改庶吉士散館授編修丙  
子主廣東試累官洗馬外任雲南迤西道降兵部員外郎  
博學多識於經史詩文書畫藝術馬步射繙譯 國書源  
流以及蒙古唐古忒諸字母無不貫串嫻習著有鳳城瑣  
錄一卷西齋偶得三卷西齋詩輯遺三卷與佟裕軒學士  
圖鞞布並以巨人長德爲學者宗它如遼東三老農曹七  
子其遺篇均不多見鍾羲重刻偶得於杭州譚獻序之

卷十四 鳳城瑣錄自序 西齋偶得自序

卷二十二 題評本昌黎詩集

阿肅字敬之號雨齋伊爾根覺羅氏隸滿洲鑲白旗乾隆十

九年進士改庶吉士散館授檢討三十九年以侍講入直  
尙書房歷官光祿寺卿左副都御史吏部侍郎降官至  
光祿寺少卿五十七年卒

卷三十九 雙節堂記

于宗瑛字英玉號紫亭于成龍孫乾隆十九年進士改庶吉  
士散館授檢討官至江南道監察御史有來鶴堂集岸亭  
中書賽音布大盜居士長海眉濱員外善聰虛白冠軍劉  
涓雲臣孝廉賈虞龍皆一時文士之冠

卷二十二 游馬氏園記書後

七十一字椿園滿洲正藍旗人乾隆十九年進士著有西域  
聞見錄八卷一名西域瑣談蓋官糧員時作故新疆識略  
庫車大臣表無其名雅頌集以著番社采風圖考之六十

七併爲一人誤洪鈞元史譯文證補以爲七十一叟尤誤

卷十 準噶爾傳論

卷十三 西域聞見錄序 新疆道里表序 絕域諸國

傳序

朱孝純字子穎號思堂一號海愚朱倫瀚子乾隆壬午舉人  
起家四川簡縣知縣擢敘永同知重慶府知府移守泰安  
遷兩淮鹽運使工詩文師事劉海峰能畫嘗作秦岱全圖  
有海愚詩鈔十二卷子朱爾廣額有論河工二書載嘯亭  
雜錄漢軍甘運源道淵亦海峰弟子與汪松蒼巖顧邦英  
洛耆王麟書及弟運瀚子灝五人之詩合刻爲海沱集

卷十九 羅兩峰登岱詩小序

宗室敦誠字敬亭別號松堂英親王阿濟格裔理事官瑚玠



子出繼叔祖經照已故子甯仁爲嗣有四松堂集詩二卷  
文二卷鶴鶴菴筆塵一卷紀文達爲之序兄敦敏有懋齋  
詩集

卷十 駁胡氏論段司農 駁發明廣義論岳武穆

卷三十九 拙鵲亭記 松亭再征記

卷五十六 璞翁將軍哀辭 祭周立崖先生文

福保字嘉申號景堂陳氏隸漢軍正白旗乾隆丙戌進士散  
館授編修改御史官至奉天府府尹陳大文禾邨亦工詩  
卷十七 蘿月軒賦鈔序

福康安字瑤林富察氏世居沙濟地方隸滿洲鑲黃旗大學  
士一等忠勇公傅恆子累官東閣大學士雲貴總督封忠  
銳嘉勇貝子嘉慶元年卒于軍贈郡王銜諡文襄配享

太廟

卷四十四 重修雙忠祠碑記

延福祖籍涿州姓馮氏隸內務府漢軍鑲黃旗保和殿大學士諡文肅英廉子文肅經進文見文穎續編

卷二十二 夢堂詩彙跋

全德字惕莊戴佳氏隸滿洲 旗乾隆閒任兩淮鹽政

卷三十九 重建儀徵巖院記

宗室宜興字桂圃八分公西安將軍普照孫恆仁子厯官刑部侍郎倉場侍郎江蘇巡撫左都御史嘉慶十四年卒

卷二十二 月山詩集跋

勒保字宜軒費莫氏世居布爾哈圖地方隸滿洲鑲紅旗大學士溫福子以功封威勤伯嘉慶十四年授武英殿大學

八旗文網卷五十八  
卷之  
二  
士十五年降十六年復授武英殿大學士十九年予告二  
十四年卒諡文襄

卷四十六 南籠紀功鐵柱銘

鼇圖字伯麟號滄來于宗瑛子乾隆三十五年舉人歷官江  
蘇徐州府蘇州府知府嘉慶十三年由淮揚道遷按察使  
有習靜軒詩文集

卷四十四 重建徐州府節孝祠碑記

和甯字太葦後更名和瑛額爾德特氏爾一作勒隸蒙古鑲黃旗

乾隆辛卯進士五十一年由戶部員外郎授安徽太平府  
知府歷官至盛京將軍刑部尚書道光元年卒諡簡勤奉  
使衛藏及西域前後凡十二年著有讀易滙參三州紀略

易簡齋詩鈔

卷四 西藏賦

伊湯安字小尹號耐圃拜都氏世居葉赫地方隸滿洲正白旗乾隆三十六年舉人嘉慶元年自括蒼移守嘉興成郡志八十卷阮文達序謂其體例有三善七年擢貴州督糧道歷官貴西道貴州雲南河南按察使太常寺卿內閣學士子鍾昌典試江南檢落卷得山陽潘四農

卷十三 重修嘉興府志序例

卷三十九 重修曝書亭記

卷五十二 杜尙書臻傳 名宦郭公廷翥傳

西清字研齋鄂爾泰曾孫著有黑龍江外紀八卷

卷二十三 黑龍江輿地圖略題識

右作者六十三家文二百六十七首

八旗文經卷第五十八終

八旗文經卷第五十九

作者考丙

鐵保字冶亭一字鐵卿號梅庵舊譜姓覺羅氏自稱趙宋之裔後改棟鄂隸滿洲正黃旗乾隆三十七年進士四十五年由吏部郎中授少詹事累官吏部侍郎掌院學士漕運總督山東巡撫嘉慶九年進所輯八旗詩首集二十六卷正集一百六卷餘集二卷 賜名熙朝雅頌集尋授兩江總督十四年謫戍烏魯木齊起喀什噶爾參贊大臣累官吏部尚書十八年謫戍吉林道光元年以洗馬致仕工書法與劉相國石庵翁鴻臚覃溪齊名有惟清齋全集白山詩介淮上題襟集

卷五 後園賦 浴鶴賦

卷十九 白山詩介自序

卷二十三 人帖書後 吉林白山書院榜額跋尾

卷三十一 編錄八旗滿洲蒙古漢軍詩成進表

卷三十九 徠甯果木記 記與止齋司空論藥

卷五十三 甘道淵傳 瑛夢禪慶似村合傳 恆中允

益亭傳

百齡字子頤號菊溪承德府張三營人隸正黃旗漢軍陟州府知府法良子乾隆三十七年進士改庶吉士散館授編修嘉慶五年由順天府府丞遷湖南按察使累官湖廣總督十二年由福建汀漳龍道再爲湖南按察使累官兩江總督協辦大學士封三等男二十一年卒謚文敏有除邪紀略守意龕集弟香巖先生桂齡乾隆癸丑進士嘉慶中

官九卿淡泊自守道光九年始轉兩階爲副憲論者賢之

卷十三 陵川縣志序

卷三十四 論河工與諸大臣書

李堯文字宛林號香湖鐵嶺人隸 旗漢軍乾隆丁酉科

舉人官江蘇淮安府知府著有香湖文存一卷詩鈔二卷

卷十 讀蕃夷諸將傳

法式善字開文號時帆一號梧門本名運昌 詔改今名國

語奮勉也蒙烏吉氏隸蒙古正黃旗高祖名孟成內務府

郎中內務府俗例取一字爲姓又稱孟氏奉 旨姓伍堯

氏乾隆四十五年進士改庶吉士散館授檢討四十八年

任國子監司業歷官侍講學士五十九年任祭酒嘉慶九

年以洗馬充文淵閣校理累官庶子有存素堂詩文集博



稽掌故預修 宮史所居在厚載門北以詩龕自題書室  
與東鄉吳嵩梁同選並時人詩爲朋舊及見錄自署小西  
涯居士嘗著李文正公年譜五卷著錄孫祠書目王惕甫  
序刻於揚州後重訂爲七卷刊於京師又以陶廬爲號有  
陶廬雜錄六卷嘉慶丁丑北平陳預於濟南付梓採永樂  
大典輯有稼軒集鈔存九卷疏議劄子論文啟三卷詩一  
卷詞五卷附年譜一卷詞多汲古閣本所遺萬載辛啟泰  
鐫版於江西所著梧門詩話未刊稿本今藏番禺葉氏其  
餘有資典故著而未刻者甚多孫來秀有掃葉亭詩集

卷十 西涯考

卷十三 北海鄭君年譜序 洪文襄公年譜序 重修  
族譜序 康熙己未詞科掌錄序 鶴徵錄序 重刻

己亥同年齒錄序 金石文鈔序

卷十五 槐廳載筆自序 清祕述聞自序 備遺雜錄

自序

卷十七 洞麓堂集序 慕堂文鈔序 春融堂集序

成均課士錄序 成均課士續錄序

卷十九 金青儕環中廬詩序 蔚巖山房詩鈔序 錢

南園遺詩序 尚綱堂詩集序 存素堂詩初集自序

容雅堂詩集序 竹屋詩鈔序 梧門詩話例言

朋舊及見錄例言

卷二十 贈曹復堂序 何雙谿先生六十壽序 陸先

生七十壽序

卷二十三 江湖後集跋 國子監司成題名碑錄跋

翁覃溪先生臨文待詔書跋 紀曉嵐尙書藏順治十八年摺紳跋 鄂剛烈遺墨跋 德文莊公遺墨跋 石倉十二代詩選跋 南宋書書後 臧和貴行狀書後 成雪田尺牘書後

卷三十五 與邵二雲前輩書 與徐尙之論文書 復

王穀旉進士論仕書 復汪均之書 與王柳村書

卷四十 南薰殿古像記 歷代帝王名臣遺像記 誠

求堂記 重裝錢南園副使畫馬記 戒臺圖裕軒曹

慕堂兩先生祠記 思過齋記 校永樂大典記 借

綠山房畫集記 校全唐文記

卷四十四 重修尙氏家廟碑文 明大學士李文正公

畏吾村墓碑文

卷四十八 例授奉直大夫禮部主事吳君墓表 耿處

士墓表 贈武功將軍雲南通判岸亭陳公墓表 朝

議大夫禮部員外郎前翰林院編修江南道監察御史

謝君墓表 朝議大夫甯夏府知府何君墓表

卷四十九 南陽清軍同知林君墓誌銘 封中憲大夫

浙江分巡溫處兵備道李公墓誌銘

卷五十三 武虛谷傳 周贊平傳 侍衛恆公家傳

先妣韓太淑人行狀 洪稚存先生行狀

松筠字湘浦瑪拉特氏隸蒙古正藍旗繙譯生員筆帖式乾

隆四十八年由戶部員外郎超擢內閣學士嘉慶十六年

以兩廣總督協辦大學士十八年授東閣大學士二十五

年謫驍騎校

宣宗御極起副都御史遷都御史進所纂新疆識略十二卷  
歷熱河都統吏部尙書道光二年降員外郎遷光祿寺少  
卿累官兵部尙書十四年以都統銜休致明年卒年八十  
有二贈太子太保諡文清入祀惠遠城祠著有古品節錄  
綏服紀略伊犁總統事略輿圖理琛異域錄孫紹昌西征  
紀略張浚滇南新語福慶異域竹枝詞薩英額吉林外記  
榮沛一得錄皆有裨實用若近人課子隨筆節鈔等書粗  
率膚淺非其倫也至所謂孝友經注尤儒者所不齒

卷十三 綏服紀略序

卷十九 靜宜室詩集序

卷二十八 阻 東巡奏

卷四十 巡邊記

宗室晉昌恭親王常穎裔初授三等侍衛輔國將軍襲鎮國公累官盛京將軍嘉慶八年奪爵十年賞三等侍衛爲烏什辦事大臣累官伊犁將軍二十三年仍襲公爵歷官兵部尙書綏遠城將軍道光八年卒

卷十三 伊犁總統事略序

玉保字德符一字閩峰鐵保弟乾隆辛丑進士改庶吉士散館授檢討累官吏部左侍郎 南齋供奉嘉慶三年卒著有蘿月軒存彙

卷五 灤陽校射賦

蔣攸銛字穎芳號礪堂蔣國祥孫山東平度州知州蔣韶年子乾隆四十九年進士改庶吉士散館授編修道光四年以直隸總督協辦大學士七年授體仁閣大學士督兩江

十年降補兵部左侍郎卒諡文勤有繩樞齋集黔軹紀行集

卷二十三 書先府君吏隱集後

卷二十八 謝頒遇變 論旨陳言奏

成書字倬雲號誤庵穆爾察氏隸滿洲鑲白旗乾隆四十九年進士辛亥由戶部主事授侍講官至戶部右侍郎有多年歲堂集及古詩選

卷二十三 清豔堂近稿跋

卷四十 三聖祠記

宗室裕瑞字思元豫通親王裔封輔國公嘗畫鸚鵡地圖卽西洋地球圖通西蕃語謂佛經皆自唐時流入西藏近日佛藏皆出一本無可校讐乃取唐古特字譯校以復佛經

唐本之舊凡十餘篇悉存於家伯熙云猶及見之著有思  
元齋全集續集

卷十 文采說

那彥成字韶九一字東甫號繹堂阿桂孫乾隆五十四年進  
士改庶吉士散館授編修五十六年以侍講入直南書  
房嘉慶四年以工部尚書兼掌院學士累官陝甘總督直  
隸總督平滑縣賊賞三等子平回疆繪像紫光閣道光十  
三年卒諡文毅有奏議辦理番案事詳奏議中與嚴樂園  
書

卷十七 德蔭堂集後序

卷二十三 題鮮于伯機書佛遺教經

卷四十 重修易州安河記

關



卷四十八 予告三品卿銜前太子少保吏部尚書梅庵

鐵公神道碑

英和字樹琴號煦齋晚號齊叟觀保從子禮部尚書德保子  
乾隆五十四年進士改庶吉士散館授編修嘉慶七年以  
戶部左侍郎兼掌院學士入直 南書房道光二年以戶  
部尚書協辦大學士七年降八年謫戍黑龍江十一年釋  
回十六年得刁公岩園居是夏入山題所居曰觀頤山墅  
二十年卒賞三品頂帶有恩福堂筆記年譜制藝詩集卜  
魁集植杖集恩榮疊唱集石氏受姓源流紀略

卷五 卜魁城賦

卷十一 江都焦氏雕菰樓易學序

卷十七 何義門先生小集序 惟清齋全集序

卷二十三 劉文清公詩集跋 書來室額跋尾

卷二十八 開源節流奏

卷四十四 半壁山魁星樓碑詞

卷四十九 侯先生墓誌銘 榮祿大夫太子少保直隸

總督愼餘溫公墓誌銘 贈中憲大夫例晉中議大夫

亮齋朱公墓誌銘 朱母劉太淑人墓誌銘

卷五十三 惲太夫人傳

玉麟字子振一字厚齋號研農國梁孫乾隆乙卯進士改庶

吉士散館授編修嘉慶六年以內閣學士入直 尙書房

道光八年平定回疆以軍機大臣繪像紫光閣九年授伊

犁將軍十三年卒諡文恭入祀賢良祠

卷二十三 澄悅堂詩集後跋

高鶚字蘭墅隸內務府鑲黃旗漢軍乾隆乙卯三甲一名進士高珮乘亭高瑛東岡高芬芸圃均有集

卷二十三 操縵堂詩稿跋

鄂山字潤泉博爾濟吉特氏隸滿洲正藍旗嘉慶丙辰進士累官四川總督刑部尙書卒贈太子太師

卷四十 重修新鄉錢公祠記

成格字果亭伊爾根覺羅氏隸滿洲正黃旗嘉慶丙辰進士官至兵部尙書

卷十三 承德府志序

滿保舒舒覺羅氏世居哈達地方隸正黃旗滿洲

卷四十 命名記

覺羅桂芳字子佩號香東隸滿洲鑲藍旗湖廣總督圖思德

孫湖北糧道恆慶子嘉慶四年進士改庶吉士散館授檢討累官吏部侍郎兼掌院學士入直 尙書房 南書房 軍機大臣十九年遷漕運總督卒贈尙書諡文敏有敬儀堂經進文彙詩彙敬儀堂詩存文敏才筆豐贍又獲主知可以力持文教而竟不永年與文子先生夢麟同殆天限之也韵詩以己亥冬下世年亦僅五十在浙聞耗馳書覓孤索其遺彙云已付王編修廷相庚子王殉所知此本不知尙在人閒否

卷二十四

御製養心殿記恭跋

御製遇變罪己

詔恭跋

御製致變之源說恭跋

御製報天

恩肅吏治修武備諭恭跋

御製行實政論恭跋

御製盡心竭力仰報

天恩諭恭跋

御製原教

恭跋

卷五十五 七觀

文孚字秋潭博爾濟吉特氏隸滿洲鑲黃旗安徽布政使國棟子內閣中書道光十一年以吏部尙書協辦大學士官至文淵閣大學士二十一年卒諡文敬有秋潭相國詩存卷二十四 時齋偶存詩鈔跋

西凌阿字純齋滿洲人嘉慶十年官乍浦副都統十九年去任

卷四十四 乍浦城隍廟碑記

繼昌字蓮龕伊湯安子嘉慶五年舉人十一年由戶部員外郎授侍講十四年授浙江督糧道累官江西布政使道光九年卒著有定軒譚萃

卷十五 抱朴子序

佟景文字質夫號艾生隸漢軍鑲黃旗嘉慶辛酉進士改庶吉士授編修累官廣西按察使

卷五十六 完顏暉太夫人誄

慶格字敬齋

旗人嘉慶十二年由候補京堂授江

蘇按察使遷浙江布政使十七年由喀什噶爾幫辦大臣遷直隸按察使累官江蘇布政使

卷二十四 玉門詩鈔跋

達三字誠齋李氏隸內務府漢軍正白旗官粵海關監督上駟院卿

卷十三 國朝宋學淵源記序

麟慶字伯餘號見亭阿什坦六世孫嘉慶己巳進士由兵部

主事授右中允官至南河總督庫倫辦事大臣著有凝香室集

卷十三 河工器具圖說序

覺羅增齡字松厓隸滿洲正黃旗嘉慶庚午舉人官山東臨清州知州有蠡吟小築文集

卷十 邪慝辨

觀瑞字竹樓觀保從子嘉慶庚午舉人累官江西糧道著有竹樓詩集

卷二十四 挂月山莊詩存跋

榮第字及亭隸滿洲正藍旗嘉慶辛未進士累官贊善

卷十五 續同書序

富呢揚阿字藝林號海帆納音富察氏先世居納音地方隸

滿洲鑲黃旗富明安孫嘉慶十八年舉人官至陝甘總督  
道光二十五年卒趙松雪所書松江寶雲寺碑真蹟在其  
家

卷十七 重刻陳文節公止齋集序

海忠字靖堂滿洲正紅旗人道光六年官承德府知府十年  
擢熱河兵備道輯有承德府志八十六卷

卷四十四 夏公祠碑記

裕謙原名裕泰字魯山博魯特氏

一作博羅忒

先世居察哈爾地

方隸蒙古鑲黃旗定北將軍一等誠勇公班第孫嘉慶二  
十二年進士改庶吉士散館授主事道光六年由禮部員  
外郎授湖北荊州府知府改今名官至兩江總督二十一  
年六月以欽差大臣殉節鎮海諡靖節予世職附祀班第



昭忠祠有遺書忠義而兼文苑者鄂剛烈外和溥淵若慎  
餘堂詩文集富察果烈明瑞北窗吟稿赫舍里忠壯多山  
亦工詩畫

卷十五 勉益齋偶存稿序

卷二十八 陳明殫竭血誠身先作則以盡臣職奏

斌良字備卿又字笠耕號梅舫瓜爾佳氏隸滿洲正紅旗浙  
閩總督玉德子由蔭生歷官刑部侍郎駐藏大臣著有抱  
沖齋詩集弟法良可盦有漚羅盦詩橐

卷十九 小鷗波館詞鈔序

卷四十六 雁足鐙銘

文康字鐵仙勒保孫歷官理藩院員外郎安徽徽州府知府  
駐藏大臣

卷十九 史梅叔詩選序

壁昌字星泉和瑛子由河南陽武縣知縣累擢直隸大名府知府道光八年授葉爾羌辦事大臣官至福州將軍內大臣前後三出峪關一督兩江咸豐四年卒謚勤襄著有兵武聞見錄葉爾羌守城紀要牧令要訣

卷三十 堅壁清野議

鄂恆字松亭伊爾根覺羅氏隸滿洲正黃旗道光丙戌進士改庶吉士散館授編修累官侍講改陝西知府甥錫纘爲輯求是山房遺集頗略味雪齋詩鈔序集外文也嘉道以來滿洲如文榦遠舉舒敏石舫貴慶雲西薩迎阿湘林富斌筠圃世泰心蒔壽昌湘颿蒙古如托渾布愛山漢軍如明華鐵崖銘惠禹民達綸經圃誠意心農陳良玉脈山文

穎魯齋均有集

卷十九 味雪齋詩鈔序

卷四十九 贈太常寺卿瑞端節公墓誌銘

柏蔭原名松蔭鄉試榜名松慶字靜濤巴魯特氏隸蒙古正藍旗道光丙戌進士改庶吉士散館授編修咸豐六年以戶部尙書協辦大學士終文淵閣大學士有薜篴吟館詩存

卷五 避暑山莊賦

宗室毓本更名豫本字茶村號陳芳外史晉昌子道光丙戌進士有選夢樓詩鈔

卷二十四 澄懷園日記跋

樊封字昆吾隸漢軍正白旗廣州駐防生員恩賜副貢著有

論語注商讀孟稽疑樸學山房文集

卷四十 新建粵秀山學海堂題名記

卷四十六 粵秀山新建學海堂銘

寶琳字夢蓮馬佳氏隸滿洲鑲黃旗禮部尙書昇寅子廩生  
恩蔭戶部主事道光二十五年知定州累官保定府知府  
署清河道有知足知不足齋詩草

卷四十 復闕古堂記

倭仁字艮峰烏齊格里氏隸蒙古正紅旗河南駐防道光己  
丑進士改庶吉士散館授編修累官大理寺卿充葉爾羌  
辦事大臣咸豐四年以侍講入直 尙書房旋授盛京侍  
郎同治元年擢工部尙書在 宏德殿授讀尋充掌院學  
士協辦大學士閏八月授文淵閣大學士十年授文華殿

大學士卒謚文端贈太保入祀賢良祠有遺書瓜爾佳文  
忠公文祥奏疏多刻入期不負齋集以代作不錄

卷二十九 敬陳治本奏 陳豫省官民情形奏 請罷

正途入同文館奏 請崇儉以光 聖德奏

瑞常字芝生號西樵石爾德特氏隸蒙古鑲黃旗杭州駐防  
道光壬辰進士改庶吉士散館授編修同治元年以吏部  
尚書協辦大學士官至文華殿大學士十一年卒謚文端  
著有如舟吟館詩鈔

卷十九 國朝正雅集序

銘岳字瘦仙號東屏蘇完瓜爾佳氏隸漢軍正白旗道光乙  
未進士歷官江西東鄉縣知縣南康府同知江蘇記名道  
援浙陣亡予騎都尉世職有妙香館集

卷二十四 讀蘇雲卿傳書後

卷四十一 贛灘記

承齡字子久裕瑚魯氏隸滿洲鑲黃旗道光丙申進士由禮部主事官至貴州按察使同治四年卒著有大小雅堂集

卷四十六 益友箴

卷五十五 演連珠四首

徐榮原名鑑字鐵孫先世監利人家遼東隸漢軍正黃旗駐防廣州道光丙申進士歷官浙江臨安縣知縣玉環廳同知紹興府知府福建汀漳龍道咸豐五年殉難夥縣予世職著有懷古田舍詩鈔

卷十五 梅統自序

盛元字韻琴號愷庭自號鐵花館主人巴魯特氏隸蒙古正

藍旗駐防杭州道光丙申進士歷官江西餘干縣知縣南  
康府知府候補道光緒丁亥卒年六十八著有營防小志  
怡園詩草駐杭人撰述如善泰仲憲草竹軒雜錄強謙毅  
齋易學答問佛龍武純齋瀚海雪山游覽記廷玉澗巖城  
西古蹟考東純謚恭介西甯秉節錄皆資考訂

卷十三 南康府志自序

官文字秀峰王氏遼陽人內務府漢軍正白旗由侍衛累官  
荊州將軍咸豐八年以湖廣總督協辦大學士十一年授  
文淵閣大學士同治元年改文華殿大學士平定粵匪封  
一等果威伯改隸滿洲六年署直隸總督十年卒謚文恭  
有敦教堂詩鈔

卷十三 大清一統輿圖序 平定粵匪紀略序 讀史

兵略序

卷十七 胡文忠公遺集序

寶璽字佩珩一字佩蘅索綽絡氏世居吉林地方隸滿洲正白旗道光戊戌進士由禮部主事陞授侍講同治十三年以吏部尚書協辦大學士官至武英殿大學士官光緒甲申于告辛卯卒諡文靖有詩集

卷五十六 擬祭鄂博文

勝保字克齋馬佳氏隸滿洲鑲白旗道光庚子舉人由順天府教授改左贊善累官兵部侍郎

卷二十九 敬陳時務五事奏

麒慶字寶臣號玉符輝發那拉氏隸滿洲正白旗道光辛丑進士由工部主事陞授右庶子官至熱河都統同治八年



卒諡莊敏有詩一卷詞一卷自留村棟亭外佟儼若昆弟  
那蘭伊麟夢得姚斌桐秋士興廉宜泉及莊敏皆工詞世  
徒以冰蠶繼飲水非通論也秋士還初堂詞鍾義爲之刻  
行惜家幼雲先生歿後詞稿散佚不可見矣

卷十 原誠

卷十五 知古錄序

卷四十一 奉使科爾沁行記 奉使鄂爾多斯行記  
廷桂字芳宇麒慶從弟道光己亥舉人官湖南永州府知府  
有仿玉局黃樓詩集所刊柳集附年譜乾隆甲辰富仁軒  
司藩江右仿宋本重刻韓集五百家注約齋侍郎所刻說  
文解字均稱善本

卷十七 柳文惠公集序

恩隆字星伯號抑菴拜都氏始隸正白旗蒙古雍正二年改隸滿洲夢禪居士孫道光乙巳進士官刑部主事襲輕車都尉

卷五十五 演連珠四首

魁聯字蔭庭李氏內務府正白旗漢軍官至湖南按察使

卷十五 守寶錄自序

瑛榮字蘭坡鄭氏內務府正白旗漢軍官至陝西巡撫

卷十五 壁勒襄公遺書序

豫山字東屏蘇完瓜爾佳氏隸滿洲正黃旗固原提督殉節  
江甯謚壯敏福珠洪阿子官至山西巡撫

卷十五 蔣子瀟遺書序

李雲麟字同安號雨蒼隸漢軍正白旗附生累官副都統銜

布倫託海辦事大臣好游山自五嶽四鎮外以勘界事涉  
歷天山木素爾嶺西金山皆窮探其勝

卷十五 曠游偶筆自序

卷二十九 挽回西北全局奏

英傑字式梁瓜爾佳氏隸滿洲鑲紅旗咸豐乙卯舉人官至  
江蘇揚州府知府

卷二十四 淮揚水利圖說跋

錫纘榜名錫淳字厚安號淶疔博爾濟吉特氏世居兀魯特  
地方隸滿洲正藍旗咸豐丙辰進士同治壬申由戶部郎  
中授江西督糧道乞病罷光緒元年 詔修

穆宗實錄起病提調館事戊寅拜駐藏大臣乞病罷著有退  
復軒詩四卷文二卷隨筆一卷金貞祐銅印題詞一卷感

舊拾遺集一卷弟錫綸子猷亦能詩

卷十 宋太祖顧命論 霍光論

卷十五 王徵士印萃序

卷十七 求是山房遺集序

卷十九 西轡依永集序

卷二十 送劉子迎同年達善之官湖南序

卷二十四 書故靜甯協副將張君遺像後 跋梁聞山

大令臨宋祕閣帖後 書王禹卿贈朱子穎詩卷後

卷三十五 報慕霽園先生甲林書 上楊澹人先生書

與周弢甫騰虎書 與翠巖論文書

卷四十一 盧臺述

卷四十四 甯夏滿城文昌廟碑 故明梁烈女碑

卷四十五

皇上萬壽頌 代

卷四十九 刑科給事中蔣君墓誌銘 太子少保漕運

總督文公墓誌銘

卷五十四 書李孝子 浙江按察使國公家傳

卷五十五 所樂軒解 所樂軒後解

穆緝香阿字向九隸鑲紅旗滿洲同治閒官御史出知山西

蒲州府藏邸報最富自國初以來幾備與鄂佗筠圖中丞

鄂順安收藏歷科闡墨埒

卷二十九 請慎擇宦寺奏

邊寶泉字潤民隸正紅旗漢軍同治癸亥進士改庶吉士散

館授編修補御史官至浙閩總督光緒二十四年卒

卷二十九 禁言祥瑞奏

宗室寶廷字竹坡鄭獻親王裔同治戊辰進士改庶吉士散館授編修光緒八年以禮部右侍郎主福建試歸途自劾罷十七年卒有偶齋詩草內集八卷外集八卷內次集十卷外次集十卷尙書持平若干卷子壽富庚子七月殉節京師其族叔恩華兩晉南北朝朔閏表已成書在鐵齡家

卷二十四 自題九九集

卷二十九 遵 旨妥議奏

宗山字獻梧魯氏鐵嶺人隸內務府鑲黃旗漢軍官浙江候補同知權乍浦理事同知丙戌卒有窺生鐵齋詩存一卷詞一卷希晦堂遺文一卷雜著一卷留意北方文獻嘗覆刻瓶水齋集

卷五十六 祭錢子奇文

鄂禮字立庭那彥成曾孫襲三等子由工部主事官至內閣侍讀學士駐藏大臣其世父慶霖松閱閣詩安邛王篆友最稱之重刻時鍾義爲校字屬補入代州馮述仲序及哀辭而立庭卒篆友又最稱多隆阿禮堂毛詩多識其殘稿在伯熙所屬思南程械林寫定伯熙旋卒未及刻

卷十九 松閱閣詩鈔序

鐵齡字希棣號鐵菴豫山子同治癸酉舉人官戶部員外郎

卷四十一 許氏山莊記

治麟字舜臣顏札氏隸正黃旗滿洲光緒丁丑進士改庶吉士散館授編修官至國子監司業入 國史孝友傳

卷五十四 先考秋坪府君行狀

右作者六十五家文二百十二首

右錄文一百九十七家六百五十首



八旗文經卷第五十九終

八旗文經卷第六十

敘錄

敘曰取大石興安以南庫葉島以西松花江嫩江合流處以東六甸以北之人百分之一曰滿洲旗取黃河以東瀚海以南嫩江東岸以西長城以北之人千分之一曰蒙古旗取故明遼東都司以及十三布政使司之人萬分之一曰烏珍超哈旗今名漢軍喀爾喀準噶爾回部番子亦時編入以黃白紅藍鑲正別之宗室覺羅各隨其所食采地之戶亦繫旗是曰八旗凡不入旗之滿洲蒙古曰丁漢人曰民番回仍其稱其取而編爲旗人者聚之於京師陪都留之於故地散之於畿輔遷之於邊城駐之於各行省開國之初綜滿洲蒙古漢軍皆通國語國語有經史性理凡人能言者卽識字能識字

者卽通經上自王公下迄執殳之士不待箋疏皆能通經史大義故康熙朝諸大臣類能以經術飾吏治佐

聖祖仁皇帝致太平其未及進用者復能誦習正文參證講義旁通乎百家之言重譯乎數萬里而外遠究乎數千百年以上三光五岳之氣聚於

聖人近聖人之居者得其氣爲獨厚非完顏地褊卻特祚短所能比方萬一惜無人掇香其文論而錄之是以俱泯沒也百年以後已不能人人盡通國語於是乎不能人人盡通經義而當官莅事讀書爲文之途稍稍分焉乾隆中始設繙譯科目以維繫之然習其業者固不能盡通國語之輩也揣侷俚語氣如儷字句大義微言益有不暇講者而方聞綴學之名始專屬之攻舉業之人要其時文章固極盛也乃以張鄂之

黨相攻之故巡撫鄂昌以文侍郎世臣以詩先後獲罪黃文  
襄之子孫又以刻奏議干議凡諸著作率皆藏家無出而問  
世者迨其後和珅擅政凡其識拔旗人以巧趨避爲德以工  
鑽刺爲才以善進退周旋俯仰爲知禮而風氣變營第宅美  
衣服飾廚傳蓄姬侍寵奴僕酒肉棄於衢綺羅照於市樓臺  
相接鐘鼓相聞恣睢跳踉於輦轂之下見漢人蒙古人則鄙  
夷之見十七營之人亦鄙夷之見駐防之人亦鄙夷之見畿  
輔屯居之人亦鄙夷之甚則見陪京之人曰彼忒蘇也見黑  
龍江吉林不曰彼伊徹卽曰彼烏拉齊也其故家遺俗蓄道  
德能文章不盡變於和珅者蓋亦僅矣而華門圭竇研泳經  
傳老死不悔者或亦時有而人亦與文遂分而不可復合

仁宗睿皇帝親大政誅和珅士氣大振遷滿洲於舊疆開宗

室之科舉雖其經術不能遽如康熙朝蓋亦彬彬稱盛焉於  
時棟鄂治亭先生伍堯梧門先生遂因以選集八旗古近體  
詩

仁宗睿皇帝錫之嘉名旗人文集始乃出而佚者多矣自時  
厥後士非科舉不能得顯秩制舉之業益精道光朝納蘭恭  
勤公那清安復有梓里文存之選其子文恪公全慶續成之  
皆制藝也他文未遑及咸豐同治閒吾師烏齊格里文端公  
昌明理學天下翕然從風遂以弼成中興之治八旗士習人  
心將復康熙之舊矣盛昱以同治庚午科順天鄉試出公門  
公謂之曰觀子之文非所謂時下文者八旗人爲古文詞者  
未有撰集之本子蓋於舉業之暇爲之因爲述八旗文運盛  
衰之故盛昱不敢當亦不敢忘退而瀏覽篇章搜求散佚二

十以後溺於帖括三十以後浮沈仕宦未四十遂以病廢比  
年病或少閒輒理而董之自念學殖荒落不能崇舊德而張  
正學無以副吾師之期許併此區區而不克就則負吾師益  
甚表弟楊子鍾義好學人也欣然相助爲理戊戌之冬殺青  
斯竟凡得賦五卷論五卷序十卷題跋四卷奏議六卷表一  
卷書四卷記六卷碑三卷頌贊一卷箴銘一卷墓碑二卷墓  
誌一卷傳狀五卷七連珠設辭一卷哀祭一卷爲文六百五  
十首作者一百九十七人八旗之文不止於是也其初也本  
功德以立言以無所藉而不克見其繼也因文以見道又以  
有所避而不克見然今日者旣不能人人通經則執筆爲文  
而名爲士者其出一詞立一說皆旗人之所模範則八旗之  
士至今而文教爲尤急文教之所及則親上外長之心生勿

汨時趨勿惑異說勿以畛域自封勿以驕貴而不學敬體

列祖

列宗開國之心凡未入旗之滿洲蒙古漢人皆吾一體恂恂  
焉兢兢焉日從事於學問之中而以文爲表見之資凡利祿  
紛華靡麗之習不以萌於心而奪其志則於吾師所以編輯  
斯文之旨其庶幾矣斯書所錄文或無當於用人亦或不克  
有終而要非不學之人所可議彼夫豐沛故人五陵子弟夷  
爲卓隸蕩爲蟲沙皆由風移俗易而無學以持之也典論論  
文曰文章經國之大業詎虛語哉名曰八旗文經凡五十  
六卷合作者考三卷敘錄一卷都爲六十卷鑲白旗弟三族  
宗室盛昱謹敘

辭賦肇興譬物連類錯綜古今控引天地旨咳六義事出沈

思蘇王歧軌姬漢誰師 帝清闡耀盛爲文章家擅左郭人  
抗班揚詒晉天人褒然稱首望則閒平才則八斗納蘭競爽  
驂靳詞場拳石突兀仙掌高張卓爾睫巢總持羣雅經術匡  
劉文章賈馬威弧絕塞獵碣成均窮文極貌近古無倫七子  
同徵華篇麗矚存者什一大宗所錄秦菴西藏喬叟卜魁匪  
唯賦手實根史材明遠舞鶴蘭成小園梅翁闕覽闢其籬樊  
軒名蘿月館拓薜絲河東甘泉今邁嗣音感物造耑材知深  
美用冠茲編光我桑梓錄賦第一弟二弟三弟四弟五  
論辨之作原本諸子學有是非辭皆奧美退之苟孟明允蘇  
張柳州韓非和仲蒙莊洛闔得之以達聖元陋儒不文學則  
滯偏中丞傑出孺嚙羣史大河西來浩浩千里張鄂相攻于  
和已兆著論託諷不以辰告詞鋒剡剡其及也宜遺文具在



屈賈之悲梅塢松堂與爲波瀾哀采眾製咸可覽觀錄論辨  
弟六弟七弟八弟九弟十

宣聖繫易百家之祖西河序詩傳異韓魯漆園自序爲天下  
篇都水渠祿提要鈞元左賦三都皇甫論定張許睢陽得韓  
益信廬陵史序上法龍門南豐校讐於道彌尊我本七略分  
別部居間塾誦習庶資問途淵路贈處猶存古道壽言不廢  
師彼惜抱錄序第十一弟十二弟十三弟十四弟十五弟十  
六弟十七弟十八弟十九弟二十

古無題跋緣起款識廳流所扇金石文字施之豪素盛于唐  
賢韓讀儀禮柳辨鶻冠六一集古蘇黃繼作文小思閑義豐  
詞約歷載三百茲體尤工近寶遺翰遠溯宗風哀然巨帙  
其精英零縑賸楮重佚其名文敏筆諫古誼忠肝公孫曲學

遇彼狂瀾錄題跋第二十一弟二十二弟二十三弟二十四  
臣工敷奏上稟宸斷百度貞明備哉粲爛敢持別裁以著  
其概汲直蕭規本之忠愛文毅首出批鱗帷幄開國宏篇邵  
陽關錄漢罷珠崖唐捐維州航航靖海力折眾流極熾而豐  
裕陵之季文成謀國心憂其繼文端諤諤事我

文宗晚相

毅皇蕩攘羣凶文軌大同異說方起誅意慎微瞻言百里惟  
百有位陳善格非義苟有激勿恇于威集議之文同源異體  
指事類情誼忠辭美錄奏議弟二十五弟二十六弟二十七  
弟二十八弟二十九弟三十

仁皇御寓早建青宮容若宿衛躬遇盛隆王國多才羽林錄  
舊八部英靈百年忠厚官書奏進主名疇居開國堂堂舉似

其餘治亭遇

主集被嘉名我抱遺璞長懷昇平錄表弟三十一

維初在昔朱曜方升涉關陵郊移書廣陵

文皇之弟

高皇之子辭嚴義正功在青史文肅造邗風高元輔啟事流  
傳彌珍片羽儼若忠告貴陽芳烈受宜吏榦存素史牒文定  
文敏商榷鬢疏豹起倪白孰爲賢瘡侍中英絕文囿縱橫淥  
缸晚出談藝尤精我儀文端坳之條教鬯我 皇風西南之  
徵錄書弟三十二弟三十三弟三十四弟三十五

西嶽漢廟戾陵晉過雜記之文分源銘刻昌黎畫記格力先  
秦歐蘇異辭孰爲知言永柳紀游曾王論學境闢蠻荒緒承  
先覺抗懷先正鉅製零章東巡紀盛施之廟堂習之南來放

翁入蜀莊敏行紀綬我藩服錄記弟三十六弟三十七弟三十八弟三十九弟四十弟四十一

鎮海開府溫都撫苗昭我 聖武雅聲遠姚橋通盤江河醜  
惠濟稚紀石門中郎樊惠秦伯至德英衛精靈百世必祀薦  
此芳馨條徐蕭索成周遺制乍浦甯夏祠廟並誌蔚文爲政  
去思來舞科目陽城循聲卓魯淒涼對簿道躋歸魂遺文湖  
海寶之斤斤錄碑弟四十二弟四十三弟四十四

明遠采壯簡文思清淵雲而後雍雍頌聲道州矜誇老子文  
學少室筆叢譏彈犖犖我 朝文治外薄無垠歌虞頌魯稽  
首揚棊德邁三古詞高六代事極揄揚義兼箴誨十臣述贊  
上下千年李贊孝義製仿嶧山錄頌贊弟四十五

翼翼忠王實佐中興翊躬如畏左右箴銘納蘭畏言詞不斂

鏗鏡明水止良金終鑠辛浦俊逸欬唾珠璣早交薌嬰晚友  
鮪埼宦蹟蒼雪家山涿鹿詩儼韓蘇文宗皮陸庚戌題橋西  
林名渡侑饗大烝銘功鐵柱文襄戡定蕞爾南籠屹然雙表  
記者臞翁文達勸學運際休明海濱鄒魯莘莘羊城誰與銘  
者昆吾樊子勿惑他塗克趾前美錄箴銘弟四十六

衍石徵獻湘陰繼作鬱華訪碑欲補其略生民之初顛頡無  
紀功在旂常德在孫子龍章牲帛石墨鐫華詞臣視草不廁  
私家蓄德能文以光泉壤事繫邦作非吾黨專集不出別  
本誰傳貞珉雖壽秋草同湮風裳雪屐表異搜奇寄齋高寄  
獨出冠時或揭桓表或闕幽宮語涉彼教列之增庸錄墓碑  
弟四十七弟四十八墓誌弟四十九

四庫著錄首推忠貞昔閔鬼火今昭日星太傅有子

君王有臣不从而外孰與公身北阡屬籍大鉢清才湛冥朝  
列荒隱蒿萊大筆淋漓幽光表襮我惜焦明不登著作世族  
嬋媯重圭彙組桂竇桐韓差肩踵武象岡下吏桑陰畫師勿  
謂齊人管晏徒知在昔廬陵表阡瀧岡畫荻之訓志之不忘  
今也梧門雪窗課讀狀此母儀彤管誰續烏蒙二傳逸事堪  
徵嘉興史筆秦阮所稱賈女之烈李子之孝文藝抑未歸根  
名教錄傳狀弟五十弟五十一弟五十二弟五十三弟五十  
四

四明文獻闡自深甯敷陳七觀根極六經美矣周原香東有  
作庶幾九能山川能說連珠發藻修家子雲後惟開府前有  
平原瀋水餘閒簞今揚古愧彼承明但習科舉客譔賓戲騷  
賦之遺古文旣盛辭學中衰退復將家鴻文拔俗標題何昉

辨志之塾錄七連珠設辭弟五十五

衡歌二子秦哀三良賈弔湘纍亦以自傷安仁汧督子山思  
舊言哀入痛千載無右淵明敬遠昌黎田橫或軫往略或念  
同生誰當韓豪半山一老師雄急難潁州直道前修有作斷  
手於斯卞文別體過而存之錄哀祭弟五十六

聖清受命基化于東姬美邠釐虔稱諸馮宣勞肇域念此羣  
策編之尺籍授之田宅以養以教以奠九垓文揆武驥陰攝  
陽開忠孝之生世世多有王教甄陶豈曰天授絲罔元黃水  
岡方圓匪古奚學匪文奚宣繫古人文與世衰盛 文思晏  
晏廣被無竟名臣碩彥志士通儒清風盛藻暝寫晨書措拾  
叢殘以究終始軼漢超唐宗蕭師李豈無台輔忽焉式微有  
文經世高燄霆飛物論何常毀鐘鳴瓦彪炳孔鸞升沈塞馬

斯文之興孰究孰承舊德姓氏來者其徵坳作者考弟五十  
七弟五十八弟五十九

懿矣我祖遘左耕桑釋褐天聰雲起龍驤君子之澤實維啟  
之侍郎五傳承而履之滿洲通譜倬彼我系入貳秋官漢軍  
改隸來室誓墓歸自平津對牀風雨翰札紛綸再世外吏悠  
悠我里松菊都荒遺文盡矣我來詞館請益王孫謂吾可與  
釐析羣言後先祭酒神柅其馳意園緝文梧門削詩略穢集  
英義在嚴謹往復揚摧有辨無隱觥觥一序悲咤涕洟彙聚  
流別命我綴辭文慙夫人我之自出李絳論事私意甄錄中  
州坳見曷例遺山君意不然敬待後賢後賢可待文獻不足  
京城表裏兩人躑躅坳敘錄弟六十正黃旗頭班管領漢軍

楊鍾義述



八旗文經卷第六十終